

**DE PARADISO
REGNIQUE
CAELESTIS GLORIA
NON EXSPECTATA
CORPORUM...**

Lodovico Antonio Muratori, Dionigi
Valesi



15. 1. 236

REV

17

D E
P A R A D I S O
CONTRA BURNETUM

REGNIQUE CAELESTIS GLORIA

Non expectata Corporum Resurrectione
Iustis a Deo conlata

A D V E R S U S

THOMAE BURNETI BRITANNI
LIBRUM

D E

STATU MORTUORUM

A U C T O R E

LUDOVICO ANTONIO MURATORIO

SERENISS. DUCIS MUTINAE BIBLIOTHECAE PRAEFECTO.



VERONAE. MDCCXXXVIII.

Typis Seminarii

Apud JACOBUM VALLARIUM

SUPERIORUM PERMISSU, AC PRIVILEGIO SENATUS VEN.

EMINENTISSIMO ET CELSISSIMO PRINCIPI
JOSEPHO DOMINICO
S. R. E. CARDINALI AMPLISSIMO
EXEMPTAE ECCLESIAE
PATAVIENSIS EPISCOPO, ET S. R. I. PRINCIPI,
COMITI DE LAMBERG &c.

Domino Domino Colendissimo.



UAM vivida Ingenia pariat ac nu-
triat magna Britannia, a quibus Sci-
entiae & Eruditio constanti aemu-
latione felicique successu excoluntur, satis novimus, &
ego quidem, EMINENTISSIME ANTISTES, lubens agno-
sco. Sed quod saepe dolui, & dolere vel inter ipsos Britan-
nos probus quisque consuevit, erumpere illic identidem vi-
demus,

demus, qui novas de Religione Opiniones procudunt, aut vetera Dogmata explodunt. Haec mihi omnium gravissima felicitum illorum Ingeniorum infelicitas videtur; nullum enim deterius malum puto, quam Religioni Sanctissimae Christi dare nomen, eidemque postea bellum indicere. Illam autem oppugnat, & pro viribus prodit, quicumque novitatem Dogmatum in eam inducit, aut quae universa Christianorum Respublica olim damnavit, nunc impialibidine exsuscitat, atque tuetur. Non id sane mirum. Nam postquam Britannica gens funestissimo Schismate a Matre illa secessit, in cujus sinu nos securi conquiescimus, quo jure salutare frenum, quod ipsa prior excussit, a filiis exigat suis? Id mirum potius, non omnia apud eos ruere in pejus. Inter illos vero, qui postremis hisce temporibus in perniciem Religionis Ingenii sui libertate abusi sunt, omnium maxime nosti, famam nominis sibi conquississe Thomam Burnetum, virum alioquin in re literaria visionibus adfuetum, & qui non se Religioni, sed sibi Religionem subiectam ad finem usque vitae voluit. Prodiit ejus Liber de Statu Mortuorum; neque intra fines unius Magnae Britanniae se continuit pestifera merces, sed in Galliam quoque, Germaniam, ipsamque Italiam penetravit. Nemo tamen hactenus, quod sciam, praesenti veneno remedium quaesivit, sive quod nostri sibi inde nihil timeant, sive quod apud Britannos idem perinde sit, bonis in Religione Libris, ac pessimis Populum erudiri. Interea quamquam persuasum & ego habeam, doctos splendidissimi illius Regni viros non tantum abhor-

rere

rere a Burneti Opinionibus , sed & earum vanitatem probe sentire , floccique facere : si vera tamen sunt , quae feruntur , non paucos ex Populo , & semidoctis , novitas illius doctrinae invasit , & nemine contra hiscente fieri potest , ut latius in dies serpat ejusmodi virus . Itaque statutum est mihi in arenam prodire , manusque conferre cum Scriptore , quem mors quidem pugnae subtraxit , sed adversus nos in Libro suo pugnantem adhuc habemus . Quibus ille potuit modis atque rationibus Dogma hac dere Catholicae Ecclesiae , simulque ejus Decreta impetivit , quasi haec una , & non Britanni etiam , Caelestem Paradisi gloriam immerito Justis aperiat ante postremum Orbis universi Judicium . At quantum ille a veritate aberravit , & contra quam solidis atque inconcussis fundamentis in hoc etiam argumento nitatur Catholicorum sententia , si quae congeffi in hoc meum Opusculum , Britanni legent , brevi , ut spero , intelligent .

Illud autem ad te missum , tibi que dicatum volui , CELSISSIME PRINCEPS . Nam ex quo accepi per literas cujusdam mihi amicitia conjunctissimi , Te aliquam de me bonam opinionem induisse in sermone , quem habuisti cum eruditissimo & nobilissimo Abbate ex Comitibus de Trautson , continuo me quoque cupiditas incessit prodendi , quanta mihi jamdudum infederit de virtutibus dotibusque animi tui sublimis existimatio , & quantum egomet obsequio erga te nemini concedam . Equidem Ecclesiam , cui praeas , felicissimam semper reputavi , tum ex antiquitate originis inter Germanicas , atque ex amplitu-

plitudine Dioecesis ; quae in Bavariam late protenditur , atque ad fines usque Moraviae , Bohemiae , atque Hungariae pertingit ; tum etiam ex connexo jure Principatus , qui illustrem Civitatem , compluresque etiam Dynastias complectitur , in Bavaria , atque Austria Superiore , & inferiore sitas . Felicior tamen Ecclesia ista evasit , ex quo eandem regendam suscepit Eminentissimus Patruus tuus JOHANNES PHILIPPUS Cardinalis de Lamberg , universae olim Germaniae decus , ex tot legationibus celebris , atque ex tot beneficiis in eandem Ecclesiam conlatis summe spectandus . Liceat tamen dicere : ad apicem felicitatis erecta est Patavien-
sis Ecclesia , ex quo te Pastorem , EMINENTISSIME AN-
TISTES , accepit . Nunc honore cum ceteris majoribus cer-
tat , postquam cura tua denique factum est , ut restaura-
tis antiquis juribus Laureacensis Archiepiscopatus , nunc
ab uno Pontifice Maximo pendeat ; ejusque Episcopus
Metropolitici etiam decoris insignibus , Palio videlicet
utatur .

Sed quod potissimum Ecclesiae tuae , Tibique simul
gratulandum est , tu eximios illos Episcopos , quos Sae-
culo praesertim Decimo atque Undecimo Germania pe-
perit , ante oculos perpetuo habens , ad eorum aemula-
tionem mores tuos , animumque jamdiu composuisti . Cer-
te Tibi summopere cordi est , ut sub te Principe Justi-
tia , & quies , atque felicitas Populis tuis , quantum
fieri possit , procuretur . Verum praecipua studia , dicam
etiam deliciae tuae , sitae sunt in rite implendo Pasto-
rali munere , in Vinca Dei excolenda , in Pietatis , &
Carita-

*Caritatis operibus singulari constantia exercendis . Bone Deus ! quanta sollicitudo tua in sacrorum Ordinum collatione , in signandis Chrismate populis , in amplissima Dioecesi toties lustranda , ne in aliquo e sacris Templis Tibi subjectis desideretur decor , & Ministrorum sollertia atque integritas ! Tu reliquo gregi exemplum , quod tute praestare potes in sacris divinoque cultu , nulli parcens labori , magnaue pariter alacritate suscipis . Illud vero prae ceteris mirandum , quia nostris temporibus perquam rarum , non aliena voce , sed tua , non aliquoties , sed centies & millies Populum tuum Fidei doctrina imbuisi , atque ad prava fugienda , ad virtutes amplectendas , per familiares in Templo expositiones , orationes , & sermones , jam es hortatus , atque hortari indefesso ardore non desinis . Si dicam , Te per hoc in primis ad Apostolicorum virorum normam accedere , consentientem certe mihi quemlibet probum polliceor . Quam in rem affluentem Tibi vel juvenis doctrinam parasti , atque in dies parare pergis . Numquam enim otiosus , quod temporis superest , dicatum vis lectioni Sanctorum Patrum , ut in promptu habeas quidquid ad boni Principis , & perfecti Episcopi munus pertinet , quo Te populosque Tibi a Deo commendatos , in sanctitate & justitia regere ac erudire possis . Neque Tibi uni in sacra Eruditione versari , atque oblectari satis est : ad ejusdem quoque studii amorem Clerum tuum excitas , & progredi in eo sapientibus non unum offers commodum & adminiculum , aperta nempe unicuique insigni Bibliotheca , quam in Episcopali Palatio Eminentissimus Patruus tuus
b
instru-*

instruxit, tu vero tot millibus exquisitis Libris additis perfecisti.

Quid ergo mirum, si digniorum personarum iudicissimus aestimator & amator Augustissimus CAROLUS VI. Te prae ceteris elegit, in quem suae beneficia Clementiae effunderet, & cui summum in Ecclesia procuraret honorem? Quid etiam mirum, si tam lubenti animo Te nuper in Purpuratorum Patrum Collegium adscivit Sanctissimus Pontifex CLEMENS XII. quando tibi ad amplissimum hunc gradum tuae ipsae Virtutes, ac merita ubique nota, patentem jamdiu straverant viam? Haec autem commemorata heic volui, EMINENTISSIME ANTISTES, non ut ingratum Modestiae tuae poculum exhibeam, sed ut Te ad majora, si fieri potest, excitem, Deumque Optimum Maximum glorificem, quod dona sua tam liberaliter in Te effuderit, Tuque talenta Tibi credita tanto cum fœnore in illius gloriam multiplicaveris. Perge, perge: hac itur, & grandi quidem volatu, in sublimem illam, beatamque Patriam, quae Libro huic argumentum praebeuit. Ibi Te manet laborum tuorum ineffabile praemium; ibi bravium; ibi quies, ad quam adipiscendam nulla Tibi nunc quies est. Atque utinam & ego, quando Te nunc coram alloqui & intueri non licet, ibi aliquando Te Beatitudine & honore cumulatam suspicere queam. Inter ea dum in hoc exsilio versamur, expectantes beatam spem, & adventum gloriae magni Dei & Salvatoris nostri Jesu Christi, Librum hunc illustri Nomine tuo signatum, ut pote qui de Paradiso loquitur, & causam Sanctif-

Sanctissimae Ecclesiae Catholicae agit, fidenter ad Te mitto. Tuae sit eximiae humanitatis, ejus quoque Auctorem benigne complecti, hominem nempe Tui admiratorem jam factum, & nullam deinceps praetermissurum rationem, qua Tibi luculentius etiam, si vires adsint, singulare suum erga Te obsequium probet.

Eminentissime, & Cellissime Princeps:

Dabam Mutinae Kalendis
Februarii MDCCXXXVIII.

Humillimus addictiss. & obsequentiss. famulus tuus
LUDOVICUS ANTONIUS MURATORIUS.

INDEX CAPITUM

QUAE IN HOC LIBRO CONTINENTUR

CAPUT PRIMUM.

Proponitur Burneti sententia de retardata Iustorum Beatitude usque ad postremi Iudicii diem. Loca Scripturarum & Patrum pro sua opinione ab eo laudata. Pessima conclusaria inde emergentia. Dolo malo hic ab eo actum. pag. 1

C A P. II.
Ecclesiae Catholicae de huiusmodi quaestione Decreta. Quibus divinatorum Librorum documentis innixa. Sancti Methodius, Thomas Aquinas, & Chrysostomus eidem adspiciuntur. p. 8

C A P. III.
Aliis Scripturae locis confirmata Catholicae Ecclesiae sententia. Non postremum tantummodo Iudicium agnoscendum, sed & alia occulta. Aliosque Christi Adventus admittere necesse est, tum in singulorum Fidelium morte, tum ad Hierosolymae excidium. Resurrectionis Dogma nihil pugnat contra inchoatam Animarum Beatitatem in Regno Caelorum. p. 16

C A P. IV.
Apocalypses loca quaedam non Burneti somnii, sed Catholicorum sententiae omnino faventia. Quid Altare, quid Thronus Dei ibi. Remuneratio Sanctis a Deo promissa, brevi complenda. Requies & Requiescere in Sacris Literis, & apud Patres, Felicitatem summam in Caelis jam constatam Iustis significat. Non una Resurrectio in divinis Libris. p. 32

C A P. V.
Millenariorum error a quibus prodierit, quosque sectatores habuerit. A Sanctis Patribus confutatus, & jamdiu explosus. Adversus illum perspicua Apocalypses loca. p. 43

C A P. VI.
Improbi statim post Mortem in Inferorum poenas conjeti. Martyrum Animae Corpore solutae, communi Ecclesiae calculo, confestim Beatitude Caelesti donatae. Non unus Dies Domini; non unus Adventus. Neque tantum Martyres, sed & ceteri Iusti, non expectato Corpore, Caelorum Regnum ingressi. p. 49

C A P. VII.
Sancti Clemens I. Papa, Ignatius Antiochenus Episcopus, Polycarpus Episcopus

*piscopus Smyrnenfis, Ecclesia itidem Smyrnenfis testes minime pro
crasmatas Beatitudinis Sanctorum.* p. 54

C A P. VIII.

*Iustinus Martyr Chiliaſtarum errori addiſtus, cum Burneto tamen mini-
me concors. Quae de praesenti controverſia ſenſerit Auſtor Quaestio-
num ad Oribodoxos.* p. 61

C A P. IX.

*Sanctus Irenaeus Martyr & Episcopus Millenarii ſomnii Patronus. Eo-
dem errore infeſtus Tertullianus. Uterque tamen Catholicae ſenten-
tiae ſuam vim ineſſe ſatetur. Quae Origenis, Viſtorini Martyris, &
Laſtantii Firmiani hac de re opinio fuerit.* p. 68

C A P. X.

*Acta veterum ſincera Animas Martyrum conſeſſim ad Caelorum Regnum
ferri teſtantur. Clemens Alexandrinus, Dionyſus Episcopus Alexandri-
nus, & Cyprianus Carthaginienſis Episcopus, non ſolum Martyribus,
ſed & ceteris Sanctis patere Caelum poſt mortem teſtantur. Pro Mar-
tyribus Eucharistica, non Propitiatoria commemoratio in ſacris. Alia Mar-
tyrum Acta eidem veritati ſuffragium praebent.* p. 78

C A P. XI.

*Methodii, Eusebii Caesariensis, Ecclesiarum Viennensis & Lugdunensis,
Conſtantini Magni, Alexandri & Athanaſii Praeſulum Alexandrino-
rum, aliorumque teſtimonia pro Beatitate Sanctorum. Hilarii Picta-
viensis Episcopi propoſita hac de re ſententia.* p. 91

C A P. XII.

*Varis nominibus ab antiquis deſignatus Beatitudinis Locus. Hiſce uſus
Paulinus Episcopus Nolanus. Sinus Abrahae ad eundem Locum indi-
candum adhibitus. Liturgiae Jacobo & Marco tributae, vetuſtiſſima
quoque Romana, idem conſrmant. Sancto Hilario Sinus Abrahae Re-
gnum Caelorum ſignificat. Requies & Requieſcere eodem ſenſu ab
ipſo uſurpata. Alia Hilarii verba in examen adducta, & ad Catho-
licum Dogma ſtabiliendum opportuna.* p. 101

C A P. XIII.

*Perperam pro ſua opinione laudatus a Burneto Sanctus Ambroſius. Varia
illius loca expenſa. Pſeudo-Eſdrae Libris ille uſus. Perſpicue ab eo
conſrmata Sanctorum Beatitas.* p. 117

C A P. XIV.

*Paradiſi vox quid apud veteres ſignificarit. Communiore Patrum ſententia
Beatorum Regnum in Caelis deſignat. Sancto Ambroſio idem viſum fuit.
Varia, eaque diſerta illius teſtimonia pro Felici Juſtorum ſorte in Re-
gno Dei.* p. 127

Joban-

C A P. XV.

Jobanni Chrysostomo tributum durum quoddam assertum, atque illud ad trutinam revocatum. Apostoli locus in Prima ad Corinthios explicatus. Chrysostomus cum Ecclesia Catholica concors. Requiris apud illum nihil aliud nisi Caelstis Beatitudo. Quibus calumniis eum sibi aduersantem Burnetus exceperit. p. 138

C A P. XVI.

Sinus Abrahae Chrysostomo idem cum Regno Caelorum. Ejusdem varia, perspicuaque loca, quibus Beata in Caelis vita non Martyribus tantum, sed & ceteris Justis jam conlata firmatur. p. 153

C A P. XVII.

Frustra Sancti Augustini auctoritatem ad suae opinionis patrocinium Burnetus contorquet. Dissolutae objectiones ex ipso petita. Compluribus ejus locis Romanae Ecclesiae doctrina de Beatitudine Sanctorum solidata atque illustrata. p. 164

C A P. XVIII.

Neque Gelasius Cyzicenus, neque Theodoretus Catholico Dogmati aduersantur, immo adspulantur. Quid sit Consummatio, & Consummari in sacris Literis, quum de Animabus separatis a Corpore agitur. Explosum fragmentum Graeci Scriptoris, quem Cajum, aut Hippolytum nonnulli suspicantur. Andreae, & Arcibae Caesariensis Episcoporum, atque Occumenii sententia a Catholica minime discors. Theophylactus cum ipsa plane concors. Quid senserit Euthymius Zigabenus. Graeculi quidam, & Armenii a majorum dogmate declinantes. p. 182

C A P. XIX.

Bernardi Claraevallensis peculiaris opinio de Beatitudine Sanctorum. A qua tamen is recessit. Catholicae sententiae luculentus & ipse adfertor plurimis in locis. p. 198

C A P. XX.

Praesentem Justorum Beatitatem in Caelis agnoscunt Sancti Basilus Magnus, Gregorius Nyssenus, Ephraem Syrus, & Gregorius Nazianzenus. Quid huic Sinus Abrahae fuerit. p. 205

C A P. XXI.

Theodorus Abbas, Didymus Alexandrinus, Gaudentius Episcopus Brixianus, Cyrillus Hierosolymitanus, Prudentius Hispanus, Amphiloebius Iconiensis, Epiphanius Constantiensis, Damasus Romanus Pontifex, & Hegesippus (cujus aetatis exploratur) Caelorum Regnum Justis corporeo carcere solutis conlatum testantur. p. 215

Hiero-

C A P. XXII.

Hieronymus Stridonienſis, Theophilus Alexandrinus, Paulinus Nolanus, Antonius Conſtantiienſis, Proſper Aquitanus, Leo I. Romanus Pontifex, Honoratus Maſſilienſis, Maximus Taurinenſis, Petrus Cbryſologus, Iſidorus Peluſiota, Syncius Ptolemaidis Epiſcopus, Arnobius Junior, Gennadius Maſſilienſis minime dilatam cenſent ſummam Felicitatem Sanctorum in Caelis. Quid ſignificet eſſe cum Domino apud Apoſtolum. p. 224

C A P. XXIII.

Burneti ridendae exclamationes adverſus Florentinum Concilium. Fulgentius Ruſpenſis Epiſcopus, Primaſius Adrumetinus, Gregorius Magnus Summus Pontifex, Ildeſonſus, & Julianus Archiepiſcopi Toletani, Beda Anglus, Aldbelmus itidem Anglus, Alcuinus pariter Anglus, Synodus Francofordienſis, Florus Magiſter, Paſchaſius Radbertus, Petrus Lombardus, Thomas Aquinas, aliiſque Sententiam Romanae Eccleſiae de Beatitudine Sanctorum tuentur. Ab eadem primo alienus Johannes XXII. Papa, tum ipſam confirmat. p. 236

C A P. XXIV.

Poſt Photianum Schiſma Graeculi quidam, inter quos Moſes Bar-Cepha ineptus Scriptor, de Sanctorum Beatitudine parum ſcite opinati. Concordes in ejuſmodi quaefitione cum Eccleſia Romana Dionyſius vulgo appellatus Areopagita, Michael Syncellus, Auſtor Vitae Sanctae Syncreticae, Euſtratus Diaconus C Politanus, Leontius Cyprinus Epiſcopus, Daniel Monachus Raiſbu, Andreas Cretenſis, Stephanus Monachus Laurenſis, Concilium II. Generale Nicaenum, Theodorus Studita, Naucratiuſ, Philo Carpathiuſ, Nicetas Papblago, & alii Graecis. p. 249

C A P. XXV.

Etiā poſt Schiſma Photianum plerique nobiles Graecae Eccleſiae Scriptores cum Romana Eccleſia in aſſerenda Beatitudine Sanctorum concordēs. Quid de hac re ſcripſerint Joſeph Hymnographus, Simeon Metaphraſtes, Michael Pſellus, Nilus Monachus, Conſtantine Acropolita, Nicephorus Gregoras, Nicolaus Cabaslas, Manuel Palaeologus. Menaea Graecorum idem teſtata. Quam inſipienter Marcus Eppheſiuſ, & pauci alii Graeculi, dum Concilium Florentinum haberetur, in hoc argumento adverſati Romanae Eccleſiae; ſed compreſſi a Gregorio Protoſynacello, Georgio Scholario, ſive Gennadio, atque ab aliis Graecis vel poſt ipſum Concilium. p. 262

C A P. XXVI.

Quam neceſſarium, quam utile ad Chriſtianorum ſpem conſoven- dam, quamque Dei bonitati conſonum Dogma de Beatitudine Sanctorum. Contra quam pernicioſa Burneti opinio utpote quae
a Mar.

a Martyrio, Virtutibusque homines avertat, & Viriis ostium grande recludat. Quam simul divinam bonitatem dedecet. p. 272

C A P. XXVII.

Improbandum Burneti consilium in hujusmodi quaestione pertractanda. Quae ab eo divinae Scripturae loca pro se adducuntur, nihil Romanae Ecclesiae hac de re Dogmati adversantur. p. 282

C A P. XXVIII.

Egregiis sacrarum Literarum locis confirmata Catholicorum sententia. Simeonis Junioris, cognomento Theologi, nobilis pro illa attestatio. De statu Justorum post mortem nemo detestabilius loquutus, quam Burnetus. Gregorii Magni, Thomae Aquinatis, Philippi Solitarii, luculenta pro Sanctorum Beatitudine testimonia. p. 291

C A P. XXIX.

Abominandae calumniae, quibus Ecclesiam Romanam Burnetus onerat, quasi haec Lucri causa postremis hisce temporibus sententiam innoxerit de Beatitudine Sanctorum. Nihil illa habet, nisi quod priorum Saeculorum Ecclesia professus fuit. Olympiodori, Asterii Amaseni, Nili Monachi testimonia adduntur. Sanctorum quoque Invocatio firmata auctoritate Origenis, Sancti Cypriani (cujus verba Johannes Fellus perversè interpretatur) ac Sancti Hieronymi, Burneti ineptias, negantis Animabus Corpore solutis omnem doloris & gaudii motum. p. 304

C A P. XXX.

Romanae Ecclesiae Dogma de Sanctis ad Caelestem Felicitatem jam deductis, novis sacrarum Literarum Documentis roboratur. Sancti Cypriani Opusculum de Mortalitate in idem Dogma consuit. Quod Sancti, & potissimum Apostolus Gentium, verbis tradidere, sanctis complerunt. Operis conclusio. p. 315

A P P E N D I X

SANCTI CAECILII CYPRIANI OPUSCULUM
DE MORTALITATE.

Anno Ch. CCLII. conscriptum, ad Fidelium solatium heic recusum.
Ex Editione Amstelodami Anni MDCC. cum altera Baluziana conlatum. p. 326

P R A E.

P R A E F A T I O .



UOT vulnera Sanctissimae Christi Ecclesiae intulerint, novissimis hisce temporibus, Schismata atque Haereses, quibus conscissa est nimum in tot Europae Provinciis Fidei unitas, numquam memini, quin miseram humanarum rerum conditionem moestis oculis metiar, animoque paene indignante contempler. Nam quid non factum, quid non quotidie fieri novimus ab iis, qui postquam ab Ecclesia matre sua defecere, in id unum intenti sunt, ut adversus illam pugnent, nullum calumniis, nullum diceriis & invectivis statuantes modum, quo se jure defecisse populo suo persuadeant? Et hoc quidem valde dolendum, non jam nostri caussa, quos in fortissima arce positos imbecillia tela non feriunt, sed eorum caussa, erga quos, etsi a nobis divisos, nobisque quotidie insultantes, noster numquam defuturus est amor. Non ii perspiciunt: perspicimus nos, quantum sit coram Deo scelus, seditiones & Schismata in Religione conflare, atque sub incerta spe assequendae Veritatis, aut meliora sapiendi, certum interea Caritatis & Unitatis patrimonium profundere, quibus quicumque caret, inani sane titulo de Christi nomine gloriatur. Sed quod gravius dolendum, multi jam sunt ex eorum grege, qui non Ecclesiae tantum, sed & Religioni ipsi, quantis possunt artibus atque conatibus, bellum inferunt. E primo lacrymabili facinore nihil facilius, quam gradus ad alterum. Ubi enim sibi relinquant infirma, simulque superba Hominum ingenia, quid non moliantur, quid non audeant animi in effusam Libertatem a teneris, ut ajunt, unguiculis proni? Sed.

o

& ni-

& nihil enixius corrupta hominis Natura expetit, quam ut sibi liberum sit, quidquid lubet. Proinde nimium urgente malefano huiusmodi stimulo, tunc Religio ipsa, cujus saluberrimo sanctissimoque freno in officio continemur erga Deum & Homines, sensim videri molestum incipit jugum, atque ad illud excutiendum meditatio demum tota convertitur. At sublata Religione ex homine, mirum est, ni is continuo perniciosum pestiferumque animal evadat; nam, ut alia praeteream, tunc *fides, & societas humani generis, & una excellentissima Virtus Justitia tollatur* oportet, uti jamdiu Tullius animadvertit.

Duplici autem via in tam deplorando negotio mortalium audacissimi, immo stultissimi, procedunt. Universam Religionem nonnulli, sed clam, veluti puerorum terriculamentum projiciunt, atque inident, in intimis suae phantasiae aut mentis cubiculis, de Divinitate, Legibusque sacris se veluti certos Judices intoleranda confidentia erigentes. Atque ex his nonnulli sua infelicitate, quam felicitatem putant, minime contenti, socios amant, & solícite quaerunt. Alii denique Religionem ipsam palam professi, immo tutelam ejus magnifice obtendentes, palam eodem tempore ipsam per latus adoriuntur, Dogma nempe quoddam arroandum sibi sumentes: quo, si fieri posset, dejecto, Religio ipsa aut enervetur, aut pereat necesse est. Atque utinam verum non foret, nostris in magna Britannia temporibus huiusmodi calamitatis, sive temeritatis apud aliquos exempla crebra spectari. Nimirum illic, uti Amicus quidam meus, & is quidem Britannus, aiebat, *quibusdam Impie cogitare, ea demum sola & vera est Libertas.* Sed camerinam istam lubens ego praetergrediens, unum heic aliorum instar commemoro *Thomam Burnetum*, sive *Burnetium*, hominem in ea gente famosum. Quod haecenus Catholica Ecclesia credidit de Caelesti gloria, & Visione Dei, Justorum Anima-

Animabus a Corpore separatis conlata, & conferenda, minime exspectato in omnium Resurrectione consortio rediviui Corporis, a Britannica quoque gente, aut saltem a plerisque, credi compertum habeo. Et fortasse vix aliam habemus ex tot Sectis, Christianam Legem profitentibus, sed a Romana Ecclesia divisis, quae non eandem amplectatur foveatque doctrinam, si forte Arminianos, aut Anabaptistas excipias, exiguum gregem, qui heic in aliquibus a nobis dissentire videntur. Verum adversus hoc omnium ferine Christianorum Dogma aevo nostro Burnetus in aciem prodiit: scilicet contendens, tum solum Justis praemia, Injustis supplicia esse retribuenda, quum universum genus humanum Christus visibilis in Judicium adducet. Immo ne tunc quidem Justis aditum futurum in Caelos, atque ad beatificum Dei adspectum, sed post Mille tantum Annos in terrae deliciis prius exigendos: ille quippe *Regni Millenarii* a tot Saeculis excisi errorem summa tranquillitate in vitam revocare conatus est, eaque de re Librum conscripsit, cui titulum fecit: *De statu Mortuorum & Resurgentium*. Porro quantum animi Improbis ex ejusmodi opinione accrescat, quantum Probis detrahatur in humanae vitae officiis, vel me tacente unusquisque nullo negotio intelligit.

Et quid quaeso dulcius homini Christiano, quam *Paradisum* meminisse, nobis ab amantissimo ac veracissimo Deo promissum, ejusque immensa gaudia meditari, ibique post arduum peregrinationis hujus curriculum sperare, conspectui beatifico Dei nostri se cito esse sistendum? Hinc amor erga Patrem optimum, qui tantam caris suis mercedem paravit; hinc solamen verum inter adversa, dum vivimus; atque haec una Spes Mortem nemini eludendam non terrore solum exarmare, sed exoptandam suavemque efficere potest. Propterea uti apud Britannos illi, qui sunt Improbi, grates habuisse Burneto

credendi sunt, quod flagitiorum suorum retributionem in immensum quodammodo distulerit: ita Probos quoslibet eisdem indignatos persuasum habeo, quod Paradisum, quem & ipsi sperant (jure-ne, an injuria, minime nunc opus est investigare) a tot Saeculis clausum exhibuerit, & quo umquam tempore recludendum sit, obscurum omnino reliquerit. Certe illud exploratum est mihi, fatentibus ejusdem Libri editoribus in Praefatione, videlicet quum foetum suum Burnetus *gravium quorundam* in Britannia *Theologorum* amico examini tradidisset, exhorruisse viros doctos atque sapientes hominis consilium, utpote quod in perniciem Christianae Religionis & Reipublicae manifeste vergat; eisdemque fuisse auctores, ut lucubrationem, nullum decus, sed odium sibi & contemptum parituram, supprimeret, prudentiusve flammis insumendam commendaret. Atque ille profecto, dum vixit, ab exponenda pestilenti merce abstinuit. Attamen, ut est Novatorum omnium, quibus idem perinde est bona fama, atque infamia, dum eorum nomen in ore hominum sonet: ita Librum vivens pressit, ut liberum ei post mortem ostium voluerit. Neque desuere viri, qui, quod lucri sui loco ponant sanctissimae Religionis detrimenta quaeque, obstetricias manus lubenter eidem praebuere. Hos nempe fructus ex infelici Schismate suo jamdiu Britannia refert, ut gregem non credentium in sinu suo augeri quotidie cernat, ac teterrimo gliscenti morbo nullum amplius remedium agnoscat. Itaque Anno 1726. Londini in lucem erupit Burneti Liber. Acuto minime ingenio opus est ad dignoscendum, qua pice oblii sint illius Editores. Inquiunt enim: *Reperto in scriniis, post obitum ipsius, codice, in quo nonnulla immutarat, visum est in Paucissimorum usum Aliquot exemplaria recudere: quippe quia aegre ferrent. ex doctioribus nonnulli, magno summi viri studio excultum*

tam Opus aliquando forsan interire posse: Adbibita tamen est cautela, ne in Vulgus emaneret. Quisquis igitur hunc Librum in manus sumserit, is se nullo modo passurum, a quoquam aut calamo aut typis describi, data fide obstringitor. Ita illi, fanniones utique impii, in ludibrium suorum praecipue contribulium, quando tot exemplaria virulenti Operis ubique disseminarunt, eorumque interim raritate conficta, pretium & desiderium illius apud incautos adaugendum sperarunt. Quare, si conjecturae locus, id unum consequuti videntur, ut apud probos Britannos gloriam sibi maligni perditique animi compararint: qua procul dubio fraudandus nequaquam est, quicumque in corruptelam Religionis & Reipublicae suae sciens volensque conspirat. Sed haec misa faciamus.

Sero ad me perlatus fuit Burneti Liber, atque e vestigio nulla mihi de illo confutando injecta est cogitatio. Immo ne illum quidem, fateor, legere sustinui. Quippe quemnam in finem, nisi ut desipere incipiam, ad Novatorum scripta me conferam? Qui me in Religione confirmet, non qui me ab ipsa avertant, equidem quaero & amo. Verum ubi intellexi, per Italiam serpere ejusdem exemplaria non pauca, tunc vires meas, quantulaecumque sint, in praesidium Religionis ac Veritatis, simulque fratrum meorum, experiri in animum induxi. Profecto certum mihi paene est, ex Catholicis neminem, etiamsi in Burneti Librum incurrat, quidquam ab illius abominando conatu, & fraudulenta eruditione commotum iri. Nam ex quo Catholica Ecclesia, in Florentino potissimum Generali Concilio, quid heic nobis credendum sit, decrevit: habemus firmiorem Evangelicum sermonem, in quo stabiles conquiescimus, certos nos faciente Deo, ibi Veritatem perpetuo futuram, ubi est Ecclesia Dei vivi, *Columna & firmamentum Veritatis,*
contra

contra quam portae Inferi numquam praevalerunt. Nihil tamen secius quam & pusillis auxilium praebere juvet adversus Novatorum insidias; atque utile non minus quam jocundum cuicumque esse consueverit, posse etiam de Fide nostra, prout occasio tulerit, rationem reddere: propterea operae pretium me facturum duxi, si hanc provinciam fusciperem, atque una cum confutatione Burnetani somnii aperirem, quam solidis atque inconcussis fundamentis hac etiam in re nitatur Romanae Ecclesiae sententia. Eo autem lubentius in arenam descendi, quod, nisi mea me fallit opinio, argumentum hoc videre mihi visus sum nondum pro dignitate pertractatum a nostris. In eo quidem versati sunt jamdudum Sanctus Thomas Aquinas, Alphonsus de Castro, Cardinalis Bellarminus, Vasquius, Petavius, aliique insignes Theologi, sed jejune, sed alio properantes. Itaque opus aggressus sum, ne illis quidem, qui inter Britannos sapiunt, ingratum, ut spero, futurum, si forte ad eorum manus perveniat.

Ex ejus autem lectione utinam desiderio ac spe Caelestis illius Regni, pro quo pugna suscepta est, vehementius in dies animi nostri accendantur. Eja mature oculos mentemque erigamus ad ineffabiles illas delicias, atque ad felicissimam aeternamque Patriam illam, ad quam brevis peregrinatio nostra tendit. Quo importunius impii quidam Novatores a beatissimi illius loci possessione removere nos, seu remorari contendunt, eo nos alacrius, divinis freti promissis, neque amplius dubii de celeritate Praemii, per Virtutum iter festinemus. Ceterum non ego singulas perversas opiniones, sive somnia in eodem Burneti Libro temere exposita, oppugnanda mihi proposui. Unum volo: videlicet ostendere, quam iminerito, dicam etiam quam impio consilio, ille Iustus perfectis Beatitatem negarit

negarit in Caelis, antequam Corpora in fine Mundi resurgant. Si hoc, ut spero, evincam, cetera Visionarii hominis deliramenta quisque prudens Lector contemnet atque ridebit. Ad haec reliquum foret, ut postquam multa disserui de *Paradiso*, & Visione Dei, hoc est de beatissimo fine *Spei Christianae*, fundamenta etiam exponerem, quibus eadem supranaturalis Virtus innitur, quidve agendum sit Christiano homini, ut firma sibi, neque illuloria sit Spes consequendae suo tempore Caelestis Hereditatis. Nam a Deo quidem misericorde per merita Jesu Christi, unigeniti ejus Filii, ac Domini nostri, speranda nobis est immensa illa Felicitas: attamen adeo beata Spes nobis ea conditione facta fuit, ut & nos fidelem Deo servitutem serviamus, & per Caritatis & Pietatis Opera, non superficialia, sed solida, fidem atque amorem nostrum benignissimo Regi ac Patri nostro probemus. Id si praestarem, tunc haberemus plene pertractatum dulce *Christianae Spei* argumentum, quod olim quoque mihi proposueram, quum de *Caritate erga proximum* egi. Sed plura nondum potui. Interim non modicam nobilis hujusce argumenti partem in Opusculo isto Lector accipiat. Antequam tamen cum Heterodoxo Burneto manus conseram, procidens adoro te, Christe Fili Dei vivi, & obsecro, ut calamus meum in veritate Sanctae Ecclesiae tuae regas, & per mea verba magnificentiam Gloriae ac Regni sanctitatis tuae unusquisque Fidelium vehementius excupere, & fidentius sperare incipiat. Nos faciem tuam requirimus, amantissime Salvator; & concupiscit ac deficit anima nostra in atria tua. Praesta, Domine, praesta mihi, & omnibus diligentibus te, ut videamus, & cito videamus Te, ac Regnum tuum Caeleste, illudque & nos possideamus una cum omnibus Sanctis tuis.

NOI REFORMATORI DELLO STUDIO DI PADOVA.

A Vendo veduto per la Fede di Revisione, ed Approvazione del P. F. Lauro Maria Piccinelli Inquisitor di Verona, nel Libro intitolato: *De Paradiso, Regnique Caelestis Gloria, non expectata Corporum Resurrectione, Justis a Deo conlata adversus Ec. Auctore Lodovico Antonio Muratorio*, non v'esser cosa alcuna contro la Santa Fede Cattolica, e parimente per Attestato del Segretario Nostro, niente contro Principi, e buoni costumi, concediamo Licenza a *Jacopo Vallarzi Stampatore in Verona nel Seminario Episcopale*, che possa essere stampato, osservando gli ordini in materia di Stampe, e presentando le solite copie alle Pubbliche Librarie di Venezia, e di Padova.

Dat. 21. Agosto 1737.

(Gio: Francesco Morosini Kav. Rif.

(Gio: Emo Proc. Rif.

(Pietro Grimani Kav. Proc. Rif.

Agostino Gadaldini Segretario.

D E



DE PARADISO

NON EXSPECTATA CORPORUM RESURRECTIONE

A D V E R S U S

BURNETUM.

CAPUT PRIMUM.

*Proponitur Burneti sententia de retardata Justorum Beatitudine
usque ad postremi Judicii diem. Loca Scripturarum &
Patrum pro sua opinione ab eo laudata. Pessima
confessaria inde emergentia. Dolo
malo heic ab eo actum.*



Aucis exhibeo, quae Burnetus hanc in rem est elo-
quutus. Postquam ostendit, Animas hominum sub-
stantias esse incorporeas, & immortalitatis prae-
rogativa donatas: quaerit, quis earum futurus sit Sta-
tus, quoties per mortem a Corpore segregantur. An
recta Impii, culparumve sarcina onerati, ad Infero-
rum poenas trahantur, se nolle investigare e vestigio fingit. Ad
Justos autem quod attinet, quos ante supremi Judicii diem ad
caeleste Regnum transferendos a tot Saeculis Respublica Chri-
stiana sere omnis censet, haec ei sententia nullo fundamento ni-
xa, ac spes inanis creditur. Nam etsi Matth. V. 8. *Mundi corde*

A

Deum

Deum visuri dicantur, & Prima Corinth. XIII. 12. viso Dei facie ad faciem nobis promittatur: nihilominus id tantummodo eventurum contendit post Resurrectionem Corporum. Tunc enim, & non antea, in Epist. Prima V. 4. Sanctus Petrus Coronam fidis Pastoribus pollicetur. Paulus quoque Secunda ad Timoth. IV. 8. Coronam iustitiae repositam sibi in illa die scribit. Et Cap. I. 12. ejusdem Epistolae, Certus sum, inquit, quia potens est Deus depositum meum servare in illum diem. Proinde, si illum audimus, componi haec minime possunt cum eorum opinione, qui statim a morte Animas Justorum ad summam gloriam, Improborum ad aeternas poenas transferri arbitrantur. Accedit, quod in Scripturis mortui dormire dicuntur, & exsurgere in die Judicii: Apostolus vero Prima ad Thesalonicen. IV. 13. non a Beatitudine illico post mortem ineunda, sed a Resurrectione, redituque glorioso Christi, spem & solatium Christianis esse capiendum scribit, inquiens: Nolumus autem vos ignorare, fratres, de dormientibus, ut non contristemini, sicut & ceteri, qui spem non habent. Si enim credimus, quod Jesus mortuus est, & resurrexit: ita & Deus eos, qui dormierunt per Jesum, adducet cum eo &c. Totam pariter spem nostram e Resurrectione pendere prodit idem Apostolus Prima Corinth. XV. 19. qui & in Epistola ad Romanos VIII. 18. ait: Non sunt condignae passionis hujus temporis ad futuram gloriam, quae revelabitur in nobis. Ecquando autem revelabitur? In Resurrectione. Exspectantes quippe sumus redemptionem corporis nostri. Addit Burnetus, in hujusmodi doctrinam confluere alia Scripturarum loca; nullumque ex iis sibi offerri, quo ante Resurrectionem affulgeat aeternae gloriae spes Justis. Neque Paradisus, quo felix Latro adductus a Christo fuit, supremum Caelum significat. Neque Apostoli, cupientis dissolvi, & esse cum Christo, vox ad beatificam visionem torquenda venit: ea nempe loquendi formula indicatur dumtaxat, esse Animas Justorum in custodia & tutela Christi. Quare si antequam corpora resurgant, caelestem Beatitudinem Sanctis tribuimus, ut is ait, vim Doctrinae Christianae de Resurrectione labefactare videmur, ipsamque quasi inutilem reddere. Quam in rem Sancti Augustini verba laudat, scribentis Genes. ad liter. Lib. XII. Cap. 35. Quid opus est Spiritibus Corpora sua in Resurrectione recipere, si potest iis etiam sine corporibus summa illa Beatitudo praebere?

Neque solum e fonte Scripturarum, sed ex rivis etiam fontium propriis doctrinam suam haurire Burnetus pergit, contentens,

dens, per tria prima Ecclesiae Saecula nullum reperiri Graecum aut Latinum Patrem, praeter Haereticos, atque unum forsam Cyprianum, qui defunctorum animas statim a morte ad visum Dei transfulerit, eo scilicet modo, quo nuperis Saeculis decretum est in Ecclesia Romana. Itaque Justinum, Irenaeum, ac Tertullianum testes suae sententiae advocat; deinde Origenem, Visitarum Martyrem, Lactantium, Marciarium Hierosolymitanum, Eustathium Antiochenum, Andream & Aretam Caesarienses Episcopos, de Hade loquentes. Quibus adjungit Polycarpum, Clementem Romanum, & Ignatium Sanctos Martyres, a quorum stilo abhorre censet Ecclesiae Romanae decretum, statuentis in Concilio Generali Florentino, Sanctorum Animas mox recipi in Caelum, & intueri clare ipsum Dominum trinum, sicuti est. Addit, rationi minime consentaneum esse; poenas exigi, aut praemia erogari, antequam res in iudicium deducta fuerit; nullum vero Iudicium in Scriptura memorari, nisi habendum in fine Mundi, uti docemur Actor. XVII. 31. & Prima ad Corinth. III. 13. Denique secum concordans ait Auctorem Quaestionum ad Orthodoxos apud Justinum, necnon & Chrysostomum, Theodoretum, Oecumenium, Theophylactum, Euthymium, Hilarium, Ambrosium, Augustinum, & Bernardum, ad quorum opinionem accedere etiam censet veteres Liturgias. Heic tamen Burneti conatus minime sistit. Qualis sit Animarum status naturalis in intervallo mortis & Resurrectionis, subinde investigat; variasque interserens quaestionunculas, eo tandem fertur, ut puret & doceat, Animas tunc esse in statu quietis, silentii, & ἀπαιρίας, idest nihil operantes. Et quidni? quum secundum communem sacrae Scripturae morem *Mors* appelleretur *Somnus*, & morientes *Obdormire* dicantur. Haec ille. Neque enim juvat cetera persequi ad Resurrectionis rationem, & postremum Christi Adventum, Iudiciumque spectantia, quae is ad examen adducit. Id mihi dumtaxat considerandum nunc venit, quod ad Statum Mortuorum pertinet, antequam Corporibus Resurrectio per imperium Dei novissimo die contingat.

Et miror quidem, simul etiam doleo, homines reperiri, qui quamquam Christi Religionem professi, atque ad ejus tutelam, dignitatemque amplificandam suo instituto obstricti, nihil tamen non agere videantur, ut ipsam nostris temporibus enervent, ne dicam evertant. Atque hoc praestitum a Burnero quisque pius facile intelligat; immo & ipse intellexisse non injuria credendus

est, quando vivens Librum suum in lucem *efferre non est ausus*; Britannicae profecto gentis iudicium atque odium veritus, quam melius sapere in hocce argumento omnes norunt. Verum ita sibi viventi cavet Burnetus, ut tamen parato veneno erumpendi post mortem suam locum consulto fecerit, aut lubens reliquerit. Abiit ille: quam spem secum tulerit, ignotum est; notissimum vero, non defuisse, qui eo e vivis sublato, tandem Libro nocte tantum digno compedes eripuerunt, eumque libera luce frui iusserunt. Qui si, aequae ac illius Auctor, male mereri de Christiana Religione in animum induxerunt, voti sui, quantum in ipsis est, compotes fuerit; sed proborum indignationem vel apud ipsos Britannos incurrisse mihi persuadeo. Nam ubi statuas, ad Caeli gloriam, atque ad Inferorum poenas, aditum nulli hominum hactenus fuisse datum, neque dandum, quousque mortuos e tumulis excitet Angelica tuba: necesse est, languere nimium incipiat in mortalium cordibus Christianae Religionis saluberrimum studium & amor, mirumque in modum turbetur hactenus creditum discrimen praemii & poenae ab ea constitutum inter Bonos & Malos. Immortalitatem utrique Animae fatetur Burnerus, neque Praemii Spem, Metumve Poenae tollit; at haec ille ita extenuat, ut quid sperandum sit, quidve timendum deinceps, vix ullus agnoscat. Jam anni fluxerunt Mille & Septingenti, ex quo divinus Magister aeternam in Caelis Vitam Justis pollicitus fuit. Si Burnetum auscultamus, nondum ille fidem solvit, omniumque Spem frustratus est; clausa adhuc est caelestis aulae janua; & tot millia millium in Domino mortuorum, mercedem adhuc expectant, vili *Somno* ac torpori, nullique operationi addicta. Quandonam vitae hujus post mortem corporis, quam vitam nescio quei appelles, erit finis? Idem qui & Mundi. At quando postrema haec dies Mundo illucescet? *De Die illa & hora nemo scit, neque Angeli Caelorum, nisi solus Pater*, Matth. XXIV. 36. Fieri autem potest, ut nonnisi post complures, immo plurimas annorum myriades, humanarum rerum casus adveniat. Quo ergo Justorum spes abierit, atque abire in posterum possit, jam vides. Et quei, quaeso, posita adeo enormi dilatione Retributionis, se quisquam Martyrio objiciat, fortique & alacri animo vitam det pro Christo? Primis Ecclesiae Saeculis, testante Apostolo ad Roman. XII. 12. erant utique Fideles *in tribulatione patientes*, sed simul *spe gaudentes*, quia vicinum spectabant, & spe praecoccupabant praemium, a Deo persequutionem propter justitiam patientibus paratum. Sed quando post tot Saecula,

la, ut Burnetus contendit, nondum ulla merces iis reddita est, atque insuper reddendae tempus in immensum trahi potest: quis jam in atrocissima tormenta, ipsamque in mortem pro vita beata in Caelis adipiscenda lubens & gaudens incurrat? *Sper, quae differtur, affligit animam*, Proverbior. XIII. 12. Quanto plus autem illa affligat & exanimet, quae in tot Saecula, atque adeo in immanes moras protrahitur ullo sine fructu, totque alia Saecula ob stare sibi posse intelligit? Ad haec, ubi quempiam in calamitatibus solari velis, aut ubi morituris Fidelibus ingemines spem caelestis Beatitudinis, statim, vel propediem consequendae: quicumque apud Britannos Burneti deliramenta accepere, ii certe se ludibrio haberi in- clamabunt. Istud sui dogmatis incommodum sensit & ipse Burnetus, ac propterea pag. 49. nulla censura dignos edicit, *si qui sine omni spe lucris consolentur moribundos, animentque velut ad Caelum confestim abituros, & ad suprema gaudia. Exeunt e carcere in libertatem; & quae, ex pio affectu dicuntur ad minuendum mortis metum, non sunt explicanda cum rigore, instar articulorum Fidei*. Sed apertissime contrerraneis suis illudit Burnetus. Non e carcere in libertatem, sed quidem e libertate in carcerem morientes illius doctrina educit. Nam quo loco sit, & quanta possit, quibusve fruatur Anima, dum conjuncta cum Corpore in Mundo degit, norunt omnes. Soluta a Corpore en a Burneto detruditur in compedes, in carcerem, tum a caelesti Regno exclusa, tum visibilis hujus Mundi penitus oblita, *quod nihil scilicet*, ut ille ait, *operetur aut efficiat in Mundum corporeum, nec ab eodem quomodocumque afficiatur*. Praeterea gravi censura is dignus, quando censura illos absolvit, qui persuasum habentes, Christianorum neminem, quantacumque iustitia polleat, posse ante supremi Judicii diem in Caelorum gloriam penetrare, nihilo secius spem eis faciunt immensi illius praemii statim a morte acquirendi, hoc est, aperto mendacio Populum in re tanti momenti fallunt, & fallere non erubescunt. Quaeenam, bone Deus, haec Theologia? & qualis hujusmodi Religio? Rideant profecto impii atque increduli, quos minime desiderari in Britannia novimus, quum ludibria eiusmodi audiunt; gravissime vero do- leant, quicumque ibi Christo revera credunt; ac tanti momenti mendacia in Anglicana Religione uti legitima venditari animadver- tunt.

Ad Improborum postea Timorem ac poenas quod attinet, in san- cta Christi Religione tantopere depraedicatas, habent sane Injusti, unde Burneto plurimum se debere fateantur. Utcumque is in limine

nos

nos moneat, nullum sibi verbum faciendum *de malorum ac miserrum* statu post mortem: ita tamen orationem deinde suam struit, ut luculentissime significet, sibi persuasum, Impiorum quoque & Peccatorum Animas a Corpore se junctas, in *Somnum* rapi, ac tum solum excitandas, atque in *Ignem aeternum* trahendas, quum Christus Judex de omnium hominum sorte decernet. *Aeternum* appello *Ignem* illum, verbis eisdem usus, quibus utitur ipsemet Christus, sed cujus Aeternitatem idem Burnetus, ac Tillotsonus nostris temporibus in dubium revocarunt, immo sustulerunt. Nam quid jam non audeat inter Britannos estrenis sentiendi licentia, ex quo a Catholica Ecclesia, numquam satis deploranda secessione, desecerunt, & privato cujuscumque judicio ac arbitrio subiecta est doctrina Fidei, quam & sacrae Literae & Patres ab Ecclesiae voce petenda tradiderunt? Idcirco peregrina in dies dogmata apud illos emergunt, aut veterum errores veluti gemmae recuduntur, ne quid umquam desideretur novi ad Eruditorum illorum nundinas deferendum: eo tamen successu, ut in tanta instabilitate sacri depositi, qui credebant, credere desinant, & Religioni sensim Atheismus succedat. Itaque posita Burneti sententia, Improbis addatur animus necesse est, ne ab iniquitatis via recedant; flagitiosae quippe illorum vitae poenas a Deo paratas ita procrastinat, ita emollit, ut terror iis a Religione incussus prorsus exarmetur, leves etiam in auras apud multos evanescere possit. Scilicet ille malos Igne excrucianos ante postremum Judicium minime consentit; poenas ipsas, ac damnatorum miseras Sempiternas fore, satis aperte negat. Aut in nihilum Spiritus illi tandem conjicientur (quod famosus vir Henricus Dodvvellus antea senserat) aut post emendationem ac poenitentiam a Deo misericorde veniam impetrabunt. Interea qui ex praesenti Saeculo a Mille & Septingentis annis migrarunt, nondum subire Judicium, nondum Infernis cruciatibus addicti fuere. Id tantummodo praestandum, adveniente postremo Mundi huius die, quem aut sero nimis, aut numquam adfuturum, facile sibi gens nequam persuadeat. Haec profecto gratissima Peccatoribus nuntia; ac potissimum quod iis liberum relinquitur, sacras Literas in hocce argumento interpretari, prout quisque magis consonum divinae Clementiae arbitretur. Verum quid aliud haec sunt, nisi nervos praecipuos Christianae Religionis excindere, quae praemiis & poenis, ab omnipotenti, iusto, ac veracissimo Deo propositis, quotidie bonos ad arduum Virtutis iter animat atque incendit, malos vero ab iniquitate deterret?

Vat

Vae illis, inquit per os Ezechielis Altissimus, Cap. XIII. 18. *qui conspuunt pulvillor sub omni cubito manus; & faciunt cervicalia sub capite universae aetatis, ad capiendas animas; & quum caperent animas Populi mei, vivificabant animas eorum.* Vae illis, qui per dulces sermones Justitiam Dei in Improbos enervant ac tollunt; ejus vero Beneficentiam erga Justos extenuare non cessant.

At, inquit Burnetus, nostrum non est, aut istis praemia, aut illis castigationem pro arbitrio nostro decernere. Sacrae tantum Literae audiendae sunt, Patres quoque auscultandi. Hoc unum ex eorum doctrina consequitur, nonnisi in fine Mundi piorum atque impiorum aëta examini aeterni Judicis subjicienda, & tunc tantummodo unicuique pro merito aut mercedem donandam, aut supplicia esse inroganda. Sed quid, si mala fide agat heic Burnetus, atque incautos & incruditos oratione sua decipiat? Ignorare is minime poterat, suas rationes, easque validissimas, non deesse statuentibus poenarum & praemiorum retributionem ante diem Judicii. Verumtamen istas ille dissimulavit, ad illud unum anhelans, ut suam opinionem ab aliquot ex antiquis, & a nonnullis etiam posteriorum temporum Haereticis venditam, novis stipatam copiis, ipse inter Britannos disseminaret, & si fieri posset, constabiliret. Nimirum id ille egit, quod quisquam e Socinianis tentare nunc posset, divinitatem Filii Dei impugnaturus. Satis ei foret, nonnulla sacrarum Scripturarum loca congerere, quae dogmati Catholicorum adversari videntur; tum iis adjungere Ante-Nicaenos aliquot Patres, quibus nonnulla exciderunt, Socinianorum Haeresi in speciem faventia, neglectis interim tot eorundem sacrorum Librorum locis, & Sanctorum Patrum sententiis in Fidem Nicaenam consentientibus. Quam bona fide subdolanus iste Scriptor munere suo fungeretur ad erudiendam Christianorum Rempublicam, nemo non intelligit. Paria autem praestitit Burnetus, cujus iniquo consilio propterea fuit irascantur oportet, quando is satis prodir, se non amore ductum Veritatis, quae nihil celat, nihil dissimulat, sed ab unius cupiditate Gloriarum se raptum fuisse. Novator enim quilibet nominis famam e Novitate doctrinae aucupatur. Contra, quum Deus, ipsaque recta Ratio Religionem in homines intulerit, efficacissimam videlicet animorum medicinam, & potissimum solamen in adversis, regiumque iter ad Beatitatem: quisquis in ejus amorem sincere fertur, quantis etiam potest viribus, ejus dignitatem atque utilitatem augendam, non minuendam, ubique sibi proponit. Quamobrem quod Burnetus oculis suorum Civium subduxit, liceat mihi in praef-

in praesentia innuere: hoc est, experiri, numi bonam ille caussam tueatur; an potius meliora ac veriora sentiant, qui Proborum & Iniquorum beatam aut miseram sortem non ab uno postremo Iudicio & Saeculi consummatione petendam statuunt.

C A P. II.

*Ecclesiae Catholicae de huiusmodi quaestione Decreta. Quibus
divinorum Librorum documentis innixa. Sancti Me-
thodius, Thomas Aquinas, & Chrysostomus
eidem adstipulantur.*

QUod antequam aggrediar, lubens fateor, huiusmodi quaestionem hinc inde gravibus circumfederali difficultatibus. Nonnulli ex Sanctis Patribus in ea fluctuasse aliquando videntur, modo anticipantes, modo differentes ad Mundi huius funera Felicitatem Iustorum, aeternasque aerumnas Impiorum. Communis tamen inter Christianos, & ubique accepta ab Ecclesiae exordio usque ad Saeculum XIV. semper sententia fuit, Proborum Animasa Corpore se-junctas, nisi quid purgandum habeant, statim in caelestia Regna transferri. Eodem tandem Saeculo XIV. Johannes XXII. Romanus Pontifex aditum aperuit ad eandem controversiam altius examinandam. Scilicet disputandi causa ille pendere videbatur in eorum sententiam, qui defunctorum Animabus visionem Dei negabant ante gloriosum Christi adventum ad iudicandum genus humanum. Verum re mature excussa Anno MCCCXXXIV. suam mentem Johannes palam purgavit, tandem professus, *quod Animae purgatae, separatae a corporibus, sunt in Caelo, Caelorum Regno, & Paradiso, & cum Christo in consortio Angelorum congregatae, & vident Deum, ac divinam essentiam clare, in quantum status & conditio compatitur Animae separatae.* Ejusmodi professionem subinde omnibus notam fecit Anno MCCCXXXV. Benedictus XII. ejus Successor, Bulla promulgata, quae incipit *Benedictus Deus.* Acrius deinde Anno MCCCCXXXVIII. & MCCCCXXXIX. agitata quaestio haec fuit in Concilio Generali Florentino inter Latinos & Graecos, ac demum concordati calculo utriusque gentis stabilitum: *Illorum Animas, qui post Baptisma susceptum nullam omnino peccati maculam incurrerunt; illas etiam, quae post contractam peccati maculam, vel in suis corporibus, vel eisdem exutae corporibus, sunt purgatae; in Caelum mox recipi, & intueri clare ipsum Deum*

Deum unum & trinum, sicuti est, pro meritum tamen diversitate alium alio perfectius. Doctrinam eandem a Synodo Tridentina confirmatam habemus Sessione XXV. ita ut nulla amplius inter Catholicos disputatio sive dubitatio de illa supersit. Quod praemonendum censui, ne quisquam miretur, si quando Patres aut Theologos ante Saeculum XIV. in hoc argumento offendant, ab aliis, immo a se in suis ipsis Libris discordes. Liberum quippe fuit ante iudicium Ecclesiae, opinioni adhaerere, quae prior videbatur. Eoque magis cavendum est, ne (quod nonnullis subrepsit) quemquam antea tempora haeretici dogmatis damnemus, quod is aliter de Mortuorum statu senserit, quam postea Ecclesia decrevit. Quotiescumque enim ab Ecclesia sciente Theologorum Opiniones tolerantur, & palam prodire sine censura sinuntur: quamquam postea decreto contrario tollantur, eas quidem averfari in posterum jubemur, sed simul earum Auctores, ac praecipue si de Sanctis Patribus agitur, nulla gravi nota aspergendos novimus. Florentini autem Concilii doctrinam de Sanctorum Beatitate Britanni, tunc in unitate Fidei nobiscum juncti, susceperunt. An autem omnes illibati servarint, servatamve cupiant, non satis compertum est mihi. Ego certe, ne a veteri, solideque firmata sententia se dimoveri illi patiantur, si quid haec mea possunt, quanta potero brevitate curabo.

Statuendum autem ante omnia est, postremam diem Mundi hujus aliquando venturam; tunc excitandos omnes mortuos, qui in sua Carne ad tribunal Christi sistentur, pro suis meritis sententiam aut dulcem, aut terribilem ex ejus ore in totius generis humani conspectu accepturi. Tunc *in Christo*, ut ait Apostolus Prima ad Corinth. XV. 22. *omnes vivificabuntur.* Denique *fnis*, quum Christus tradiderit Regnum Deo & Patri. Novissima autem inimica destruetur mors: Sunt in hanc rem non pauca Scripturarum loca clarissima, ac proinde *Resurrectionem Mortuorum*, & gloriosum Christi adventum ad judicandos in fine Mundi universos homines, veluti unum e praecipuis Christianae Fidei Articulis credimus & veneramus. Sacrae vero Literae, quae Resurrecturos homines saepe tradunt, de Corpore id tradunt, de Anima vero silent; uti enim Sancti Patres animadverterunt, unum Corpus in morte hominis cadit, atque Anima ab eo sejuncta vivere pergit. Propterea Matth. XXVII. 52. *Multa Corpora Sanctorum, qui dormierant, surrexerunt.* Ita & Apostolus cum in multis locis, tum praesertim in eodem Cap. XV. mortuorum Resurrectionem describens, de Corpore tunc suscitando, & ad incorruptionem transferendo loquitur; de Anima vero

nihil habet. In prima quidem ad Thessalonicens. V. 23. optat, *ut integer Spiritus & Anima, & Corpus sine querela in adventu Domini nostri Jesu Christi servetur.* Verum eā de adhuc viventibus dicit, & ad jam vita functos non pertinent. Nam, uti palam faciemus, non unum Christi Domini *Adventum* sacrae Literae tradiderunt; atque in illo Apostoli loco nihil aliud designari contendimus, nisi accessum Christi Judicis ad singulorum Fidelium mortem. Sed ubinam post Corporis mortem Animae vivunt, praecipue postquam Christus resurrexit, atque in caelestem aulam conscendit? Catholicorum sententia est, Impiorum aut Improborum Animas sine vera poenitentia decedentes, ad Inferorum supplicia illico ferri: Piorum vero, dum culpam nihil expiandum eis restet, in Caelorum Regnum convolare, & divinae Visionis compotes fieri. Ad istius doctrinae firmamentum haec Scripturarum loca Sanctus Thomas Aquinas, Durandus, Cardinalis Bellarminus, alique doctissimi viri jamdiu attulere. Ecclesiastici Cap. XI. 28. *Facile est coram Deo in die obitus retribuere unicuique secundum vias suas.* Tum additur: *In fine hominis denudatio operum illius.* Quae Justorum ac Injustorum *Restitutio* futura sit, non semel Christus, ejusque Apostoli nos edocuerunt. Et quum hanc *in die obitus* unusquisque a Deo recepturus dicatur, non Corpus quidem, sed Anima, jam tum ad gaudium, sive ad supplicia transibit. At *Ecclesiastici* Librum, inquam Protestantes, minime inter Canonicas Scripturas recensemus. Ut ut sit, negare saltem nequeant, quin veneranda in primis antiquitate nitatur, & tamquam Agiographus Liber secundi ordinis laudatus fuerit vel ipso Secundo Ecclesiae Saeculo, a Tertuliano, & Clemente Alexandrino, deinde ab Origene, Cypriano, Athanasio, Basilio, Cyrillis ambobus, Gregoriis Nazianzeno & Nysseno, Chrysostomo, Epiphanio, Ambrosio, Hieronymo, Augustino, atque ab aliis non paucis. Ergo velis nolis, luculentum habes testem, qualis in primitiva Ecclesia foret Opinio de mercedis *Restitutione*, non ad metas supremi Judicii procrastinanda, sed *in die obitus* a Deo praestanda.

Ad haec Apostolus Secunda ad Corinth. V. 1. *Scimus*, ait, *quoniam si terrestres domus nostra, hujus habitationis dissolvatur, quod aedificationem ex Deo habemus, domum non manufactam, aeternam in Caelis. Nam & in hoc ingemiscimus, habitationem nostram, quae de Caelo est, superindui cupientes.* Video haec Interpretes digladiari. Burnetus ipse loco isto utitur, tamquam suae sententiae fulcro, inquam dissolutionem hujus corporis opponi assumptioni corporis caelestis,

testis, quae tantummodo in Resurrectione universali speranda est, nulla habita ratione temporis intermedii. Verum uti Bellarminus post Sanctum Thomam scite animadvertit, ejusmodi interpretatione nimium enervaretur Apostoli argumentatio. Is enim, ut ad patientiam in adversis Corinthios animet atque instituat, praemium non post Saeculorum complurium moras, sed brevi accipiendum proposuerit oportet, appellando nempe aeternam Beatitudinem, domum non manufactam, habitationem numquam interituram in caelis. Si terrestris domus nostra, in qua habitamus, dissolvitur, habemus statim aliam domum, sine comparatione meliorem in caelis, hoc est, caeleste domicilium, in quo Anima Deum facie ad faciem conspiciet. Atque hanc interpretationem quo plus nos viventes ab Apostoli temporibus distamus, eo magis justam ac necessariam sentimus. Neque objicias, aequum minime esse metiri a desideriis nostris, sive a praesenti rerum statu, mentem Apostoli, quum nonnulli e Sanctis Patribus, atque ex ipsis nuperis sacrarum Literarum Interpretibus in aliam abierint sententiam. Nam neque Hammond Britanno Interpreti nostra improbat; immo vel ante Mille & Quadringentos annos, Tertio videlicet post Christum natum Saeculo, interpretationem a nobis propositam jam tum viguisse comperio. Sanctus Methodius Tyri Episcopus circiter Annuthi Christi CCXC. Librum *de Resurrectione* elaboravit, quem Sanctus Hieronymus Cap. 83. de Scriptorib. Ecclesiastic. *Opus egregium contra Origenem* appellat. Ampla ejus excerpta nobis servavit Photius Cod. 234. Is autem explicanda sibi sumens praeclaudata Apostoli verba, *scimus, quoniam si terrestris &c. inter alia ait: per terrestrem domum, brevem hanc vitam abusive intelligendam, non vero Corpus &c. Quae est ergo domus manufacta? Haec, inquam, brevis Vita &c.* Denique addit *Quemadmodum ergo, quum dies Vitae nostrae praesentis defecerint, bona opera Animas nostras recipient: ita brevi hac Vita soluta, ANIMAE ANTE RESURRECTIONEM HABITATIONEM HABEBUNT APUD DEUM, donec instauratae, & numquam casuram Domum (id est Corpus) recipiamus.* Quae Sancti Methodii verba eo lubentius attuli, ut maturè Lector intelligat, quae fuerit tanti viri sententia (vel ipso Saeculo Tertio) de non differenda ad Resurrectionem Corporum Beatitudine Justorum; lusumque ludi a Burneto Britannis suis, dum contrariam tantummodo opinionem tunc receptam fuisse venditat.

Tertio ait Apostolus in eodem Cap. V. Epist. Secund. ad Corinth. *Qui sumus in hoc tabernaculo, ingemiscimus gravati, eo quod nolu-*

mus exspoliari, sed supervestiri &c. *Scientes quoniam dum sumus in Corpore, peregrinamur a Domino (per Fidem enim ambulamus, & non per speciem). Audemus autem, & bonam voluntatem habemus, magis peregrinari a Corpore, & Praesentes esse ad Deum.* Evidens est *Peregrinari a Domino* significare absentiam a Domino, hoc est, nos heic positos, a reali ejus praesentia sejunctos vivere; *Peregrinari a Corpore* separationem Animae ab ipso Corpore. Si ergo Apostolus melius sibi futurum ait, si Anima sua e Corpore abeat, ut sit *Praesens ad Deum*: nonne tenes, Sanctorum Animas hinc evolantes illico ferri ad beatificam praesentiam Dei? Propterea jure Sanctus Thomas Aquinas in Commentar. ad hunc locum scribit: *Consutatur per haec verba error dicentium, Animas Sanctorum decedentium non statim post mortem deduci ad visionem Dei. Nam frustra Sancti auderent & desiderarent peregrinari a Corpore, si separati a Corpore non essent Praesentes ad Deum. Et ideo dicendum est, quod Sancti statim a morte vident Deum per essentiam, & sunt in Caelesti Mansione.* Estius quoque vir inter Catholicos doctissimus ex his Pauli verbis deducit, *evidenter ostendi, Sanctorum Animas Corporibus exutas (sive a Corpore peregrinantes; utroque enim modo loquitur Apostolus) esse Domino Praesentes, & quidem eo modo, ut jam non per Fidem ambulent, sed per speciem teneant. Hic autem est, Deum clare, & per essentiam intueri.* Neque dissentit inter Britannos praeclaudatus Hammondus. Immo Calvinus ipse ab hoc loco convictus, affirmare coactus fuit, Justorum animas, mox ut e Corpore migrant, ferri ad praesentiam Domini. Hoc idem tradidere Patres, ex quibus unum seligo, Chrysostomum videlicet, qui diserte hinc sententiam eandem eliciebat Homil. X. in Epistol. II. ad Corinth. Cap. V. En ejus verba ad hunc ipsum locum: *Praestantius est, cum Christo esse, quam Corpus a corruptione liberum accipere. Sensus autem horum verborum est hujusmodi. Vitam nostram is non exstinguit, qui nos oppugnat, ac morte afficit. Ne timeas: fidem animam praebet, quam concideris atque obtruncaris. Neque enim ille dumtaxat te a corruptione vindicat, ac gravi sarcina levat; sed etiam ad DOMINI CONSPECTUM CONFESTIM (ταχως) TRANSMITTIT.* Et profecto, si dum Anima cum Corpore conjuncta est, peregrinatur a Domino, hoc est, a praesentia Dei, ejusque beata fruitione longe abest (nemo enim, in carcere corporeo vivens, ad videndum Deum facie ad faciem admittitur) consequens est, ut peregrinari a Corpore (idest separari a Corpore) vehementer cupiat, atque in eum locum

locum transferri, ubi sit *Praesens ad Dominum*, hoc est emigrare ad Caelestem Gloriam. Si tantummodo post Resurrectionem Corporum speranda esset haec Gloria, non dixisset Apostolus ad eam nos duci, postquam desinit Anima versari cum Corpore, sed quidem in fine Mundi, qui quando futurus sit, omnino incertum est. Atqui Paulus aperte nos docet, ideo exitum ab hac vita Iustis exoptari, quia soluti a Corpore impediende Visionem Dei, continuo fiunt *praesentes ad Dominum*, eoque frui incipiunt. Dixi, per Corpus nunc Visionem Dei impediri, quia idem discimus ab Apostolo scribente ibidem: *Scientes, quia dum sumus in Corpore, peregrinamur a Domino. Per Fidem enim ambulamus, & non per speciem*, idest non per Visum sive Visionem. Alibi hoc ille appellat videre Deum *facie ad faciem*. Ergo evidens est, Justum peregrinantem a Corpore, hoc est, Animam illius Corpore solutam, *Praesentem esse ad Dominum*: hoc est Deum non amplius per *Fidem*, sed *per speciem*, sive *facie ad faciem* ab ipsa videri: id quod Ecclesia Catholica credendum statuit.

Evidentius eadem veritas colligitur ex aliis ejusdem Apostoli verbis ad Philippens. I. 23. *Coarctor*, inquit, *& duokus: desiderium habens dissolvi, & esse cum Christo: multo magis melius. Permanere autem in Carne, necessarium propter vos*: Ubi Christus post gloriosam Resurrectionem suam collocatus fuerit, sacrae Literae nobis non uno in loco aperiunt. Scilicet *is in Caelum ascendit*; ibi *sedet a dextris Dei*; *Christus est in gloria Dei Patris*, eumque ibi stantem conspexit speciali visionis prerogativa Stephanus, dum a Judaeis lapidaretur. Si Paulus cupit *dissolvi*, idest optat, ut e Corpore Anima dissolvatur, reputatque *multo magis melius* sibi futurum exui carne, quam *vivere in carne*: non alia certe de causa id cupit, nisi quia statim adjungeretur Christo, in ejus consortio perennem Vitam, summamque felicitatem consequuturus. Quare jam tenes, Beatitatem ante Corporum Resurrectionem Iustis promissam, eaque fiducia animatum Apostolum agnovisse, desiderandum sibi e praesenti vita decessum. Burnetum angit mirum in modum hic locus: ideoque ut ejus vim declinet, effugium non unum quaerit. Si, inquit, *corporali praesentia* secum Christo futurum intellexit Paulus, *de tempore Resurrectionis intellexit*; *interquiete mortis pronibilo habita*: *Animae enim a Corpore separatae, & ab omni materia, nullam habere possunt praesentiam corporalem & externam cum Christo durante illo statu: hoc ex natura rei est impossibile*. Inepte ac temere omnia, immo & impie. Apostolus ait: *Cupio dissolvi, & Ess*

¶ *Esse cum Christo*, hoc est, ut quisque intelligit, Carnis sarcinam deponere cupio, ut Anima mea ad Christum videndum ascendat. Homine autem Philosopho, eoque magis Christiano indignum est venditare, Animam humanam solutam a Corpore non posse, quamquam lumine gloriae a Deo donetur, frui praesentia Christi, cum eo esse, ipsumque intueri. Angeli certe materia corporea carent, & nihilominus in Caelis semper vident faciem Patris mei, qui in Caelis est, inquit Christus ipse, Matth. XVIII. 10. Et poenitentis Latronis Anima sine Corpore fuit cum Christo, beatificata illius praesentia in Paradiso. Id si quis negat, Anathemate feriendus est. Burnetus deinde, si Sanctis vita sanctis praesentiam Christi spiritualem & internam (quali etiam in hac vita fruuntur) concedere malumus, non repugnat. Sed & haec pugnant cum mente Pauli. Nam si, fatente Burneto ipso, & sacris Literis idem tradentibus, Sancti homines in hac vita adsunt Deo, sunt cum Deo, spiritu nempe conjuncti cum illo: nihil erat, cur Apostolus dissolutionem Corporis optaret, ut esset cum Domino; cum ipso quippe hac ratione erat etiam in Mundo vivens. Ergo necesse est intelligamus, Apostolo ante oculos fuisse, procul dubio sibi obventurum alium Animae statum, ubi ista e Corpore avolasset, idest, se potiturum non spiritali dumtaxat, sed reali praesentia Domini, quaecum Visio Dei & Beatitudo conjuncta incedit.

Subdit Burnetus: *Piorum Animae post mortem dici possunt esse cum Christo, quatenus erunt in custodia Christi: Christus jam jam moriturus Animam suam in Manus Patris deposuit, idest in custodiam & tutelam Patris. Stephanus quoque moribundus in manus Christi Animam suam tradidit; Domine Jesu suscipe spiritum meum, exspirans dixit. Eodem modo Anima Sancti Pauli esset cum Christo in ipsius tutela, & apud eum deposita usque ad Resurrectionem. Nescio, an quid Arianum infusurret nobis Burnetus, exemplum Christi adferens, deponentis Spiritum suum in Manus Patris. Numquid tutela & custodia indigebat Anima Christi, a qua numquam Divinitas sejuncta fuit? Stephanus autem (ut Sancti Augustini verbis utar in Sermone 319.) pro cujus Evangelio animam posuit, illi commendavit ipsam animam. Domine, inquit, accipe spiritum meum. Fecisti me victorem, recipe in triumphum. Accipe spiritum meum. Illi persequuntur: tu suscipe; illi ejiciunt: tu intromitte. Dic spiritui meo: intra in gaudium Domini tui. Hoc est enim, Accipe spiritum meum. Ceterum superflua haec esse, & Burnetum vagari, ut nos a scopo avertat, continuo Lector intelligat, ubi recogit, nihil*

nihil aliud significari phrasi illa esse *cum Christo*, sive *recipi ad Dominum*, uti Tertullianus legit, quam id, quod nuper vidimus in Secunda ad Corinth. V. 8. ab eodem Apostolo reperitum, quum ait, Sanctos percipere *peregrinari a Corpore*, hoc est, mori, ac desinere in Carne morari, ut *praesentes* fiant *ad Dominum*: quae nonnisi de reali praesentia in conspectu Dei vivi, & de caelesti Gloria explicanda sunt. Quod item denique de huiusmodi formula dicendi dirimit, idem Paulus Thessalonicens. IV. 16. postquam Resurrectionem, & postremum Christi in fine Mundi iudicium descripsit, & Justos rapiendos *in nubibus obviam Christo in aera* nos docuit, addit: *Et sic semper cum Domino erimus*. Haec diligenter animadvertenda; nemo enim ex his non intelligit, *esse cum Domino* idem significare, atque Gloria ac Beatitate aeterna frui, quam ne Burnetus quidem Justis post Resurrectionem & Iudicium supremum negare ausus est. Hanc ergo *Felicitatem* adepturus, quod est ad Animam, Apostolus fuit, statim ac eadem Anima *dissoluta a Corpore* fuisset, quia confestim *cum Christo*, *cum Domino*, futura erat. Inquit deinde Burnetus, Apostolum Secunda ad Corinth. V. 4. dixisse *Nolumus expoliari*, idest non cupimus mori; haec vero cupere *dissolvi*, quod idem est ac mori; atque adeo temperanda haec esse, ut non repugnent. Sed o egregium hominem, qui levibus hisce difficultatibus distineri se patitur. Norunt omnes, in quolibet homine varios esse Voluntatis actus, immo & contrarios, ex quibus denique unus alteri praesertur. Christus quoque diversa volebat, quia Homo, quia Deus. Itaque Natura & in Justis a morte abhorret: ab ea quoque, non negabat Paulus, quin & ipse abhorreret. Verum Ratio, & desiderium migrandi ad Christum, ejusque Gloria fruendi, pergratam illi dissolutionem ipsam faciebat. Pergit Burnetus inquit, dixisse Paulum: *Mors mihi lucrum*. Tum enumeratis tot malis & periculis ab ipso in vita toleratis, ait, mirandum esse, cur *tantillum* dicat; & certe *mortem in hac vita optabiliorem ei fuisse*. Primo somnium Burneti est illud *tantillum*; neque ejus erat, tanta confidentia definire, quantum *lucris* Apostolo obventurum erat in morte, quando is diserte infra inquit, *dissolvi, & esse cum Christo*, reputari a se *multo magis melius*: quibus verbis, uti Erasmus monuit, *duplicat comparativum ad vehementiam, ut plurimum excessum significet, idque juxta idioma sermonis Hebraici*. Accedit, quod Apostolus numquam sibi vitae hujus exitum optavit, ut tribulationibus, quas pro Christo ejusque famulis perferebat, sese eximeret. Immo placebat sibi *in contumeliis, in angustiis pro Christo*,
ut

ut ipse testatur Secunda ad Corinth. XII. 10. Quamobrem forti hilarique animo inter aerumnas sibi vires addebat, certus, quo plura in terris pro Christi gloria atque utilitate Fidelium pateretur; eo majus sibi Gloriam pondus expectandum in Caelis. Atque heic praesertim prodit, se cupere *dissolvi*, non ut finem faciat laboribus & periculis, sed ut sit *cum Christo*, & coram Christo sistatur; cujus Gloriam participem se confestim futurum novit. Chrysostomum, ut alios omittam, audi, tutiorem certe Pauli Interpretem; quam Burnetus, Homil. III. in Epistol. ad Philippens. Cap. i. *Dissolvi multo magis melius, & quid eligam, ignoro. Quid ais? Quum hinc abiens AD CAELUM SIS MIGRATURUS, & CUM CHRISTO FUTURUS, ignoras, quid eligas? Ecquis pugil, quum coronam possit induere, malit rursus in certamen descendere? Ecquis Dux, qui a bello cum gloria & trophaeis liberari queat, & cum Rege in Regia quietus degere, seque oblectare, adhuc & sudare praeoptet, et in aciem prodire? Ita ille, ita & nos sentiamus oportet.*

CAP. III.

Aliis Scripturae locis confirmata Catholicae Ecclesiae sententia. Non postremum tantummodo Judicium agnoscendum, sed & alia occulta. Aliosque Christi Adventus admittere necesse est, tum in singulorum Fidelium morte, tum ad Hierosolymae excidium. Resurrectionis Dogma nihil pugnat contra inchoatam Animarum Beatitude in Regno Caelorum.

U Sque ad Resurrectionem Burnetus vestes ferreos iniecit caelesti Hierusalem, ejusque ostia omnibus, praeterquam Christo, clausit. Quam bene, haecenus vidimus. Adducatur nunc in examen alter Scripturarum locus Luc. XXIII. 41. ubi poenitens Latio dicebat ad Jesum: *Domine, memento mei, quum veneris in Regnum tuum. Et dixit illi Jesus: Amen dico tibi; Hodie mecum eris in Paradiso.* Consueverunt hoc uti, qui censent, statim a morte caeleste Regnum a Justis iniri. Et profecto quum Latio petat a Redemptore locum in ejus Regno, Christus vero ei Paradisum illo ipso die polliceatur, omnino videtur idem locus sub diversis nominibus nobis exhibitus. Verum, ne quid dissimulem, *Paradisi* appellatio apud Patres non tam liquida est, ut certam & inconcussam ejus

ejus significationem ad praesentis controversiae decisionem trahere liceat. Incongruum quippe nonnullis visum est, in caelestem Regiam fortunatum hunc Latronem invehere ante Christum ipsum, qui quadraginta tantum diebus post Resurrectionem suam illuc ascendit. Praeterea quum triduo Anima Christi a Corpore sejuncta in inferis piorum sedibus versata fuerit: quei tempore illo Latronis Anima facta est caelestis Regni compos? Haec tamen alios, eosque longe plures, minime absterruerunt, quin sub *Paradisi* vocabulo significante deliciis refertam mansionem, *Paradisum Caelestem*, sive supremum Beatitudinis locum designatum censuerint. Christus enim inquit: *Mecum eris hodie*. Non illudit, sed confirmat Latroni spem Regni, & quidem accipiendi non sero, sed postquam beata Anima sua Corpore soluta fuerit. Neque opus fuit, Animam Latronis in Caelum invehere statim. Etiam ad inferos descendens Christus, Limbum Patrum convertit in locum inaeffabilis felicitatis. Et ubi Caelum recogites, certe ibi divinitate Christus praesens erat, atque inde, qua Deus, numquam recessit. Ad ista accedat Apostoli verbum, magni in hac quaestione faciendum. Nimirum Secunda ad Corinth. XII. 2. testatur, se raptum usque ad tertium Caelum, atque insuper se raptum in *Paradisum*, ubi auditur arcana verba, quae non licet homini loqui. Quicumque scopum Pauli attente considerat, ejusque sermonem recte perpendit, numquam sibi persuadeat, raptum fuisse Apostolum in *Paradisum* terrestrem Adami, sed quidem in summum Caelum, atque in Beatitudinis sedem; ibique ineffabilia sibi a Deo revelata: ita ut, si quis forte veterum minus honorifice de *Paradiso* scripserit, in Limbum Patrum, atque in inferioris terrae partes illum conjiciens, ab eo abscedere cogamur. Certe plerique Interpretum a primis Ecclesiae Saeculis ad nostra usque tempora, inter quos & Hammondus Britannus, *Paradisi* vocabulo indicatum censuerunt Caelum ipsum, ubi in deliciis aeternis Beatorum animae Deum intuentur, atque ejus Gloria fruuntur. At de hoc uberius infra.

Ancipitis quoque significationis nomen est *Sinus Abrahae*. De hoc etiam infra ageatur. Interea de Lazaro paupere legimus Luc. XVI. 22. *Factum est autem, ut moreretur mendicus, & portaretur ab Angelis in Sinum Abrahae. Mortuus est autem dives, & sepultus in Inferno. Elevari autem oculos suos, quum esset in tormentis, vidit Abraham de longe, & Lazarum in sinu ejus. Quae eo in loco Dominustradit, aperte produnt, Divitem in tormentorum loco fuisse, Lazarum vero in alicujus Felicitatis regione, in quam Angelo-*

C

rum

rum ministerio fuerat deportatus. Praeterea sunt, qui arbitrantur, *Sinum Abrahae* significare non quempiam locum, sed honorificam sedem in regione illa, ubi cum Justis servabatur Abraham, pater omnium credentium. Nempe ei proximus sedebat Lazarus, apud illum supra complures alios honoratus. Et laudanda sane, immo ceteris praeferenda interpretatio. Nam & Johann. I. 18. dicitur *Unigenitus Filius, qui est in sinu Patris*: & XIII. 23. *Erat ergo recumbens unus ex Discipulis ejus in sinu Jesu, quem diligebat Jesus*. Quae in eum finem commemoro, ut si quem ex antiquis offendimus, qui post Domini Ascensionem in Caelum scribant, Justorum Animas in *Sinum Abrahae* deferri, nil mireris. Per ea verba Caelestis quoque Beatitudo delineatur, in quam translatus est Abraham a victore mortis Christo. Ideo Matth. VIII. 11. dicitur: *Multi ab Oriente & Occidente venient, & recumbent cum Abraham & Isaac & Jacob in Regno Caelorum*: idest, uti Grotius interpretatur, gaudia post hanc vitam, more tunc recepto, sub Convivii specie describens. Proinde Chrysostomus Homil. XXVII. in Matthaeum, haec de Domino nostro habet: *Caeleste Regnum non suo nomine, sed Sinum Abrahae appellavit*. Sunt & alia in hanc rem veterum loca, quae infra commemorabo.

Nunc nobis animadvertendum, Divitem in tormentis fuisse, atque in Inferno conclusum: nam verba ista in antiquis Codicibus conjunguntur cum *elevans oculos*. Quae forent ejusmodi tormenta, ille ipse prodit inquit: *quia crucior in hac flamma*. Neque Corpus, sed Animam dumtaxat ibi excruciatam fuisse, certo agnoscimus, quum Diviti quinque fratres essent, adhuc in terra viventes; is autem optabat, ne & ipsi venirent in hunc locum tormentorum. Ergo nondum facta Resurrectio Corporum. Porro tria hinc hauriuntur, eaque maximi momenti ad controversiam nostram. Primum est, negari amplius non posse, quin Improborum Animae statim a morte in Inferorum tormenta consiciantur, ibique excruciantur ante Corporum Resurrectionem. En Divitis Animam ad ea supplicia deductam, dum adhuc vivi ejus fratres versarentur in Mundo. Jugulant haec prorsus Burneti sententiam, qui & Injustis poenam differt usque ad postremum orbis universi Judicium, eumque Haereticum produunt. Simul etiam ostendunt, quam temere & inepte is tradat, Animas sine Corpore summa Beatitudine frui, aut excruciarı non posse. Secundo, si Animae peccatorum pondere pressae, atque a corporeis vinculis expeditae, in tormentorum locum detruduntur, neque expectanda eis est Archangeli tuba & con-

consummatio Saeculi; par militat ratio, quare neque Iustorum Animabus in Christo morientibus Felicitatis aeternae praemium differendum sit in finem usque Mundi. Nam cur par non sit utrobique divinae Iustitiae mensura? Tertio, duplex Judicium a Deo faciendum Catholicorum Theologi statuunt: alterum privatum & occultum, videlicet mox ut unusquisque hominum e vivis decedit. Tunc enim quilibet aeterno Iudici operum suorum rationem reddit, ejusque sententiam subire cogitur, ad praemium aut ad poenam transiente Anima illius. Ad hujus dogmatis veritatem stabilendam adferri consuevit Apostoli locus Hebraeor. IX. 27. *Statutum est hominibus semel mori. Post hoc autem Judicium.* Neque injuria hisce verbis utimur, quum nulla ibi inter mortem hominis, & occultum Judicis Dei tribunal mora interponatur. Et quamvis nonnulli arbitrentur, ibi Apostolum loqui non de singulari, sed de universali Judicio Dei in fine Mundi; doctrina tamen de privato Dei Judicio statim a morte hominum ex iisdem verbis multo rectius ac verisimilius refultat, utpote quae etiam ex aliis Sacrarum Literarum & Patrum documentis deprehenditur firmissima; immo sine temeritate ac latione Christianae Fidei negari non potest. Hujusmodi Judicium agnoscit & confirmat Sanctus Thomas non uno in loco: sed praesertim in Summa Tom. III. Quaest. 59. Artic. V. Praeterea Sanctus Augustinus Lib. XX. Cap. 1. de Civitate Dei, praeter *novissimum Judicium* alia agnoscit *media Dei Judicia*, quum Deus judicet etiam de singulorum hominum operibus propriis; & homines plerumque aperte, semper occulte, luunt pro suis factis divinitus poenas, sive in hac Vita, sive Post Mortem. Alios Patres hujus doctrinae testes infra adducam. Reliquit autem divinus Magister ineluctabile hujusmodi veritatis exemplum in Divitis Anima, nondum resumpto Corpore, apud inferos excruciatum. Quamobrem etiamsi aperta Scripturae verba desissent, facta non desunt, quibus ipsum dogma persuadeatur. Nimirum nullum habemus intervallum inter Divitis mortem & supplicium. Istius damnationem, istius poenam Judicis sententia praecesserit oportet. Rursus Augustinum audi Lib. II. Cap. 4. de Anima & ejus origine. *Rectissime & valde salubriter credit, judicari Animas, quum de Corporibus exierint, antequam veniant ad illud Judicium, quo eas oportet jam redditis Corporibus judicari, atque in ipsa, in qua haec vixerunt, Carne torqueri, sive gloriari. Hoc ita-ne tandem nesciebas?* Hujus quoque doctrinae fundamenta inter cetera indicat, addens: *Quis adversus Evangelium tanta obstinatione mentis obscuruit, ut in illo Paupere, qui post*

mortem ablatus est in Sinum Abrahae, & in illo Divite, cujus in Inferno cruciatus exponitur, ista non audiat, aut audita non credat? Haec Novatorem Burnetum feriunt, & doctrinae Catholicae verustatem produnt. Quare prorsus corruiere videas Burneti ejusdem argumentum, dum scribit: *Nec sacris Literis, nec Rationi naturali consentaneum esse videtur, summas poenas exigere, aut summa praemia erogare, antequam res in Judicium deducta fuerit, & de cujusque causa constiterit. Judicium autem nullum memorat Scriptura sacra ante finem Mundi.* At nos jam manu tenemus, ante extremum Mundi Judicium inflictas Diviti mortuo poenas: ergo non unum tantummodo universale Judicium, sed Judicia quoque peculiaria in hominum morte a Deo habenda credamus. Infra quoque vide Caput XXVIII.

Lucis incrementum majus accipiet sententia nostra ex Johann. XIV. 1. ubi Christus ad mortem profecturus, Apostolos suos hisce verbis solatur: *Non turbetur cor vestrum. In domo Patris mei mansiones multae sunt, si quo minus, dixissem vobis: Quia vado parare vobis locum. Et si abiero, & praeparavero vobis locum, iterum venio, & accipiam vos ad me ipsum, ut ubi sum ego, & vos sitis.* Neminem futurum puto, qui non agnoscat, mansiones Apostolis parandas fuisse in Caelo, atque in sede omnium felicitatum, quum illas diserte Salvator statuat in domo Patris mei. At ecquando in eas Mansiones Apostolis futurus est locus? Si Burnetus auscultandus, neque post annos Mille & Septingentos paratus eis fuit locus, neque illum quisquam obrinuit; & inde erunt exclusi Justi omnes fortassis adhuc per aliquot alia annorum Millia, scilicet donec Mundo finis adveniat. Nonne hac ratione ridendae incredulis exhibentur divinae Scripturae? Quippe aut impotentiam in parando, aut promissi oblivionem, aut illudendi voluntatem Christo Domino incaute tribuit Burnerus. Verba Salvatoris, eorumque contextus hunc unum sensum praebent cuicumque videre volenti: *Verum quidem est, me discessurum a vobis: quod permolestum vobis agnosco. Verum in Caelo non mihi tantum, sed & vobis excipienda est locus. Id non semel dixi vobis. Bene ergo vobis erit, si abiero, ac praecessero tamquam praecursor, hospitium vobis in eadem beata domo paraturus. Nam hoc facto, quum ex Mundo eritis & vos abituri, rursus ad vos veniam, & vos mecum accipiam, in Regnum Patris mei vos introduclurus, ut semper ubi sum ego, & vos sitis, coheredes & participes meae felicitatis. Quare non morori, sed gaudio discessus meus futurus est vobis.* Animadverte illud

lud *Venio pro Veniam*, quod celeritatem reditus sonat. Secundum Burneti somnia dicturus fuisset Jesus: *Vado parare vobis locum extra domum Patris mei, ubi per aliquot annorum millia dormietis, suos requiescetis*. Sed ab hujusmodi imaginatione manifeste absunt Salvatoris verba: *In domo Patris mei*, ait, in Regno Caelesti, ubi ero & ego, *vado parare vobis locum*. In praecedenti quoque Cap. XIII. 36. interroganti Petro: *Domine, quo vadis? Respondit Jesus: Quo ego vado, non potes me Modo sequi. Sequeris autem Postea*. Propterea Chrysostomus Homil. XI. in Cap. VI. ad Hebraeos: Praecursor, ait, *pro nobis introivit Christus*. Praecursor autem est aliquorum Praecursor, sicut Johannes Christi. Et non dixit solum introiit, sed ubi Praecursor pro nobis introiit, utpote quod nos quoque debeamus eo pervenire. Non est enim multum interstitium inter Praecursorem, & eos, qui sequuntur; nam aliqui non esset Praecursor. Neque, ut rursus repetam, excogitandum est, quoties in sacris Literis Christus venire, & Christi adventus auditur; singula ea loca unum significare novissimum diem, quo Deus judicaturus est Orbem in aequitate. Praeter magnificum, omnibusque visibilem illius Adventum in fine Mundi, jam didicimus esse alios Salvatoris Adventus, sed occultos & peculiares. Unus inter alios statuendus, quum Justi ex Mundo abituri sunt, ut eos Christus suscipiat, atque in Regnum claritatis suae introducat. Miror, si sit, qui haec in dubium vertat, quando satis aperte de aliis Adventibus Christus ipse nos monuit. Utique ait Johann. XIV. 23. *Si quis diligit me, sermonem meum servabit: & Pater meus diliget eum; & ad eum Veniemus, & mansionem apud eum faciemus*. Ad haec Jesus ipse ad suscipiendum Stephani morientis spiritum, se visibilem praebuit. Tum Lucae XII. 36. inquit: *Vos similes hominibus expectantibus Dominum suum, quando revertatur a nuptiis, ut quum venerit & pulsaverit, confestim aperiant ei*. Idem inculcat subdendo: *Beati servi illi, quos, quum venerit dominus, invenerit vigilantes. Amen dico vobis, quod praecinget se, & faciet illos discumbere, & transiens ministrabit illis. Et vos estote parati, quia, qua hora non putatis, Filius hominis veniet*. Convivii hujus descriptio Caelestem sine dubitatione Felicitatem designat, hoc est inestimabile illud praemium, quo ipse Justos donaturus est, quos paratos, sive virtutibus ac bonis operibus ornatos, atque a vitiis & peccatis alienos, in morte inveniet. Neque enim haec de supremo Judicii universalis die intelligenda sunt. Ad Apostolos loquitur divinus Praeceptor, eosque vigilare jubet. Certe illi vitam producturi non

non erant usque ad finem Mundi. Tum ad *omnes* Parabosam & monitum extendit, ne quemquam imparatum mors offendant, atque ut quo tempore Christus ipse adveniet, occultum Judicium de morientium operibus facturus, quilibet Fidelium vigilans deprehendatur. Hoc etiam clarius expressum videas apud Marcum XIII. 33. ubi Dominus ait: *Vigilate ergo, ne quum homo venerit, inveniatur vos dormientes. Quod autem vobis dico, omnibus dico: Vigilate.* Sententiam vero praeium statim subsequetur.

Innuitur hoc in praeaudatis verbis, dum Apostolos alloquitur, eisque *mansiones in domo Patris*, hoc est in aeterna Beatitudine, pollicetur. *Si abiero, inquit, & praeparavero vobis locum, iterum venio, & accipiam vos ad me ipsum*, quum nempe e corporeo carcere Anima vestra evolabit, *ut ubi sum ego, & vos sitis.* Non ait *Sero*, eoque minus post duo, aut tria, aut plura Annorum Millia Veniam ad vos; sed *Brevi*, quum scilicet e Mundo & vos abieritis, ut in domo Patris mei mecum semper sitis. Reminiscere, haec dici a Christo solandi causa Discipulos, quorum cor turbatum agnoverat, quod eis dixisset: *Filioli, adhuc modicum vobiscum sum.* Non aliud ergo solatium adhibitum ad removendum ex eorum cordibus moerorem ac turbationem, excogitare possumus, nisi celerem Redemptoris ipsius Reditum, qui illorum Animas exciperet hinc abeuntes, atque in aeterna gaudia inveheret, illic, ubi Christus foret, futurus & ipsas in perpetuum. Propterea infra addit: *Non turbetur cor vestrum, neque formidet.* Cur, quaeso, timorem & angorem deposituri sunt? *Quia*, repetit, *Vado, & Venio ad vos.* Chrysostomo quoque teste Homil. 72. in Johann. quum Jesus dixisset: *Non potestis me modo sequi; ne arbitrentur diuturniorem moram futuram*, sive ne putarent, usque ad finem Mundi (ὡς τέλος) eum esse moraturum, addidit: *Ut ubi sum ego, & vos sitis.* Et numquid amantissimus Pater Deus morem nondum gessit unigenito Filio suo, hisce verbis tunc ipsum alloquenti? *Pater, quos dedisti mihi, volo, ut ubi sum ego, & illi sint MECUM, ut videant Claritatem meam, quam dedisti mihi*, Johann. XVII. 24. Impie aut Christum Dominum, aut Evangelistam mendacii insimulet, quicumque nondum completam voluntatem & promissionem Christi affirmare non erubescat. Disertis verbis Dominus fidem heic suam obligavit: liberare procul dubio potuit. Quis contra hiscat, aut factum non credat? Et quum dicit, *ut sint Mecum, & videant Claritatem meam, quam dedisti mihi, quia dilexisti me ante constitutionem Mundi*, supremam Christi Claritatem, hoc est Gloriam in Caelis

Caelis prodit, de qua antea ipse Dei Filius dixerat: *Et nunc clarifica me, Pater, Apud Te metipsum* (videlicet in Regia Beatitudinis tuae) *Claritate, quam habui, priusquam Mundus esset, Apud Te.* En quare Iusti cum Apostolo cupiant *Dissolvi, & esse cum Christo*; quare peregrinari a Corpore, & praesentes esse ad Dominum; quare ambulare non per fidem, quod solum possunt, dum in Corpore sunt, sed per speciem; quod Corpore solutis continget. Chrysostomus quoque Homil. 66. in Cap. XII. Johann. Domini verba interpretans: *Ubi sum ego, illic & minister meus*, haec habet: *Ubi Christus? in Caelis. Ergo ante Resurrectionem Illuc Anima & Spiritu transferemur.* Huiusmodi autem Praemio donari ait, qui Crucem ferunt, & sequuntur Jesum.

Atque haec evidenter produnt, quantum a veritate absit Burneti opinio, & simulquam firma sit sententiae Catholicae Ecclesiae. Neque solum ad mortem Fidelium se adventurum divinus Redemptor praedixit, sed & alterum suum denuntiavit *Adventum*, occultum & ipsum, quo tempore Regnum Iudaeorum excidit, capta & prostrata illorum Urbe a Romanis Anno vulgaris Epochae LXX. & annis post Ascensionem Domini fere sex & triginta. Tunc ad peculiare Iudicium ingratae gentis Iudaicae accessurus erat Christus. Immo Iudicium illud typus fuit universalis alterius, ad quod omnes resurgentes in fine Mundi adstabimus. Vide Matth. XXIV. 2. ubi desolationem Templi praedicit, & seque ea occasione adventurum: quae etsi de universali Iudicio recte interpretari consuevimus, attamen respicere videntur singulare illud Iudicium, quum subdat: *Amen dico vobis, quia non praeteribit generatio haec, donec omnia haec fiant.* Cum his conjunge, quae idem Dominus habet Matth. X. 19. *Quum autem persequentur vos in Civitate ista, fugite in aliam. Amen dico vobis: non consummabitur Civitates Israel, donec Veniat Filius hominis.* Confer etiam alterum locum Matth. XVI. 27. *Filius hominis venturus est in gloria Patris sui cum Angelis suis. Et tunc reddet unicuique secundum opera sua. Amen dico vobis, sunt quidam de his stantibus, qui non gustabunt mortem, donec videant Filium hominis Venientem in Regno suo.* Novi, referri & ista ad gloriosum Christi adventum in fine Saeculorum, atque ad Transfigurationem proxime sequutam: quae sane interpretatio laudanda est, & mihi probatur. Nihilo tamen secius quum Adventus ille Christi futurus dicatur, vivente adhuc non uno ex Apostolis & Discipulis suis: perpendendum est, num spectare potius possit ad Iudaici Regni excidium, in quo aeternus Iudex poenas

poenas jamdiu praedictas repetiit a Populo illo, suo, suorumque Fidelium persecutore indefesso. Horrendo Hierosolymae excidio notum est, saltem Sanctum Johannem fuisse superstitem. Ad ea quoque tempora referenda sunt, quae habet Sanctus Lucas in Evangel. Cap. XVII. 30. *Secundum haec erit, qua die Filius hominis revelabitur*; subdit enim: *In illa hora qui fuerit in tecto, & vasa ejus in domo, non descendat tollere illa*. Vide etiam Luc. XVIII. 7. & XIX. 39. & XXI. 6. 20. Inquit quoque Apostolus ad Philippens. IV. 5. *Dominus prope est*: quod de Christo Judice explicandum est, venturo vel ad mortem non longe futuram illorum, ad quos scribit, vel ad liberandos Fideles suos a Judaeorum impotentia: quod paucis inde annis contigit in populi illius terribili calamitate atque ruina. Idem vero Apostolus Hebraeos ad fidem Christi conversos, & a fratribus in sua incredulitate obduratis vexatos, sperare jubet pacem Hebr. X. 25. *consolantes, & tanto magis quanto videritis appropinquantem diem. Terribilis autem quaedam expectatio Judicii, & ignis aemulatio, quae consummatura est adversarios*. Tum ad patientiam eos hortatur versiculo 37. haec subdens: *Adhuc enim Modicum aliquantulum, qui Venturus est, Veniet, & non tardabit*. Ita & Jacobus in Epist. sua, V. 7. *Patientes igitur estote, fratres, usque ad Adventum Domini*. Et infra: *Patientes igitur estote & vos, & confirmate corda vestra, quoniam Adventus Domini appropinquavit*. Ecce Judex ante januam adsistit. Conjungenda quoque cum hisce locis sunt, quae concordī doctrina Johannes Apostolus tradidit in Epistola Prima, Cap. II. 18. scribens: *Filioli, novissima hora est; & sicut audistis, quia Antichristus venit, & nunc Antichristi multi facti sunt* (de Gnosticeis Haereticis, qui Ecclesiam Dei tunc infestabant, loquitur): *unde scimus, quia novissima hora est*. Infra addit: *Filioli, manete in eo, ut quum apparuerit, habeamus fiduciam, & non confundamur ab eo in Adventu ejus*. Haec & alia similia referre ad universale Judicium magno cum incommodo coneris; & deceptos imaginari Apostolos Christi, blasphemiam saperet. Ergo praeter solemnem & gloriosum Christi Adventum, quem in fine Mundi Christiani quique expectamus, alios illius Adventus in Scripturis facris indicatos videmus; hoc est, aut ad mortem singulorum Fidelium, ad quos Apostoli scribebant, aut ad Templi & Reipublicae Judaicae postrema fata, paucos post annos subsequuta: quod & Sanctus Augustinus agnovit Lib. XX. Cap. V. de Civitate Dei. Quos autem tunc viventes hortatur Johannes, ut *quam Christus appa-*

apparuerit, habeant fiduciam (appariturum vero brevi satis prodit) hos Cap. subsequenti vers. 2. aliis hisce verbis solatur: *Carissimi, nunc filii Dei sumus; & nondum apparuit, quid erimus. Scimus, quoniam quum apparuerit, similes ei erimus; quoniam videbimus eum, sicuti est.* Si haec, uti videtur, cum praecedentibus cohaerent, jam habes, non expectasse Justos Resurrectionem Corporum in postremo Judicio, ut ad summam Beatitudinem, & *Visiōnem Dei* admitterentur. Hoc ipsum vero edocuit Apostolus idem a Christo dilectus, Apocalypf. II. 25. *Tamen id, quod habetis, tenete, donec veniam.* Et infra Cap. III. 3. *Si ergo non vigilaveris, veniam ad te tamquam fur, & nescies, qua hora veniam ad te.* Et rursus eodem Cap. III. 11. *Quoniam servasti verbum patientiae meae, & ego servabo te ab hora tentationis, quae ventura est in orbem universum tentare habitantes in terra. Ecce Venio cito. Tene, quod habes, ut nemo accipiat coronam tuam.* Et infra vers. 20. *Ecce sto ad ostium, & pulso. Si quis audierit vocem meam, & aperuerit mihi januam, intrabo ad illum, & coenabo cum illo, & ipse mecum. Qui vicerit, dabo ei sedere mecum in throno meo.* Luculentius eadem inculcat Sanctus Apostolus in fine Apocalypseos ipsius Cap. XXII. 7. *Et ecce, inquit, venio velociter.* Et vers. 12. *Ecce venio cito, & merces mea mecum est, reddere unicuique secundum opera ejus.* Et vers. 20. *Dicit, qui testimonium perhibet istorum. Etiam Venio cito. Amen. Veni, Domine Jesu.*

Accedat nunc Burnetus, nobisque depraedicet unum Christi Adventum, unum illius Judicium in fine Saeculorum, atque in tempus adeo enorme differat proborum praemia, & poenas improborum. Exigat ille a nobis, ut sacram Literarum loca proferamus, quibus ante magnum illum diem alius ostendatur Domini Adventus, & expedita operum retributio. En loca, en lucem, a qua ipse oculos avertit, ad gloriam e novitate dogmatis captandam unice intentus. Non nobis, inquam, ille ingeminet, *Adventum Domini* de solemnitate tantum illius apparitione in fine Mundi esse intelligendum. Quantum is fallatur, jam perspeximus. *Dies* quoque Domini non semper supremum Judicium indicat, quum Apostolus ad Philippens. I. 6. scripserit: *Qui coepit in vobis opus bonum, perficiet usque in Diem Christi Jesu:* hoc est, usque ad obitum vestrum, perseverantiae gratiam vobis impertiendo. Atque huc facere, simulque hinc accipere posse interpretationem videtur locus Johannis Apostoli XXI. 22. ubi Dominus de ipso dixit ad Petrum: *Sic cum volo manere, donec Veniam; quid ad*

re? *Exiit ergo sermo ille inter fratres, quia Discipulus ille non moritur. Et non dixit Jesus, non moritur; sed: Sic eum volo manere, donec Veniam: quid ad te?* Johannes profecto Hierosolymorum excidium superstes fuit, ad quod Dominus se Venturum praedixit. Tunc ergo habes completum Christi vaticinium. At Apostoli, quod Domini Adventum ad poenas de Judaeis fumendas tunc minime excogitarent, arbitrati fuere, ad postremum Orbis Judicium differendam fore Johannis mortem. Ejusdem vero Sancti Johannis verba nuper accepimus, hortantis tunc viventes, *ut quum Christus apparuerit, habeant fiduciam, quem brevi Venturum prodit.* At inquit Burnetus pag. 59. *Judicium nullam memrat Scriptura sacra ante finem Mundi.* Tum loca adrexit, quibus Scriptura supremum illud Judicium nobis annuntiat. Matth. XXV. 31. *Quum venerit Filius hominis in majestate sua &c. & statuet oves quidem a dextris suis &c. & Prima ad Corinth. III. 13. uniuscujusque opus manifestum erit. Dies enim declarabit &c. & Secunda ad Corinth. V. 10. Omnes enim nos manifestari oportet ante tribunal Christi, ut referat unusquisque propria corporis, prout gessit, sive bonum, sive malum &c.* Subdit Burnetus: *In his, quae pendent a voluntate Dei & a revelatione divina, non licet ad arbitrium fingere novam rerum oeconomiam, ut hypothesei serviamus.* Verum hujusmodi oeconomiam veluti novam ille sibi fingit, postquam nulla alia divinarum Literarum loca animadvertere voluit, quibus evincitur, alia quoque Judicia ante novissimum a Christo institui, & statim a morte Animas hominum aut castigari, aut mercede donari. In eo ipso Cap. V. Epistol. II. ad Corinth., uti supra vidimus, praemisera Apostolus, nos cupere peregrinari a corpore, & praesentes esse ad Dominum: quae verba idem important, atque dissolvi, & esse cum Christo. At instat Burnetus: quid igitur ultra praestabit universale Judicium, si peculiare praecessit? Et quomodo unusquisque tunc referat propria corporis, si ante Resurrectionem, ut nuper agebat Sanctus Johannes, redditum fuit unicuique secundum opera ejus? Uti ostendimus, ad singulorum hominum mortem de illorum bonis malisve operibus Deus Judicia instituit, & Evangelicum Divitem vidimus detrufum confestim fuisse in tormenta, atque in flammis cruciatum. Licet autem nobis, de ipsis privatis Christi Judiciis accipere verba Apostoli monentis: *Omnes nos manifestari oportet ante tribunal Christi, ut referat unusquisque propria Corporis.* Quod si ea referre contendas ad universale Judicium, animadvertet, Apostolum tan-

tum-

tummodo de Corpore loqui. *Propria Corporis* inquit: Tunc autem in sententia nostra unum Corpus referet praemium aut poenam; antea quippe Anima retulit. Sanctus quoque Irenaeus, quamquam Millenariorum sententiae addictus, & a Burneto pro sua sententia laudatus, dum tamen Lib. II. Cap. 34. Divitis & Lazari relationem commemorat, satis innuere videtur ejusmodi Judiciorum minime procrastinatam sententiam, scribens: *Per haec enim manifeste declaratum est, & perseverare Animas, & non de corpore in corpus transire &c. & Propheticum quoque adesse Abrabae, & Dignam Habitationem unamquamque Gentem percipere, etiam ANTE JUDICIUM.* Mirum vero est, cur Sanctus ille Episcopus, postquam agnovit, Animam Divitis statim a morte migrasse in illum locum poenae, hoc est, tormentorum, & flammarum, simul etiam non agnovit, ex Justitiae mensura, Animas Justorum ante universale Judicium transferri in Caeleste Regnum, dignam videlicet habitationem morientium in Domino, uti Tormentorum locus digna est habitatio Improborum. Atqui singularia ista Judicia Dei occulta sunt, & sere semper nobis ignota; & quid de iis, qui praecesserunt, judicaverit Deus, nihil rescire licet, & nihil in posterum licebit. Porro Dies aderit, dies irae, quo tum bona, tum mala opera hominum manifesta in conspectu omnium volet Altissimus; quae nunc latent, tunc aperientur: & fiet *Revelatio justitiae Dei*, ut ait Apostolus ad Roman. II. 5. Neque frustra dictum putemus, ut nuper vidimus, *uniuscujusque opus manifestum erit, & nos manifestari oportet.* Scilicet, uti monuit Sapientia III. 2. *Justi visi sunt oculis insipientium mori, & aestimata est afflictio exitus illorum, & quod a nobis est iter, exterminium: illi autem sunt in pace; & casta generatio in perpetuum coronata triumphat.* Verum supremo adveniente Judicio, stabunt *Justi in magna constantia adversus eos, qui se angustiauerunt.* Contra Impii videntes turbabuntur timore horribili, & mirabuntur in subitatione insperatae salutis, dicentes intra se: *Hi sunt, quos habuimus aliquando in derisum. Nos insensati vitam illorum aestimabamus insaniam, & finem illorum sine honore. Ecce quomodo computati sunt inter filios Dei &c.* Quare nihil privata Dei Judicia obstant, quominus solemne totius generis humani Judicium a Deo instituat, tum ad Justorum gloriam, tum ad Iniquorum confusionem, atque ut eluceat aeterni atque incorrupti Judicis Justitia, prodentis in unoquoque, & confirmantis in omnium oculis mercedem antea in occulto redditam.

D 2

Supra

Supra objiciebat nobis Burnetus Sancti Augustini verba Lib. XII. Cap. 35. de Genes. ad Literam, videlicet: *Quid opus est Spiritibus Corpora sua in Resurrectione recipere, si potest iis etiam sine Corporibus summa illa Beatitudo praebere?* Peto & ego, quid Augustinus responderit. At Burnetus suum non censuit reliqua referre. Ergo ubi bona hominis fides? Non veritatem inquirere, sed sententiam suam persuadere incautis, unus illi erat scopus. Adferam ego, quod ille omittendum censuit. Effrene ingenium Tertulliani in Apologiae Cap. 48. & de Animae testimonio Cap. 4. necessariam Carnis Resurrectionem censuit, *quia neque pati quicquam potest Anima sola sine materia stabili, idest Carne; & quod omnino de judicio Dei pati debent Animae, non sine Carne meruerunt, intra quam omnia egerunt.* Non uno in loco Sanctus Augustinus primam ex hisce rationibus confutavit. Et quod mirere, Tertullianus a se ipso discors in Lib. de Resurrection. inanem illam opinionem confessus fuit, quum scripsit: *Nam & nunc Animas torqueri, foverique penes Inferos, licet nudas, licet adhuc exsules Carnis, probavit Lazari exemplum.* Vide etiam infra Cap. IX. ejusmodi opinionem ab ipso Tertulliano ejuratam. Porro alteram rationem adeo exaggeravit Athenagoras, ut e justis limitibus excesserit, contendens, laesum iri Iustitiam, si Animam dissociatam Corpore praemio & poenae obnoxiam statuamus, quum ad rectum Dei judicium spectet, Carni quoque suam conferre mercedem, quae particeps laborum cum in Virtutibus, tum in Vitiis fuit; & qui singula in vita egit, de quibus judicandum est, Homo fuit, non Anima sola. Urgent & alii Sancti Patres, sed moderatius, rationem istam, aequum arbitrati, suum quoque praemium aut poenam Corporibus, quum resurgent, in altero Saeculo non denegari; ac propterea constitutam a Deo fuisse Resurrectionem Carnis. Id & nos probamus: sed nullam agnoscimus rationem, cur Deus nequeat, siue nolit retributionem nunc dare Animabus, daturus postea Corporibus quoque, quum Resurrectionem omnibus imperabit. Augustinus autem ad propositam sibi quaestionem ea responderet, quae nunc etiam in Catholicorum schola a non paucis traduntur; scilicet, *Animam solutam Corpore non sic videre posse incommutabilem substantiam, ut sancti Angeli vident; siue alia latentiore causa, siue ideo quia inest ei naturalis quidam appetitus Corpus administrandi; quo appetitu returdatur quodammodo, ne tota intentione pergat in illud summum Caelum, quamdiu non subest Corpus, cujus administratione appetitus ille conquiescat.* Origenes quoque contra Celsum Lib. VIII. in Christianis morientibus desiderium Corporis a calumniis Celsi vindicat, inquires:

Aique

Atque hac ratione Resurrectionem quoque Justorum desideramus speramusque. Addit Augustinus, Apostolo abrepto in tertium Caelum & Paradisum, hoc defuisse ad plenam perfectamque cognitionem rerum, quae Angelis inest. Hoc utique non deerit, quum receptis Corporibus in Resurrectione Mortuorum, corruptibile hoc induetur incorruptione. Itaque in Resurrectione Carnis augebitur tum Justorum Beatitudo, tum Improborum miseria: & Corpus, quo nunc Anima gravatur, ineffabilibus dotibus tunc ornatum, ei ad majorem gloriam sociabitur. Habemus ergo, dummodo justitiam heic amemus, & opere compleamus, unde spes nostra & gaudium augeatur, ubi beatam illam immutationem contemplemur, quae non minus Animam perfecta felicitate, quam Corpus felicissima immortalitate donabit.

Porro Burnetus contra *Theologiam Pontificiam* bellum continuat, inquiens, *eneruari*, immo *inutilem reddi Resurrectionem*, si beatitatem Animae in Regno Caelesti anticipemus. *Quantillum est*, inquit pag. 62. *quod nobis accedit a Resurrectione, secundum hos Theologos? Quam male convenit illis cum Sancto Paulo! Hinc suum praemium unice repetit: hinc suam coronam Apostolus. Hinc aliis contra vim mortis, aut malorum quorumcumque, consolationem maxime arcessit. Postremo, quod Paulus noster Secunda Corinth. IV. 17. aeternum pondus gloriae appellat, id illi levis superpondii loco habent. Ita ille: cui responsum velim, indulgere nimis genio suo, quicumque adeo fidenter statuit varia Scripturarum loca respicere ad unum tempus Resurrectionis, in fine tantum Mundi faciendae. Jam animadvertimus, aliter sensisse divinum Magistrum, aliter ejus Apostolos. Locus ipse Pauli nuper laudatus, videlicet: Id enim, quod in praesenti est momentaneum & leve tribulationis nostrae, supra modum in sublimitate aeternum Glorae pondus operatur in nobis, sententiae nostrae consentaneum est. Neque enim Apostolus ejusmodi Gloriam differt usque ad excidium Mundi, ut sibi Burnetus persuadet, sed statim post excessum e vivis Justo homini tribuendam tradit, quum Cap. V. sequenti subdat, melius nobis esse peregrinari a Corpore, & praesentes esse ad Dominum: uti supra vidimus. Quod tamen in quaestione hujusmodi praesertim considerandum venit, duplicem ob causam summi momenti est in Christiana Religione dogma, & spes Resurrectionis. Nam ad Corpus quod attinet, ejus restitutionem ad vitam pauci aut nihili facere videtur Burnetus; & contra pro ingenti dono Justis conferendo Scriptura sacra, & veteres quivis illam habuerunt; quod nempe corruptibile hoc induturum sit incorruptionem, & per ejus societatem multiplicabitur*

bitur in Saeculorum fine Animabus iustis laetitia. *Seminatur in corruptione*, inquit Paulus Prima ad Corinth. XV. 42. *surget in incorruptione: seminatur in ignobilitate, surget in gloria* &c. Altera causa est, *Resurrectionis* quidem nomen respicere ad unum Corpus, quod cecidit, sed secum necessario involvere certitudinem Immortalitatis Animae, adhuc post Corporis interitum viventis, vigentis, neque dormientis, uti Burnetus arbitratur. Si Resurrectio Mortuorum datur, ergo Anima aeternum vivit, neque cum Corpore cadit. Negabant Sadducei, teste sancto Luca in Act. Apostolor. XXIII. 8. spirituales substantias praeter Deum; scilicet negabant *Angelos, & Spiritus*, hoc est *Animas hominum*; ac propterea contendebant, *non esse Resurrectionem*. Christiani contra cum Pharisaeis sentiebant, *Angelos, & Animas hominum immortales* existere: quod postremum, ex quo Christus resurrexit a mortuis, & mortuorum Resurrectionem dilucide praedicavit, certissimum dogma evasit apud quemcumque Christi Fidelem. Si Christus resurrexit (is autem sine dubitatione resurrexit) certo nos quoque resurgemus. Hoc identidem Apostolus inculcat; ac proinde e certitudine futurae Resurrectionis pendet atque elicitur dogma de Immortalitate Animae. Haec autem summa Fidei nostrae est, haec omnis Spes Christianorum sita. Nam si Anima cum Corpore perit, quis locus, quaeso, Religioni superest? Animam non perire continuo intelligimus, quia Resurrectio futura est, ejusque veritatem confirmavit Resurrectio Christi. Igitur uti Christiani veteres vel inter ipsas aerumnas ac tormenta fortes atque hilares consistebant, quia *spes illorum immortalitate plena erat*, ita & nos alit eadem spes, & insufficienti gaudio perfundit.

Quae nunc de certitudine Animae immortalis petenda dixi e certitudine Resurrectionis, a divinae Scripturae verbis confirmantur. Salvator Mar. XII. 26. Judaeis dicebat: *De mortuis, quod resurgant, non legistis in Libro Moysi: Ego sum Deus Abraham, & Deus Isaac, & Deus Jacob? Non est Deus mortuorum, sed vivorum*. Nondum resurrexerant Abraham, Isaac, & Jacob. Christus vero ita argumentatur: Nemo dicitur dominus rei, quae omnino periiit, & nusquam est. Atqui Deus est Deus (scilicet Dominus) Abraham, Isaac, & Jacob, atque hi non sunt vivi Corpore. Ergo ii vivunt quoad Animam. Atque haec habes, ex certa Resurrectionis fide certam nobis praestari Animorum Immortalitatem. Rursus Apostolus Prima ad Corinth. XV. 16. agebat: *Nam si mortui non resurgunt, neque Christus resurrexit. Quod si Christus non resurrexit, vana est*

est Fides nostra. Ergo & qui dormierunt in Christo, perierunt: Si in hac vita tantum in Christo sperantes sumus, miserabiliores sumus omnibus hominibus. Commemorat & Burnetus hunc Apostoli locum, ut inde educat, felicitatem Justorum expectandam esse ex Resurrectionis die. Sed alia est Apostoli mens. Animam non extingui cum Corpore, ostendendum ille sibi sumit e dogmate Resurrectionis. Nam si stat doctrina, quam depraedicamus, fore ut Mortui suscitentur, inde consequitur, etsi nunc pereat Corpus, incolumem superesse Animam, semperque vivere, donec ad pristinam cum Corpore societatem redeat. Si vero fallax est de Resurrectione opinio, necesse est, non Corpus tantum, sed & Anima in hominis morte perierit; ac propterea *& qui dormierunt in Christo, perierunt.* Nos vero Christi sectatores, addit Apostolus, quum in praesenti vita tot aerumnis & contumeliis propter Christum, & spem vitae aeternae vexemur, si verum foret, quod nonnulli ex Ethnicis & Sadducaeis persuadere vellent, videlicet perire Animas in morte nostra: ceteris hominibus miserabiliores dicendi essemus, utpote quibus neque in praesenti, neque in futuro Saeculo ullum foret solatium. En cur tanti factum fuerit dogma Resurrectionis, non solum, quia rursus excitandum est Corpus, sed etiam quia inde certo hauritur a Christi Fidelibus eximium illud Religionis principium de Immortalitate Animae. Itaque sive mortui Corporis futuram vivificationem, sive Animae immortalis existentiam, e Resurrectionis doctrina manantem, consideremus, semper fuit, semperque erit inestimabilis pretii apud Christianos dogma de ipsa Resurrectione Corporis. Hanc autem & sperare, & vehementer cupere non immerito consueverunt Sancti Patres. Nunc tantummodo Animae Justorum purgatae coronantur in Caelis. Tunc homo, e Corpore & Anima constans, resumta Carne, totus coronabitur. Tunc perfecta & omnibus numeris consummata felicitas erit, *Deo pro nobis melius aliquid providente*, ut qui jam praecefferunt ad aeterna gaudia, non sine nobis consummarentur, Hebr. XI. 40. idest non sine nobis, neque ante nos, Corpora sua in Resurrectione recipiant. Justis & nunc post mortem retributio datur & Beatitudo, quae Animabus congrua est. Postremo autem die in omnium Resurrectione plena erit & completa Beatitudo, quum suum Corpus Anima receperit.

CAP. IV.

Apocalypseos loca quaedam non Burneti somniis, sed Catholicorum sententiae omnino faventia. Quid Altare, quid Thronus Dei ibi. Remuneratio, Sanctis a Deo promissa, brevi complenda.

Requies & Requiescere in sacris Literis, & apud Patres, Felicitatem summam in Caelis jam conlatam Justis significat. Non una Resurrectio in divinis Libris.

PRacterea inquit Burnetus pag. 43. Visne scire Justorum statum post mortem? audi Johannem in Apocalypf. VI. 9. scribentem: *Vidi subtus Altare Animas intersectorum propter verbum Dei &c. Et clamabant voce magna, dicentes: Usquequo; Domine, non vindicas sanguinem nostrum de iis, qui habitant in terra? Non in Caelo, sed sub Altari, Sanctorum Animae adhuc quiescunt. Atqui Burnetus, uti jam monui, in sacris Literis ea tantum expiscatur, quae cum opinione sua consentire videntur; reliqua vero, quae adversantur, lubentissime dimittit, sive contemnit. Non aliter Ariani e sacro illo fonte ea tantum depromere consueverunt, quae Filium minorem Patre suspicari faciunt, ceteris parentes, unde ejus aequalitas manifeste confirmatur. Sed est amantium veritatem, singula in divinis Libris sincere rimari, diligenter expendere, & ubi pugnantia videantur, perquam sollicito studio conciliare. Mirum porro est, quei Burnetus pro sua opinione locum istum adhibeat, quum & eo ipso, neque injuria, utantur Catholici ad suam stabilendam. Neque is ignorat, quot interpretationibus obnoxia haec sint Johannis verba. Profecto si Burnetus haec *Altare* accipit pro materiali quopiam Altari, sub quo concludantur omnes Animae intersectorum propter verbum Dei, risum commoveat, utpote qui in nubibus aedificet. Itaque animadvertet, visionem istam factam fuisse Johanni in Caelo, quo nempe is raptus fuit spiritu. *Ecce ostium apertum in Caelo. Ascende huc, & ostendam tibi, quae oportet fieri post haec. Et statim fui in spiritu &c.* Apocalypf. IV. 1. Caelestem ergo Regiam exhibet ad instar Templi, ubi mystica candelabra & lampades, mysticum Altare & Sedes, sive Thronus Dei Patris cum Agno sedentis, ad quem Seniores, idest Angeli, alique Curiae caelestis incolae dicebant: *Sedenti in throno, & Agno, benedictio & honor & gloria &c.* Quum ergo sub Altari Johannes*

Johannes conspexit Martyrum Animas, non in terrestri quodam carcere eas vidit, uti somniat Burnerus, sed quidem in Caelestri Templo, ibique, ubi divina Patris majestas & gloria Agni, hoc est, Christi ad ejus dexteram sedentis, effulgebat. Expetebant insuper Martyres vindictam sanguinis a se pro Christo fusi, quibus responsum fuit, *ut requiescerent adhuc tempus modicum*, hoc est, existerent vindictam *post modicum tempus*: quod & re ipsa factum est in proximo Judaeorum excidio, aut in everfione Regni & Religionis Gentilium, a quibus tam enormia supplicia retulerant Christi Fideles. Atque hoc ipsum a Domino praedictum fuerat non uno in loco, sed praesertim Luc. XVIII. 8. *Dico vobis, quia Cito faciet vindictam illorum*. Ad haec, minime expectato tempore vindictae illius, *datae sunt Martyrum Animabus singulae stolae albae*. Quid, quaeſo, *Stola* ista significat, nisi *Stolam Glorïae*? qua ornatum Dominum quoque Jesum Christum praenuntiavit Isaïas LXIII. 1. *Iste formosus in Stola sua, gradiens in multitudine fortitudinis suae*. Ita mulieres ad sepulcrum Domini post ejus Resurrectionem convenientes, Marc. XVI. 5. *viderunt juvenem* (idest Angelum) *sedentem in dextris, coopertum Stola candida*. Quae *Stola* Marco est, a Sancto Luca appellatur *vestis fulgens* XXIV. 4. Matthaeus etiam XXVIII. 2. scribit: *Angelus Domini descendit de Caelo, & accedens revolvit lapidem*. Erat autem *aspectus ejus, sicut fulgur, & vestimentum ejus, sicut nix*. Quare nulla dubitatio futura est, quin *Stolae* symbolo designetur Gloria Sanctorum, & quidem in Caelo. Nam subdit Sanctus Johannes Cap. VIII. 1. *Factum est silentium in Caelo*. *Et vidi septem Angelos stantes in conspectu Dei*. *Et alius Angelus venit, & stetit ante Altare, habens thuribulum aureum; & data sunt illi incensa multa, ut daret de orationibus Sanctorum omnium super ALTARE aureum, quod est ANTE THRONUM DEI*. Non alibi Altare illud, nisi in Caelo, & quidem *ante Thronum Dei*. Atque hoc Caeleste *Altare* passim Sancti Patres depraedicant, ita ut sub hoc nomine aeternam Beatitudinem & Visionem Dei, qua Justorum Animae fruuntur, aut ipsum Christum significet. Unum do Sanctum Ephraem Syrum, qui in suo Testamento ait: *Si quis fallacibus argumentis ausus fuerit sub Altari me collocare, SUPERNUM ac CAELESTE ALTARE talis numquam videat*. Dicuntur autem *datae singulae Stolae* Martyribus, quia *Animabus* tantummodo illorum datae; nam & in Resurrectione Vitae altera etiam *Stola Corpori* dabitur, quo nempe tempore totius Hominis felicitas complebitur beatitudine perfecta.

E

Sed

Sed quid ultra inquisitione fatigamur? Habemus Johannem ipsum dilucide nobis nuntiantem, quod investigamus. Pergit ille dicere in subsequenti Cap. VII. 9. *Post haec vidi turbam magnam, & quam dinumerare nemo poterat ex omnibus Gentibus & Tribubus & Populis* (ergo de Animabus hominum heic agitur) *STANTES ANTE THRONUM, ET IN CONSPPECTU AGNI, amicti STOLIS ALBIS.* Animae erant *ante Thronum*, quo nomine sine ulla dubitatione significatur beatissima Sedes Dei Patris in Caelesti Gloria. Si erant *in conspectu Agni*, qui ad dexteram Patris sedet: manifestum est, illas tum in Caeleste Regnum fuisse invecas, tum Dei visione frui. Atque hinc simul intelligis, quid *Stola Alba* significat, videlicet *Gloriam*, qua Sancti post mortem donantur. Neque minus luculenta sunt, quae subdit infra Sanctus Apostolus, inquiens: *Hi, qui amicti sunt Stolis albis, qui sunt? & unde venerunt? Hi sunt, qui venerunt de tribulatione magna, & laverunt Stolas suas, & dealbaverunt eas in sanguine Agni. Ideo SUNT ANTE THRONUM DEI, & serviunt ei die & nocte IN TEMPLO EJUS.* Quae nuper aiebam de Templo Caelesti, confirmata heic habemus. Porro quisquis narrationem Johannis rite perpendet, illico intelliget, haec ab eo referri, non ad postremi Judicii diem, sed quidem ad tempora intermedia. Et quandoquidem haec ille vidit in Caelo, atque Animae illae stare dicuntur *ante Thronum Dei*: nonne vim facies sacris Literis, si secus interpretari velis, quam de Caelesti Gloria, Sanctorum Animabus jam conlata, & demum in Resurrectione Corporum perficienda? Matth. V. 34. monet divinus Magister, ne juremus, *neque per Caelum, quia THRONUS DEI est.* Sunt & alia Scripturarum loca, quae dubitare nos non sinunt, quid per *Thronum Dei* significetur. Referri huc etiam possunt, quae idem Sanctus Johannes Cap. XIV. 1. Apocalyps. se vidisse ait, Agnum nempe, idest Jesum, stantem supra *Montem Sion*: quo nomine nemo, qui recte sapiat, putet designari materiale Templum, ac Montem Hierosolymitanum, sed quidem Hierusalem Caelestem. Nam *centum quadraginta quatuor millia*, qui cum eo comitabantur, *cantabant ANTE SEDEM, & ante quatuor Animalia, & Seniores.* Erant autem, uti e praecedentibus didicimus, tam Sedes, quam Animalia & Seniores in Caelo. De illis vero centum quadraginta quatuor millibus dicitur: *Emiti sunt de Terra, & translati ad Caelestem Sion. Hi sequuntur Agnum, quocumque ierit.* (Ita & Paulus cupiebat dissolvi, & esse cum Christo. Salvator etiam ad parandas mansiones Discipulis suis abiturum se

se ait, *ut ubi sum ego, & vos sitis.*) Pergit dicere Sanctus Johannes: *Et in ore eorum non est inventum mendacium: sine macula enim SUNT ANTE THRONUM DEI.* Ergo & isti in Caelo statuenti. Ridendum vero foret, imaginari Animas in Caelesti Regia, atque *ante Thronum Dei* positas, quae Visione ipsius Dei carerent.

Denique ad istam veritatem stabiliendam non frustra adhibeas Sancti Pauli locum ad Hebraeos XII. 22. Postquam ad Fideles e Judaismo dixerat: *Non enim accessistis ad tractabilem Montem*, scilicet Sinam, subdit: *Sed accessistis ad Sion Montem, & Civitatem Dei viventis, Hierusalem Caelestem, & multorum millium Angelorum frequentiam, & Ecclesiam primitivorum, qui conscripti sunt in Caelis, & Judicem omnium Deum, & Spiritus Justorum perfectorum.* Et si militantem Ecclesiam heic designatam velis, negare tamen nequeas, quin & Ecclesia triumphans hisce comprehendatur: quod etiam agnoverunt Interpretes sapientiores. Nam qui in Christum credit, ejusque legem fideliter complet, communionem habet per Fidem & Caritatem cum Angelis, & filiis tum veteris, tum novi Testamenti, tam in Terra militantibus, quam in Caelo regnantibus. Qui heic dicuntur *Spiritus Justorum perfectorum*, nihil aliud sunt, nisi Animae Justorum, purgatae vel ante, vel post mortem, atque in Caelestem Patriam translatae, quae nunc ibi Beatitudine fruuntur. Teste Grotio, Hebraei quoque Scriptores passim admittunt *Spiritus*, Sanctorum videlicet vita functorum, qui ad *solum Gloriae ascendunt citius aut tardius, quo magis minusve purgati ex hac vita abierunt.* Mitto *Ecclesiam primitivorum*, quo nomine aut Patriarchae, aut Apostoli, primive Martyres inter Christianos jam Caelo donati, indicari creduntur. Satis quippe ad opus nostrum est mentio *Spirituum*, in *Caelesti Hierusalem* jam degentium, quorum consortium Apostolus, non post Millia multa annorum, uti Burnetus cerebro suo ariolatur, sed aut statim a morte, aut post purificationem in altera Vita, sperare Justos jubet. Quare testes habemus, contra quam Burnetus censuit, non uno in loco divinas Literas, minime a Justorum Spiritibus expectari redivivae Carnis societatem in fine Mundi, ut ad Beatitudinem & Visionem Dei admittantur in Caelis. Alia etiam ex parte in eadem doctrinam conspirant sacrae ipsae Literae, dum ubique Justis faciunt praemii & Beatitatis spem brevi complendam, Burneto sane adversantes: qui ne hoc quidem factum post Mille & Septingentos Annos contendit; & negat ullam Retributionem bonorum operum faciendam ante extremi Judicii diem, a

quo fortassis absumus per aliquot alia Annorum Millia. Non ita Christus Dominus, non ita ejus Apostoli ab ipso edocti nos edocuerunt; sed illi ingentes ubique animos fecere Fidelibus pro Christo mortem opponentibus, aut in Christo morientibus, spe mercedis ac retributionis propediem subsequuturæ: Impius foret, qui aut illos deceptos, aut deceptores suspicaretur. Jamque nonnulla innui loca, unde spes Coronæ non diu differendæ Justis ingeritur. Pauca nunc alia accipe.

Sanctus Johannes in fine Apocalypseos XXII. 12. Dominum hæc loquentem audivit: *Ecce venio cito, & merces mea mecum est, reddere unicuique secundum opera sua.* Duo pollicetur Dominus. Primum est se *Cito* venturum. Ergo non post aliquot Annorum myriades: quod Burnetus persuadere nobis vellet, unum tantummodo Adventum Domini agnoscens in fine Saeculorum. Christus autem non solum *Cito* adveniet, sed etiam secum adferet *mercedem operum.* Et ne de vocis istius significatione dubitatio suboriarur, addit *Reddere unicuique secundum opera sua.* Si & *Dominus*, & *Merces* uno tempore venient, & *Cito* utriusque erit adventus: necesse est agnoscamus, ante Mundi excidium, quod nondum post tot Saeculorum cursum vidimus, Justorum & Injustorum Animabus reddi, & jamdiu redditam fuisse Retributionem operum, manifestandam postea universo Orbi in gloriosa Revelatione Domini nostri Jesu Christi. Quum vero subdat Dominus eodem in loco vers. 14. *Beati, qui lavant Stolas suas in sanguine Agni, ut sit potestas eorum in ligno vitae, & per portas intrent in Civitatem:* quali praemio donandi sint, & quidem *Cito*, Martyres, aut etiam quicumque Deo fideliter servientes in osculo Domini decedunt, non difficile intelligimus. *Lignum Vitae*, Caelorum Beatitudo est. Quod si dubites, animadvertite, promitti Justis ingressum *in Civitatem.* Quæ est ista Civitas? Utiq; Caelestis Hierusalem, Ecclesia Triumphans in Caelis, quam praecedentes colores satis delineant. Neque alia esse heic potest: nam *qui lavant Stolas suas in sanguine Agni*, procul dubio in Militante Ecclesia sunt. Ergo si intraturi dicuntur, ex quo Stolas suas laverunt, *in Civitatem*, ingrediantur oportet in Civitatem Caelestem, ubi Visio beatifica Dei intrantes manet. Accedat nunc, qui illud *Cito*, aliosque Christi *adventus* non multo post promissos, de uno postremo Judicio interpretetur: quasi tempus inter diem, quo Dominus resurrexit e mortuis (jam abiire Mille & Septingenti Anni) & supremum diem Mundi, quo universum quoque humanum genus resurget, tantillum sit, ut breve, ac *prope* & *cito* transiturum appellari

pellari potuerit. Nae is duriora nobis propinabit, quam concoquere nos possumus, & ferre velint increduli.

Profert etiam Sanctus Johannes in eadem Apocalypsi XIV. 13. sententiam, quam Burnetus pag. 42. praecoccupavit, veluti suae opinionioni faventem. *Beati*, inquit Johannes, *Mortui, qui in Domino moriuntur*. Subdit Burnetus: *Quare vero beati? Quoniam visi. ne Dei beatificati statim fruuntur? Hoc non occurrit apud Prophetam. Quid tum demum?* Post quae adtexit reliqua Johannis verba, quae ille ita Latine reddit: *Ut requiescant a laboribus*, inquit *Spiritus*, & *opera eorum eos subsequantur*. Haec autem opera Burnetus ait, suum praemium tandem habitura sunt, hoc est, ut ille sibi fingit, quum rerum humanarum finis, fortassis adhuc remotissimus, adveniet. Verum quisquis non praecoccupato animo Johannis verba perpendet, nullo negotio inveniet, quod Burnetus quaerere, aut invenire noluisset. Non dicit Spiritus, *ut requiescant a laboribus*, & *opera eorum eos subsequantur*; sed quidem: *Amodo jam dicit Spiritus, ut requiescant a laboribus suis*. Opera enim illorum sequuntur illos. *Beati sunt, Requiescunt*, quia Opera illorum sequuntur illos. Sed quare *sequi* dicuntur *Opera*, quae jam facta fuerunt, neque amplius existunt? Quia morientes in Domino secum ferunt bonorum Operum merita, atque illorum praemium a Deo consequuntur. Si merces piis a Deo promissa, in Saecula plura differtur; nonne intelligis, prorsus enervari promissionem Dei? Spes etiam nostra langueat oportet, & frustra *Beati* appellantur in pace & caritate Christi decedentes, qui fructum bonorum operum se sequentium ne post mortem quidem percipiunt. At, inquit Burnetus, fructum percipiunt, quia *requiescunt*. Scilicet, ut is pag. 83. diserte scripsit, *Animae e Corpore evolantes transeunt in statum quietis, silentii, & aegritudinis, nempe quoad Mundum externum; ut nihil habeamus commercii cum Mundo externo in statu mortis, non magis quam in statu Somni: a quo Somno tum solum excitabimur, quum tuba Archangelii insonabit, ut ille somniat*. En quo tandem abiit *Beatitudo* morientibus in Domino promissa, & praemium Operum, quae pios vel post mortem sequuntur. Sed quanto aequius nos Justorum morientium mercedem minime procrastinatam sentimus, quum non diu procrastinandam toties divinae Literae nos certos effecerint? Nuper vidimus in Apocalypsi: *Ecce Venio Cito, & Merces Mea Mecum est*. Paria quoque habet Apostolus ad Hebr. X. 34. ubi Fideles Judaeos ad patientiam hortatur,

tatur, eisque spem ingerit praemii, in Caelis brevi completam. *Rapinam*, inquit, *bonorum vestrorum cum gaudio suscepistis, cognoscetes, vos habere meliorem & manentem substantiam*. En bona Opera in Terris, & praemia in Caelis numquam interitura. Pergit Apostolus: *Nolite itaque amittere confidentiam vestram, quae magnam habet remunerationem: hoc est, inculcat magnitudinem praemii. Patientia enim vobis necessaria est, ut voluntatem Dei facientes, reportetis promissionem*. Sed quandonam, beate Apostole, *promissionem* reportabimus? ecquando ad *magnam illam Remunerationem* pervenimus? Burnetus Britannus persuadere nobis vellet, promissa Dei ne post Saecula quidem Septem & Decem completa fuisse Fidelibus, quos tu erudiebas, atque ad patientiam laborum & confidentiam animabas: immo is ad diuturniora etiam tempora illorum complementum protrahit. Verum Apostolus interrogationem nostram minime expectavit, & Judaeis tunc in Christum credentibus, patientiam brevi coronandam pollicitus est, continuato sermone inquires: *Adbuc enim modicum aliquantulum, qui Venturus est, Veniet, & non tardabit*.

Quid igitur aliud intelligamus in Sancti Johannis verbis, nisi *Morientes in Christo*, & sociatos operibus suis ad alteram vitam abeuntes, aut statim, aut non diu post, praemio donari bonorum Operum? Quod si forte vox *Requiescant a laboribus suis*, id unum sonare Burneto videatur, ut piorum *Animae* ad *Quietem & Requiem* somno similem ferantur, quam teneant usque ad supremi Judicii diem: norit Lector minus peritus, hac ipsa phrasi reapse designari beatam Vitam in Caelo Justis promissam, quum nempe requiescunt, atque aeternum requiescent, ac delectabuntur in contemplatione Dei glorificantis. Atque haec est illa *Requies*, quam Sanctus Paulus ad Hebraeos IV. non semel commemorat, inter alia scribens versicul. 10. *Qui enim ingressus est in REQUIEM EJUS, etiam ipse requievit ab operibus suis, sicut a suis Deus*. Quae quidem verba indicant jam exstitisse, qui in beatissimam illam *Requiem* fuerant translati. Quod luculentius idem Apostolus significat, dum addit: *Festinemus ergo ingredi in illam Requiem*. Certe non in Ecclesiam, sive in Fidem depraedicatam a Christo ingressuri erant (jam enim hanc amplexi fuerant Hebraei, ad quos Paulus scribit) sed quidem per bona Opera & per patientiam, in *Requiem illam* Caelestem, ad quam Legis opera non deducebant, sed Evangelii opera deducunt per Sanguinem & Merita Jesu Salvatoris nostri. Audi Chrysostomum in hunc locum, Homil. VI. in Epistol. ad Hebr.

Hebr. τίς ἔν ἐστιν ἄλλῃ ΚΑΤΑ΄ΠΑΤΕΙΣ, ἀλλ' ἢ ἡ ΒΑΣΙΛΕΙΑ ΤΩΝ ΟΥΡΑΝΩΝ, ἧς εἰκὼν καὶ τύπος ἐστὶ τὸ Σάββατον; *Quaenam est ergo alia REQUIES, quam REGNUM CAELORUM, cuius imago & typus est Sabbatum?* Quod si testem cupis ab ipsis Apostolicis temporibus, accipe Sanctum Clementem I. Romanum Pontificem, ac Petri Apostoli discipulum & successorem, cui a multis tribuitur Epistola Secunda ad Corinthios, monumentum certe e primitiva Ecclesia ad nos usque productum. Ibi §. V. haec habet; *Et scito te, fratres, quod peregrinatio carnis hujus in hoc Mundo, brevis est, ac parvi temporis. Promissio autem Christi magna & admirabilis est, atque (ΑΝΑ΄ΠΑΤΕΙΣ τῆς ΜΕΛΛΟΤ'ΕΗΣ ΒΑΣΙΛΕΙΑΣ, καὶ ΖΩΗΣ Α'ΙΩΝΙΟΥ) REQUIES FUTURI REGNI, & VITAE AETERNAE.* Ita in Actis Martyrii Sanctae Theclae (quae Johannes Ernestus Grabe Britannus Tom. I. Spicilegii Patrum edidit, opinatus, ea ad primitivae Ecclesiae tempora spectare) legimus, dixisse Paulum Apostolum: *Beata Corpora & Spiritus Virginum, quia verbum Patris operabitur eis salutem in die Filii ejus (ἀνάπαυσιν ἔχουσιν ἐνς αἰῶνα αἰῶνος)* Requiem habebunt in Saeculum saeculi. Paria habet Sanctus Iustinus in Dialogo cum Tryphone pag. 350. Edition. Colonienf. ubi de glorioso Christi adventu in fine Mundi agens, excindendos ab eo iniquos ait, τὰς δὲ δι' ἑαυτὰς ἀνάπαυσαι, *Suos autem in Requite collocabit, omnia illis reddens, quae exspectaverant.* Sed & Sanctus Irenaeus Lib. V. Cap. 31. ait: *Adducens Justis Regni tempora, hoc est, Requietionem.* Clementem quoque Alexandrinum audi, qui Lib. V. Stromat. ex Platone agens de fine vitae optimaе, inquit: *Non cessabit, qui quaerit, donec invenerit. Quum autem invenerit, admirabitur. Admirans autem regnabit: Regnans vero Requiescet.* Aliis quoque in locis Chrysostomus Requiem non semel pro Beatorum vita in Caelis usurpat, ut alios praetercam. Nimirum ex Epistola ad Hebraeos, & atque ex aliis sacrarum Literarum locis deduxere Patres significationem vocis *Requies* in hoc sensu: quod & sexcentis aliis testibus ostendere mihi in promptu foret. Ac propterea acceptam a primis Saeculis phrasim hanc retinet Ecclesia Catholica, quum Justis vita functis a Deo precatur *Requiem aeternam, Requiem sempiternam*, ut caelestis Patriae delicias designet. Qui ergo in mentem Burneto venit, *Requiem* in divino Libro Animabus Justorum a Corpore segregatis promissam, nihil aliud esse, nisi ignobilem Quietem & Somnum, donec post quamplurima Saecula ad Regnum & ad Vitam aeternam in fine Mundi advocentur? Ecce Apostolos & veteres

& veteres Patres, qui nullam aliam agnoscunt *Requiem*, nisi *Regnum Caelorum*, & *Vitam aeternam*. Quare quum in Apocalypsi appellentur *Beati, qui in Domino moriuntur*, & polliceatur Deus, eos *amodo*, idest a tempore mortis, futuros in beatissima illa *Quiete*: quid aliud restat, nisi ut eo quoque ex loco deducamus Iustorum Beatitudinem eximiam vel ante postremum Iudicium; quae tandem non primum ineunda, sed tantummodo augenda & complenda erit, quum Caro etiam ab Animabus refumta, in conspectum Dei & ipsa conscendet? Quum vero Paulus nuper Hebraeis Fidelibus, & nobis quoque dixerit: *Festinemus ergo ingredi in illam Requiem*, mirum est, quei Burnetus non perspexerit, se incaute adversari, ne dicam irridere Apostolo, dum contendit, ipsum, ejusque discipulos, *festinasse* quidem, ut ingrederentur in *Requiem illam* Caelestem, sed ne post Annos sane Mille & Septingentos id illis contigisse, atque expectanda eis adhuc esse complura Saecula, ut illuc tandem ingrediantur. Quis haec ferat?

Alia certe erat Paulo fiducia, alia spes, immo fides. Atque id ipsum erui posse mihi videtur ex ejus verbis ad Ephesios II. 5. ubi ait: *Et quum essemus mortui peccatis, convivificavit in Christo (cujus gratia estis salvati.) Et conresuscitavit, & confedere fecit in caelestibus in Christo Jesu.* Quin Praeteritum heic pro Futuro adhibitum recte censeatur, non abnuo. Quod spe nunc tenemus, re quoque suo tempore consequemur. Nihil tamen obstat, quo minus & Praeteritum, & Futurum Sanctus Apostolus conjunxisse potuerit. Praeesserant enim Stephanus, alique Justi inter Christianos, quos Deus *confedere* fecerat *in caelestibus*. Se quoque, & Ephesios, ad quos scribit, & ceteros in posterum Justos, statim a morte confessuros *in caelestibus* tanta fiducia credit, ut sibi videatur quodammodo factum, quod faciendum erat. Cur haec interpretatio non toleranda solum, sed etiam sine haesitatione excipienda sit, quae sequuntur Apostoli verba, subindicant. Quippe subdit: *Ut ostenderet in Saeculis supervenientibus abundantes divitias gratiae suae in bonitate super nos in Christo Jesu.* Hisce verbis Saecula Christianae Ecclesiae, ad finem usque Mundi decurrentia, Paulus significat. Si nemini (quod Burnetus opinatur) confedere licuit, aut licebit *in caelestibus*, nisi in Resurrectione omnium: quei, quae, *abundantes divitias gratiae Dei* Apostolus adeo extollit supra tempora antecedentia Christum? Non defuere in Judaica Lege Sancti homines. At ubi statuamus, Christi Fidelium iustorum Animas, non secus atque Animae Abraham, Isaac, & Jacob, ac reliquorum

reliquorum Patrum, a Caelesti Regno adhuc exclusas, & ad illud frustra aspirantes, nisi quum tuba novissima insonabit: ubi sunt, inquiet Judaeus, *abundantiae illae divinae gratiae*, quas Apostolus in novo Foedere tantopere deprædicat? Nihil hæcenus plus contigit Christianis Justis, quam Justis Judæis. Verum quum tanta Apostolo cura sit effèrendi copiam & magnificentiam bonorum, quæ per Christum nobis obveniunt, & præcipue is animadvertat, nos *convivificatos* in Christo fuisse, nos *conresuscitatores*, immo & ad beatam sedem *in Caelestibus* una cum eo translatos (quod donum finis est omnium desideriorum, ac Religionis ipsius complementum) rite hinc argumentari possumus, aliam, quam putet Burnetus, esse oeconomiam Dei misericordis & Remuneratoris, neque immensas moras ejus beneficentiae esse injiciendas in remunerandis servis & amicis suis: quod & ex aliis Scripturarum locis elucere jam vidimus.

Attamen quum verbum *conresuscitavit* obstare huic interpretationi videatur; neque enim *Resurrectio* intelligi consuevit, nisi de Corpore excitato aut excitando e mortuis: quod divinae potentiae opus non in *supervenientibus Saeculis*, sed quidem in extremo Judicii die spectandum est; ac propterea aequius sit, hæc interpretari de Resurrectione & Conversatione spirituali seu mystica; accuratius investigemus oportet, quæ sit vis vocis istius. Nulla dubitatio est, quin *Resurrectio mortuorum*, & *Resurgere a mortuis* fere semper in Scripturis significet Corporis antea mortui reditum per virtutem divinam ad pristinam societatem & foedus cum Anima. Et quandoquidem universum hominum genus in fine Mundi excitandum e tumulis est, ut solemne Judicium Dei subeat: propterea passim in sacris Libris *Mortuorum Resurrectio* terribilem illum diem designat. Hæc prima & communior significatio. Succedit & altera; nempe *Resurrectio Animæ* dumtaxat, quum ipsa e peccatis resurgit Deo. Nuper dicebat Apostolus nos, *quum essemus mortui peccatis, convivificatos* fuisse in Christo. Quæ heic appellatur *Vivificatio*, alibi dicitur *Resurrectio*. Ad Colossens. II. 12. *Consepulti ei in Baptismo, in quo & Resurrexistis per fidem*. Et ibidem III. 1. *Si Consurrexistis cum Christo, quæ sursum sunt, sapite*. Tercio per *Resurrectionis* vocabulum significatur consequutio Regni caelestis, seu æternæ Beatitudinis in Caelo. Luc. II. 34. hæc de Domino nostro Jesu Christo Simeon prædixit: *Ecce positus est hic in ruinam, & Resurrectionem multorum in Israel*. Scilicet multi, quod in eum non crediderint, damnabuntur: multi vero, quia crediderint, salu-

F

tem

tem consequentur aeternam: Habemus etiam Johann. V. 29. *Et procedent, qui bona fecerunt, in Resurrectionem Vitae: qui vero mala egerunt, in Resurrectionem Judicii.* Ubi vides, *Resurrectionem vitae* significare Regnum caeleste atque aeternam Beatitudinem; & diversam hanc esse a *Resurrectione Mortuorum*, quum nempe tam probi, quam improbi suscitabuntur. Quare quum apud Lucam XIV. 14. dicitur: *Retribuetur enim tibi in Resurrectione Justorum*, ne puta cum Burneto, inde erui, tum solum a Deo retribuendum fore Justis, quum veniet Filius hominis ad judicandum genus humanum. Nam uti Grotius etiam animadvertit, *Resurrectio Justorum* idem est ac *Resurrectio vitae*, nempe quum Justus ad vitam immortalem & beatam transfertur in Caelum: quod ante Judicium supremum Animabus Justorum, heic, aut post mortem purgatis, contingeret; integro autem homini, hoc est & Animae, & Corpori, concedetur in extremo illo universali Judicio. Quamobrem ubi Apostolus nos *conresuscitatos* cum Christo ait, necesse nihil est in iis verbis imaginari Resurrectionem Corporum, quamquam & multi Sancti Patres in Christi Resurrectione resurrexerint & ipsi in carne, & una cum eo Caelum petiisse non immerito a multis credantur: sed interpretari licet aut de Resurrectione spiritali, aut de Resurrectione Animarum tantummodo ad Gloriam caelestem. Denique manifestum est ex Apocalypseo Cap. XX. 4. non unam Justis esse Resurrectionem. Quippe ibi de iis dicitur: *Vixerunt, & regnaverunt cum Christo mille annis. Haec est Resurrectio prima. Beatus & sanctus, qui habet partem in Resurrectione prima. In his secunda mors non habet potestatem.* Ergo duplex *Resurrectio* futura. Ex Catholicorum sententia, quam & complures e Protestantibus amplectuntur, recte sequitur, spectare *Resurrectionem primam* ad Animas Justorum Corpore solutas, atque ad visionem Dei translatas; alteram vero in fine Mundi complendam, quum nempe & illorum Corpora resurgent. Burnetus Novator explosam jamdiu opinionem Millenariorum resuscitans, primam Resurrectionem interpretatur de Resurrectione Carnis, quam post annos mille subsequetur Resurrectio ad perennem Beatitudinem in Caelis. De hoc infra agemus. Nunc satis nobis sit animadvertere, ne illum quidem inficiari posse, quin *Resurrectionis* nomen usurpatum fuerit ad designandum ingressum Justorum in possessionem felicissimi Regni caelestis. Id ille sibi fingit eventurum dumtaxat mille annos post universale Judicium. Nos haecenus ostendimus, Retributionem aut statim a morte, aut post purgationem Justis negan-

negandam non esse, atque in hoc dogma conspirare sacras ipsas Literas, quarum verba perpendimus.

CAP. V.

Millenariorum error a quibus prodierit, quosve sectatores habuerit.

A Sanctis Patribus confutatus, & jamdiu expofus.

Adversus illum perfpicua Apocalypfeos loca.

A Libris Hagiographis nos deinde Burnetus pag. 50. appellat ad veteres Patres, hoc est ad Traditionem, contendendo, tribus primis Ecclesiae Saeculis, nullam reperiri Graecum aut Latinum, praeter Haereticos, aut unum forsan Cyprianum, qui defunctorum Animas statim a morte ad visionem Dei, & caelestis Gloriam possessionem transtulerit. Itaque pro sua opinione laudat Justinum Martyrem, Irenaeum, Tertullianum, Origenem, Victorinum, Lactantium, & alios, quos Cap. I. commemoravi. Non multo studio opus fuit Burneto, ut hosce Auctores pro sua opinione congereret. Eisdem quoque Anno Christi MCCCXXXIII. laudaverat Johannes XXII. Romanus Pontifex, ut ex Historia novimus, quum in eandem opinionem & ipse inclinaret, reclamantibus tamen Galliarum Theologis. De ipsis quoque Patribus mentionem habes apud Genebrardum & Stapletonum, atque in Comment. Kortholti ad Justinum Martyrem. Singulorum etiam verba protulit Sixtus Senensis Lib. VI. Annotat. 345. Bibliothecae Sacrae; neque ea dissimulavit Cardinalis Bellarminus Lib. I. Cap. I. de Sanctior. Beatit. Itaque non nova adfert Burnetus, sed jam protrita argumenta: quae tamen nihil obstitere, quominus Ecclesia quaestionem, cui liber cursus per complura Saecula fuerat, postremo tandem decreto dirimeret, atque ita dirimendam justo judicio censuerit. Gravi interim culpa aut malignitatis, aut ignorantiae Burnetus laborat, quum tribus primis Ecclesiae Saeculis nullum ex Patribus opinioni suae adversantem venditat. Ego, quanta potero brevitate, duo ostendam. Alterum est, vel ipsos Patres, quos veluti commilitones suos Burnetus in aciem educit, aut magnificentius sensisse, quam ipse, de statu Animarum post mortem, aut aperte etiam adhaesisse Catholicorum sententiae. Alterum est, contra Catholicorum dogma Traditionem germanam neutiquam proferri posse. Quippe legitima illa Traditio appellatur, ut inquit Vincentius Lirinensis in Commonitorio, *quod Semper, quod Ubique,*

quod ab Omnibus traditum est. Atqui opinio de dilata usque ad excidium Mundi Beatitudine neque semper, neque ubique, neque ab omnibus tradita fuit; immo communior vel ipsis iis Saeculis, quae pro se laudat Burnetus, semper habita est Catholicorum sententia. Ergo frustra heic a Burneto exeruntur veteres, suae opinioni faventes: & potissimum quod non pauci ex iis, sive a se ipsis discordes, sive quod firmiorem demum arbitrati fuerint sententiam, quae in Catholica Ecclesia stabilita deinde fuit, in eam concessere, & adhuc militant nobis.

Quod antequam aggredior, praemittendum est, Millenarios Scriptores opinatos fuisse post Resurrectionem Carnis in postremo Iudicio Sanctos cum Christo regnatos in terra hac renovata Mille Annos; & deliciis operam duros: quo annorum spatio transacto in Caelum denique, & ad visionem beatificam Dei consecuturi erunt. Ex opinione ejusmodi consequatur, Sanctorum Animas e Corpore abeuntes Caelesti gloria minime donatas, neque donandas, nisi peracto universalis Iudicio, immo annis etiam Mille post ipsum Iudicium in terra transactis. Primus commentum hujus auctor fuit *Cerintbus Haeresarcha*, qui, vivente adhuc Sancto Johanne Apostolo, virulenta sua dogmata disseminavit. Accesserunt deinde Marcionistae, Montanistae, Meletiani, alique Haeretici. Ad eam opinionem Catholicis quoque viris persuadendam, vel ipsis temporibus adhibitus fuit, perperam intellectus, Apocalypseos locus Cap. XX. 4. quem nuper innuebam: *Et regnaverunt cum Christo Mille Annis. Haec est resurrectio prima.* Quod certum est, inter primos *Papias Hieropolitanus Episcopus*, cui aut cum Johanne Apostolo, aut cum Discipulis Apostolorum multa fuerat familiaritas, Millenarium illud Regnum probavit, sectatus *Traditiones* sive fabulas Judaeorum, ea, quae de Regno Messiae in sacris Libris traduntur, carneis tantum oculis metientium. E Cerinthi tamen Regno commenticio Papias rescuissse creditur corporeas delicias, spiritales dumtaxat ibi excogitans: quod tamen ego affirmare non a-sum. Sanctum Hieronymum testem habeo de Vir. Illustrib. Cap. XVIII. cujus verba sunt: *Hic, scilicet Papias, dicitur Mille Annorum Judaicam edidisse Δωριπώσι: quem sequuti sunt Irenaeus, & Apollinarius, & ceteri, qui post Resurrectionem ajunt in carne cum Sanctis Dominum regnaturum. Tertullianus quoque in Libro de Spe Fidelium, & Victorinus Petabionensis, & Lactantius hac opinione ducuntur.* En ergo unde emerferit hujusmodi opinio, ex cujus resurrectione gloriam sibi nuper emendicavit Burnetus. rum

rum *Traditio*, sive Thalmudica (hoc enim significat *Δωρεῖσθαι*, ut nos docuit Sanctus Epiphanius Haeresi 33.) originem dedit Chiliastrarum opinioni. Grotius quoque animadvertit, agi de duabus Resurrectionibus, de Mille Annis felicibus, de Bello Gogij & Magogij, in Targum Megilla, apud Aben Esdram, Saadium, aliosque Rabbinos. Quare vides, e quam lutulento fonte haec hauserit Papias. Porro quis & quantus vir ille fuerit, juvat etiam discere ab Eusebio Caesariensi, qui Lib. III. Cap. ultim. Histor. de ipso in haec verba loquitur: *Nuda vocis Traditione ad se pervenisse plura testatur, novas quasdam scilicet Salvatoris Parabolas ac Praedicationes, aliaque Fabulis propiora. Inter quae & Mille Annorum spatium post Corporum Resurrectionem fore dicit, quo Regnum Christi corporaliter stet in orbe terrarum. Quae quidem ita opinatus esse videtur Papias ex male intellectis Apostolorum narrationibus, quum ea, quae arcano quodam sensu, & exempli causa ab illis dicebantur, non satis pervidisset. Fuit enim Mediocri admodum Ingenio praeditus, ut ex scriptis illius conicere licet. Plerisque tamen post ipsum Ecclesiasticis Scripturibus ejusdem Erroris occasionem praebuit, hominis vetustate sententiam suam tuentibus: puta Irenaeo, & si quis alius ejusdem Opinionis fautor existit. En qualem ducem sequuti sunt Irenaeus, Justinus, Tertullianus, ceterique Chiliastrae: qui quando in ejusmodi opinionem concesserant, nil mirum, si coacti sunt negare Sanctorum Animabus Beatitudinem in caelesti Regia ante postremum Christi Domini Adventum; ridiculum quippe fuisset eas a tanto gaudio exturbare, ut Mille Annis post Resurrectionem Corporum in Regno terreno versarentur. Verum etsi quatuor primis Ecclesiae Saeculis licuit huic opinioni adhaerere, illustresque viri eam adoptasse & tradidisse reperiantur: nihilo tamen secius doctissimi inter Patres ab ea semper abhorruerunt.*

Quid Eusebius senserit de illa, jam accepimus. Pari constantia non uno in loco Sanctus Hieronymus Judaicum Dogma ipsam appellat, & in Proemio ad Lib. XVIII. in Isaiam Prophetam auctor est, Sanctum Dionysium Episcopum Alexandrinum in Libris contra Nepotem Episcopum, Millenarii Regni fabulam infectatum fuisse. Hieronymi haec sunt verba: *Irenaei tantum Lugdunensis Episcopi faciam mentionem; adversum quem eloquentissimus Dionysius Alexandrinae Ecclesiae Pontifex elegantem scribit Librum, irridens Mille Annorum Fabulam, & auream atque gemmatam in terris Hierusalem &c.* Floruit Sanctus Dionysius, Origenis Discipulus, Saeculo Christi Tertio, atque ab Anno CCXLVII. usque ad CCLXIV.

aut

aut CCLXV. Cathedram illam tenuit, vir sacra eruditione & eloquentia supra ceteros sui temporis clarissimus. Hic autem tanta vi rationum in Millenarios pugnavit, qui in sua Dioecesi succrescebant, ut omnes ab ista opinione abduxerit, & schisma eam ob causam natum, Eusebio teste, sustulerit. Nisi nobis tempus edax invidisset *Libros Cati Presbyteri Romani*, qui Sancto Dionysio longe antiquior fuit, fortassis & ab illo Millenarium Regnum impugnatum videremus. Is certe, Eusebio teste Lib. III. Cap. 28. Histor. Cerinthum carpit, quod ab illo primum venditata fuerit ejusmodi illusio. Quum tamen liberum adhuc cuicumque foret Millenarium hoc somnium amplecti, non defuere Saeculo Christi Quarto, qui suum illi suffragium addidere. Prae ceteris Apollinarius junior, innumerabilium voluminum Scriptor, sed & non unius haeretici dogmatis disseminator, circiter Annum CCCLXX. eandem recoxit crambem, Libris editis adversus Dionysium Alexandrinum. At in Apollinarium hac de causa Sanctus *Epiphanius* Haeres. LXXVII. §. 26. & Sanctus *Basilius* in Epistol. LXXIV. insurrexerunt. *Didymus* quoque Alexandrinus Enarrat. in Epistol. I. Petri, Sanctus *Ephraem* in Opusc. CXI. *Nazianzenus* quoque, & *Dionysius*, ut vulgo dicitur, Areopagita in Lib. de Ecclesiast. Hierarch. Chiliastrarum somnia improbarunt. Anathemate insuper percussus fuit ob varios de Christo errores idem Apollinarius a Damaso Papa in Romana Synodo, uti memoriae prodidit Sozomenus, Anno CCCLXXXIII. ut nonnulli putant, sive CCCLXXVI. aut CCCLXXVII. ut alii arbitrantur. Porro sacrorum Annalium parens Baronius scribit, in eo ipso Concilio damnatum fuisse Chiliastrarum errorem, qui propterea deinde evanuit. Et profecto nulla dubitatio est, quin impia Apollinarii dogmata de Trinitate & Christo proscripta tunc fuerint. Verum ad Millenarii Regni opinionem quod attinet, eadem sententia illam profligatam fuisse, conjectura quidem doctissimus Cardinalis censuit, sed nulla certa monumenta evincunt. Immo illam intactam adhuc abiisse, sunt quae mihi persuadent. Nam praeclaudatus Hieronymus in eodem Proemio Lib. XVIII. in Isaiam, ubi tradidit Judaicum Millenarii Regni commentum disiectum fuisse a Dionysio Alexandrino, haec addit: *Cui duobus Voluminibus respondit Apollinarius, quem non solum suae sectae homines, sed & nostrorum, in hac parte duntaxat, plurima sequitur multitudo, ut praesaga mente jam cernam, quantum in me rabies concitanda sit.* Haec literis consignabat Hieronymus post Annum Christi CCCGIX. Neque enim prius Commentarios

tarios in Isaïam elucubrasse potuit, uti Martianaes ostendit. Si Romae in solemni Concilio Millenarius error nigro obelo confixus fuisset, veri minime videtur simile, tot e Catholicis, quum haec scribebat Hieronymus, ab ipso fovendo nondum fuisse deterritos. In aliis quoque Libris post Sancti Damasi mortem scriptis is minime audet Haereticam appellare hujusmodi opinionem. Ad haec Sanctus Augustinus Lib. XX. Cap. 7. de Civitat. Dei, hoc est in Opere, quod ipse ad umbilicum perduxit circiter Annum Christi CCCCXXVI. opinionem hanc neque prorsus extinctam, neque omnino execrandam prodit, immo se olim in eam concessisse testatur. *Quae opinio*, inquit, *esset utcumque tolerabilis, si aliquae deliciae spirituales in illo Sabbato adfuturæ Sanctis per Domini praesentiam crederentur. Nam etiam nos hoc opinati fuimus aliquando.* Denique pro eadem opinione circiter Annum Christi CCCCXV. stetit Severus Sulpicius. Nam, uti Sanctus Hieronymus Lib. XI. Cap. 36. in Ezechiel. scribit, Millenarium Regnum pollicitus nobis fuit *nuper Severus noster in Dialogo, cui Gallo nomen imposuit.* Itaque Millenarii erroris funus tutius differatur in Saeculum Christi Quinctum, quo revera leves in auras abiit. Sunt qui scribant, illius causa a Gelasio summo Pontifice Anno CCCCXCIV. Severi Sulpicii Dialogum in Concilio Romano improbatum fuisse. Ego rem in medio relinquo. Certe Gennadius in Opusculo de Ecclesiastic. Dogmat. ejusmodi Opinionem, uti sacris Literis adversantem, improbat.

Ceterum in confutanda Millenariorum Fabula tempus ego non teram. Laterem lavant, & caecutire volunt in meridie, qui temporibus nostris, ut aliquid novi adferant, a doctioribus & sapientioribus hac in re dissentire non erubescunt. Hoc unum dicam, videlicet, Sanctum Johannem in Apocalypf. XX. 4. dum ait: *Et vixerunt, & regnaverunt cum Christo Mille Annis*, perspicue haec scripsisse de Martyrum Animabus a Corpore separatis; vidit enim Animas decollatorum propter testimonium Jesu; atque adeo illarum Regnum statuitur, antequam cum rediviva Carne contubernium recipiant. Dicit, inquam, Animas: quo nomine, quum de vita functis agitur, mortalium tantummodo Spiritus designantur. Quid ergo Millenarius Burnerus studet, ut incautis obtudat, non Anima tantum, sed & Corpore e mortuis suscitato, regnatos Sanctos cum Christo in somniato suo Regno? Deinde quid est, quod post Mille Annos solvetur Satanas, & seducet Gentes, quae sunt super quatuor angulos terrae, Gog & Magog? Si Burnero hdes, praecedet

praecedet totius generis humani Resurrectio in Carne, ac supremum Christi Judicium: deinde succedet terrenum Christi Regnum cum Sanctis, Mille duraturum annos. Et nihilominus vides, etiam durante Regno Christi, innumerabiles Gentes a Deo averſas, teſtante Sancto Johanne, ſuperfuturas eſſe in terra. Prorſus haec abhorrent a deſcriptione extremi Judicii, quam Sanctus Matthaeus nobis propoſuit. Sed perſequi non juvat multiplicia Burneti ſomnia, qui hiſce, & aliis, dum vixit, inanibus phantaſmatibus oblectatus eſt, ſuaeque Genti aut mirandi, aut ridendi non ſemel occaſionem praebuit. Quicumque ſapit, facile intelliget, Johannis prophetiam, alioqui perobſcuram, de Regno Christi mille Annos duraturo, ut ſibi divinae Literae conſtent, immo ut ſecum ſit concors idem Sanctus Apoſtolus, non aliam admittere interpretationem, quam quae a Sancto Auguſtino, praelaudato Lib. XX. Cap. 7. de Civit. Dei, aut a Sancto Thoma Aquinate, aliisve praecipue Catholicis adferatur. Nempe Regnum Christi, aut Eccleſiam Dei ſignificat, quam conſtituunt tam viventes, quam mortui in Chriſto; aut quod aliis veri videtur ſimilius, Eccleſiam dumtaxat triumphantem in Caelis, quam Juſti poſt Chriſti mortem ac aſcenſionem implere coeperunt, & augebunt, uſquequo humanis rebus finem imponat glorioſus Chriſti judicatori Adventus: Neque enim aliud *Mille* annorum numerus ſignificat, ut Sancti Patres docuerunt, niſi tempus ab initio Eccleſiae futurum uſque ad finem Mundi. Dum fluit hoc tempus, *Animae decollatorum propter teſtimonium Jeſu* regnant & regnabunt *cum Chriſto*. Niſi vim facere velis verbis Apoſtoli, negare nequeas, quin ille nobis exhibeat Sanctos regnantes, non viventes in terris, ſed jam morte praereptos; & quum *Animas* ait, ſatis indicat, ſe de iis agere, qui nondum per Reſurrectionem in fine Mundi eventuram, Corpora reſuſceperint. Atqui ejusmodi Sanctorum *Animae regnaturae* dicuntur *cum Chriſto*, id eſt futurae tamquam Reges, donec ſupremi Judicii dies adveniat: quid aliud, quaero, rite interpretari poſſis, niſi magnificam eorum Gloriam in Caelis, exemplo a terrenis Regibus deducto, qui ſupra ceteros mortalium ſplendere, felicesque eſſe putantur? Quod praefertim de Sanctis verum ſit neceſſe eſt, quando *regnare* dicuntur *cum Chriſto*, quem certo novimus eſſe *in Gloria Dei Patris*. Addit Sanctus Johannes: *Beatus & Sanctus, qui habet partem in Reſurrectione prima: in ſeconda mors non habet poteſtatem*. Ergo duplicem Reſurrectionem Johannes nobis exhibet. Prima Juſtos morientes tantummodo reſpicit, quorum Animae e mortali ac terrena habitatione hac emigrantes,

grantes, ad immortalem & beatissimam in Caelis vitam resurgunt. Altera deinde Resurrectio erit Iustis, quum in excidio Mundi Corpus resumentes, illud quoque ad immortalitatem ac Beatitudinem, judicante & jubente Christo, perducent. Duplicem similiter mortem Apostolus statuit. Prima mors tam Iustis, quam Improbis continget, quum nempe Anima separatur a Corpore. Mors altera, quum Impiorum Animae una cum Corpore in aeterna supplicia trudentur: quae *Mors secunda potestatem non habet* in eos, quibus *Resurrectio prima* donata est. Dilucide vero innuit Sanctus Johannes, quid futurum sit post *Mille annos*, dum subdit: *Et quum consummati fuerint Mille Anni, solvetur Satanas de carcere suo, & exhibit, & seducet gentes.* Habes heic dies Antichristi. *Et vidi mortuos magnos & pusillos, stantes in conspectu Throni. Et libri aperti sunt. Et judicati sunt mortui ex his, quae scripta erant in libris, secundum opera ipsorum.* En postremum ac solemne Christi Judicium in fine Mundi, toties in divinis Voluminibus depraedicatum. Atque illud, non ante Mille Annos, ut Millenarii somniant, sed post. *Et Infernus & Mors missi sunt in stagnum ignis. Haec est mors secunda.* Ecce Christi Judicis sententiam: *Ite in ignem aeternum*, quae in Peccatoribus completur. *Et vidi Caelum novum &c.* Heic Caelestis Patria, plenaque & perfecta Beatitudo Iustis conferenda in Caelis describitur, ad quam Iustorum Animae cum Corporibus conjunctae advolabunt, uti Sanctus Augustinus tradit. Satis nobis futurum est, cum Cerinthi deliramentis, ineptiive Papiae, sive cum omnium Chiliastarum figmentis componi non possit hunc Apocalypseos locum; immo inde validius confirmari Catholicae Ecclesiae sententiam de conlata & conferenda Iustis caelesti Beatitate, minime expectato postremo divini Judicis Adventu.

C A P. V I.

Improbi statim post mortem in Inferorum poenas coniecti. Martyrum Animae Corpore solutae, communi Ecclesiae calculo, confestim Beatitudine Caelesti donatae. Non unus Dies Domini; non unus Adventus. Neque tantum Martyres, sed & ceteri Iusti, non expectato Corpore, Caelorum Regnum ingressi.

VEterum Traditionem pro Opinione sua laudat, nobisque objicit Burnetus; merito ne, ad inquirendum nunc progrediamur. Ego tria ostendenda mihi sumo, quae veluti Theoremata tria
 C
 praec

prae oculis futura semper nobis sunt in quaestione, quam prae manibus habemus. Primum est, communem ab exordio Ecclesiae sententiam fuisse, Improbos, atque in peccatis ereptos vitae, illico in aeterna Supplicia fuisse deturbatos. Secundo, communiter quoque creditum, Martyrum in primis Animas post tormenta ac mortem in beatissima Caeli tabernacula sine mora fuisse translatas. Tertio, etsi non defuerint, qui ad universalis usque Resurrectionis tempus differendam censuere caelestis Beatitatis possessionem: contrariam tamen doctrinam, quae in Ecclesia Catholica viget, praevaluisse semper; neque illam novam, sed ab ipsis Apostolorum temporibus acceptam, dignam tandem fuisse visam, quae post serium examen stabili decreto firmaretur. Si tria haec ostendero, nullus dubito, quin aequus rerum iudex continuo intelligat, vel eos ipsos, qui tamdiu distulere aeternam felicitatem Justorum, non amplius esse audiendos.

Theorema Primum.

Nam primo ubi firmum stet, a primis Ecclesiae Saeculis persuasum fuisse Christianis, Injustos post mortem in Inferorum tormenta continuo abripi, ruant etiam oportet fundamenta quaevis, quibus nittitur Burneti fabrica, & suffragium ex aliquot veterum Patrum auctoritate petitum. Contendit ille, in uno universali Iudicio totius humani generis opera esse examinanda, & tunc solum decernendum Bonis praemium, Malis supplicium, Animabus defunctorum interea dormientibus, & postremi illius diei sortem aut faustam, aut miseram expectantibus. Contra, si constet, Impiorum & Iniquorum Animas, vix e Corpore solutas, in Tartareas poenas detrudi: jam manu tenes, praecessisse privatum & occultum operum examen, Deique Iudicium, & reorum poenam: quae cuncta manifestanda demum erunt in generali publicoque Christi Iudicio. Atqui ita se rem habere, neque id negari posse sine blasphemia, vidimus exemplo Divitis Evangelici, ad *flammas & tormenta damnati*; & quidem ante supremum Iudicium, quia vivere adhuc super terra pergebant illius fratres. Neque secus senfere antiqui Patres. Praeterea si Improbos sine mora plectit debitis poenis divina Iustitia: quicumque rite ratiocinari novit, necesse est, simul agnoscat, Probos quoque sine mora praemio & gloria donandos a Deo. Mensura haec, & non alia, infinitam illius Bonitatem decet; & praecipue quia misericors Deus paratior est ad Remunerandum

Bonos,

Benè, quam ad Puniendum Indignos, uti scribit Auctor Operis Imperfecti in Matth. Homil. XXV. Deus quippe *dives est in misericordia*, Ephes. II. 4. atque is ad nos venit, *ut ostenderet divitias gloriæ suæ in vasa misericordiæ, quæ præparavit in gloriam*, Roman. IX. 23. Itaque injuriam incaute Deo inrogat, qui illum sibi fingit ad poenas omnium atrocissimas a Malis exigendas velocem; ad præmia vero, toties servis fidelibus promissa, tardum & reluctantem, ut jam Mille & Septingenti fluxerint Anni absque præmio, immo in plura adhuc Saecula Retributio procrastinetur.

Theorema Secundum.

Ad secundum quod attinet, ubi conslet testimonio veterum, ferri sine cunctatione ad caelestia gaudia Animas Martyrum: fateri cogimur, evanescere prorsus Burneti somnia, claudentis ostia quæque Caeli ferreo repagulo, & contententis, ea dumtaxat referenda, non in universali Judicio Christi, sed Mille Annos post ipsum Judicium. Et profecto jam vidimus gloriosos illos Athletas *ante Thronum Dei, & in Conspectu Agni amictos stolis albis*. Quod si pro Christi nomine mortem generose appetentibus a Sancto Stephano ad nostra usque tempora patet Caelestis Aula: nulla superest causa, cur non & reliquis Justis ad beatissimas sedes illas apertus sit aditus. Et quidni? De Martyribus ait Dominus Matth. V. 10. *Beati, qui persecutionem patiuntur propter justitiam, quoniam ipsorum est Regnum Caelorum*. Matth. X. 32. *Omnis ergo, qui confitebitur me coram hominibus, confitebor & ego eum coram Patre meo*. Et Marc. VIII. 34. *Qui perdiderit animam suam propter me & Evangelium, salvam faciet eam*. At ille idem Dominus de reliquis Justis inquit Matth. V. 3. *Beati pauperes spiritu, quoniam ipsorum est Regnum Caelorum*. *Beati mundo corde, quoniam ipsi Deum videbunt*. Et in Apocalypicos XIV. 13. *Beati, qui in Domino moriuntur*. *Opera enim illorum sequuntur illos*. Et Jacob. I. 12. *Beatus, qui suffert tentationem; quoniam, quum probatus fuerit, accipiet coronam vitae, quam repromisit Deus diligentibus se*. Cedo locum aliquem sacrarum Literarum, ubi a Martyribus distinguatur fors reliquorum Justorum, ita ut hisce, & non illis, Remuneratio expectanda sit post enormes illas moras, quibus illorum spem irridere videtur eruditio Burneti. Nullum proferes. Reliquum ergo est, quando san guinem pro Christo dantes caelestis Regia continuo excipit, ut & pari munere donentur ceteri morientes in Domino, dum nihil ex-

piandum habeant in altera vita. Rursus vero hinc elucet, in Martyrum morte Judicium a Christo institui de illorum operibus, Judicium inquam nobis occultum, & ab altero in fine Mundi palam habendo diversum: quod supra innuimus, atque immerito Burnetus agnoscere noluit. Animae profecto e Corpore abeuntes, non sua sponte in Caelum ascendunt, aut in Inferorum supplicia descendunt. Ex judicio ac sententia Judicis aeterni variae illarum sortes pendent, & poenae vel praemia a justo Deo decernantur oportet. Igitur ubi pateat, neque Impiis, neque Martyribus Retributionem disferri post mortem: nonnisi temere peculiare ejusmodi Animarum Judicium negetur. Quod si de Martyribus id fateare, cur & ceteris Justis non idem contingat? Atque huc etiam referri posse puto Parabolam Talentorum Matth. XXV. 14. Haec bonus Pater, qui in Caelis est, unicuique pro suo arbitrio distribuit, a singulis postea rationes exacturus de recto usu & lucro percepto. Qui quinque acceperat, totidem lucratus est. Itaque, veniente Domino, gratissima illa verba audit: *Euge serve bone & fidelis, quia super pauca fuisti fidelis, super multa te constituam, intra in gaudium Domini tui.* Servus autem piger atque inutilis ejicitur in tenebras exteriores: *Illic erit fletus & stridor dentium.* Certum est, haec summam Justorum omnium Beatitudinem, & vicissim Improborum aeternas poenas designari. Quum ergo statim a morte Martyres praemia percipiant pro bono usu talentorum suorum; Improbi vero in tenebras exteriores projiciantur: aequum est arbitrari, reliquos etiam Justos ad eandem advocari mercedem post mortem. Neque enim, repetere liceat, unus Christi Domini ad universale Judicium *Adventus* excogitandus est. Ad singulorum quoque mortem is venit, & judicat. *Vigilate ergo*, inquit ille Matth. XXIV. 42. *quia nescitis, qua hora Dominus vester venturus sit.* Beatus ille servus, quem, quum venerit Dominus ejus, invenerit sic facientem. Amen dico vobis, quoniam super omnia bona sua constituet eum. Uti Sanctus Johannes Chrysostomus, alique animadverterunt, ad cujuscumque mortem venire haec dicitur Christus. Neque secus patitur verborum sensus; ejus enim improvisus adventus deprehensus est Servum operantem & paratum. Ideo & vos, estote parati, quia, qua nescitis hora, Filius hominis venturus est. Praeterea non haec dicit Christus ad illos dumtaxat, quos viventes Archangeli tuba ad supremum Judicium vocabit. Nullius roboris, nullius usus sententia & exhortatio fuisset, si eos tantum respiceret, qui tunc in vivis non erant, ac solum post tot Saecula in vivis futuri essent.

sent. Alloquitur Dominus Apostolos ipsos, atque ad eos dicit *Vigilate*; alloquitur & omnes, qui in ipsum credent usque ad finem Mundi; & *Beatos* quoslibet Servos appellat, quos, quum venerit Dominus, ut e terreno domicilio educat, invenerit operibus bonis de-
ditos, & in iustitia stantes. Et quare *Beatos*? Quia cum illis statim rationes inibit; atque uti Martyres, ita & illos *super omnia bona sua constituet*, & unicuique e vestigio dicit: *Euge Serve bone, intra in gaudium Domini tui*. Itaque repeto, *Adventus Domini* non unus est, ut Burnetus sibi persuadet, neque unus est *Dies Domini*. Mortis quoque nostrae *Dies* hoc etiam nomine significatur in sacris Literis. Locupletem habemus testem, Sanctum videlicet Hieronymum, cujus verba sunt Cap. II. in Joelem: *Diem autem Domini, Diem intelligo Judicii, sive Diem Exitus uniuscujusque de Corpore. Quod enim in Die Judicii futurum est omnibus, hoc in singulis Die Mortis impletur*. Chrysostomus vero Homil. 78. in Cap. XXIV. Matthaei, & Epistol. VI. ad Theodorum Monachum, verba illa Domini interpretans Luc. XII. 39. *Hoc autem scitote, quoniam si sciret paterfamilias, quia hora fur veniret, vigilaret &c. Et vos esote parati, quia, quia hora non putatis, Filius hominis veniet*, ait, illic agi de singulorum excessu e vita; nam & tunc venit Dominus ponere rationem cum servis suis. Jam vidimus, Regnum Caelorum, ac Visionem Dei quibusque Justis a Deo misericorde promitti; atque ubi statuamus, tantum praemium statim subsequi certamina & mortem Martyrum: minorem fortasse; beatam tamen in Caelis mercedem Confessoribus quoque & reliquis Justorum Animabus confestim, aut brevi conferendam credere cogimur. Id autem luculentius intelliges, quoties recogitabis, apud veteres non eos tantum, qui pro Christi nomine aut tormenta tolerarunt, aut etiam vitam dederunt, sed & ceteros Deo fideliter in sanctitate & iustitia servientes, *Martyram* appellatione fuisse donatos. Primi quidem per antonomasiam, & excellenti quodam, proprioque titulo, appellati *Martyres*; reliquis per analogiam par nomen tributum fuit. Antiquissimus Scriptor Clemens Alexandrinus Lib. IV. Stromat. *Si igitur, inquit, Confessio Dei est Martyrium, sive Testimonium; quaecumque Anima se pure & sincere gessit cum agnitione Dei, & quae praeceptis paruit, Martyr est, & vita, & sermone; quemadmodum liberetur a Corpore, fidem tamquam sanguinem, per totam vitam, & etiam in exitu, profundent*. Rursus in eodem Libro ait: *Quicumque autem Salvatoris mandata exsequuntur, in unaquaque actione sunt Martyres, sive testes*. Paria habet Chrysostomus Homil. XI. in Epistol. ad Hebraeos, & Homil. II. in Epistol. ad Corinthios, & alibi idem tradit.

Quocum

Quocum video concordēs Sanctum Methodium apud Epiphanium Haeref. LXIV. Nazianzenum in Oration. VI. Ambrosium Sermon. XX. in Psalm. 118. Augustinum, Gregorium Magnum, & alios. Itaque vix nihil erit, cur Justus, quum postrema vitae dies instabit, invadeat maturae Martyrum felicitati. Ipsius nempe Spiritus ad illorum consortium, atque ad patriam caelestem e vestigio advolabit. Si Martyrium verum ita culpas & maculas Animarum eluit, ut purae sistantur ante Dei solium: cur ceteris, quibus est meritum aeternae Glorīae, Caelum praecludatur, Martyribus jam reſeratum, neque amplius clauſum, uti fuit sub veteri Lege?

Theorema Tertium.

Quanto autem magis in hanc ſententiam deſcendendum erit, quoties animadvertamus, ne ipsis quidem Ecclesiae primitivae temporibus umquam deſuiſſe, immo ſupra ceteros abundaſſe, qui illam non ſolum tradidere, ſed & meliorem, ſacriſque Literis, & beneficae Dei noſtri naturae ac voluntati congruentiorem cenſuerunt? Si quid diſcriminis in eorum diſtis occurrit, uti videbimus, de aeternae potius Felicitatis Loco, quam de ipſa Felicitate fuit. Quare nihil eſt, quod Burnetus pro ſua opinione antiquos Patres proferat. Proferimus & nos, & quidem longe plures, atque hac in re fide & veneratione majori dignos; uſque adeo, ut is concentus deprehendatur inter ſacras Literas, quarum verba attulimus, & Patres ipſos, ut ipſi quoque Adverſarii, ſi forte opus ſit, habituri ſint, unde a Burneti Novatoris opinione longius avertantur, & in antiqua Catholicae Ecclesiae ſententia perſiſtendum judicent. Catholicis enim nihil heic dubitationis reſtat, ex quo Eccleſia falli neſcia ſuum interpoſuit ſolemne decretum. Age vero in veterum examen, quo nos Burnetus vocat, invadamus.

C A P. VII.

Sancti Clemens I. Papa, Ignatius Antiochenus Episcopus, Polycarpus Episcopus Smyrnenſis, Eccleſia itidem Smyrnenſis, teſtes minime procrastinatae Beatitudinis Sanctorum.

ET primo pro ſe Burnetus laudat *Sancti Clementis Romani Pontificis*, qui Anno Chriſti Centeſimo coronam Martyrii aſſequutus eſt, *Epistolam Primam ad Corinthios*, ubi Cap. V. Apoſtolus Paulus

Paulus *Martyrium passus dicitur, & ita e Mundo migravit* (ἔξ ἐκ τῶν ἁγίων τόπων ἱεροπόλιν) atque in *Locum Sanctum abiit*. Et infra Cap. L. ejusdem Epistolae addit: *Generaciones omnes ab Adamo usque in bodiernum diem praeterierunt. At qui per Christi gratiam consummati sunt in Caritate, habent (χάρις τοῦ βίου) Locum Piorum, qui manifestabuntur in visitatione Regni Christi*. Nullum, inquit Burnetus, heic summi Caeli, nullum Visionis beatificae verbum. Dicit dumtaxat *Locum Sanctum, Locum Piorum*. Utique hoc dicit, sed satis adversus Novatores dicit. Nam quid aliud est *Locus Sanctus*, nisi Caelum ipsum, in quo habitant & habitaturae sunt Justorum Animae, quarum gloria in adventu glorioso Christi Manifestabitur? *Quis ascendet in montem Domini, aut quis stabit in Loco Sancto ejus? innocens manibus & mundo corde &c.* inquit Psalmista XXIII. 3. Ut ut haec terrestrem Hierusalem, ac Templum Domini significare velis, sublimiori tamen sensu significant apud Patres *Hierusalem Caelestem, quae vere Hierusalem est*, ut ait Eusebius Lib. IV. *Demonstration. Evangelic.* Certe aliud significare non possunt, dum de Justis vita sanctis sermo habetur. Horum nempe Animae in *Montem Domini* ascendunt, idest in Caelum, & stant in *Loco Sancto ejus*; Atque illuc revera Paulus abiit, post datam fortiter pro Christo cervicem. Et ne dubitatio hac de re superesset, mature inquit ipse divinus Magister ad Apostolos suos Johann. XIV. 2. *Vado parare vobis Locum*. Ubinam hic locus? dicat Burnetus. *In Hade* (sunt ejus verba pag. 57.) *Hades autem est regio nobis inconspicua, siue nos latens, & notitiam fugiens, quae Animas nostras hinc emigrantes excipit*. Contra Dominus dixit: *In Domo Patris mei mansiones multae sunt: & vado parare vobis Locum, ut ubi sum ego, & vos sitis*. En ut *Loca Sanctorum e Mundo abeuntium sunt in domo Patris mei*, non vero in regione, cujus situm invenire Burnetus nequivit. Atque ubi est Christus, ibi quoque futuri post mortem sunt Justii. Quod si meliori fide agere in tota ista concertatione stauisset Novator noster, perspexisset & ipse, quae mens reapse Petri Apostoli discipulo Clementi fuerit. Nimirum is in eadem Epistol. I. ad Corinth. Cap. V. de Sancto Petro ait: *Multos sustinuit labores, atque ita Martyr effectus* (εἰς τὸν ἐπεσθῆναι τὸν τῆς δόξης) *ad debitum Gloriam Locum discessit*. Tum Capite sequenti de Martyribus haec scribit: *In constanti Fidei cursu pervenerunt; & corpore debiles (ὀλίγας ἡλικίας) Nobile Præmium acceperunt*. Denique Cap. XLV. de Daniele, & tribus Pueris, ceterisque Justis haec habet: *Illi vero in fiducia tolerantes, Gloriam & Honorem*

Honoris Heredes facti sunt; Elevati sunt, & Sublimes, Beatique effecti a Deo in memoria ipsorum, in Saecula Saeculorum. Si Iusti vita defuncti jam *debitum Glorïae Locum* consequuti sunt; si jam *Nobile Praemium* acceperunt; si *ad Hereditatem Glorïae* pervenerunt, *Beatique* a Deo sunt effecti: quid aliud quaerimus, ut agnoscamus, non alium a Clemente Romano Sanctis deferri *Locum*, nisi in Patria Caelesti, & sublesta fide egisse Burnetum, qui haec ante oculos habens dissimulavit? Sed quando senobisobtulit Apostolicorum temporum Scriptor Sanctus Clemens, non abs re fuerit, aliqua delibare ex Constitutionum Apostolicarum Libris. Non illiquidem, quamquam ab antiquis eidem tributi, hunc habuere Auctorem. Eruditorum tamen calculo confarcinati videntur primis Ecclesiae Saeculis, & memorantur a Sancto Athanasio, Eusebio, Epiphonio, & aliis. Ibi Lib. I. Cap. 6. haec leguntur: *Omnes Reges, qui Iusti fuerunt, a Deo aucti sunt, & apud ipsum Deum promissio Vitae aeternae eis perduravit. Quotquot autem Reges a Deo fornicati sunt, in defectione sua, iusto Dei iudicio, brevi interierunt; & Vita ejus privati sunt, Sempiternum Supplicium pro Requite sortiti.* Si non satis dilucida sunt priora verba, posteriora saltem aperte produnt, Reges malos jam in aeterna Supplicia detrusos fuisse: quibus confirmatum vides Theorema Primum, de quo in praecedenti Capite egimus, ejusque consecutaria. Lib. V. Cap. 8. erga Martyres honor praecipitur: *ii enim sunt & a Deo Beatitudine donati, & a Sanctis viris honore affecti, de quibus David dixit: Pretiosa in conspectu Domini mors Sanctorum ejus.* Praeterea Lib. 8. Cap. 41. traditur Oratio pro fratribus, qui in Christo requieverunt, atque inter alia haec animadvertenda videntur: *Colloca eum in sinu Patriarcharum, Prophetarum, Apostolorum, omniumque, qui tibi a Saeculo placuerunt: ubi non est tristitia, dolor, gemitus, immo Locus piorum sedatus, & pariter quieti terra rectorum, eorumque, qui in ea vident Gloriam Christi tui.* En quid apud veteres significarit *Locus piorum* post mortem. Ibi vident Iusti *Gloriam Christi*. Quid plura petis?

Nobile Martyrii certamen consummavit Sanctus Ignatius, celeberrimus Episcopus Antiochenus, Anno Christi CXVI. Ex ejus Epistolis duo verba excerpit Burnetus, inquit, ab eo appellari *totius Idior, Locum proprium*, ad quem, vita pro Christo data, se e Mundo abiturum confidebat. Quanam ex Epistola Burnetus haec hauerit, nescio, cur minime nos monuerit. Equidem nihil tale mihi in germanis ejus Literis occurrit. Utcumque sit, nisi funes adhibeat, nil inde Burnetus exsculpet. *Proprius Locus* Animarum pro Christo

Christo Sanguinem fundentium, ut nuper vidimus, est *debitus Glorificatus* apud Deum. Aequius tamen ille fecisset, si pro dubiis verbis illa excerptisset, quae praesenti quaestioni lucem suppeditare paene meridianam possunt. Mecum adeat Lector gloriosi Martyris Epistolam ad Romanos, ad quos victus deducebatur. Ibi eos enixe rogat, ne Martyrio suo, quod praec omnibus cupit, impedimentum adferant. *Obsecro vos*, inquit, *ne intempestiva benevolentia erga me sitis. Sinite me ferarum escam fieri, per quas licet Deum Alipisci.* Perenne hoc erat invicti Martyris desiderium: certa haec illius spes. Ita & ad Magnesianos scripserat: *Memores estote mei in orationibus vestris (Ὡς οὐδ' ἐπιτρέχω) ut Deum Assequar.* Idem repetit scribens ad Trallianos: *Expiet vos meus Spiritus; non modo nunc (Ὡς οὐδ' ἐπιτρέχω) sed & ubi Deum nactus fuero.* Quid aliud est οὐδ' ἐπιτρέχω, nisi invenire, assequi, nancisci, attingere Deum, eoque potiri? Num per Gratiā, num per Caritatem, ac spiritalia vota? At hoc illi adhuc viventi obtigerat. Ergo οὐδ' ἐπιτρέχε-
ται, Alipisci Deum nihil aliud heic est, nisi re post mortem tenere, quod Sanctus vir spe tantum in Mundo tenebat, ejusque Conspectu frui, illumque Facie ad Faciem intueri. Pergit dicere generosus Martyr in eadem Epistola ad Romanos Cap. VI. *Nil me juvabunt fines Mundi, nec Regna hujus Saeculi. Melius est mihi emori propter Jesum Christum, quam imperare finibus terrae. Illum quaero, qui pro nobis mortuus est. Illum volo.* Hoc ardore loquitur, atque omnia Regna terrarum contemnit, qui Caeleste Regnum Dei, & Christi consortium se statim a morte consequutur novit. *Sinite me*, subdit, *purum Lumen haurire: Ille perveniens, homo ero.* In aliis textibus legitur ἀνθρωπος οὐδ' ἵσταναι, *Homo Dei ero.* At non alibi *Lux pura* speranda, nisi in Caelesti Hierosolyma, atque in Visione Dei. *Videmus nunc per speculum in aenigmate: tunc autem Facie ad Faciem*, Prima ad Corinth. XIII. 12. Sed dic & tu, beatissime Martyr, ubi *puram* hanc *Lucem* speres? Utique in conspectu misericordiae Dei, atque in beatissimo Regno, ubi ille in sua gloria se Justis conspiciendum praebet. En dulcissima Ignatii verba: *Meus amor crucifixus est: & non est in me ignis amans aliquam aquam; sed vivens & loquens in me, intus mihi dicit: Veni ad Patrem.* Si Piorum Animae a Corpore separatae abirent ad enormem Somnum, Locumque ignotum, quem nobis Burnerius obtrudere veller, jam non abirent *ad Patrem*; sed illuc, ubi non magis est Pater, quam heic, ubi nunc vivimus: atque Ignatius tantundem abfuisset a Patre, quantum vivens in

H

Mundo

Mundo erat. Immo in deterius fors illius cessisset: nam praeterquamquod non secus, atque erat in Mundo, remotus fuisset a beatifica praesentia Dei; ne potuisset quidem patrimonium & meritum augere bonorum operum, Deumque sibi copiosius demereri. Id in hac vita licet, post mortem non licet. Propterea Apostolus ad Philippenf. I. 22. quamquam summopere excuperet *dissolvi & esse cum Christo*, eligebat tamen adhuc *vivere in carne*, ut maiorem fructum *operis*, disseminando Evangelium, perciperet. Itaque velis nolis, quum Sanctum Ignatium tanto ardore Martyrii correptum vides, ac sperantem, se confestim abiturum *ad Patrem*, nil aliud excogitare potes, quam Beatitatem, hoc est praesentiam realem, ac Visionem Dei, mox ipsi conferendam in Caelis.

Habemus etiam Acta sincera & antiquissima Martyrii ipsius Sancti Ignatii, ab Usserio Archiepiscopo Armachano edita, e quibus haec eadem doctrina maiorem lucem mutuari potest. Describitur illius navigatio, quum ad gloriosum certamen positus in vinculis deduceretur. Smyrnae Sanctum Polycarpum adit, eumque *deprecatur concertare issus proposito, ut velocius per bestias disparens Mundo factus, appareat Faciei Christi*. Et hoc sic dixit, sic testificatur *est: tamen extendens eam, quae circa Christum, Caritatem, ut CAELUM quidem apprehendere per bonam confessionem posset*. En quid optabat, & quid se certo assequuturum sperabat Sanctus Martyr. Porro addunt Actorum Scriptores, qui *horum ipsimet confectores* fuerant, se vidisse in visione beatum Athletam, quemadmodum ex labore multo venientem, & *adstantem Domino in multa confidentia, & Ineffabili Gloria*. Hinc intelligis, an primitivae Ecclesiae Christiani in Burneti somnia consentiant. Et quoniam Sancti Episcopi Smyrnenfis Polycarpi facta est mentio, qui & ipse exemplum Sancti Ignatii aequalis sui aemulatus, multis post annis celebre Martyrium valde senex confecit, istum quoque consulamus. Burnetus ex ejus Epistola ad Philippenfes Cap. IX. duo tantum verba pro sua opinione selegit, inquiens, Animarum sedes post Corporis mortem appellari ab eo *Locum sibi debitum*. Quid haec verba significant, nuper vidimus. Attamen integrum locum proferre praestat, ubi de Paulo, ceterisque Apostolis scribit. *Persuasi, quod hi omnes in vacuum non cucurrerunt, sed in fide ac iustitia; & quod in Debito Sibi Loco Sint Apud Dominum, cum quo & passi sunt*. Omisit Burnetus, quae prae reliquis amatori veritatis proferenda erant. Locum, ubi sunt post mortem Animae Iustorum, ille ignorat. Verum ubi sit, diserte nobis indicat Sanctus Polycarpus: nempe

Apud

Apud Dominum, παρὰ τῷ Κυρίῳ: hoc est *in praesentia, in conspectu Domini*. Sanctus ipse Martyr idem testatus est, Deo ante mortem benedicens, quod me, aiebat, *in hunc diem & ad horam hanc perducere dignatus es, ut partem caperem in consortio Martyrum, inter quos, quaeso, suscipiar HODIE IN CONSPECTU TUO, tamquam bestia pinguis*. Innumera quoque sunt exempla in sacris Literis praepositionis *Apud*, sive Παρὰ, realem praesentiam significantis. Et quum Dominus noster Matth. VI. 1. dicat: *Alioquin mercedem non habebitis* (παρὰ τῷ Πατρὶ ὑμῶν) *apud Patrem vestrum, qui in Caelis est: mercedem hanc acceperint Sancti* necesse est, quando jam eorum Locus est *apud Dominum*. Ita magnus ille Polycarpus, Sancti Johannis Apostoli discipulus, totius Asiae princeps a Hieronymo appellatus, & de quo Sanctus Irenaeus Lib. III. Cap. 3. ait: *Hic docuit semper, quae ab Apostolis didicerat, quae & Ecclesiae tradidit, & sola sunt vera; & testimonium bis ferbent, quae sunt in Asia, Ecclesiae omnes*.

Ad hanc veritatem propius intuendam nos etiam manu ducet celebratissima Epistola circularis Ecclesiae Smyrnenfis de Martyrio ejusdem Sancti Polycarpi, illis ipsis temporibus, hoc est circiter Annum Christi CLXIII. vel CLXVI. scripta. De Martyrum constantia ibi agitur Cap. 2. *Oculis cordis respiciebant ad ea Bona, quae tolerantibus reservantur: quae nec Auris audit, nec Oculus vidit, nec in cor hominis ascenderunt; ipsis autem a Domino monstrabantur, utpote qui non Homines amplius, sed Angeli essent*. Ergo jam sibi paratam conspiciebant in Caelis summam apud Dominum Felicitatem, atque in eam se brevi transferendos agnoscebant. Hac fide & spe armati, & jam velut Angeli effecti, tormentum despicerent, mortemque laeti non sustinere tantum, sed & invitare consueverunt. Iis sane fidem lubentius habeant nunc Christi Fideles, quam Burnero alia tradenti, & pleraque dissimulanti, quae suae opinioni adversentur. Sed ut haec etiam majori in lumine collocentur, en quae dicere pergunt Smyrnenfis Ecclesiae Presbyteri Cap. XVII. postquam gloriosus Martyr Polycarpus inter flammam & gladios Animam in specie Columbae exhalasset. *Sed quum aemulus ille ac invidus & malus, Justorumque generi adversus, cerneret insigne illius Martyrium, & illum Immortalitatis Corona redimitum, ac (βραβίον ἀντιπρόσπον) Praemium minime dubium reportasse: operam dedit, ne Reliquiae ejus a nobis auferrentur*. Contendit Burnetus, non ante finem Mundi Justis Praemia esse a Deo conferenda, atque secum in ejusmodi opinione concordare esse

primitivos Christianos. En ut iis pro certo persuasum erat, confestim post mortem *Praemium*, & *Coronam Immortalitatis* a beneficentissimo Deo fuisse in victo Martyri illi conlata; cuius etiam *Praemii* nuper Sanctus Clemens certiores nos fecit. Et quid *Corona* illa, nisi quam Sanctus Jacobus in Epistol. Cap. I. 12. descripsit, inquires: *Beatus vir, qui suffert tentationem, quoniam, quum probatus fuerit, accipiet Coronam vitae, quam repromisit Deus diligentibus se?* Quid, inquam, *Corona*, nisi Beatitudo Caelestis, de qua scribit Apostolorum Princeps in Epist. I. Cap. V. 4. *Et quum apparuerit Princeps Paflorum* (scilicet ad singulorum mortem) *percipietis immarcescibilem Gloriam Coronam?* Denique in Smyrnenfium Epistola idem repetitum videas hisce aliis verbis Cap. XIX. *Nam per tolerantium devictio injusto Praeside, sicque Immortalitatis Corona recepta, cum Apostolis, omnibusque Justis exultans, Deum ac Patrem glorificat, atque benedicit Dominum nostrum.* En *Exultatio* ipsa, ἀγαλλιάματα: en ipsum *Glorificare Deum* coronatis Athletis tributum, quod Johanne teste in Apocalypf. XIX. 7. incolae Caeli usurpant, dicentes: *Gaudeamus & Exultemus, & demum Gloriam Domino Deo nostro, quia venerunt nuptiae Agni.* Luculentius autem expressa haec deprehendas in antiquissima Latina Versione ejusdem Epistolae Smyrnenfium, ab Usserio edita, & Saeculo Christi Quarto, ut is opinatur, in usum Ecclesiae Gallicanae confecta. Hanc rursus evulgavit Ruinartus inter Acta Martyrum. Parum dissimilem dederat & Bollandus Tomo II. Sanctior. Januarii. Ibi legitur Cap. II. *Beatae enim Passiones Caelestia tolerantibus Regna parturiunt: & post contenta haec omnia, opes, honores, parenter, Coronae consummatio plena Martyrium est.* Cur vero Martyres animo tam intrepido omnia perferrent, ratio ibi redditur: *Parabatur enim unius horae exitio Gaudium, nulla vetustate perituum.* Haec ibi, quum eandem Epistolam, variis demtis, additis, aut mutatis, Smyrnenfes ad varias Ecclesias miserint. Sed & ex eadem Versione Cap. VIII. haec habeto: *Tandem hora illius ac tempus advenit, qua custoditae acciperet Coronam Justitiae, quam scilicet & Apostolus Secunda ad Timoth. IV. 8. expectabat repositam sibi in illa die, non uti opinatur Burnetus, ei tradendam post complura, immo plurima Saecula, sed Resurrectionis, sive mortis suae die, quemadmodum accepit & Polycarpus, ab Apostolis ipsis eruditus. Propterea beatissimus idem Martyr in oratione ad Deum, quam in limine certaminis praemisit, agebat Cap. XII. Te benedico, qui me dignum hac passione duxisti, ut percipiam partem, Coronamque Martyrii &c. ut completo Sacrificio istius diet, Promissu*

missa tuae veritatis accipiam. Haec veterum Christianorum fides, haec doctrina, quam adhuc Catholica Ecclesia a majoribus traditam constantissime servat. Atque ex his paucis constare jam potest, quam longe a veritate abierit, quantumque suis Lectoribus imponat Burnetus, dum primitivae Ecclesiae traditionem nobis adversam, sibi omnino faventem, apud imperitos venditarit.

CAP. VIII.

Iustinus Martyr Chiliastarum errori additus, cum Burneto tamen minime concors. Quae de praesenti controversia senserit Auctor Quaestionum ad Orthodoxos.

AT ille instaurato certamine fortiores pugiles pro sua sententia educit, quorum primus Sanctus *Iustinus Martyr*, qui vitam pro Christo dedit Anno Vulgaris Aerae, ut creditur, CLXV. Is enim in Dialogo cum Tryphone, pag. 223. edition. Colonienf. in haec verba de Animabus e Corpore abeuntibus loquitur: *Piae quidem in Loco quodam meliore manent: Injustae vero & Pravae in deteriore, Judicii tempus expectantes.* Adtexit deinde Sanctum *Iraenum*, qui sub finem Saeculi a Christo nato Secundi lauream Martyrii consequutus creditur. Etenim is Lib. V. Cap. 31. adversus Haereticos haec scribit: *Manifestum est, quia & discipulorum ejus, propter quos & haec operatus est Dominus, Animae abibunt in Invisibilem Locum, definitum eis a Deo, & ibi usque ad Resurrectionem commorabuntur, sustinentes Resurrectionem: post recipientes Corpora, & perfecte resurgentes, hoc est corporaliter, quemadmodum & Dominus resurrexit, sic venient ad conspectum Dei.* Consimilia quoque profert *Tertulliani* verba, qui circiter Annum Christi CCXX. finem vivendi fecit. Nam in Lib. de Anima Cap. 55. exemplo Christi, ad Inferos post mortem prosecti, eos ridet, qui *satir superbe non putant, Animas Fidelium inferis dignas: servi super Dominum, & discipuli super Magistrum; aspernati, si forte in Abrabae sinu, expectandae Resurrectionis solatium capere.* Insuper addit in suo de Paradiso Libello, qui jamdiu excidit, se constituisse omnem Animam apud Inferos sequestrari, in Diem Domini. *Origenem* pariter laudat, qui Anno Christi CCLIV. diem suum obiisse creditur, atque in Homil. VII. in Levitic. haec scripsit de Sanctorum Animabus: *Nondum receperunt laetitiam suam, ne Apostoli quidem: sed & ipsi expectant, ut & ego laetitiae eorum particeps fiam.* Sub finem quoque Saeculi Tertii floruit *Victorinus Martyr Petauionensis*, cujus verba sunt ad illud Apocalypf. VI. 9. *de Animabus* sub

sub Altari: Sed quia in novissimo tempore Sanctorum remuneratio perpetua, & Impiorum ventura damnatio, dictum est iis, Expectate. Et pro corporis sui solatio acceperunt Stolas albas, idest donum Spiritus Sancti. Denique Laetantii, qui ineunte Saeculo Quarto floruit, nota verba adfert Lib. VII. Sect. 21. Divinar. Institution. Nec tamen quisquam putet, Animas post mortem protinus judicari. Omnes enim in una communique custodia detinentur, donec tempus adveniat, quo maximus Judex meritorum faciat examen. Tum quorum fuerit probata justitia, id praemium Immortalitatis accipient. Obiter heic animadvertat velim Lector, quid Laetantio sit praemium Immortalitatis, tantummodo post Judicis aeterni adventum ac sententiam conferendum Justis. Nuper vidimus Immortalitatis Corona illos statim a morte donatos, testimonio Smyrnensis Ecclesiae. Parum autem laborandum Burneto fuit, ut haec veterum loca congereret. Ea quippe, immo & alia, uti nuper monui, jamdudum Sixtus Senensis, Cardinalis Bellarminus, atque alii e nostris produxerant. Sed quid, quaeſo, haec possunt contra Ecclesiae Catholicae dogma, quando meminerimus, tum Justini & Tertulliani, tum reliquorum, tamdiu differentium poenas & praemia Mortuorum, opinionem ex uno falso principio, atque ex altera futili opinione processisse? Ita porro sese res habuit. Primus Millenarii Regni somnium, complendum post universale Judicium, Cerinthus temporum Apostolicorum Haeresiarcha invehit. Plerique Catholicorum abſuerunt ab ejus opinione amplectenda: immo diu non pauci Apocalypsim Sancti Johannis tamquam divinum Librum accipere noluerunt, veriti foetum Cerinthi ipsius, quod ibi Mille Annorum Regnum commemoretur. Verum animadvertimus, Papiac Hieropolitano Episcopo, sub initium Saeculi Secundi Millenarium illud Regnum placuisse, atque in ejus Libris habuisse locum; an defaecatum a corporis voluptatibus Cerinthi, mihi non satis constat. Illud certum est, ex male intellectis Apostolorum narrationibus, uti Eusebius Caesariensis jamdiu nos monuit, Papiam pertinens ingenii virum eam conſlaſſe opinionem; cui, teste Hieronymo, Spuria quoque Judaeorum Traditiones occasionem praebuere. Veri propterea simile est, Apocalypſeos locum male intellectum ei ante oculos fuisse. Non hominis ingenium, sed verustatem meriti aliquot ex subsequentibus Christianae Religionis Scriptoribus, has ab eo merces sine haesitatione acceperunt. Diserte Sanctus Irenaeus testatur Lib. V. Cap. 33. se in Millenarii Regni sententia sequutum fuisse Papiam, cujus etiam auditor & discipulus fuerat. Omnes autem norunt, ut id re-

id repetam, ex eiusmodi opinione alteram effluere, videlicet Justis caelestis Regni possessionem ante universale Judicium deferri non posse. Burneti verba sunt pag. 43. *Ecquis credat, Christum revulsi- se Lazarum a Visi. ne beatifica, ut in hanc vitam miseram pedem referre cogeret?* Nemo sane. Credemus quidem, interrogationem hanc erupisse ex homine aut oblito sui, aut hospite in Catholico- rum scriptis. Nimirum Orthodoxorum omnium sententia est, quo tempore Lazarus e mortuis suscitatus fuit, hoc est ante Salvatoris nostri mortem, nondum ulli hominum reclusas fuisse Caelestis Hie- rosolymae portas; ita ut nihil opus Christo fuerit inde illius Ani- mam evocare, ut rursus in quadriduanum Corpus immitteretur. Contra vero quum putida fabula Millenarii Regni, quam Burne- tus revocare in vitam nititur, placuerit Irenaeo, Tertulliano, Jus- tino, Lactantio, & aliis; nil mirum est, si coacti fuerint San- ctorum Retributionem in Caelis differre usque ad extremum Judi- cium, immo & post somnium illud Mille Annorum Regnum, ne Sanctos e caelesti Beatitudine in terrenam deturbarent.

Verum ubi fundamenta Millenarii Regni nudent, immo nulla sint: ruat oportet & super illud aedificata opinio de Justarum Ani- marum carcere usque ad finem Mundi. Et profecto Regnum hoc tot rationum ariete, ipsorumque Patrum auctoritate jamdiu concussum fuit, ut inter Theologos Christianos nullus sit ei amplius lo- cus; & male sibi blandiatur, qui stramineis argumentis ejus rui- nas reparare se posse nunc putet. Pugnat, ut dixi, cum ipsa Apo- calypsi. Pugnat cum tot aliis divinae Scripturae oraculis. Et quoti- es Christi Fideles audiunt, Redemptorem in supremo Judicio di- centem Justis, Matth. XXV. 34. *Venite benedicti Patris mei: pos- sidete paratum vobis Regnum a constitutione Mundi:* numquid aliud desideratur, ut intelligant, ac certo teneant, illic agi de uno *Cae- lorum Regno*, quod toties Deus electis suis pollicitus fuit, & in quo *Justi recumbent cum Abraham & Isaac & Jacob?* Non duo, sed unum Regnum sperare nos semper fecit misericors Dominus; atque illud non Terrenum, sed Caeleste: ita ut mirari jam subiret, erumpe- re nunc homines Christiani nominis, qui desperatae causae patro- num ac relictorem agere velint, nisi exploratum foret, pejora audere etiam posse, quicumque in novitate doctrinae spem gloriae ac nominis sui statuunt. Excusandi sunt veteres, quod nondum excussis, & ad trutinam revocatis ab Ecclesia quaestionibus, ali- quas olim Opiniones induerint, quas deinde Ecclesia a veritate alie- nas deprehenderit, atque proscripserit. Sunt & alii complures naevi
in pri-

in primitivis Ecclesiae Scriptoribus, atque in iis praesertim, quibus nunc utitur, sive abutitur Burnetus: quos excusare, Christiani hominis est; amplecti rursus ac tueri, esse non potest nisi hominis temere agentis, aut Haeretici. Quamobrem uti in tot aliis doctrinae Catholicae capitibus nihil sapiens vir moratur, si quid antiquis exciderit, quod cum sanctissimis Ecclesiae decretis subsequutis minime consonet; ita nihil commovetur, dum quosdam reperit apud prima Ecclesiae Saecula Regni Millenarii patronos, quum ejusmodi Regnum jam prorsus detritum sciat, neque certe Burneto ad illud restaurandum sint vires. Idem quia ipsius fabulosi Regni causa illico agnosceimus procrastinatam usque ad finem Mundi Beatitude Sanctorum: propterea quis non intelligat, nihil heic ponderis habere posse paucorum auctoritatem veterum adversus stabilitam ab Ecclesia hac in re doctrinam? Et praecipue postquam jam vidimus, vel ab ipsis temporibus Apostolicis nostrum dogma emanasse, illudque semper in Ecclesia praevaluisse ostensuri mox simus. Apud justos rerum aestimatores, atque Historiae & oeconomiae Ecclesiasticae peritos, sufficere pauca haec possunt. Nonnulla tamen addere juvat, quae satius visum fuit Burneto suis occultare Lectoribus. Primum est, non negasse *Justinum* Martyrem, quin multi e Catholicis suo quoque tempore Regnum Millenarium ejusque consecutaria averfarentur. *Confessus sum tibi*, inquit, *me quidem & Alios Multos eadem mecum sentientes arbitrari id, sicut plane scitis, futurum. MULTOS vero etiam, qui PURAE PLAEQUE sunt CHRISTIANORUM SENTENTIAE, hoc NON AGNOSCERE, tibi significavi.* Quare vides, ex ipsius Sancti Martyris confessione, quamquam is aliter sentiret, *Multos* tamen Orthodoxorum in contraria sententia stetisse; ac proinde jam tum viguisse dogma, quod uti suum semper agnovit Catholica Ecclesia. Ita is in eodem Dial. cum Tryph. pag. 265. Judaeos ad Christi fidem converfos, & Legalium adhuc Rituum observatores, minime damnat, simul tamen monens, ejusmodi Judaeos ab aliis Christi Fidelibus nequaquam tolerari. Et heic suam *Justinus* praeserebat opinionem sententiae Orthodoxorum. Surgat nunc alter *Burnetus*, & Judaizantes nobis commendet: quis eum non videat, auctoritate *Justini* perperam usum? Secundo, ex eo quod idem *Justinus* in praelaudato Dialogo scribat, Haereticos dicere, *non esse Mortuorum Resurrectionem, verum simul atque moriantur, Animas ipsorum recipi in Caelum*, eosque propterea *non existimandos esse Christianos*, frustra *Burnetus* inferre vellet pag. 51. dogma Catho-

Catholicum de Beatitudine Sanctorum enatum ex Haereticorum placitis. Utrique Gnostici, & praecipue Valentiniani, uti Sanctus Irenaeus tradidit Lib. V. Cap. 31. tibi sinxere, simul atque mortui fuerint, se supergredi Caelos, & Demiurgum, & ite ad Matrem, vel ad eum, qui ab ipsis affingitur, Patrem. Qui ergo universam reprobant Resurrectionem, quid mirum, si nec ordinem Resurrectionis sciant? Immo ibidem Irenaeus ipse quosdam ex his, qui putantur Recte credidisse, censet supergredi ordinem promotionis Justorum, & modos meditationis ignorare, haereticos sensus in se habentes. Verum Catholici aliam ab eo sententiam sectantes, uti notissimum est, a Gnosticis prorsus discrepabant; quippe minime inficiabantur Resurrectionem Corporum, immo hanc uti inconcussam Christianae Religionis dogma tuebantur. Neque sentiebant, singulorum Christi Fidelium Animas, mox ut hinc emigrabant, in Caelum evolare: quod non sine gravi impudentia suae sectae hominibus Gnostici pollicebantur: sed Justis tantum, iisque ab omni labe purgatis, vitam in Caelis aeternam concedi existimabant. Quare nimio zelo Religionis, atque aestu in Haereticos abreptus Irenaeus, haereticum fursur suspicabatur in illorum sententia inesse, qui tamen, satente ipso, Recte credidisse putabantur; erantque, teste Sancto Justino, *Purae Piaeque Christianorum Sententiae*. Num Catholicum dogma quodpiam sinistra quicquam incurrit, aut est explodendum, propterea quod olim idem senserint, aut nunc sentiant Haeretici? Quam longe a Gnosticorum erroribus abesset Catholicorum sententia Justini & Irenaei aevo, nemo non intelligit. Potiori forsitan jure potuissent vicissim Catholici, tunc a Millennio Regno aversi, eandem Sancto Irenaeo canere cantilenam, ejusdem opinioni haereticos sensus objiciendo. Cerinthus hercle commenticii illius Regni Auctor fuerat, Judaici Sabbatismi fabulis nimium fidens, atque in eo corporeas delicias statuerat; quas, si quicquam video, ne ipse quidem Irenaeus inde voluit exclusas, quum renovatam Terram contendat, incredibili felicitate cibos hominibus & bestiis reddituram, ex Apocryphis Libris somnia somniis aggregans.

Sed Irenaeo parumper dimisso, Sanctum Justinum repetamus, & quae illius sententia reapse fuerit de Animabus Piorum & Iniquorum a Corpore segregatis, iterum sciscitemur. Respondentem habeo in Apologia Prima, quae olim Secunda dicebatur, pag. 66. Edition. Colonienf. hisce verbis: *Quum Animas asserimus post mortem quoque sensu praeditas esse; ac Injustorum quidem Excruciari; Proborum vero, suppliciiis liberari, Feliciter Agere: eam Poetis &*

Philosophis eadem asseverare existimamur. Infra addit: Nos autem Immortales dumtaxat eos fieri scimus, qui sancte per virtutem ad imitationem Dei vivunt. Torqueri autem (ἡς ἁλώσις τιπὶ) in Igne Aeterno, qui absque resipiscentia & morum mutatione aetatem transigunt, credimus. Ad haec Burnetus e Dialogo cum Tryphone, uti nuper monui, haec tantummodo Sancti Justini verba e pag. 223. produxit: Piae quidem Animae in Loco quodam meliori manent; Injustae vero & Pravae in deteriore, Judicii tempus tandem expectantes. Verum addenda ea erant, quae subsequuntur, videlicet: Hoc namque modo, quae dignae sunt, ut Coram Deo appareant, non moriuntur amplius. Illae autem Excruciantur, quoad eas & esse, & Excruciari vult Deus. Quantum haec distent a Burneti placitis, nemo non sentiat. Ille cum Felicitatem Proborum, tum Poenas Improborum usque ad finem Mundi prorogat, eorumque Animas in speciem quamdam Somni conjicit. At illius Somnia Justinus ipse jamdiu coarguit, tradens, Justorum Spiritus Feliciter degere post mortem, & quidem in Loco quodam Meliori, quam terrena nostra habitatio: Iniquorum vero Excruciari, & quidem manere in Loco Deteriore, atque in Igne Aeterno. Quae ergo testem pro se Justinum Martyrem advocare Burnetus audeat? Agnoscit ille, Nunc impiorum & iniquorum Animas excruciaci, minime expectato fine Mundi. Ergo ex Theoremate primo consequitur, Animas quoque Justorum deferri ad Beatorum Gloriam, atque ut illae Poenam, ita & istas Praemium reportare suarum Virtutum. Immo ea sunt Justini verba, ut sine vi ad Catholicum dogma pro Justis quoque accommodari posse videantur. Quum enim ait in Meliori Loco versari, & Immortalitate donari Animas hinc abeuntes, quae (ἀθανάτων τῶ Θεῷ παρασσω) dignae sunt, ut coram Deo appareant, interpretari sane quisquam possit, hanc apparitionem Coram Deo futuram post universale Judicium: sed rectius licebit nobis aliter arbitrari, hoc est, ut ex vi contextus verborum deducitur, contingere statim a morte istam apparitionem ad conspectum Dei. Supra vidimus Coronam Immortalitatis, & Praemium apud Deum conferri Justis, mox ut e vita emigrant. Idem heic innuitur; immo hujusmodi interpretationem ab ipso Sancto Martyre Justino confirmatam accipe. Narrat ille in Apologia Secunda (quae olim Prima credebatur) pag. 43. accusatum fuisse apud Urbicium Praefectum Urbis Ptolemaeum quemdam, quod Christianae professionis esset, & in generose confitentem Christum, mortis sententiam fuisse promulgatam. Adstabat Lucius quidam & ipse

& ipse Christianus, qui libera voce iniquum Urbicii iudicium est exsecratus. *Tu-ne ergo quoque*, inquit Urbicius, *eandem, quam ille, sectam tenes?* Fortiter asseveravit ille; & par propterea in illum poena ab impio Iudice decreta fuit. *Cui quidem*, inquit Sanctus Iustinus, *se gratiam ille debere professus est: a malis quippe dominis se liberari, & ad Deum Patrem & Regem optimum transire.* Tum subdit Iustinus, Senatui Romanum alloquens: *Ne vero quispiam dicat: Omnes vos igitur vobis ipsis adfertis manus, atque ad Deum jam Nunc Ite, neque negotium vobis facessite: causam, cur hoc non faciamus, exponam &c.* En ergo statim a morte *ad Deum Patrem & Regem*, hoc est ad conspectum Dei transferri Animas, quae dignae sunt, ut *Coram Deo Appareant*; atque adeo a Catholicorum sententia minime abfuisse Martyrem Iustinum, eumque propterea non uno titulo adversari Novatoris Burneti placitis. Tribuuntur etiam Sancto Iustino *Quaestiones & Responsiones ad Oribodoxos*, inter ejus Opera evulgatae. Sed foetum illum ad Auctorem spectare, qui Saeculo Christi Quinto floruerit, emunctioris naris Eruditi nunc censent. Attamen, quia & illius suffragio utitur Burnetus pag. 64. heic ei sit locus. Igitur inquit ille *Quaest. LX. Nemi-
mini ante Resurrectionem, rerum in vita transactarum Retributio redditur.* Tum *Quaest. LXXVI. Utilitas Latroni, quod Paradisum sit ingressus, haec fuit: quod fidei commodum re ipsa percepit, per quam dignus reputatus est, qui Sanctorum coetus adjungeretur: in quo usque ad diem Resurrectionis & Remuneracionis reservatur.* Fallitur tamen hic Auctor, dum in ipsa *Quaest. LX. contra mentem Patrum, immo & ipsius Evangelii, censet, nar-
rationem de Lazaro ac Divite respicere tempora futura post Resurrectionem & Iudicium extremum.* Ut quid enim *fratres ejus* dicuntur adhuc vivere super terram? Ergo inde saltem constat, *Retributionem* Improborum fieri ante Resurrectionem. Nam *arrat-
pēdōr* ibi *Retributionem*, non vero, ut vertit Burnetus, *Remuneracionem* significat, & non minus ad Justos, quam ad Injustos refer-
tur. Deinde quum Scriptor ille Millenarii erroris sectatorem se prodat *Quaest. XCV. & Quaest. CXII.* quid nostra refert, ut su-
pra animadvertimus, si e principio, quod falsum esse patet, ille intulit, *Retributionem* differendam esse usque ad Carnis Resurre-
ctionem? Quamquam & illius verba mitius interpretari nefas ne-
quaquam esset, ita ut loqui censeatur de perfecta tantummodo & completa illa *Retributione*, quae Animas omnium manet in supre-
mo Iudicio, & quam Catholici quoque agnoscunt. Is profecto in

eadem Quaest. LXXV. haec habet, studiose a Burneto dissimulata: *Post exitum vero Animarum e Corpore, illico Iusti ab Injustis segregantur (en peculiare & occultum Iudicium Animarum.) Abducuntur enim ab Angelis ad condigna Loca. Ac Iustorum quidem Animae in Paradisum, ubi consuetudine & aspectu fruuntur Angelorum & Archangelorum; per Visionem autem, & ipsius Servatoris Christi, pro eo atque diuturnum est: Peregre absumus a Corpore, & praesentes adsumus apud Dominum. Inveniat heic, si potis est, Burnetus sententiam suam; & praecipue quod is Animam e Corpore solutam pag. 85. spoliat sensu & perceptione Mundi externi, immo & voluntate, & dolore: quae temere effusa dogmata earundem Quaestionum Auctor infra impugnat ac rejicit.*

C A P. I X.

Sanctus Irenaeus Martyr & Episcopus Millenarii somnii patronus: Eodem errore infectus Tertullianus. Uterque tamen Catholicae sententiae suam vim inesse fatetur. Quae Origenis, Viatorini Martyris, & Lantii Firmiani hac de re opinio fuerit.

AD Sanctum Irenaeum regredior, quem frustra Cardinalis Belarminus a Chiliastrarum errore purgandum speravit. Citius Aethiopem dealbes. Immo, si ei credimus Lib. V. Cap. 31. *Animae abibunt in invisibilem Locum, definitum eis a Deo, & ibi usque ad Resurrectionem commorabuntur, sustinentes Resurrectionem: post, recipientes Corpora, & perfecte resurgentes, hoc est corporaliter, quemadmodum & Dominus resurrexit, sic venient in conspectum Dei.* Sed quam pauci facienda sit illius hac de re opinio, nil luculentius ostendet, quam ratio ab eo adhibita, ut hoc aliis persuaderet. *Si haec, ait, ita essent, quemadmodum dicunt (id est alii Catholici ejusdem temporis, qui putabant recte credidisse, sentientes, Animas Iustorum in Caelum sine mora, aut sine grandi mora ferri) ipse utique Dominus, in quem se dicunt credere, non in tertia die fecisset Resurrectionem, sed super Crucem expirans, confestim utique abiisset sursum, relinquens Corpus terrae. Si ergo Dominus legem Mortuorum servavit, ut fieret primogenitus a mortuis, & commoratus usque in tertiam diem in inferioribus terrae, post deinde sur-*
gens

*gens in Carne, sic ascendit ad Patrem: quomodo non confundantur, qui dicunt, interiorem hominem ipsorum dereliquentem heic Corpus, in super caelestem ascendere locum? Parcat Sanctus Episcopus: suae imaginationi nimis heic ipse indulgit, quae legem & mensuram praescribere voluit non solum actibus Christi Domini, sed & divinae Beneficentiae erga servos suos, limiteque ponere supereminenti scientiae Caritatis Dei, qui potens est omnia facere superabundanter, quam petimus aut intelligimus secundum virtutem, quae operatur in nobis, uti scribit Apostolus ad Ephef. III. 19. Resurrexit Redemptor noster, quando voluit. Is enim de se ipso ait Johana. X. 17. Ego pono animam meam, & iterum sumeam eam. Nemo tollit eam a me: sed ego pono eam a me ipso, & potestatem habeo ponendi eam; & potestatem habeo iterum sumendi eam. Quoties etiam voluit, potuit & potest in Caelum a se apertum animas electorum suorum recipere. Neque hilum haec inter se cohaerent: Christus tertia die resurrexit, & post quadraginta dies in Caelum ascendit: ergo absque Corpore Animae omnium Fidelium in Caelestem Patriam ab ipso revocari nequeunt; aut certe nequeunt, nisi post tres dies, aut post dies quadraginta. Quod si a Christi Resurrectione & Ascensione petendus esset ordo promotionis Justorum, ut Irenaeus contendit, Justique excitandi forent a mortuis tertia die, & post quadraginta transferendi & ipsi essent in Caelum. Quum autem ille ait: *Et nos suscitare debemus definitum a Deo Resurrectionis nostrae tempus, praenuntiatum a Prophetis, & sic resurgentes assumi, quotquot Dominus ad hoc dignos habuerit: nemo non videt, hisce nequaquam tan- gi Catholicos, qui Resurrectionem & ipsi expectant in fine Mundi, neque jam factam credunt, uti Gnostici dicebant. Ceterum vix desines mirari, dum consideres, qualem ordinem promotionis Justorum sanctus vir ipse tradiderit, non divinis Literis inhaerens, sed spuris Papiac, aliorumque levis ingenii virorum traditionibus nimium credulus. Nimirum post universale Judicium censet futurum Caelum novum & Terram novam, hoc est Terram ipsam, quam inhabitamus, in quibus nopus perseverabit homo, Semper nova confabulans Deo. Et quoniam haec Semper perseverabunt Sine Fine, quemadmodum Presbyteri dicunt, tunc qui digni fuerint Caelorum conversatione, illuc transibunt, id est in Caelos: alii tute Paradisi deliciis utentur: alii autem speciositatem Civitatis (hoc est terrenae Hierusalem) possidebunt. Ubique autem Deus videbitur, & quemadmodum digni erunt videntes eum. Reliquas illius imaginationes omitto. Quisnam vero sacrarum Literarum & Theologiae gnarus,**

haec

haec perpendens, confestim non fateatur, incassum obijci Catholicorum dogmati, de quo agimus, auctoritatem Irenaei, utique summe venerandi viri, sed *in ordine promotionis Iustorum*, ut evidentissime patet, inania & incredibilia solum proferentis? Quod satis interim futurum est nobis, ne ille quidem negat, quin suo tempore aliter alii sentirent, & *putarentur recte credidisse*, hoc est alii Catholici, qui Papiæ phantasmatis rejectis Animarum Iustarum Beatitudinem in Caelis anticipandam credebant. Immo Sanctus Episcopus alibi agnoscere videtur, Animas Martyrum, quos veros Christi testes Ecclesia tantum Catholica ostendere potest, post mortem in Caelestia Regna recta ferri. Scribit enim Lib. IV. Cap. 64. sive Cap. 33. § 9. in Edition. Cl. P. Massuet: *Quapropter Ecclesia omni in loco ob eam, quam habet erga Deum dilectionem, multitudinem Martyrum in omni tempore Praemittit ad Patrem.* Similia protulit Lib. III. Cap. XVI. olim XVII. de Innocentibus pro Christo occisis, inquires: *Propter hoc & Pueros eripiebat, qui erant in domo David, bene sortiti illo tempore nasci, ut eos PRAEMITTERET in suum REGNUM; ipse Infans quum esset, Infantes hominum Martyres parans.* Si vel solas Martyrum Animas in Caelum mature profectas habemus (quae plane tunc erat communis Ecclesiae sententia, ipsiusque Irenaei mens fuisse videtur) nihil aliud opus est, ut totum ipsius Sancti viri, simulque Burneti aedificium per se solvi ac ruere intelligamus, ut supra ostendi Cap. VI. Theoremate Secundo. Sed quam melius egisset Burnetus, si Irenaeum potius consulisset Lib. V. Cap. 20. ubi haec ejus verba? *Ecclesiae quidem praedicatio vera & firma, apud quam una & eadem salutis via in universo Mundo ostenditur. Huic enim creditum est lumen Dei, & propter hoc sapientia Dei. Ubique enim Ecclesia praedicat Veritatem. Qui ergo relinquunt praeconium Ecclesiae, imperitiam Sanctorum Presbyterorum arguunt, non contemplantes, quanto pluri sit idiota religiosus a blasphemio & impudente Sophista. Tales sunt autem omnes Haeretici, & qui se plur aliquid praeter Veritatem invenire putant.* Opinionem de Millenario Regno, ac retardata Sanctorum Beatitate, faterur idem Sanctus vir, ab aliis sui aevi Catholicis improbatam fuisse. At quod est ad dogma *Infallibilitatis* Ecclesiae, impositumque Fidelibus de ea audienda, ejusque decretis amplectendis praeceptum: id veluti ratum, omniumque Catholicorum consensu probatum Christianae Religionis principium Sanctus Irenaeus compluribus aliis in locis confirmat atque inculcat; ita ut si is temporibus nostris vixisset, primus, Millenario errore deposito, in sententiam Ecclesiae Catholicae

licae concessurus fuisset. Interim ex ipsius sancti Praesulis diserto suffragio habemus Burnetum Haereticorum albo inscriptum, ipsumque Irenaeum in hac ipsa quaestione alio saltem ex latere nobis militantem.

Ad *Tertullianum* quod attinet, exploratum est, pro Millenaria fabula & ipsum stetisse; ac mirandum proinde non esse, si ad Judicium extremum, immo & post somnium illud Mille Annorum Regnum, plenam & absolutam Sanctorum Beatitudinem distulit. Plenam, inquam: neque enim ille inficias it, quin statim a morte Justorum & Injustorum occultum & peculiare Judicium Animarum fiat, complendum postea & manifestandum in postremo, quum omnium Corpora resurgent. Immo non distitetur, illis Felicitatem, & istis Supplicia gravia post mortem contingere. In Lib. de Anima Cap. 58. ita is Burnetum nostrum, ut puto, alloquitur: *Velis, ac nolis, & Supplicia jam illic, & Refrigeria. Habes Pauperem & Divitem*; idest Evangelicum Lazarum, de quo etiam dixit in Lib. de Jejunii Cap. 16. *Sed nec apud Inferos admonitio cessavit, ubi in Divite quidem convivia Cruciantur (scilicet in flamma ac tormentis) in Paupere vero Jejunia recreantur.* Paria habet in Lib. de Resurrectione Carnis Cap. 17. Pergit quoque in praelaudato Lib. de Anima: *Cur enim non putes (Burnete) Animam & Puniri, & Foveri Interim, sub expectatione utriusque Judicii? Quia salvum debet esse, inquis, in Judicio divino negotium suum, sine ulla praelibatione sententiae; tum quia & Carnis opperienda est restitutio, ut consortis operarum atque mercedum. Quid ergo fiet in tempore isto? Dormiemus?* Ita sane respondet Burnetus. Cui Tertullianus: *At enim Animae nec in viventibus dormiunt; Corporum enim Somnus, quorum & ipsa mors. Aut nihil vis agi illic?* Ne longius sermo elabatur, singula referens, satis erunt haec pauca. Postquam dixit, Animam & in carne, si velit, dolere; si velit, gaudere; subdit: *Hoc si ex arbitrio suo in vita, quanto magis ex Judicio Dei post Mortem?* &c. Ergo propter hoc congruentissimum est, Animam, licet non expectata Carne, Puniri. Si ob cogitatus pios & benevolos, sine Carne recreabitur &c. salva Resurrectionis plenitudine, per Carnem quoque. Perspicias igitur, quantum hac ex parte Burneti somniis adversetur ejus commilito Tertullianus. Qui & Cap. 17. de Resurrect. Carnis, iterum contendit, Animas (quas errore non levi Corporales prohitetur) Torqueri, Foverique apud Inferos, licet nudas, licet adhuc exclusas carnis: quod probavit Lazari exemplum. Proinde addit, Animam sine Carne & felicitatis, & supplicii capacem esse.

Idcirco

Idcirco & Patitur apud Inferos, prior degustans Judicium, expectant tamen & Carnem, ut per illam etiam facta compenset, cui cogitata mandavit. His positis, jam sequitur ex praemisso Theoremate Primo, immerito non secus a Tertulliano, atque a Burneto Animabus Justorum negari Beatitudinem in Caelis ante univerforum Judicium, quando & sine Carne jam Improborum Animae torquentur & excruciantur in Inferis.

Deinde ex Burneti opinione impugnata sese convertit effrene Tertulliani ingenium ad oppugnandam illorum quoque Catholicorum sententiam, qui, uti non semel vidimus, jam tum arbitrabantur, nihil obstare Justorum Animabus purgatis, quo minus in Caelum ferantur. Igitur inquit eodem in Libro de Anima Cap. LV. *Habes & illos cubito pellere (id est irridere) qui satis superbe, non putant Animas Fidelium Inferis dignas, servi super Dominum, & discipuli super Magistrum, aspernati, si forte in Abrahamae sinu, expectandae Resurrectionis solatium capere. Sed in hoc, inquit, Christus Inferos adiit, ne nos adiremus; ceteram, quod discrimen Ethnicorum & Christianorum, si carcer mortuis idem?* Tum Tertullianus mordicus tuetur, nulli patere Caelum, & dumtaxat cum transactione Mundi reseratum iri Regna Caelorum. Haec ille a Montano acceperat, jam in ejus Haeresin delapsus. Catholicos deinde rursus objicientes inducit. *Immo, inquit, dormitio nostra in Paradiso, quo jam tunc Patriarchae & Prophetae, appendices Dominicae Resurrectionis, ab Inferis migraverint.* Animadvertite heic, quanta vetustate nitatur sententia putantium, Patriarchas & Prophetas, quorum Corpora in Resurrectione Domini & ipsa surrexere, ut scribit Sanctus Matthaeus XXVII. 52. una cum ipso Domino in Caelum conscendisse. Inani argumento utitur Tertullianus jam Montanista ad ejusmodi opinionem evertendam, inquit: *Et quomodo Johanni in spiritu Paradisi regio revelata, quae subjicitur Altari, nullas alias Animas apud se, praeter Martyrum, ostendit? Quomodo Perpetua, fortissima Martyr, sub die Passionis, in revelatione Paradisi solos illic Commartyres suos vidit; nisi quia nullis romptata (id est gladius versatilis, quo in caelestem Paradisum aditus vetatur, ad instar terrestris) Paradisi janitrix cedit, nisi qui in Christo decesserint, non in Adam? An Animas tantummodo Martyrum in Caelorum Curia aspexerit Sanctus Johannes, jam perpendimus Cap. IV. Ariolatur heic Tertullianus, & suo solum fretus cerebro insuper negat Patriarcharum Animabus ingressum in Caelum, quod decesserint in Adam, & non in Christo:*

nam

nam & illas Christi meritis, ipso Christo ascendente in Caelum; jam in Vitam aeternam translatas, Orthodoxorum sententia est. Subdit postea: *Agnosce itaque differentiam Ethnicis & Fidelis in morte. Si pro Deo occumbas, tota Paradisi clavis tuus sanguis est.* Ad haec in Lib. de Resurrect. Cap. 43. Nemo, ait, *peregrinatus a Corpore, Statim immoratur penes Dominum, nisi ex Martyrii praerogativa, Paradiso scilicet, non Inferis, deversurus.* Quid Paradisi nomine designet heic Tertullianus, nequaquam ego decernam. Paradisum ille in Apologet. Cap. XLVII. appellat *Locum Divinae Amoenitatis, recipiendis Sanctorum Spiritibus destinatum, maceria quadam igneae illius zonae a notitia orbis communis segregatum.* Satis in praesentia sit, evidenter agnosci, ejus Paradisum ab Inferis exclusum fuisse, atque illic statim emigrare Martyrum Animas; immo ibi eas esse *penes Dominum.* His positis peto, quei Burnetus (post amandatas omnes & Justorum, & Injustorum Animas in ignotum sibi locum, ubi reclusas dormire illas cogit, longe a Deo, in expectatione supremi Judicii) nunc audeat testem pro se adhibere Tertullianum, qui Improborum Animas illico in Inferorum tormenta conjicit, & saltem Martyrum in Paradisum, atque in conspectum & visionem Domini perducit? Praeterea animadverteris, ab acutissimo Afro tamquam rem certam arripi, quod & nos supra ostendimus, scilicet melius esse *peregrinari a Corpore, & praesentes esse ad Dominum*, nihil aliud significasse, nisi optandam esse Justis dissolutionem Animae a Corpore; quippe statim ad Dominum evolant, & *penes Dominum* sunt, hoc est praesentia illius, utique beatifica, frui incipiunt. Incassum postea Tertullianus unis Martyrum Animabus ejusmodi Felicitatis praerogativam pollicetur. Nulla justa ratio occurrit, cur ceteris Proborum Spiritibus neges, quod illis concedis. Ostium jam reclusum est. Vicerunt & isti Mundum; eosque, ut Clemens Alexandrinus, alique Patres ajunt, non dedecet nobilis *Martyrum* appellatio, atque adeo & Praemium. Cur non opera istorum sequantur & istos? Neque Apostolus cupiens *dissolvi*, sive *peregrinari a Corpore*, ut *praesens esset ad Dominum*, sperabat id se confestim a morte assequuturum, quod caput daturus foret pro Christo; sed quod jam consummasset cursum, & fidem servasset. Frustra quoque suffragium ex Apocalypsi Tertullianus petit, quasi mortuorum Fidelium Animae *sub Altari* positae Deum non intueantur, neque ejus conspectu fruuntur. Aditum dubitationi praecludit Sanctus Johannes, dum Apocalypf. VII. 9. se vidisse testatur *Turbam Magnam, quam*

K

dinumc-

dinumerare nemo poterat ex omnibus Gentibus, & Populis, & Linguis (ergo non de Angelis, sed de humanis Spiritibus) stantes Ante Thronum, & in Conspectu Agni. Pete, quis, & ubi hic Thronus? Respondet Apostolus in subsequenti vers. undecimo: Et omnes Angeli stabant in circuitu Throni, & Seniorum, & quatuor Animalium. Et ceciderunt in Conspectu Throni in facies suas, & adoraverunt Deum. Haec interpretatione non egent. Caecus sit, qui haec non videat. Atque haec pauca de Tertulliano, Millenarii phantasmatis alioqui patrono. Quod si & ille diserte fatetur, suis temporibus abundasse Catholicos, qui Justorum Beatitatem minime differendam censebant: cur nos Tertulliani ingenio, in tot aliis a veritate Catholicae doctrinae devio, quam illis, fidem in controversia ista adhibeamus? Eoque minus ab illo nobis timendum; nam & ipse tandem in Catholicorum sententiam hac in parte descendisse, & quod nos agnoscimus, agnovisse videtur. Accipe *Scorpiacum* illius, Opusculum videlicet, postremis suae vitae annis, uti eruditi censent, ab eo compositum. Is ibi pugnat contra Gnosticos & Valentinianos, quorum sententia erat, Christi Fidelium Animas Corpore solutas, in Caelum quidem ferri, sed per varias Caelorum sedes disrineri, donec Confessionem nominis Christi coram Potestatibus & Spiritibus ibi degentibus faciant; neque enim Haeretici illi necessariam arbitrabantur ejusmodi Confessionem in Terris, Martyrio sese sub obtentu hujusce opinionis subducentes. Nimirum, aiebant, quum *Animae de Corporibus exceßerint, & per singula tabulata Caelorum, de recepto dispici coeperint* &c. Contra instabat Tertullianus, Confessionem nominis Christi faciendam *Coram hominibus* in Terra, quoties occasio poscit; Animas vero Christianorum, dum solutae sint peccatis, *Sine mora* in Caelum deferri, ubi Christus est in dextera Dei Patris. Scito, inquit ille Cap. X. *& Ascensum illum exinde complanatum vestigiis Domini; nec ULLAM MORAM, aut Quaestionem in limine Christianis occursuram* &c. Nam si adhuc clausum putas Caelum, memento *Claves ejus hunc Dominum Petro, & per eum Ecclesiae tradidisse.* Ergo tandem Tertullianus contra Burnetum insurgens, intellexit, & falsus est, Caelum post Ascensionem Domini non amplius clausum, sed referatum esse; atque illuc Proborum Animabus ingressum *Sine Mora* patere; neque exspectandum eis esse finem Saeculorum, ut ad Dominum cum Patre sedentem perveniant; idque non solum Martyribus, sed *Christiano* cuicumque licere, dum sordes peccatorum eluerit.

Nihil porro esset, cur de *Origene*, cujus etiam clypeo suam senten-

tentiam Burnetus tueretur, curam heic haberemus; quando ejus Libri tot erroribus, tot imaginationibus scatent, ut nihili faciendum sit, quidquid ille, ne sibi quidem saepe constans, excogitavit, quoties a Catholicae Ecclesiae dogmatis alienum deprehenditur. Ridet illum vel ipse Burnetus Cap. Quinto, quod tribuat aereum Corpus Animabus post dissolutionem terrestris sui Corporis. Millenarii praeterea Regni commentum ab Origene adoptatum novimus: quid ergo mirandum, si & illius consecraria pariter nutantia idem ipse adoptarit? Attamen addam, siquidem Burnetus integram Origenis narrationem ex Homilia VII. in Leviticum nobis exhibuisset, jam patuisset, aut nimis absurda esse illius sentia, aut conciliari, componique non aegre ea posse cum Catholicorum sententia. Contendit ibi fervida sua imaginatione abreptus Origenes, nondum res creatas ad summam perfectionem fuisse adductas; ideoque Beatos ipsos nondum plenam recepisse laetitiam, & ne ipsos quidem Prophetas vel Apostolos: immo (quod stupeas, atque execreris) ne ipsum quidem gloriae Regem Christum. En ejus verba: *Non dum enim receperunt laetitiam suam, ne Apostoli quidem; sed & ipsi expectant, ut & ego laetitiae eorum particeps fiam.* Et quaenam est ejusmodi laetitia? Animadvertite, quae sequuntur: *Neque enim, ait, decedentes hinc Sancti continuo Integra Meritorum suorum Praemia consequuntur: sed expectant etiam nos, licet morantes, licet desider. Non enim est illis Perfecta Laetitia, donec pro erroribus nostris dolent, & lugent nostra peccata.* Addit deinde, Sanctos Perfectam nobiscum in die Judicii Beatitudinem capturos, propterea quod totum simul Corpus suscitandum sit, homines nimirum universi. Nam Corpus istud, sive Universitas, e singulis hominibus constans, si qua sui parte careat, adhuc mancum est, ac proinde tunc solum, quum omnes resurgent, integritatem recipiet, plenaque & completa fruetur Laetitia. *Vides igitur, subdit, quia expectat adhuc Abraham, ut, quae Perfecta sunt, consequatur. Expectat & Isaac & Jacob, & omnes Prophetae expectant nos, ut nobiscum Perfectam Beatitudinem capiant.* Immo haec addit: *Quod si tibi, qui membrum es, non videtur esse Perfecta Laetitia, si desit aliud Membrum: quanto magis Dominus & Salvator noster, qui Caput & auctor est totius Corporis, non sibi Perfectam dicit esse Laetitiam, donec aliquid ex Membris deesse Corpori suo videt?* Pudeat Burnetum, recte uti, qui deliramentis hisce, si haec rigide accipiamus, vel ipsi Christo detrahit, sedenti a dextris & in gloria Dei Patris. Ad nos quod attinet, tenemus jam, Origenem satis aper-

te fateri, Sanctos e praesenti vita sublato, *nondum Integra Meritorum suorum Praemia* fuisse consequutos. Ergo jam *Praemium* retulere, quamquam non integrum. *Laetitia* quoque est illis, sed nondum *Perfecta*. Adveniente Christo in fine Mundi, tunc eis erit Praemium completum, perfecta Laetitia. Ergo & Origines Beatitude[m] Sanctorum post eorum excessum e terris non negat. Perfectam & Plenam tantummodo negat: quod ne nos quidem diffitemur. Neque obstat, quominus ingentem credamus illorum Beatitude[m], quamvis nondum Perfecta sit, quando Origenes, vel ipsum Christum, certe beatissimum, Perfecta nondum Laetitia frui, sibi fingit; quod adhuc sua membra, hoc est Fideles reliquos, expectet secum in Gloria conjungendos. Idem quoque innuere videtur Origenes Comment. in Matth. XIII. 36. ubi non sine aliquo errore ait: *Existimo ego, in ipso statim Beatitudinis initio, qui fruuntur ii, qui salvi sunt, quoniam nondum purgati sunt, qui tales non sunt, inde oriri illam luminis Beatorum differentiam. Sed postquam a toto Christi Regno omnia collecta fuerint scandala, tunc futurum est, ut in Patris sui Regno fulgeant Justi, unum solare lumen facti*. Agnoscit etiam in Lib. VIII. contra Celsum *Angelos, Animas, & Spiritus* precantes pro nobis: in Caelis profecto, & non in Terra. Agnoscit demum Lib. II. Cap. ultim. Peri Archon, Sanctorum Animas e Corpore decedentes ad loca aerea duci, ubi sublimiora discunt; ac tandem supra Caelos ad Christum perducunt, ubi omnia in Deo vident. En ejus verba: *Puto, Sanctos quosque discendentes de hac vita, permanere in loco aliquo in terra posito; quem Paradisum dicit Scriptura divina, velut in quodam eruditionis loco, & ut ita dixerim, in Schola vel auditorio Animarum, in quo de omnibus his, quae in terra viderint, doceantur &c. Si quis mundus corde, & purior mente, & exercitior sensus fuerit, velocius perficiens, ad aeris locum ascendet, & ad Caelorum Regna perveniet. Quamobrem videat Burnetus, an congrue somnia sua Origenis calculo confirmanda sibi proposuerit.*

Victorinum Martyrem, cujus verba e Commentario in Apocalypsin aut interpolato, aut dubii Auctoris, laudat Burnetus, nihil moror; uti neque *Laetantium Firmianum*. Addicti iidem quoque Systemati aurei Millenarii Regni, Animas Justorum a Caelo arcere, ut toties dixi, cogebantur. Verum ejusmodi Systema, inane prorsus, quis, quaeso, nisi cum Burneto desipere amet, concoquere nunc in tanta luce eruditionis velit ac possit? De *Laetantio* autem, egregio Philosopho, infirmo Theologo, jamdiu Sanctus Hieronymus in Epistola 49. alias 13. ad Paulinum pronuntiavit: *Utinam tam nostra*

stra affirmare potuisset, quam facile aliena destruxit. Alios quoque praeter istum errorem in ipsius Libris deprehendimus, quos ob materiem nondum ab Ecclesia tunc ventilatam condonare quidem volumus, amplecti nequimus. Inter alia quis umquam plaudeat homini, in unam *Custodiam* sive Carcerem conjicienti tam Justorum, quam Injustorum Animas post mortem? Sacrae Literae, ac veterum Traditio id prorsus improbant. Animus etiam refugit id credere. Atque haecenus censum Scriptorum, a Burneto in suae opinionis suffragium e tribus primis Ecclesiae Saeculis accitorum. Quam parum vero movere nos possit aut debeat illorum auctoritas, nullis sacrarum Literarum certis documentis nixa, immo super Regni Millenarii male confutam fabulam unice fundata, jam satis me ostendisse confido. Non semel autem dixi (neque id negarunt, ut vidimus, Justinus, Irenaeus, ac Tertullianus) viguisse tunc etiam in Catholica Ecclesia sententiam, a terreno illo Regno post supremum vivorum & mortuorum Judicium inchoando alienam; & plerosque detulisse Animabus Justorum ex hac vita decedentium sedem in Caelis, non vero in Carcere illo sive Custodia, quam post Lactantium Philosophum, & Vigilantium haereticum hominem, nobis obtrudere Burnetus percuperet. Sed nunc eadem veritas in majori est mihi luce collocanda. Ad quod potissimum praesto nobis esse possunt Acta Sanctorum sinceriora & vetustiora, quae in insigni sua Collectione protulerunt hucusque Johannes Bollandus, ejusque successores e Societate Jesu, & Ruinartus in Libro edito contra Dodvvelum. Et eorum quidem, quibus usus sum, antiquitatem jamdiu docti Viri vindicarunt, ita ut idem ostendere supervacaneum sit, & me hoc onere ab iis levatum sentiam. Praesertim vero *Martyrum* Animas, e Corpore prodeuntes, in Caelestem Patriam consessim rapi, concordem sensere veteres: quod unum ubi persuasum habeamus, non est, cur ceteris Justis Caelum negemus, totaque Burneti moles dehiscat oportet.

CAP.

CAP. X.

Acta veterum sincera Animas Martyrum confestim ad Caelorum Regnum ferri testantur. Clemens Alexandrinus, Dionysius Episcopus Alexandrinus, & Cyprianus Carthaginiensis Episcopus, non solum Martyribus, sed & ceteris Sanctis patere Caelum post mortem testantur. Pro Martyribus Eucharistica, non Propitiatoria commemoratio in sacris.

Alia Martyrum Acta eidem veritati suffragium praebent.

Liceat mihi primo loco memorare Acta Sanctae Symphorosae, quae circiter Annum Vulgarem CXXV. in Christi confessione fortissime vitam dedit. De Martyribus agebat illa: *Elegerunt magis decollari, quam vinci; passi mortem, quae pronomine Christi suscepta, inter homines quidem ignominiam eis peperit temporalem, inter Angelos vero decus & gloriam sempiternam; inter quos nunc gradientes, & tropaea passionum suarum laudantes, CUM AETERNO REGE Vita Aeterna fruuntur IN CAELIS.* Acta vetustissima Passionis Sanctae Felicitatis, ejusque filiorum, qui circiter Annum vulgaris Aerae CL. pro Christo decertarunt, deinde nobis sese offerunt. Ibi animos natis suis addebat generosa mater, inquit: *Videte, filii, Caelum, & sursum adspicite. Ibi vos expectat Christus cum Sanctis suis. Pugnate pro animabus vestris, & fideles vos in amore Christi exhibete.* Pugnarunt illi, & diversis suppliciis interempti, omnes effecti sunt victores & Martyres Christi: & cum Matre triumphantes, ad Praemia in Caelis percipienda convolarunt. *Qui pro Dei amore minas hominum, poenas, & verbera contemneres, Christi amici facti sunt in Regno Caelorum.* Quibus verbis exprimeretur merces, qua suos Athletas statim Christus donabat, jam discis. Aliis alii verbis idem ineffabile Praemium designarunt. De Sancto Justino Martyre supra fuit nobis sermo. Acta judicialia gloriosi illius Martyris, circiter Annum Christi CLXVII. consummati, habes edita a Ruinarto Latine, Graece quoque a Papebrochio ad diem primam Junii. Ibi Rusticus Praefectus sanctum virum interrogat: *Si a capite per totum corpus flagellis caesus fueris, persuasum-ne habes, fore ut IN CAELUM ASCENDAS?* Cui Justinus: *spero, inquit, me habiturum, quod habent, qui Christi dogmata servaverint, si haec ipsa, quae dicis, perpeffus fuero.*

fuero. Scio enim, omnibus, qui sic vixerint, divinam gratiam conservari, quoad totus Mundus consummetur. Ad haec Praefectus Rusticus: ergo futurum opinaris, ut *IN CAELOS ASCENDAS*, mercedem aliquam recepturus? Non opinor, inquit Justinus: Sed scio, & hoc tam certum habeo, ut nihil dubitem. Cum hinc confer nunc, quae supra ex ipsius Sancti Justini Libris attulimus, ac potissimum quae, ut idemmet testatur, Lucius quidam ad Martyrium raptus dicebat: videlicet, se gratiam habere Judici, vitam sibi eripienti; a malis quippe dominis se liberari, & *AD DEUM PATREM & REGEM OPTIMUM TRANSIRE*. Contigit etiam circiter Annum Christi CLXVIII. Martyrium Sanctorum Epipodii & Alexandri, quorum Acta prostant apud Surium, atque in Aprili Bollandiano. Ibi Epipodius ante Praesidem Ethnicum confitetur Jesum Christum, qui ineffabili mysterio Homo pariter & Deus, famulis suis tramitem Immortalitatis instituit, & ad Caelestia Regna perducit. Infra addit: Mibi vita non tollitur, sed mutatur in melius. Nec interest infirmitas corporea quo fine solvatur: dummodo *ANIMA CAELIS INVECTA AD SUUM REVERTATUR AUCTOREM*. Denique, ut ibi legitur, consummatio accelerata est Martyrii, ut puerum suum de passione ac persecutoribus triumphantem, *VELOCIUS CHRISTUS REMUNERATOR RECIPERET*. Exsistit etiam in Romae Subterranae Lib. III. Cap. 22. Inscriptio, in Coemeterio Callisti reperta, quam & Mabillonius in Itin. Ital. pag. 138. indubitatae antiquitatis monumentum appellat. Haec sunt illius verba.



*Alexander mortuus non est, sed vivit
SUPER ASTRA, & Corpus in hoc tumultu
Quiescit. Vitam explevit cum Antonino*

Imp. qui ubi multum beneficii anteverire praevideret, pro gratia odium reddit.

Genua enim flectens vero Deo sacrificaturus, ad supplicia ducitur. O tempora infaustra! quibus inter sacra & vota ne in cavernis quidem salvari possumus. Quid miserius vita? sed quid miserius morte?

cum ab amicis & parentibus sepeliri nequeant.

Tandem IN CAELO CORVSCAT. Parum vixit, qui

Vixit.

Saeculo Ch. secundo, quo imperarunt Antoninus Pius, & M. Aurelius

lius Antoninus, & Sanctus Iulianus geminas Christianorum Apologias scripsit, par est credere, positum fuisse hunc titulum. Sed si ad tertium quoque Saeculum, quo spurii Antonini regnarunt, referre vis, nihil interest. Certo inde hauris, Martyrem hunc creditum fuisse translatum *super Astra*, & *coruscare in Caelo*: quibus verbis quid aliud significatur, nisi summa Sanctorum Beatitas in Caelo?

Floruit etiam sub finem Saeculi a Christo nato Secundi Clemens Alexandrinus, quem nescio, cur in scenam cum reliquis non produxerit Burnetus, ut suorum pugilum agmen augeret. Is certe Lib. IV. Stromat. locum e Clementis Romani Epistola Prima ad Corinthios adfert, supra a nobis ad stateram revocatum, ubi scilicet Iusti morientes migrare dicuntur in *Χώραν Ἐσσεῖαν, Locum Piorum*. Periculum faciam ego, an exsculpi ab Alexandrino possit, quid revera vocabulo hocce olim significaretur. Sunt ejus verba Lib. VI. eorumdem Stromat. pag. 638. Editionis Colonienfis: *Ἰὰν ὁ ἀληθὲς Ἐὐαγγέλιον, multa, quae dormierant, surrexissent Corpora; ut quae videlicet translata essent (εἰς ἀμείνω τόπον) ad Meliorem Locum, sive Statum. De Sanctis, qui in Christi Resurrectione suscitati fuerunt e mortuis, & in Caelum una cum ipso ascendisse creduntur, agit ibi Alexandrinus Philosophus, eamque in rem adfert Hermae Verba e Lib. III. Cap. 16. Pastoris. Si ex Abrahæ Sinu in *Meliorē Locum* antiqui Patriarchæ & Prophetæ translati fuere: ergo non alio quam in Caelestem Patriam migrasse credendi sunt. Id quod satis indicare videtur Clemens idem Lib. VII. Stromat. pag. 736. ubi haec scribit, laudata deinde ab Eusebio Caesariensi Lib. III. Cap. 30. Histor. Ecclesiasticae. *Ἀγνὴν, Beatum Petrum, quum Uxorem suam duci ad supplicium videret, gaudio exultasse, quod a Deo vocata, ac mox IN PATRIAM REDITURA* esset (εὖς ὁμοῦ ἀναχωρεῖς) eamque proprio nomine compellantem, hortatorio & consolatorio vocis sono inclamasse: *Mulier, memento Domini*. En quo per Martyrium sancta illa femina abitura erat, *In Patriam*: quo nomine negare nemo audeat, quin, uti nos nunc, ita & veteres Caelum & Vitam Aeternam apud Deum significarint. Habemus ergo, quid *Locus Piorum*, quid *Locus* sive *Status Melior* in Christianorum veterum vocabulario sonet. Atque in hunc Locum se confestim post mortem adducendos praecipue Martyres exploratum habebant. Propterea subdit idem Clemens: *An non ergo est eis manifesta fidei Spei Post Mortem, qui etiam ipso tempore tormentorum Deo agunt gratias?* Sed & antea
in*

in eodem Lib. VII. pag. 732. Edition. Colonienf. constituerat Clemens *Purgationem* Animarum, postquam e Corpore abscēsserint, qua peracta quid subsequatur, hisce verbis nos docet: *Post quam redemptionem Praemium & Honores dantur Consummatis* (hoc est Spiritibus Jusorum Perfectis, sive Consummatis, de quibus loquitur Apostolus ad Hebr. XII. 23.) *quam cessaverint quidem a Purgatione. Cessaverint autem etiam ab alio quocumque ministerio, etsi sit sanctorum, & inter Sanctos. Deinde eos, qui fuerint Mundi Corde, quod quam proxime Domino adhaeserint, manet perpetuae contemplationis restitutio, & Deorum appellantur nomine, qui in eisdem Sedibus sunt Collocati, in quibus alii Dii, qui sunt primi a Servatore constituti. Audistis, Praemia & Honores dari Consummatis Spiritibus? Accipe etiam, quid Scriptor idem habeat Lib. IV. Stromat. pag. 492. ubi Ethnicos redarguit, quia nec Honores Post Mortem eorum, qui sancte vixerunt, nec Supplicia eorum, qui injuste & libidinose gesserunt, volunt intelligere: non ex nostris solum, dico, Scripturis, sed nec suorum scriptis volunt aures praebere. Tum productis Platonis, aliorumque Philosophorum sententiis ostendit, esse post mortem Praemia & Poenas Animarum: illa vero Probris speranda esse, non post aliquot Annorum Millia, uti Burnetus persuadere populo frustra aggressus est. Nam, ut ipse Clemens Lib. V. pag. 546. ait: Bona autem spes est fore, ut, Postquam excessero, omnia Consequar. Eadem sibi volunt, quae dicuntur apud Mosē: Nemo videbit faciem meam, & vivet. Clarum est enim, neminem umquam vitae suae tempore posse Deum evidenter comprehendere. Qui sunt autem Mundi Corde, Deum videbunt, postquam ad extremam pervenerint perfectionem. Haec Clemens, a quo si hauriri & firmari sententiam Catholicae Ecclesiae de Beatitudine Sanctorum dixerō, consentientes mecum, ut spero, quosque veritatis amatores habeo.*

Ad Acta veterum Martyrum regrediamur. Ex sinceris Sancti Symphoriani Martyris, qui circiter Annum Christi CLXXX. vitam pro Christo dedisse traditur, eadem doctrina deducitur. Illum quippe cunctam ad patibulum mater hisce verbis confortabat: *Nate, nate Symphoriane, in mente habere Deum vivum. Resume constantiam, fili. Timere non possumus mortem, quae sine dubio perducit ad Vitam. Sursum cor suspende, fili. Aspice illum, qui regnat in Caelis. Hodie tibi vita non tollitur, sed mutatur in melius. Hodie, nate, AD SUPER-NAM VITAM felici commutatione migrabis. Hisce adde Acta Proconsularia Martyrum Scillitanorum, ad Annum Christi CCII. a Cardinali Baronio in Annalibus Ecclesiasticis edita, tum recusa*

a Ruinaro, & denique in Actis Sanctorum a Cl. P. Guilielmo Cuperio, continuatore Bollandi ad diem 17 Julii illustrata. Gloriosi illi Martyres in agone dicebant: *Deo gratias conferimus, qui dignatur nos HODIE Martyres ACCIPERE IN CAELIS pro confessione sua*. Sive, ut in aliis Actis legitur: *Hodie Martyres in Caelo sumus. Sic venientes ad locum martyrii, gladio beatas Deo Animas tradiderunt. Dominus vero Jesus Christus suscepit Martyres suos in Pace*. Neque minus praeclara, immo longe praeclariora sunt, quae de Martyribus in Deciana persecutione Anno Christi CCL. ad aeternam Vitam translatis, scripsit Sanctus *Dionysius Alexandrinus Episcopus*, omnium, qui suo tempore floruerint, celeberrimus & doctissimus in Ecclesia Catholica Antistes & Scriptor. Quae tunc contingere sub oculis suis, perscripsit ille ad Fabium, sive Fabianum Episcopum Antiochenum; ejusque Epistolam servavit nobis Eusebius Caesariensis Lib. VI. Cap. 41. & 42. Historiae Ecclesiasticae. En quid sanctus vir post tantae lanienae narrationem in calce ejusdem Epistolae subjungit: *Ceterum, inquit, bi divini Martyres, QUI NUNC ASSESSORES SUNT CHRISTI, & REGNI illius CONSORTES, ac judicii participes, una cum ipso judicaturi, dum haec apud nos essent, quosdam e Fratribus lapsos, & idolis sacrificasse convictos susceperunt*. Accedat nunc Burnetus, & Justorum veterum Animas hinc emigrantes arceat a Caelo, atque ad miserrimum quasi soporem eas damnet, nondum a tot Saeculis excitatas, neque post complura Saecula excitandas; ac dubia hac de re, aut inconsulta quorundam antiquorum dogmata praetendat. Aliam plane tunc fuisse mentem Catholicae Ecclesiae, quae jam attulimus, satis prodidere. Luculentissime vero eadem confirmata haec habemus ab insigni Religionis Christianae Scriptore Dionysio Alexandrino, cui nullum e suis pugilibus (quod est ad rectum de rebus Theologicis judicium) Burnetus aequet, & cui non immerito antiquitas Magni cognomentum detulit. Quamquam & per se quisque facile dignoscat, non aliam quam istam potuisse tunc regnare in Catholica Ecclesia doctrinam. Si tunc Burnetus quispiam vixisset, suamque de *statu Mortuorum* opinionem disseminans Fidelibus persuasisset: quis, amabo, ad mortem pro Christo oppetendam ruisset, immo quis non ab ea fuisset absterritus? Non alia de causa tam intrepidi ibant, tam alacres festinabant ad supplicia milites Christi, ipsaeque tenellae Virgines, nisi quia commune Sanctae Religionis dogma erat, confestim post gloriosum agonem Animas ad Coronam, ad Dominum, atque in Caelos migrare, ubi Beatitute

titate ac Visione Dei fruerentur. Hujusce doctrinae certos nos facit magnum Ecclesiae lumen Saeculo Christianae Aerae Terrio praeclaudatus *Dionysius Alexandrinus*. Atque hinc etiam haurimus, non aliter Ecclesiam, quam nos supra, fuisse interpretatam Apostoli verba, cupientis *dissolvi & esse cum Christo*, sive *peregrinari a Corpore*, & *praesentes esse ad Dominum*; uti & alia Apocalypseos, & Evangelistarum atque Apostolorum verba, quae supra delibavimus; non vero uti Millenariorum coetus, Burneto carus, arbitrabatur. Et ne quis in suspensionem adducatur, tanti Praemii praerogativam in solis tunc proprie appellatis Martyribus constrictam fuisse, sibi in mentem revocet, quod jam monui, per analogiam quamdam in censum *Martyrum* eos olim quoque venisse, qui propter alias Virtutes, & praesertim ob Caritatis opera, in Domino morentur. Alteram ejusdem Sancti Dionysii Epistolam Eusebius idem Lib. VII. Cap. 22. Histor. Ecclesiastic. ad posterostransmisit. Ibi beatissimus ille Episcopus pestilentiam describit, qua laboravit Alexandrina sua Civitas. Tyrannorum persecutionem primo commemorat, ob quam *omnium laetissimam festivitatem egerunt consummati Martyres*, **QUI IN CAELO EPULATI SUNT**. Deinde Christianorum Caritatem extollit in ferenda ope fratribus suis lue pestilenti infectis, in quo munere multi ex iis decessere, adeo ut **GENUS HOC MORTIS** ob Pietatem, Fideique constantiam, **NEQUAQUAM INFERIUS MARTYRIO censeatur**.

Saeculo eodem Tertio, eisdem immo diebus, quibus Sanctus Dionysius, floruit alterum Catholicae Ecclesiae clarissimum lumen, *Sanctus Cyprianus Carthaginiensis Episcopus*, qui Anno Christi CCLVIII. gloriosissimo Martyrio cursum suum complevit. Quae tunc foret Catholicorum doctrina de Justorum Animabus praesenti Saeculo ereptis, ab ipso sciscitemur. Tam crebra, tam lucida sunt eloquentissimi viri hanc in rem testimonia, ut non eruditioni, sed oneri futurum foret, singula referre. Is profecto passim *Coronam* pugnantibus pro Christo pollicetur. Et qualem, quaeso? *In Caelis*, atque *apud Dominum accipiendam*. Et quando? Non, uti Burnetus sibi fingit, post complures Annorum myriades, sed sine mora post datam in agone vitam. In Epistola ad Sergium, Rogatianum, aliosque Confessores, eos hortatur, *ut in confessione Caelestis gloriae fortes & stabiles perseverent, & ingressi viam Dominicæ dignationis, ad accipiendam Coronam spirituali virtute pergant*. O beatum carcerem, qui homines Dei mittit ad CAELUM! Nemo Mortem cogitet, sed Immortalitatem: nec temporariam poenam,

sed Gloriam Sempiternam, quum scriptum sit: Pretiosa est in conspectu Domini mors Iustorum ejus. Quando ergo Judicaturus vos, & REGNATUROS CUM CHRISTO DOMINO cogitatis (quod & nuper vidimus a Dionysio Alexandrino commemoratum) exsultetis necesse est, & futurorum gaudio praesentia supplicia calceatis. Beatae enim feminae, quae vobiscum sunt in eadem confessionis gloria constitutae, non solum ipsae AD CORONAM PROXIMAE sunt, sed & ceteris quoque feminis exemplum de sua constantia praebuerunt. Denique Dominum deprecatur, ut initiis ad summa pergentibus, quos confiteri fecit, faciat & CORONARI. Opto vos, fratres carissimi, bene valere, & ad CORONAM CAELESTIS GLORIAE pervenire. Quid sit Corona Martyribus a Deo conlata, ac toties in veterum Aetis repetita, hinc discimus, ac nos numquam oblivisci juvabit. Tum in Epistol. ad Martyres & Confessores: Quosdam, inquit, jam comperi Coronatos, quosdam vero ad Coronam viatorum Proximos. Laniena gravior ad hoc diu perseveravit, non ut stantem fidem dejiceret, sed ut homines Dei ad Dominum Velocius mitteret. Hic est agon, quem nobis ostendit beatus Apostolus Paulus, in quo oportet nos currere, & ad Coronam Gloriae pervenire. Hunc igitur agonem Mappalicius suo, & collegarum suorum nomine Proconsuli repromisit. Nec fellit in promisso suo, & Palmam, quam meruit, accepit. Opto pariter, & exhortor, ut quos vinculum confessionis & hospitium carceris simul junxit, jungat etiam consummatio virtutis, & Corona Caelestis. Neque secus in Epistol. ad Moysen, Maximum, & ceteros Confessores, eos laudat, qui jam de Saeculo recesserunt, confectoque itinere virtutis ac fidei, ad COMPLEXUM & OSCULUM DOMINI, Domino ipso gaudente, venerunt. Pariter in Epistola ad Plebem Thibaritanam scribit: Gaudere nos, & exsultare voluit in persecutionibus Dominus; quia quando persecutiones fiunt, tunc dantur Coronae fidei, tunc probantur milites Christi, tunc MARTYRIBUS PATENT CAELI. Sunt & ibi alia, quae praetermitto. Similia habes in Epistol. ad Nemesianum, Felicem &c. ubi de quibusdam Virginibus mortem pro Christo perpeffis ait: Quas ad Caelestem Coronam gloria geminata propeffit. Ipsos vero alloquens addit: Expectatis quotidie laeti professionis vestrae salutarem diem, & jam jamque de Saeculo recessuri, ad MARTYRUM munera & DOMICILIA DIVINA properatis, post has Mundi tenebras visuri candidissimam Lucem, & accepturi majorem passionibus omnibus & consuetudinationibus Claritatem,

Apo.

Apostolo contestante & dicente: Non sunt condignae passiones &c. Sed prae ceteris legenda sunt, quae is concessit in calce Libri de Exhortatione Martyrii, ubi, ut reliqua omittam, in haec verba loquitur: Quis ergo non omnibus viribus elaboret ad tantam Claritatem pervenire, ut amicus Dei fiat, ut CUM CHRISTO STATIM GAUDEAT? ut post tormenta & supplicia terrena, PRAEMIA DIVINA PERCIPIAT? Si militibus saecularibus gloriosum est, ut hoste devicto redeant in patriam triumphantes: quanto potior & major est Gloria, victo Diabolo, ad Paradisum triumphantem redire? Coheredem Christi fieri? Angelis adaequari? Cum Patriarchis, cum Apostolis, cum Prophetis, Caelestis Regni possessione lactari? Quanta est dignitas, & quanta securitas exire hinc lactum: claudere in momento oculos, quibus homines videbantur & Mundus; & aperire eosdem STATIM, UT DEUS VIDEATUR ET CHRISTUS?

Catholici dogmatis testem luculentissimum habemus Cyprianum, cujus quanta semper fuerit auctoritas & existimatio in Religionis & Ecclesiae rebus, is tantum ignorat, qui in Ecclesiastica eruditione omnino sit hospes. Quod plus est, communis etiam aliorum Catholicorum sententia erat, statim ut emigrabant e vita generosi Athletae Christi, eos ad alteram beatam Vitam in Caelos transferri. Neque heic suspicioni, quam intoleranda impudentia Burnetus excitat, relinquatur locus, quasi sacri Antistites, quod minime crederent, depraedicaret, eo consilio, ut alacriores promptioresque ad certamina pro Christo Fideles, urgente persecutione, efficerent. Evertat Religionem, quisquis haec fieri potuisse suspicetur, simulque abominanda calumnia oneret viros incomparabili sanctitate & doctrina praeditos, atque Heroes, ut ita dicam, Christianae Reipublicae; quasi Populum inani persuasione illi imbuerent, atque ad supplicia perferenda nimis credulum urgerent. Quod tamen heic ora cuicumque obstruat: qui haec alios docebant, & ipsi exemplo suo confirmabant. Nam & ipsi fortiter caput dedere pro Christo, persuasum habentes, se ad Dominum suum e vestigio profecturos, & una cum illo statim regnatos fore. Quid Ignatius, quid Polycarpus, quid Iustinus, quid & alii egerint, jam accepisti. Gloriosissimus quoque Episcopus Cyprianus eandem viam arripuit. Et quamquam, uti Pontius ejus Diaconus in Vita illius animadvertit, is mortem evitare posset, multique etiam loca, in quae secederet, offerrent, is tamen imperterritus & constans apparitores opperiri maluit, atque ad Coronam Justitiae

(ab

(ab Apostolo quoque desideratam) *consummato agone cucurrit*. Haec Pontius, qui & de se haec addit: *Dolebo, quod non comes fuerim? Sed illius victoria triumphanda est. De victoria triumphabo? Sed doleo, quod comes non sim. Verum vobis tamen & simpliciter confitendum est, quod & vos scitis, in hac me fuisse sententia. Multum ac nimis de Gloria ejus exsulto. Plus tamen doleo, quod remansi.* Communis ergo tam Sanctis Episcopis illius temporis, quam Populis fidelibus fuit Martyrii cupido, quia communi ac firma persuasione quisque ducebatur, fore ut sanguis suus *clavis Paradisi*, & in Caelestem Beatitatem aditus esset, quemadmodum Tertullianus ajebat. Erant etiam Cypriano ante oculos loca Scripturarum, quae pro inani systemate suo a Burneto producta vidimus; immo eadem, & plura ipse concessit Lib. III. Cap. 16. Testimoniorum. Attamen vir doctissimus, non ignarus, quae tunc foret Apostolica Traditio & mens Ecclesiae, sine haesitatione non aliis tantum, sed & sibi pollicitus est certam vix consummato certamine Coronam & Praemium in Caelis. Quod plus est, hoc ipsum, quod illi minime dubium erat, certum quoque erat iisdem temporibus in Ecclesia Romana. Ubi Cypriani literas hortatorias ad superanda tormenta, mortemque subeundam accepere Moyses, Maximus, alique Confessores Romani, in carceribus macerati ob Christi nomen. Epistolam & ipsi ad illum dederunt, quae est XXVI. in editione Pameliana, in qua haec ajunt. *Ex tuis ergo Literis vidimus gloriosos illos Martyrum triumphos, & oculis nostris quodammodo, Caelum ipsos petentes prosequuti sumus; atque inter Angelos ac Potestates, Dominationesque caelestes constitutos contemplati sumus. Sed & Dominum apud Patrem testimonium suum illis promissum perbibentem auribus nostris quodammodo sensimus. Hoc est ergo, quod & nobis animum in dies singulos erigit, & ad consequendos gradus tantae dignationis incendit. Quid enim gloriosius quidve felicius ulli hominum poterit ex divina dignatione contingere, quam inter ipsos carnifices in ipso interitu confiteri Dominum Deum? quam relicto Mundo CAELUM petiisse? quam desertis hominibus inter Angelos stare? quam impeditis omnibus saecularibus ruptis in Conspectu Dei jam se liberum fistere? quam Caeleste Regnum Sine Cunctatione retinere?* Haec, quae so, intentis oculis Lector perpendat, ac serio recogitet. Burneti Scholam certe nesciebant, aut saltem falsam credebant Romani Martyres, qui tanta fiducia de Praemio in Caelis Justos, statim ac decedebant, manente, haec Romae in centro Fidei perferiebant. Proinde Burnetum pudeat, venditasse apud suates, trium
prio-

priorum Saeculorum Christianos in deliramenta sua concordī suffragio consensisse.

At heic inquit aliquis: utut sanctis Martyribus e veterum communi dogmate ostia Caeli obferata non fuerint, unis tamen illis hactenus delatam ejusmodi praerogativam vidimus. Quenam ergo de reliquorum Justorum Animabus sententia tunc fuit? Non aliud tunc visum gravioribus Ecclesiae Patribus, quam quod a tot Saeculis tradit Ecclesia Catholica: videlicet ceteris quoque Justis suam esse sedem in Caelo, diversam tamen pro diversitate meritorum, neque expectandum supremum Christi Judicium, ut illuc invehantur. Unum tamen discrimen perpetuo constitutum fuit inter istos & illos. Martyres, quod omnem labem culparum suo Sanguine purgarint, continuo Caelum excipit. Justos non eadem semper celeritas praemii manet. Qui aut innocentes, aut culpis per poenitentiam rite elutis e vivis abeunt, nihil obstat, quominus recta ferantur in Caelum. Amici Dei & ipsi sunt, ac propterea & ipsi Praemio statim donantur. Quibus vero purganda restant in altera Vita, tum solum in Patriam ingressus est, quum divinae Justitiae factum est satis. Proinde in sacris vel ab ipsa primitiva Ecclesia commemoratio fieri consuevit tam Martyrum, quam ceterorum Justorum, sed plane diverso intuitu: quod & antea animadvertit Dodvellus in Dissertationibus Cyprianicis. *Eucharistica*, gratulatoria, laetitiae tantum testis erat commemoratio Martyrum, non vero *Propitiatoria*, ut eis parceret Deus. Reliquorum autem Fidelium memoria *Propitiatoria* erat, ut Fidelium in terra viventium orationibus illorum Animae in altera Vita juvantur, qui adhuc misericordia Dei indigerent. Veterem hanc Ecclesiae disciplinam non uno in loco innuit praeclaudatus Sanctus Cyprianus, & non semel expressit Sanctus Augustinus, praecipue in Sermone nunc CLIX. olim XVII. de Verb. Apostoli. Sunt haec illius verba: *Ideoque habet Ecclesiastica disciplina, quod Fideles noverunt, quum Martyres eo loco recitantur ad Altare Dei, ubi non pro ipsis oratur. Injuria est enim pro Martyre orare, cujus nos debemus orationibus commendari.* Porro nihil dubitandum est, quin Sanctus Cyprianus crediderit atque tradiderit, Justos quoslibet, nisi quid expurgandum eis restet post mortem, in Caelum sine cunctatione recipi. Martyres quippe quodammodo, ut saepe monui, ii quoque censebantur, qui carnem suam crucifigebant cum vitiis. Atque hanc Carthaginensis quoque Ecclesiae fuisse doctrinam, satis prodit Pontius Cypriani Diaconus, dum in illius Vita animad-

animadvertit, neminem e praecedentibus ejus Urbis Episcopis sanguinem effudisse pro Christo, & nihilominus ad Martyrum Praemia illos pervenisse. *Ex quo*, inquit, *Carthagini Episcopatus ordo numeratur, nunquam aliquis, quamvis ex bonis & Sacerdotibus, ad Passionem venisse memoratur: licet semper Deo mancipata devotio, dicatis hominibus pro Martyrio deputetur.* Affinia sunt, quae Sanctus ipse Cyprianus in Lib. de Habitu Virginum tradidit, ubi, postquam Christianas puellas ad curriculum omnium Virtutum hortatus est, hisce verbis documenta sua concludit: *Durate fortiter, spiritaliter pergitte, Pervenite Feliciter. Tantum mementote tunc nostri, quum incipiet in vobis Virginitas honorari.* Animadverterat Pamelius, *facere hunc locum pro Invocatione Sanctorum post hanc vitam.* Id negat Johannes Fellus Oxoniensis Episcopus in Notis ad eum Librum, atque interpretationem absonam prorsus nobis obtrudit. Nisi oculorum usum praepudicatae opinionis sectae suae doctissimo homini heic eripuisse, vidisset & ipse, quod nemo non videre potest in Cypriani verbis. *Pervenite feliciter*, exitum e vita praesenti, & ingressum in alteram meliorem aperte significat. Tunc meritum *Virginum*, quae honorificaverunt Deum in corpore suo, ab optimo hero honoribus & praemiis afficitur. *Si quis*, inquit Dominus Johann. XII. 26. *mibi ministrat, me sequatur: & ubi sum ego, illic & minister meus erit* (& erit sane, nolente etiam Burneto, qui vel ipsis Apostolis & Martyribus non locum, ubi Christus nunc est in gloria, sed carcerem quemdam sibi incompertum assignat.) *Si quis mibi ministraverit, honorificabit eam Pater meus.* Huc Sanctus Cyprianus respexit. Et potissimum quod paulo ante ad easdem Virgines dixerat: *Sed quum Habitationes multas apud Patrem suum dicat, melioris Habitaculi hospitia demonstrat. Habitacula ista meliora vos petitis, carnis desideria castranter, majoris gratias Praemium in Caelestibus obtinetis.* Itaque e praesenti Saeculo prudentes illae Virgines abeuntes, ad conspectum Dei & Beatorum Gloriam migraturae confestim erant; ac propterea, quum illuc pervenerint, se illarum precibus commendat Sanctus Episcopus. Patrem ejusdem Sancti Cypriani locum vide infra Cap. XXIX. Hoc itidem faciendum nuper nos docuit Sanctus Augustinus. Et hosce quidem Doctores Ecclesia Catholica sequitur. Quosnam sequatur Novatorum temporis nostri concordia discors, illi videant. Verum quae sua mens foret, immo quae suae etiam Ecclesiae sententia, luculentius nusquam prodidit Sanctus Cyprianus, quam in Libro de Mortalitate. Invaserat Africam teterrima pestilentia. Jam mortem

mortem in limine quisque spectabat: jam suam in alienis mortibus sortem legebat. Ad Populum suum in tanta calamitate solandum atque animandum praesto fuit zelus & eloquentia incomparabilis Sancti Praefulis, prae ceteris ostendens, posse Fidelium quempiam, bene cum Deo compositum, ad gaudia Caelorum statim post obitum transire. *Regnum Dei*, inquit, *fratres dilectissimi*, esse coepit in proximo. *Praemium vitae*, & *Gaudium salutis aeternae*, & *Perpetua Laetitia*, & *possessio Paradisi nuper amissa*, *Mundo transeunte*, jam veniunt. Jam terrenis Caelestia, & Magna parvis, & caducis Aeterna succedunt. *Quis heic anxietatis & solitudinis locus est?* quis inter haec trepidus & moestus est, nisi cui *Spes & Fides* deest? Ejus est enim mortem timere, qui ad Christum nolit ire: ejus est ad Christum nolle ire, qui se non credat cum Christo incipere Regnare. Ultra non progredior, & ceteris parco. Constitutum quippe mihi est, integrum hoc Cypriani Opusculum in calce hujus mei adijcere, utpote splendidum prae ceteris testimonium doctrinae illius, quam a tot Saeculis Ecclesia Romana servat & proficitur; dignum profecto, quod quisque Christi Fidelis ad manum habeat, & identidem relegat. Pergamus nos interea colligere, quae supersunt, monumenta Ecclesiae, ad Saeculum Christi Tertium spectantia, perspecturi, quantum ipsa dissideant a pernicioso Burneti placitis.

Acta authentica Sanctorum Fructuosi & Eulogii Martyrum habemus, edita a Bollando ad diem XXI. Januarii, atque a Ruinarto recusa. Mortem pro Christo subiere Tarracone in Hispania Anno CCLIX. In carcere quarta feria stationem solemniter celebraverant. Igitur sexta feria laetus atque securus festinabat Fructuosus, ut cum Martyribus & Prophetis in Paradiso, quem Dominus praeparavit amantibus se, solveret stationem. Consummato Martyrio, solita Domini non defuere magnalia; apertumque est Caelum, videntibus Babylon & Migdonio fratribus nostris ex familia Aemiliani Praefidis. Qui etiam filiae ejusdem Aemiliani ostendebant Sanctum Fructuosum Episcopum cum Diaconibus in Caelum ascendentes coronatos. Haec eadem confirmat Sanctus Prudentius in Hymno VI. Libri ΠΡΩΤΩΝ ΣΤΕΦΑΝΩΝ. Tum in haec verba definit Aetorum Scriptor Synchronus: *O beati Martyres, qui meruerunt dignam HABITATIONEM IN CAELIS, AD DEXTERAM STANTES CHRISTI*, benedicentes Deum Patrem omnipotentem, & Dominum nostrum Jesum Christum, Filium ejus. *Suscepit autem Dominus*

M

Marty-

Martyres suos in pace per bonam confessionem. Postrema haec retinere volui: saepe enim in Coemeteriis antiquissimis Romanis, atque aliarum Civitatum, occurrit formula haec in Pace. Alludebant veteres Christiani ad versiculum Psalmi IV. 9. In Pace in idipsum dormiam & requiescam, spem Resurrectionis a Deo promissae confirmantes, & pacem Dei cum fratribus & Ecclesia innuentes. Eorum interea Animae in Caelis versabantur, ad dexteram stantes Christi, benedicentes Deum Patrem &c. Quare intelligis, quale in Ecclesiis quoque Hispaniarum de hac re doctrina vigeret. Jam evulgantur in Tomo IV. Maji, socii Bollandiani Passionem Sancti Theodoti Ancyрани, qui ad superos abiit Anno Christi CCCIII. Nilus Scriptor coaevus, immo & testis oculatus, gloriosum illorum certamen descripsit. Ita vero illum fratres adstantes alloquebantur: Te quidem, postquam ab his aerumnis emigraveris, Caelestia excipient Luminaria, Angelorumque & Arcangelorum Gloria diversimoda, & Spiritus Sancti incommutabilis Claritas, ac Dominus noster Jesus Christus, residens ad Patris sui dexteram. Horum enim bonorum causa tibi erit gloriosum ac magnum, quod instat, certamen &c. Ad diem quoque V. Junii in Actis Bollandianis habemus agone Martyrum Aegyptiorum Marciani, Nicandri, & sociorum. Quo Anno illustre Martyrium ii consummarint fame perempti, non constat. Fortassis in persecutione Diocletiani. Henschenio, viro ejusmodi rerum peritissimo, veri videtur simile, narrationis illius Auctorem fuisse Eusebium Caesariensem in Opere de Martyribus, cujus haec sunt verba: Haec erat illorum exultatio: haec laus illis proposita, AD PARADISI VOLUPTATEM PERCIPIENDAM, eos maxime urgebat. Post haec, quum tempus praesto esset, quo illorum Animae ad propria Loca, & suum Deum properarent, Martyres ipsi, multis hymnis & laudibus Deo pronuntiatis, purissimas, ut decebat, Animas Deo tradiderunt. Memineris heic, Burnetum objecisse nobis, irrito tamen successu, ut vidimus, Ignatium & Polycarpum; appellantes τόπον ἴδιον Locum Proprium, aut τόπον αὐτοῖς ἀπεδωμένον Locum Eit Debitum, quo Martyrum Animae Corpore deposito deserebantur. Et heic Scriptor dixit τόπος appellat, idest Propria Loca. Sed ubinam haec Loca? In Paradisi voluptate, & gaudio, & apud Deum suum, ad quem Martyres vitam dando properabant. Ita in Actis Sancti Procopii Martyris, qui circiter Annum Christi CCCIV. in persecutione Maximiani caput licitori obtulit, editis a Valesio in Notis ad Eusebii Histor. Ecclesiastic. Gloriosus ille

ille Martyr capite amputato *INGRESSUM VITAE CAELESTIS* per compendium *Batatus* invenit. In Aëis pariter Sancti Philippi Episcopi Heracleae, qui pro Christi nomine sanguinem tudit cum aliis Martyribus circiter Annum Christi CCCIV. a *Maillonio* in Tom. IV. *Analector.* evulgatis, Severus Presbyter Deum hisce verbis precabatur: *Da mihi partem Coronae, ut sim cum illis junctus in Gloria, quibus eram junctus in carcere. Habeam cum illis Requiem, cum quibus nomen tuum venerabile confessus, tormenta Judicis saeva non timui.* Subdit postea Actorum Scriptor: *Sic beati Martyres testimonium vitae implere. Felices Christi discipuli, ejus sequuti vestigia, per quem fuit illis concessa victoria: comitati etiam doctrinam Apostolorum, & eorum Martyrum, qui Apostolos sunt sequuti, quorum jam exutae a labe terrena ANIMAE AD CAELESTIA REGNA PROPERARUNT.* Sunt & alia vetustissima ac sincera Martyrum Acta apud *Bollandistas*, *Surium*, & *Ruinartum*, e quibus eadem veritas colligitur; sed missa facio, ne pro eruditione tedium Lectori ministrem. E paucis tamen, quae attuli, jam satis didicisse nos puto, non eam fuisse olim in Ecclesia doctrinam, quam venditavit nuper *Burnetus*; immo adversus illam conspirasse fere omnes Christi Fideles.

C A P. XI.

Methodii, Eusebii Caesariensis, Ecclesiarum Viennensis & Lugdunensis, Constantini Magni, Alexandri & Athanasii Praesulum Alexandrinorum, aliorumque testimonia pro Beatitudine Sanctorum. Hilarii Pictaviensis Episcopi proposita hac de re sententia.

ATamen *Burnetus* suppetias iterum opinioni suae petit ab aliis Saeculi Quarti, Quinti, & posteriorum quoque temporum Patribus, puta *Chrysostomo*, *Theodoreto*, *Oecumenio*, *Theophylacto*, *Euthymio*. E Latinis etiam sibi adstipulantes jactitat *Hilarium*, *Ambresium*, *Augustinum*, *Bernardum*; ea tamen arte semper Lectorem incautum ludificans, qua Apelles Antigonum Regem coclitem picturus, illam dumtaxat vultus partem expressit, quae alterum oculum referebat. Scilicet ille ea tantum adfert, quae sibi placent; contraria vero quaeque dissimulat. Rursus quoslibet e Patribus suae opinioni adversantibus studiose celat, ut

imperiti credant, totam pro illius sententia stare veterum cohortem. At hisce dolis in sanctae Religionis negotio uti nefas est: iis-
que tantummodo utatur, qui nihil de veritate sollicitus, in id unum
intentus est, ut suas merces incautis divendat, & nomen sibi e no-
vitate conquirit. Ego tum quae is dissimulavit, supplebo; tum
quae is pro se adhibuit, iustiori lance pensabo: fietque, ut spero,
palam, semper in mente Patrum prevaluisset sententiam hac de re
Catholicae Ecclesiae. Jamque supra Cap. II. animadvertimus San-
ctum *Methodium*, qui circiter Annum Christi CCXC. teste Hiero-
nymo *Opus egregium* de Resurrectione contra *Origenem* composuit,
non alia tradidisse, quam quae nunc nos tradimus ac propugnamus.
Digna sunt, quae rursus audiantur illius verba: *Quemadmodum*,
inquit, *quum dies Vitae nostrae praesentis defecerint, bona Opera*
(ut in Apocalypsi legitur XIV. 13.) *Animas nostras recipient, ita*
brevi hac Vita soluta, ANIMAE ANTE RESURRECTIONEM
HABITATIONEM HABEBUNT APUD DEUM, donec infrau-
ratam, & numquam casuram Domum (idest Corpus) *recipiamus.*
Et quis iste Methodius? Tyri Episcopus, simulque gloriosus Mar-
tyr, & unus ex illustrioribus Ecclesiae Catholicae Scriptoribus, qui
a Sancto Epiphanio appellatur *vir apprimè doctus, acerrimusque*
Veritatis patronus. Et quamquam ille in Convivio Virginum ad
Millenarios accedere videatur, in eodem tamen Libro Oration. VIII.
quantum absit a Burneti phantasmatis, aperte significat, dum vix
sublatas e vivis Virgines de numero Prudentum in beatissimum De-
liciarum locum invehit, ubi illarum Animae (*translatæ in Cae-*
lestem Vitam) ineffabilibus bonis ibi sitis fruuntur, & fructibus
spiritalibus vescuntur, qui *utentes ipsis vespcentesque, in Immortalitatem*
alunt, Aeternitatem eis, DIVINITATEMQUE COMMUNICAN-
TES. Cetera non minus vivida praetereo. Quid vero de quaestione
hac senserit *Eusebius Caesariensis* Episcopus, qui praesertim An-
no Christi CCCXV. eruditionis Ecclesiasticae peritia inclaruit, in-
quiramus. Ipsum jam supra Cap. V. invenimus a Millenarii Regni
opinionem prorsus alienum. Porro idem in Lib. I. Cap. 13. Histo-
r. Ecclesiastic. literis consignavit Abgari Regis conversionem ad Chri-
sti Fidem, simul tradens, ad eum fuisse missum a Thoma Apostolo
Thaddaeum, unum e septuaginta Christi Discipulis, qui inter alia
ipsum docuit, *quo pacto Servator noster surrexerit, & mortuos, qui*
multis retro saeculis sepulti jacebant, secum una suscitaverit; utque
solus quidem e Caelo descenderit, ascenderit vero ad Patrem cum
maximo comitatu, & ad ejus dexteram honorifice sedeat in Caelo.
Abgari

Abgari Historiam, atque ad eum Christi Epistolam, immo & Thaddaei ipsius praedicationem, cuicumque per me liceat ad fabulas amandare. Istud minime moror. Quod nostra interest, Eusebii aevo eam vixisse intelligimus opinionem, videlicet Sanctos Patres, quos Christus in sua Resurrectione suscitavit e mortuis, Marthaeo restante in Evangelio, in Caelum ascendente postea ipso, illos quoque una cum eo in Caelestem Aulam fuisse translatos. Et haec sane opinio antiquissima; ipsam quippe tradidit Sanctus Herma Pauli Apostoli discipulus Lib. III. Cap. 16. Pastoris: ipsam adoptarunt Clemens Alexandrinus Lib. VI. Stromat. & Origenes Homil. XV. in Exodum, & alii ex antiquis, quos in praesentia recensere nihil attinet. At quicumque descenderunt in ejusmodi sententiam, si non certam, saltem veri valde simillimam, & fortassis ab Apostolo indicatam, quum de Christo ait Ephes. IV. 8. *Ascendens in altum Captivam Duxit Captivitatem*: ii proculdubio agnoverunt, Caeli portas non adeo Justis praeclusas fuisse, ut praeter Redemptorem nostrum haecenus neminem e mortalibus receperint, neque recepturae sint, nisi post Resurrectionem futuram omnium, immo post aureum Millenarium Regnum: uti veterum somniorum restaurator Burnetus contendit. Quod si jam in beatissimam regionem viventium simul cum Christo, Patriarchis, & Prophetis ingredi licuit, qui tamen adstabunt & ipsi in postremo Christi Domini Judicio: vides jam nihil officere inconcusso dogmati de eodem universali Judicio illorum sententiam, qui ceterorum Justorum Animabus, simul ac e Saeculo migraverint, aut purgatae fuerint, Caeli ostia patere pro certo habent.

Accedit, quod idem Eusebius Lib. V. Cap. primo, & sequenti, refert celebratissimam Epistolam Ecclesiarum Viennensis & Lugdunensis de Martyrio Sancti Pothini Episcopi, & aliorum, qui Anno Christi CLXXVII. forti animo jugulum obtulere carnifici pro Christi nomine. In ea Epistola legimus, quanta constantia beati illi pugiles certarint pro Christo, levia reputantes tormenta quaelibet, quia *ad Christum ire properabant*. Ibi Advocatus Christianorum & ipse Martyrium consummavit, *germanus* revera *Christi discipulus, sequens Agnum, quocumque ierit*. Infra quoque ajunt: *Aequum sane erat, ut fortissimi Athletae, qui multiplex certamen subierant, atque insignem victoriam retulerant, insignem Immortalitatis Coronam acciperent*. Quid sit *Corona Immortalitatis*, supra Cap. VII. animadvertimus. Generosa quoque Mar-
 13r Balbina, postquam *Filios ad fortiter certandum accen-*
derat,

derat, & victores AD REGNUM PRAEMISERAT, eosdem certaminum cursus, quos Filii consecrant, remetient, ad eosdem ire properabat, de exitu suo laeta atque exultans, prorsus quasi ad Nuptiale Convivium invitata, non bestiis objecta esset. Equidem quum veneranda haec antiquitatis Christianae monumenta lego, & fortitudinem & alacritatem Sanctorum in tam horribilibus tormentis contemplor, lacrymas continere non possum; simulque irascor Burneto nobis nunc venditanti, Coronam, & Praemium vel ipsis Sanctis Martyribus ne nunc quidem post tot Saecula datum, neque dandum nisi in Mundi excidio, quod, unus Deus novit, quot adhuc Saeculis a nobis distet. Aliam fidem, aliam Traditionem profecto primitiva Ecclesia, ut vidimus, tenuit, & quidem per omnes Ecclesias. Nam ita sensit Ecclesia Romanam, Ecclesias Africae, Aegypti, Asiae, Hispaniae vidimus, quibuscum concordet nunc videmus Galliarum. Spes nempe, immo firmissima Fides perveniendae vestigio ad Dominum, ejusque Regiae Beatitatis fruendi, quam a vicinis Apostolis, atque adeo ab ipso Christo acceperant, illa illa erat, quae ad tormenta subeunda generosos Fidelium animos urgebat; neque tantum intrepidus, sed & hilares in ipsa lanicna efficebat. Atqui tantae Spei ac Fidei bellum nuper indixit Burnetus. Quidni indignationem atque opprobrium apud quemque verum sanctae Religionis amatorem, non vero gloriam, pravum ejus consilium incurrat? Habemus ejusdem Eusebii Orationem Lib. X. Cap. 4. Histor. Ecclesiastic. ubi sequutus Apostolum in Epistol. ad Hebr. XII. 22. commemorat supernam illam Hierusalem, Caelestem Montem Sion, & ultra Mundum positam Civitatem Dei viventis, in qua innumerabiles Angelorum chori, & Ecclesia primogenitorum, qui in albo Caelestium Civium descripti sunt, & conditorem suum ac summum omnium ducem Hymnis venerantur. Vides, minime dubitasse Eusebium, quin multa jam turba Fidelium in Caelestem illam Civitatem fuerit invecita. Atque illuc prae ceteris Sanctos Patres a Christo ascendente in Caelum deductos ait Lib. IV. Cap. 12. Demonstration. Evangelicae. Illuc quoque Constantini Magni Augusti Animam jam penetrasse, doctissimus ipse vir certum putabat Lib. I. Cap. 2. de Vita ejusdem Augusti, ubi haec scribit: Jam vero quum ad ipsos usque Caeli fornices mentis meae aciem extendi, atque illic beatissimum ejus ANIMAM CUM DEO VERSARI cogito: terrestri quidem ac mortali integumento liberatam, circumdatam vero splendidissimae Lucis Stola; eamque non jam brevis temporis curriculo in his caducis sedibus volutari, sed Corona perpetuo virente,

& Im.

& Immortali Vita, ac Beato Aevo donatam esse intelligo: mutur
 baeto &c. Gemina sunt, quae idem Lib. III. Cap. 46. ejusdem Vi-
 tae tradidit de Helena Augusta Constantini matre, muliere sanctis-
 sima, ipsam inquiens longo vitae spatio decurso, ad Feliciorē Sor-
 tem accitam fuisse. Eluxit & in illius morte pietas, adeo ut nequa-
 quam mori mulier beatissima, sed potius caducam banc vitam cum
 Immortali Vita commutare, recte sentientibus videretur. ANIMA
 igitur illius, in incorruptibilem & Angelicam substantiam reformata,
 AD DEUM SALVATOREM SUUM ASSUMTA EST. Quam-
 obrem non unis Martyribus, sed quibusvis Justis aditum in Caele-
 stem Beatitudinem tunc etiam Ecclesia sentiebat. Ad haec Lib. IV.
 Cap. 63. morientis Constantini alacritatem exprimit, utpote qui
 adstantibus & lacrymantibus responderet: *Properare se, & profe-*
ctionem ad Deum suum nulla tergiversatione differre. Is autem die
 festo Pentecostes ad suum Deum migravit, mortalibus quidem par-
 tem sui mortalem relinquens; eum vero ANIMAE PARTEM, quae
 intelligentia & amore Dei praedita erat, DEO SUO CONJUN-
 GENS. Sed & ipsius Constantini Augusti Orationem ad Sanctorum
 coetum exhibet Eusebius, in qua Cap. XII. fortis Martyrum ani-
 mus extollitur his verbis: *Quumque gravissimos terrores generose*
(Martyr) superaverit, Corona donatur ab eo ipso, cui testimonium
constanter perhibuit; atque hujusmodi vitam excipit immortalis me-
moria, & Gloria Sempiterna. Ad Orationem quoque de Laudibus
 Constantini, ab ipso Eusebio viventi eidem Augusto recitatam,
 quisquis accedit, obviam habet elegantem descriptionem Regni ac
 Beatitudinis Caelestis, pag. 619. Edition. Moguntinae; in qua uni-
 genitum Dei Filium, beatissimas illas Potestates, justitiae radiis &
 sapientiae lumine collustrare, & ANIMAS HOMINUM vera Pie-
 tate exornatas, non caeli ambitu, sed SINU SUO ACCIPIEN-
 TEM Promissa sua rebus ipsis firmare atque adimplere CREDIMUS
 In Ethnicorum deinde crudelitatem adversus Christianos, atque in
 Martyrum admirabilem constantiam infra excurrit Eusebii, om-
 nium testis oculati, oratio. Istorum certamina, inquit, & pro Pie-
 tate exantillatos labores, quum judicio suo summus omnium M.erator
 comprobasset, eos quidem, qui jam ad Iesum Migrassent, TRIUM-
 PHALIBUS APUD SE ORNAMENTIS DECORATOS, Caele-
 stibus Angelorum choris adscripserat. Alios vero, velut rediiva
 quaedam Pietatis semina, adhuc in terra servavit &c. Sunt & alia
 ejus generis in hac ipsa Oratione, quae brevitatis causa praetermit-
 to. Omnia autem dilucida, omnia in idem conspirantia, ut intel-
 ligamus

ligamus, quantum a Burneti rationibus abscedat primitivae Ecclesiae Traditio de Beatitudine Sanctorum, in quam statim Martyres invehantur, reliqui vero Iusti citius aut serius pro suorum meritum mensura. Qualis vero, quantusque vir, & quam idoneus hac in re testis fuerit Eusebius Caesariensis, non indiget eruditus Lector, ut ex verbis meis ediscat.

Iisdem temporibus, quibus Eusebius, floruit & Alexander insignis Archiepiscopus Alexandrinus. Hic Anno Christi CCCXXVI. uti habetur ex ejus Actis a Photio laudatis Cod. 256. *pie & sancte pro terrestri Caeleste Domicilium adeptus est.* Eidem successit Sanctus Athanasius, illustre nomen in terris, & longe splendidus in caelis. Vitam ille Sancti Antonii Abbatis literis consignavit, quam a nonnullorum censura Cl. Montfauconius in editione illius Operum vindicavit: ubi haec animadvertenda censui, antiquissimam Versionem sequutus. Vitam quippe illam, fortassis Athanasio ipso vivente, Evagrius Antiochiae Episcopus, acris ac ferventis ingenii, quum adhuc esset Presbyter, in sermonem nostrum transtulit, uti fidem facit hisce verbis Sanctus Hieronymus Cap. 125. de Scriptoris Ecclesiasticis. Igitur inquit Athanasius: *Quum ante cibum orare coepisset, raptum se sensit in spiritu, & ab Angelis in Caelum deferri, prohibentibus transitum aeris Daemonibus &c.* Rediens autem Antonius in se, reputabat secum humanorum hostium multitudinem, & collustationem tanti exercitus, & laboriosum per aerem iter ad Caelum, & hoc Apostoli dictum, quo ait: *Non est nobis collustatio &c.* Qui sciens aereas Potestates ob id semper tentare, lustrari, & contendere, ne nobis liber transitus esset ad Caelum, hortabatur monens: *Assumite arma Dei &c.* Occasionem visio ejusmodi discipulis praebeuit, ut ab eo sedule sciscitarentur, quemadmodum se post Corporis sarcinum Anima gereret, quive ei locus post exitum concederetur. Proxima nocte vox desuper, nomen ejus inclamans, ait: *Antoni, exsurge, exi, & vide.* Qui egressus, elevatis ad Caelum oculis, vidit quemdam longum atque terribilem, caput usque ad nubes attolentem. Vidit etiam pennatos quosdam, se elevare cupientes ad Caelum; atque illum extensis manibus prohibere transgressum. E quibus alios adprebensos elidebat ad terram, alios, frustra contendens, dolebat super se ad Caelestia transvolare: & maximum gaudium mixtum more victi victoresque tribuebant. Statimque ad eam vox facta est, dicens: *Animadvertite, quod vider.* Et tunc coepit illuminato corde intelligere, ANIMARUM ESSE CONSCENSUM, & Diabolum probi-

prohibentem; quæ & sibi retineret obnoxior, & in Sanctorum, quos decipere non poterat, cruciaretur volatu. Locum Animabus Justorum destinatum, post discessum e vita præsentis, ab Antonio sci-
 scitabantur illius discipuli. Visio illi exhibita non aliud domicilium, quam Caelum, paratum esse Justis, aperuit: appositè nimirum ad communem temporibus quoque illis Ecclesiæ doctrinam. Præterea Sanctus Athanasius in Epistola ad Luciferum Episcopum Calaritanum scripsit: *Etiā nos optamus, tenentes Apostolicam Traditionem, vivere juxta Legis mandata, ut possimus vobiscum inveniri in Choro illo, in quo NUNC exsultant Patriarchæ, Prophetæ, Apostoli, ac Martyres.* Et infra: *Gaude igitur, in eote esse, in quo etiam Prædecessores tui NUNC sunt Martyres, hoc est in Choro Angelorum.* Neque dimittendus hæc nobis Lucifer ipse, qui Constantio Augusto imperante Libellum scripsit cum hocce titulo, *Moriendum esse pro Filio Dei.* Ibi, postquam de Martyribus a Domino dictum fuisse ait: *Gaudete & exsultate, quoniam merces vestra multa est in Cælo,* ad Constantium conversus addit: *Hoc tu omnibus impotens de gradu putasti sellere? Quod enim elegerint, non vobiscum negatoribus torqueri apud Inferos, sed CAELESTE CONSEQUI REGNUM, hoc per inanem Regni tui auctoritatem censueras temet superaturum.* Infra subdit: *Disperdidisti resistentes tibi variis in locis. Sed hi omnes, quod tu audire minime vis, Martyres sunt. Illor omnes BEATISSIMOS, tuo mactator gladio, IN PARADISO ESSE qui CREDIMUS, crede mihi, quod a te statuerimus interfici &c.* Quibus verbis satis innuit, non aliud sibi esse Paradisum, quam Cælesti Regnum, de quo paullo ante loquutus fuerat. Et præcipue quum infra subdat: *Tantum vero BEATITUDINEM, quam Sancti sunt MARTYRES ADEPTI, nemo, ut videmus, est consequutus, nisi hi, qui mortem propter unicum Dei Filium moriendo vicerunt.* Apertius quoque inferius prodit, ubi sunt Beati MARTYRES, quos jam Dei potentia CAELESTIBUS IN REGNIS ESSE CONSTITUTOS cernimus. Et rursus acris ingenii vir Constantium alloquutus in hæc verba erumpit: *Quis tantam sibi oblatam Felicitatem respiciat, nisi qui te infelicio, quum videat, confessione vocis unius, Christianus sum, adversa succumbere, læta provenire, patefieri Regna, Aeterna parari Imperia? Quis non malit particeps ac socius Patriarcharum, Prophetarum, Apostolorum, Martyrum, Cunctorumque Justorum inveniri, quam Jadae, cujus tu exististi imitator? En doctrinam stabilem Ecclesiæ Catholicae: statim Martyribus Regni Cælestis ostia patebant. Reliquis etiam Justis non negabatur illuc ingressus, sed non omnibus aut par gloria, aut tam*

elitus dabatur ingressus. Vide etiam ad diem XX. Februarii in Actis Sanctor. Bollandi, Martyrium Sanctorum Sadoth Episcopi, atque aliorum in Perside Anno CCCXLVI. pro Christo caeforum. Oblata est Sancto viro in somnis *scala, cujus initium erat in Caelo; ei autem superflabat Sanctus Episcopus Symeon cum Infinita Gloria, qui ait. ASCENDE AD ME, SADOth, ASCENDE. Ego enim veri ascendi; tu vero bodie ascendes.* Quibus verbis tum suum Martyrium jam completum, & alterius brevi complendum indicavit. Propterea Sanctus Sadoth fratres adhortari coepit ad grande certamen, inquit: *Quamdiu dies est, celeri pede AD REGNI CAELESTIS DOMICILIUM TENDAMUS, ut honoris GLORIAEQUE HEREDITATEM ADEAMUS. Qui Deum diligunt, ad Deum excesserunt: qui vero Mundum, in Mundo manserunt.* Illi quidem ad Laetitiam & Exultationem; bi vero ad aerumnas & suspiria relictī. Hac fide, certaue spe tunc generosi Christi Fideles ad tormenta properabant, vicinam ac imminentem semper Beatitatem sibi promissam ac paratam in Caelis.

Synchronus gloriosis hisce Athletis fuit Sanctus Hilarius, celeberrimus Pictavorum Episcopus. Hunc non uno in loco suae faventem opinioni Burnetus ossentat. Atque is revera explicans Psalmum CXXXVII. ad versiculum octavum haec scripsit: *Humanae ista lex necessitatis est; ut conssepultis Corporibus ad Inferos Animae descendant. Quam descensionem Dominus ad consummationem veri hominis non recusavit.* Idem praedixerat in Psalm. LIII. versicul. 9. de Christo Domino loquens, qui *ad explendam quidem hominis naturam, etiam morti se, idest discessioni se tamquam animae corporisque subiecit, & ad Infernas sedes (id quod homini debitum videtur esse) penetravit* Denique in Psalm. CXX. ad versic. 8. *Dominus custodiet exitum tuum* &c. ait: *Non enim temporis hujus & Saeculi est ista Custodia, non aduri sole atque luna, & ab omni malo conservari; sed futuri boni expectatio est, quum exeuntes de Corpore, ad introitum Regni caelestis per Custodiam Domini Fideles omnes reservabuntur, in sinu scilicet interim Abrahae collocati.* Haec pro se laudat Burnetus. Cui responsum primo velim, Saeculo Christi. Quarto nondum excidisse pennas opinionum de Millenario Regno, eamque in paucorum adhuc cerebro locum pacificum invenisse, inter quos Sanctum Hilarium forsitan recensere licet. Aliquam ille hac de re suspicionem ingerit Tractat. in Psalm. LXII. num. 7. atque in Psalm. CXLVIII. num. 8. Si haec ejus opinio,

opinio, quod affirmare non aulam, toties diximus, iterumque meminisse juvat, nil mirum esse, si posito hoc principio, tamdiu retardaretur Beatitas fustorum, quando ipsam tum solum admittere ejusmodi opinioni adhaerentes cögebantur; quum completum foret aureum illud Millenarium, in terra nova, sive renovata somnium. Vidimus explosum vel antiquitus imaginarium hoc Regnum, quod nunc Theologorum nemo, qui sapiat, non averteretur. Ergo ruant & illius confectaria oportet. Condonandus hic error, dum aliquamdiu fuerit in Sancto Hilario, qui a deliramentis Cerinthi, aut ab ineptiis Papiae, alienum saltem se prodit, eamque opinionem non uno titulo emollivit. Verum qui illius hac in re auctoritatem uti velit, inani prorsus suffragio utatur, sive, ut melius dicam, abutatur. Numquid gemmae sunt, quaecumque in Libris priorum Patrum occurrunt? Ea solum aut amplectenda, aut non improbanda, quae aut consentientem, aut non repugnantem habuerunt, & habent coetum aliorum Patrum, & praesertim Ecclesiae. Quos autem magistros in hac opinione Hilarius habuerit, satis patet: Irenaeum videlicet ac Tertullianum. Jam Cap. IX. vidimus ab Irenaeo legem impositam Animabus, simul atque e corporeis vinculis abeunt, descendendi ad Inferos, eo quod illuc & ipse Christus Dominus descenderit. Sed & Tertullianus idem sibi finxit in Lib. de Anima Cap. LV. inquit: *Quod si Christus Deus, quia & homo, mortuus secundum Scripturas, & sepultus secus eadem, huic quoque legi satisfecit, forma humanae mortis apud Inferos functus* &c. Idem a Sancto Hilario repetitum habemus, quamquam is minime decernat, quoto tempore in Inferis Animae sint detinendae. Porro quam fluxa, quam nulla sit vis hujusce argumentationis, & hujusmodi legis imaginatio, satis supra monuimus. Secundo, animadvertendum est, adversus Burneti systema non una ratione Hilarium ipsum decertare. Scilicet ille, sive quia ad Millennarios numquam accesserit, sive quia ab ipsis recesserit, se plerisque aliis in locis prodit Catholicorum sapientiorum sententiae addictissimum. Non praemia tantum Justis, sed & Injustis poenam differt Burnetus usque ad Resurrectionem, & supremum Judicium. Contra Hilarii sententia fuit, nullam intercedere moram inter Improborum mortem, eorumque poenam. En ejus verba Tract. in Psalm. II. sub finem. *Excipit nos Statim Infernus: & decedentes de Corpore; si ita vixerimus, de via recta perimus. Testes nobis Evangelicus Dives & Pauper; quorum unum Angeli IN SEDIBUS BEATORUM, & IN ABRAHAE SINU locaverunt; alium STATIM*

POENAE REGIO suscepit. Adeo autem **STATIM POENA** Mortuum excepit, ut etiam fratres ejus adhuc in supernis manerent: Nihil illic dilationis aut morae est. Idem ab eo repetitum videas Tractat. in Psalm. CXXII. num. 11. prope finem. Praeterea Tractat. in Psalm. LVII. num. 5. scribit: Neque enim suspensio adhuc Judicii tempore quiescere Peccatores sine Poena erat dignum. Viventes itaque eos cum Poenae scilicet sensu absorbet Ignis, **ANTEQUAM RESURGANT**. Ergo testem sibi adversantem Burnetus inducit. Statuta autem Poena Iniquorum, consequitur ex vi Theorematis Primi, a nobis positi Cap. VI. praemia quoque Proborum Animabus non esse differenda. Legem hanc divinae bonitatis agnovisse Hilarius & ipse videtur, dum Tractat. in Psalm. LXVII. num. 4. scribit: Aequa judicii Caelstis & iusta moderatio est, ut Peccatores Morte conficere, ita & **JUSTOS LAETITIA MUNERARI**. Rursus ne Martyres quidem Burnetus Caelo dignatur. Gloriosas quoque & triumphales istorum Animas, universa antiquitate reclamante, expectare jubet certaminis Coronam a postremo Christi Adventu. Ejusmodi commentum Hilarius deiecit, dum Tractat. in Psalm. LXV. num. 10. illorum Animas Igne temporalium tormentorum purgatas & defaecatas ad refrigerium aeternae Beatitudinis continuo perducit. Transivimus, inquit, per Ignem & Aquam. Gloriosas videlicet Martyrum mortes commemorat. Et eduxisti nos in Refrigerium. Hujus refrigerii & in loco alio meminit, dicens: Convertere Anima mea in Requiem tuam, quia Dominus benefecit mihi. Bene placebo Domino in regione vivorum. Animam videlicet suam in Requiem beatae illius Resurrectionis (quo nomine, ut supra diximus, significatur etiam Justorum ingressus in Caelum) kortatus, in qua Post Mortis Hujus Tempus, omni humanarum calamitatum labe deterfa, non doletur, non fletur, non peccatur, sed vivitur. In hujus igitur Beatitudinis per Ignem & Aquam Refrigerium Edusti sunt. Stephanum quoque Protomartyrem illuc fuisse deductum, sat ipse significat Tractat. in Psalm. LVIII. num. 6. Et heic igitur ab Hilario Burneti cogitationes improbantur. Ubi vero dederis, Martyribus ex hac Vita decedentibus patere Caelum, nihil (uti supra ostendimus Theoremate Secundo) ultra exigitur, ut jure statuas, reliquorum quoque Justorum Spiritus purgatos illuc invehī, ibique Requiem beatissimam nancisci: Negat insuper Burnetus peculiare & occultum Dei Judicium in singulorum hominum morte a Catholicis depraedicatum. Neque ani-

animadvertit, Hilarium in hoc etiam sibi adversari, & nobiscum sentire. Ipsum audi Tractat. in Psalm. LVII. num. 7. *Uti- que est Deus judicans eos in terra. Dicens ergo homo, an fructus sit Justo, non ambigitur expectare Judicium, Justo tamen jam in ter- ris, quia per Angelos in Abrahae sinum deductus sit, Judicato.* Deinde Infidelem diserte pronuntiat jam Judicatum ad Poenam. Si Justorum quoque post mortem Judicium instituitur, ergo & Prae- mium pone sequatur oportet. Tertio, quod plus est, quamquam Sanctus Hilarius *Sinum Abrahae* excipiendis ante Corporum Re- surrectionem Justorum Animabus destinatum crediderit; immo Locum illum non semel a *Regno Caelesti* distinguat, in quod rece- pto Corpore electi introducentur: nihilo tamen secius is quam lon- gissime abest hac etiam in re a somniis Burneti. Sed quia lux ab eo petenda poterit usui esse ad illustranda etiam ambigua aliorum aliquot Patrum verba de statu Mortuorum, in subsequens Capitu- lum materiem hanc rejiciendam duxi.

C A P. XII.

Variis nominibus ab antiquis designatus Beatitudinis Locus. Hisce usus Paulinus Episcopus Nolanus: Sinus Abrahae ad eundem Locum indicandum adhibitus. Liturgiae Jacobo & Marco tributae, vetustissima quoque Romana, idem confir- mant. Sancto Hilario Sinus Abrahae Regnum Caelorum significat. Requies, & Requiescere eodem sensu ab ipso usurpata. Alia Hi- larii verba in examen adducta, & ad Catholicum Dogma stabi- liendum opportuna.

NON levis inter aliquot ex antiquis Patribus dissensio occurrit, ubi agitur de statuendo Loco, in quem Justorum Animae absceden- tes e Corpore deferantur. Alii *Caelum*: alii *Sinum Abrahae*: isti *Locum Quietis*: illi *Paradisum* censent, sive appellant. *Paradisus* ipse apud aliquos aut ipsum Caelorum Regnum significat, aut saltem in Caelo- rum regione situs creditur; apud alios in ignota Terrae hujus plaga. Sunt & paucissimi, qui sub Terra, sive in Inferis, non quidem poenali- bus, ejusmodi Animarum sedes locant. Attamen vel ipsi, qui a *Caelesti* Patria illorum Animas interim arcere videntur, eorum Beatitatem inchoatam, immo praegrandem omnes fere fatentur; ipsamque tum solum consummandam complendamque arbitrantur, quum Christus Judex

Judex cunctos tandem e tumultis excitabit & judicabit. De Loco, inquam, aut gradu Beatitudinis discrepant, non vero de Beatitudine ipsa: ita ut componi facile possit cum eorum placitis Catholicorum sententia, non negantium, quin Felicitas Sanctorum post resumpta Corpora in fine Mundi augenda perficiendaque sit pro meritum diversitate. Proinde quum apud nonnullos Patres audis haec nomina *Sinum Abrabae, Locum Piorum, Requiem, Pacem*, atque alia ejusmodi vocabula; ne puta conclusas ab eis in ignobili quodam Ergastulo Proborum Animas, ubi quodammodo insectorum more per hyemem somno indulgeant: quae fabella Burneti cerebrum invasit. Namque ibi etiam Felices, & Beatae, ac sine comparatione vivaciores, quam quum illigatae erant Corporibus, vitam apud Deum, & una cum Divino Salvatore nostro nunc transigere ab ipsis Patribus credebantur. Porro diversae hac in re veterum opiniones nullo unquam tempore obsisterunt, quin usitatio, immo, ut ita dicam, communis semper fuerit Christianae Reipublicae sententia, minime exspectandam esse Justis Resurrectionem Corporum, ut ad Beatificam Visionem Dei conscendant: quod praesertim Martyribus obtingere, uti jam ostendimus, concordi calculo, & vel ipsis primis Saeculis, Ecclesia Dei pro certo habuit. Discordiam hanc de Loco, in Beatitate vero concordem, graphice delineasse mihi videtur Sanctus Paulinus Nolanus Episcopus, Martini, Ambrosii, Hieronymi, Augustini aequalis & amicus. Agit ille de Sancto Claro Presbytero Turonensi, sua aetate vita functo, in Epistol. XII. ad Sulpicium Severum, nihil dubitans, quin is ad caelestem Beatitudinem una cum Sancto Martino ejus magistro fuerit translatus. Haec autem de ipso inter cetera ait:

*Nominis ut titulo, sic mentis lumine Clarus
Presbyter hoc tegitur, sed membra caduca, Sepulcro.
Libera corporeo MENS carcere GAUDET IN ASTRIS,
PURA PROBATORUM SEDEM SORTITA PIORUM.*

In altero Epigrammate sub altari more Martyrum illius Corpus reconditum scribit:

*Digna pio domus est Altaria, sub quibus artus
Conditur exanimos. Nam SPIRITUS AETHERE GAUDET,
Discipulumque pari sociat SUPER ASTRA Magistro.*

Sed quanam haec *Sedes Piorum*, beate Pauline? In tertio Epigrammate respondentem audi.

*Sed quia tu non haec, qua Corpus, Sede teneris,
Qui meritis Superis Spiritus involitar;*

Sive

Sive Patrum Sinibus recubas, Dominivæ sub Ara

Conderis, aut sacro pascaris in Nemore:

QUALIBET IN REGIONE POLI situs, AUT PARADISI,
Clare, SUB AETERNA PACE BEATUS agis.

Haec peccatorum bonus accipe vota rogantum,

Ut sis Paulini, Therasiaeque memor.

Paulinum vides incertum, quo nomine Locum & Sedem Piorum appellet: hoc est, decernere non vult, Sanctus-ne Presbyter requiescat in Sinu Abrahæ, an sub Caelesti Ara Domini, an in sacro Nemore. Attamen firmissime credit, ejus Animam, *sortitam Piorum Sedem*, versari & gaudere in *Astris*, ac laetari in *Aethere & super Astra*. Certus quoque est, ubicumque Clarus spiritu degat, & in quacumque Regione Caeli sive Paradisi nunc habiteret, ipsum sub *Aeterna Pace Beatum* vivere. Ac propterea se, ac Therasiam uxorem antea, tunc vero spiritalem Sororem suam, ejus apud Deum orationibus commendat: ex quo etiam illius apud Deum Sedem & Beatitatem confirmat. Haec Sanctus Paulinus ad Sulpicium Severum.

Quid autem Severus ipse de hac re senserit, perquiramus. Est idem ille, quem Sanctus Hieronymus, uti supra Cap. V. vidimus, in Chiliastrarum album retulit. Attamen is, dum Martini celeberrimi Turonensis Episcopi, & Magistri sui, discessum e Mundo in Epistol. III. ad Bassulam narrat, Sanctum virum vel in postremo anhelitu orantem nobis exhibet, atque oculis & manibus in Caelum semper intentum. Rogatus, ut corpusculum lateris mutatione relevarret; *Sinite, inquit, me, fratres, Caelum potius respicere quam Terram*, ut suo jam itinere *ITURUS AD DOMINUM SPIRITUS* dirigatur. Diabolum deinde prope adstare intuitus: *Quid heic*, ait, *adstas cruenta bestia? Nihil in me, funste, reperies. ABRAHAE ME SINUS RECIPIT*. Ex his intelligis, Sinum ipsum Abrahæ creditum ab antiquis in Caelo ipso positum; quamquam, ut supra monui, ejusmodi vocabulo non Locum aliquem, sed consertium Abrahami, patris omnium credentium, utique in Caelo, Sancti Patres designasse videantur. Et ne quis de mente Sulpicii Severi, sive de Beatitudine Sancti Martini dubitet, en quid ipse Severus in Epistol. II. ad Aurelium Diaconum scribat, ubi de sancto Episcopo, paullo antea mortalibus erepto, ait: *Est ille consertus Apostolis & Prophetis* (idcircoque cum Abraham) & quod pace Sanctorum omnium dixerim, in illo *JUSTORUM GREGE NULLI SECUNDUS*, ut spero, credo, confido; illis potissimum, qui Stolas suas in sanguine Agni lavaverunt,

verunt, aggregatus, Agnum ducem ab omni integer labe comitatur. Hic-
ce vides delineatam Caelestem Sancti Martini gloriam, eumque jam
invectum ad Visionem Dei & Domini; nam qui Stolas suas deal-
barunt in sanguine Agni, *stant ante Thronum, & in Conspectu Agni*,
uti supra animadvertimus Cap. IV. Quare frustra Burnetus agit,
quum in suum censum pertrahere se posse putat, si quos veterum depre-
hendit statuentes defunctorum Animas in Sinu Abrabae degentes,
vel postquam Dominus ad dexteram Patris conscendit. Nihil hoc offi-
cit ineffabili Sanctorum Beatitudini. Quod si a nonnullis beatissi-
mus iste Animarum status distinguitur a Regno Caelorum, id tan-
tummodo factum, ut indicarent completam & consummatam
illorum Sanctorum Felicitatem, quam una cum Corpore post
universorum Judicium consequentur, & quam *Regnum Dei, Re-
gnum Caelorum* appellare maluerunt. Evidens enim est, ab iis
ipsis agnosci conlatam interim Sanctorum Animabus Beatitatem,
atque ipsam in Caelis.

Ceterum lepidus est, ac caecitatem suam prodit Burnetus, quum
pag. 73. Liturgiam antiquissimam, quae Sancto Jacobo tribuitur;
in suum praesidium advocat, Graeco tantum textu prolato; in-
de inferre volens, pro *Animabus etiam Patriarcharum, Apostolo-
rum, Martyrum* &c. preces & oblationes a Fidelibus fuisse factas,
quod nondum illas crederent ad summam Gloriam, & beatissimam
Dei Visionem pervenisse. Fabulas narrat hic Scriptor. Jam supra
palam fecimus, nullas Ecclesias obtulisse preces pro Animabus
Patriarcharum, Apostolorum, & Martyrum. Horum mentio in
Liturgia in eum tantummodo finem recurrebat, ut pro eorum
gloria Deo gratiae agerentur, & cum beatis illorum spiritibus
communio militantis Ecclesiae exprimeretur. Mos autem semper
fuit, & adhuc in Ecclesia Catholica perdurat, pro aliorum mor-
tuorum Animabus, quorum Sanctitas incomperta est, Deo exhi-
bere preces, ut, si remissione indigeant, eas misericors Deus pec-
catis solvat, atque in aeternam suam Requiem & Gloriam reci-
piat; atque ideo precari, quia nunc, non vero in fine Mundi,
Gloriam hanc eis conferri Ecclesia cupit, & pro Dei clementia
conferendam sperat atque confidit. Sed minime pro Apostolis &
Martyribus preces Deo offerbantur, neque offeruntur; quippe jam
Patriarchae, jam Prophetae, Apostoli, & Martyres, alique San-
cti, communi Ecclesiae calculo, vel ipsis primis Saeculis cense-
bantur attingisse metam & accepisse bravium; non integrum fane,
perfectumque Praemium illud, quod ex Resurrectione totus homo
justus

justus expectare debet, sed tamen Praemium incomprehensibile Beatitatis, quippe realis, aut aliqualis saltem Visionis Dei & Christi. Pro ceteris autem, qui in pace Ecclesiae atque in signo fidei dormiant, utpote quod incerta apud superstites foret illorum fors, aut dubium, an adhuc purgati essent, preces revera & oblationes fiebant in sacris. Nimirum ex Apostolica Traditione persuasum habebant, uti & adhuc habetur, militantis Ecclesiae orationibus Mortuorum Animas juvari, *ut a peccatis solvantur, & in beatam apud Deum Requiem emigrent.* Accipe Latinis verbis, quid Liturgia Jacobi ferat. Orat Sacerdos & Populus, *ut inveniamus misericordiam & gratiam cum omnibus Sanctis tuis* (idest ut in consortium admittamur Sanctorum) *qui ab aeterno tibi placuerunt per generationes ac generationem: Majorum nostrorum Patrum, Patriarcharum, Prophetarum, Apostolorum, Martyrum, Confessorum, Doctorum, Sanctorum, & omnis Spiritus Justi in fide Christi tui consummati.* Splendidiora sunt, quae sequuntur, quamquam a Burneto ipso producta: *Memento, Domine Deus noster, Spirituum, & universae carnis, quorum memoriam egimus, & quorum non egimus, Orthodoxorum, ac recte de Fide sentientium, ab Abel justo usque ad hodiernum diem. Fac eos REQUIESCERE IN REGIONE VIVENTIUM, IN REGNO TUO ET DELICIIS PARADISI, IN SINU ABRAHAE, ISAAC, & JACOB, Sanctorum Patrum nostrorum, unde exsulat dolor, tristitia, & gemitus: ubi praesidet LUMEN VULTUS TUI, & perpetuo refulget.* Nisi clausis oculis pugnans Burnetus sibi fucum fecisset, aut aliis facere voluisset, duo in hoc ipso loco Sole meridiano clariora inspexisset. Alterum est, jam Patriarchas, Apostolos, Martyres &c. *in Regno Dei, in Paradiso* versari, & frui Lumine Vultus Dei, neque viventium precibus apud Deum indigere. Quum viventes optent ac petant, ut cum iis jungantur, patet, nos adhuc navigare, illos vero jam Portum tenere. Quod etiam didicisse potuit ex Libro VIII. Cap. 41. Constitution. Apostolicar. quas & ipse, qua fronte nescio, haec laudat, ubi ista occurrunt: *Colloca eum in sinu Patriarcharum, Prophetarum, Apostolorum &c. qui vident Gloriam Christi tui, quae verba Cap. VII. supra attuli. Et collocet eum in Regione Plorum, quiescentium in sinu Abrahami, Isaac, & Jacobi &c.* Ita ex eadem Liturgia Jacobi, quo in loco Sanctorum Animae maneant, didicisset Burnetus, si discere amasset. Nempe ibi in Praefationis Hymno laudatur Deus, *quem Caeli Caelorum laudibus celebrant, Hierusalem Caelestis congregatio, Ecclesia primogenitorum descri-*

descriptorum in Caelis, Spiritus Justorum, & Prophetarum, Animae Martyrum & Apostolorum, Angeli, Archangeli &c. Hæc manu tangimus, e quibus efformetur *Cælestis Hierusalem*: e primogenitis Ecclesiae, e Spiritibus Justorum, ex Animabus Martyrum & Apostolorum, atque ex Angelis & Archangelis. Nomina autem *Spirituum & Animarum* nihil aliud ibi designant, nisi Animas a Corpore separatas, quæ utique in Cælo cum Angelis & Archangelis collocatae dicuntur. Alterum est, ex ipsa Liturgia, quam improvide Burnetus pro se exeruit, diserte nos moneri, Synonyma apud veteres fuisse *Regionem Viventium, Regnum Dei, Delicias Paradisi, Sinum Abrahæ; ubi praesidet Lumen Vultus Dei*: in quem beatissimum locum jam receptæ fuerunt Patriarcharum, Apostolorum, Martyrum, aliorumque Sanctorum Animæ, & recipi se cupit Populus Fidelis. Quei igitur Burnetus *Sinum Abrahæ* in infimii sui ædificium trahit, quasi per has voces Carcer ille designatus fuerit, in quem dormitantes coniecit Justorum simulque & Injustorum Animas? Habemus veteres variis nominibus usos, ad designandum Beatitudinis locum, quem adiere jam Sancti, & quem Ecclesia precibus & sacrificiis precabatur olim, & adhuc precatur a Deo illis, qui in pace Ecclesiae e vivis decedunt. Quod & confirmatum videas in altera vetustissima Liturgia, quæ Sancto Marco tribuitur, ubi Sacerdos pro Defunctis orat, inquit: *Horum omnium Animabus dona Requiem, Dominator Domine Deus noster, in Sanctis Tabernaculis Tuis, in Regno Tuo, largiens eis promissionum tuarum bona, quæ Oculus non vidit, & Auris non audit, & in cor hominis non ascenderunt, quæ præparasti, Deus, diligentibus nomen tuum. Eorum, inquam, Animabus dona Requiem, easque Regno Cælorum dignare.* Idem quoque antiquissimum Ecclesiae Romanae Sacramentarium significat, quum Deum deprecamur, ut omnibus in Christo quiescentibus Locum Refrigerii, Lucis, & Pacis indulgeat; atque ut nobis peccatoribus partem aliquam & societatem donare dignetur cum Sanctis Apostolis & Martyribus &c. intra quorum nos consortium veniat largitor admittat. Quem antiquissimum Ecclesiae Catholicae ritum Chrysostomus commemorat Homil. XLII. in prima ad Corinth. XV. & Sermone III. in Cap. I. ad Philippens. & Sanctus Augustinus pluribus commendat ac tuetur in Lib. de Cura pro Mortuis habenda, Cap. Quarto. Possem quoque paria delibare ex vetustissimis Sacramentariis Gallicano & Gothico. Sed hæc missi facio, ista concludurus Sancti Cyrilli Hierosolymitani ver-

his,

bis, qui in Catechesi Mistagog. V. testatus est, fieri mentionem etiam eorum, qui ante nos obdormierunt, primo Patriarcharum, Prophetarum, Apostolorum, Martyrum, ut Deus orationibus illorum suscipiat preces nostras. Deinde pro Defunctis, Sanctis Patribus & Episcopis. Denique pro omnibus oramus, qui inter nos vitam functi sunt, maximum esse credentes Animarum juvenum, pro quibus offertur obsecratio sancti illius & tremendi Sacrificii. Quare & suo calamo, & credulitate Lectorum abutitur Burnetus, quum pro Patriarchis, Apostolis, & Martyribus intercessisse apud Deum preces Ecclesiae venditat. Atque interim nos tenemus, non alibi quaerendum esse quam in Caelo Sinum Abrahæ, neque Beatitudinem Sanctorum in eo etiam loco desiderari. De Paradiso erit infra nobis sermo.

His positis, Sanctum Hilarium rursus adeamus, & quid sit illi Sinus Abrahæ, exploremus. Tenebras non raro offendas in figurata, mystica, allegorica Hilarii loquela, cujus perobscuro & salebroso stilo fortasse vix alium patrem inter Latinos Patres ostendas. Sunt qui putant; a Sancto Hieronymo scribente: *Hilarii Libros inoffenso decurrat pede*, indicari puritatem doctrinae illius. Mihi potius creditur, innui tenebrosam non raro, atque interdum male cohaerens & intricata illius oratio, quae vel peritioribus negotium non leve facessit. Attamen si studiosius in illius scripta oculos intendamus, brevi fiet, ut ejus mentem non nobis adversantem hac in re demum assequamur. Itaque, Hilario testante, in Sinum Abrahæ Justī e terrena vita dimissi feruntur. Illuc etiam translata dicitur in Evangelio Anima Lazari pauperis. Sed numquid illa ibi dormit, remota a Visione Patris, aut Christi Domini, quod putavit Burnetus? Apagē. Repetenda sunt Hilarii verba in Psalm. II. num. 48. *Testes nobis Evangelicus Dives & Pauper: quorum unum Angeli IN SEDIBUS BEATORUM, & in Abrahæ Sinu locaverunt; alium Statim Poenae Regio suscepit.* Quid sit Abrahæ Sinus, percontaris? *Sedes Beatorum*, atque idem Locus, quem Liturgiae vetustissimae nuper descripserunt, uti ineffabilis Beatitudinis domicilium. Et sane si Improbos e praesenti Saeculo decedentes confestim Poena excipit, Divinam Clementiam pariter decet, Probos quoque vicissim ad Praemium sine mora transire. Quē enim Deus, qui poenitentiam potius quam mortem peccatorum amat, tam festinus ad malos puniendos sit, tam piger ad bonos praemio donandos? Neque enim obstat solemne Judicium a Domino in fine Mundi habendum. Tunc divinus Judex

Beatitudinem aut Poenam, jam coeptram in Animabus, in conjuncto Corpore augebit, totum hominem beans aut puniens, eamque Aeternam fore pronuntiabit. Tunc etiam universo Orbi nota faciet, quae praecessere occulta de Justis ac Injustis iudicia sua. Homines nequam Hilarius vix mortuos in Poenam ac Ignem rapi nuper dixit. Tum subdit: *Nihil illic dilationis aut morae est. Iudicii enim dies vel Beatitudinis Retributio est Aeterna, vel Poenae. Tempus vero mortis habet interim unumquemque suis legibus; dum ad Iudicium unumquemque aut Abraham reservat, aut Poena.* Si Iudicium postremum erit Retributio aeterna *Poenae*, quam Improbi, fatente Hilario, statim a morte subierunt: ergo & ipsum erit Retributio aeterna *Beatitudinis*; cuius participes antea Probi fuerunt effecti. Quod diserte nuper confessus est ipsemet Hilarius, dum *Sinum Abrahae Sedes Beatorum* appellavit. Rursus ille in Psalm. CXVIII. Lit. 18. num. 10. ait: *Aeterna Dei testimonia Lazarus pauper exspectans, & Abrahae Sinu continetur, & miseriam vitae laboriosae, BEATAE QUIETIS HONORE demutat.* Et in Psalm. CXXII. num. 11. Idcirco *ANIMA* ejus ab Angelis post carnis dissolutionem *BEATA* in *Abrahae Sinum* fertur. Iterum eundem audi in Psalm. LVII. num. 6. ubi repetit, cruciandos Igne Peccatores sine cunctatione post mortem: adveniente autem universali Iudicio, unumquemque *sive bona, sive mala*, percepturum in *Carne*; atque Animam Divitis interim in Igne torqueri. Tum addit: *Sed inter haec Iusti Cujusque, tamquam Lazari in Sinu Abrahae Requiescentis, Laetitia monstratur. Laetitia Iusti, quum viderit vindictam, quia deducit se per Angelos IN AETERNAM REQUIEM LAETATUR.* Neque tibi dubitationem ingerant voces illae, *Quies, Requies, Requiescere*: nam, ut supra Cap. IV. animadvertimus, hisce ipsis verbis ac phrasibus Beatitudo Sanctorum designabatur a Sanctis Patribus, atque eodem sensu ipsis adhuc utitur Ecclesia in sacris. Neque Hilario diversa mens fuit. Is in Prologo ad Psalmos, num. 18. *finem* esse ait, *cujus causa cetera sunt*: finem vero hominis *consequentionem Bonorum Aeternorum*, quum in his nullo *teriore tendens procurso, ipso suo optatae & adeptae Beatitudinis fine Requiescat.* Tractatu quoque in Psalm. XIV. explicans ea Psalmistae verba: *Domine, quis habitabit in Tabernaculo tuo, & quis Requiescet in Monte sancto tuo?* Tabernaculum interpretatur Ecclesiam, *Requiem* vero in Monte, Christum in Caelis gloriosum. Si ergo, ait, *Requiei nostrae spes omnis est in Christi corpore; & quum*

quam in Monte sit *Quiescendum*, Montem non aliud possumus intelligere quam Corpus, quod suscepit ex nobis &c. Ad illud enim post habitationem Ecclesiae scanditur; in illo in Domini Sublimitate REQUIESCITUR, in illo cum Angelorum choris (quum & nos simus Dei Civitas) sociabimur.

Porro dubitationi cuicumque Sanctus ipse vir aditum praecludit, quum in Sinu Abrahæ *Quicquam* quidem, sive *Requiem* statuit, sed *Beatam*, sed *Aeternam*, uti vidimus. Si *Requies* illa in Sinu Abrahæ non solum *Beata* est, sed etiam *Aeterna*, hoc est semper duratura, numquam cessatura: ergo nihil aliud esse potest, nisi Caelestis Animarum Beatitudo, & felicissima illa *Requies*, de qua Apostolus ait: *Festinemus igitur ingredi in illam Requiem*. Rursus si *Aeterna* est, etiamsi supremi Judicii dies adveniat, perget Anima Beatitudine seu *Requie* illa frui; ac tum solum Caro rediviva in Beatitudinis illius consortium recipietur. Propterea Tractatum illum hisce verbis concludit Hilarius: *Per haec igitur est habitatio in Tabernaculo, per haec Requies in Monte*. Addit, elaborandum esse, ut *acquisita hac in viaticum aeternitatis opulentia, & habitantes in Ecclesia, Tandem IN GLORIA corporis Christi QUIESCAMUS*. Cur vero Justos tanta Felicitas post mortem maneat, idem Hilarius edisserit Tractat. in Psalm. CXIX. num. 1. ubi de tribulationibus Christiano non timendis agit. Apostolus, inquit, *Dissolvi & Cum Christo esse, sibi melius testatur &c. Quid (contra haec fidei nostrae proposito firmato) loci adversus nos, Saeculo re-iniunctur, quum CHRISTI CONSORTIUM MORS ACQUIRAT?* Nihil aliud Consortium est, nisi Societas, nisi in eo Loco praesens esse, ubi Christus est. Ubi vero nunc sit Christus, quis Christianorum ignorat? Ille in Gloria. Ergo Iusti quoque in Gloria, quia in *Gloria Corporis Christi*, utpote sua membra, *quiescunt*, & *Christi contubernium Mors nobis acquirit*. Quare, qui jam praecessere, cum Christo sunt, ejus Vultu fruuntur, vultu utique Beatifico. Quid igitur ultra opus est, ut Sanctorum Beatitudinem in Caelo intelligas? Nonne ubi Christus, ibi & Paradisus? In cruce positus hoc ipse nos docuit. Quae quum ajo, in evidentem plane transeunt lucem, quoties ejusdem Hilarii sententiam de Martyrum Animabus intentis oculis colligamus. Tractat. in Psalm. LIII. num. 10. *Si quando, ait, injustae mortis vis afferatur, excedentem habitaculo Corporis ANIMAM sicut IN DEI SUSCEPTIONE REQUIESCERE*. Cavillaretur ad ista, ut puto, Burnetus aliquis, *Susceptionem tantummodo audiens, & nihil nisi Requiescere inveniens. Verum quid sit Requies*.

Requiescere, jam ostendimus. Quid *Susceptio*, Stephanus Protomartyr, videns *Caelos apertos*, ad quos jam transferendus erat, & clamans: *Domine Jesu, SUSCIPE SPIRITUM MEUM*, fatis nobis aperuit. Aperuit & ipse Hilarius, dum de Christo in Caelum ascendente scribit Tractat. in Psalm. LVIII. num. 6. *Et dignum fuit, reditum ejus in ambitione occursum caelestis ornari, ne ingressuro Caelos dignatio paterna de Caelo deesset. Neque id mirum, quum primo nominis sui Martyri Stephano, velut in primoribus Caeli, in occursum a Deo Patre descensum sit. Sed quid ultra moror? Ut infra videbis, ab Hilario ipso Omnium perfectio Bonorum appellatur Inhabitationis Caelestis Requies. Ergo illi Requies Beatitudo est, in quam Martyrum & reliquorum Justorum Animae segregatae a Corpore invehuntur. Sed si Christus Dei Requies est, ergo bi, QUI IN CHRISTO ERUNT, ERUNT IN DEI REQUIE: inquit idem Hilarius, de Beatitudine loquens Tractat. in Psalm. XCI. num. 9. Rursus vero, ut palam fiat, quid sit Requies Aeterna, in quam Justi cujusque Animam separatam a Corpore deduci Hilarius nuper significavit, illum audi ita loquentem Tractat. in Psalm. CXLVII. num. 5. *Vitae via, sicut Dominus in Evangelii ait, angusta & tribulata est: neque nisi per maximas difficultates & molestias hac ad CAELORUM REGNUM via pergitur. Quod quidem de molestiis hujus Saeculi dictum fuisse intelligi oportet. Per praesentes enim vexationes in REQUIEM AETERNAM aditur. Et quamvis rerum Praesentium laboribus uramur, tamen Post barum Praesentium acerbissimum rigorem, Deo eos resolvente, in placidis & tranquillis & serenis QUIESCEMUS. Heic nullum discrimen statuit Hilarius inter Requiem Aeternam, atque Regnum Caelorum; & illuc aperte ait, absoluto laborioso hujus vitae stadio, pervenire Justos. Infra idem confirmatur, scribente sancto viro: Dissolutis infirmitatibus Corporis, REGNI BEATI hujus tempus AETERNUM est, ubi non stendum, non dolendum &c. Sed in his vivendum, Quae oculus non vidit &c. Quum igitur audis, Martyres in Dei Susceptione Requiescere, Justos in Requie Aeterna degere, ne tibi Burneti somnia obrepant, quasi illic de quadam inactuosa Quietate, & quodam ad instar insectorum Somno agatur. Quies illa, seu Requies, in Deo est, in Visione Dei est; neque umquam mortali animus quiescet, donec ad amplexum & visionem summi incommutabilis & infiniti Boni pertingat. Sed & Philosophia ipsa, non in Voluptate, quae in motu est, sed in Quietate veram hominis Felicitatem in terra collocavit. Quanto plus in Caelis? Praeterea, quid**

quid Martyribus post mortem contingat, diserte alibi significavit Sanctus Hilarius, videlicet Tractat. in Psalm. LXV. num. 21. ubi haec ejus verba: *Alii in profundum demergendi, non in aquas necaturas, sed in REFRIGERIUM AETERNAE BEATITUDINIS decidunt.* Infra addit: *Et quo transducatur (Martyr) Propheta non nescit, dicens: Et eduxisti nos in Refrigerium. Hujus Refrigerii & in alio loco meminit, dicens: Convertere Anima mea in Requiem tuam, quia Dominus benefecit tibi. Bene placebo Domino in Regione Viventium.* Insuper ait: *Per haec igitur genera poenarum, Martyres in fidei testimonium corpora sua holocausta voverunt, ut in Dei Domum, idest in Caelestis Domicilii habitationem hostiarum suarum sacrificiis introirent.* Denique scribit, generosos illos Christi Athletas per passionum poenas & mortes in Locum Beatitudinis transire. En quid *Requies*, quid *Refrigerium* fuerit beato Hilario.

Quamobrem basilice fallitur Burnetus, quum Hilarium in suae opinionis praesidium adventurum sperat. Habemus Sanctum virum disertissime non uno in loco affirmantem, minime expectandam Justis postremi Judicii diem, ut ad beatam in Caelis vitam assurgant. Urgentem tamen aliquem post Burnetum audire mihi videor, atque Hilarii verba repetentem ex Tractat. in Psalm. CXX. ubi de Justis inquit: *Exeuntes de Corpore, ad introitum Regni Caelestis per Custodiam Fideles omnes reservabuntur, in Sinu scilicet interim Abrabae collocati.* Ergo nondum Justii (dicit aliquis Burnetus) immo ne Apostoli quidem, neque Martyres (inquit enim Hilarius *Fideles Omnes*) ad Regnum Caelorum conscenderunt, ac proinde Visionem Dei adhuc desiderant, non tenent. Sed amovebit & hunc obicem Hilarius ipse. Duplex Regnum jamdiu animadverterunt Eruditi a Sancto Hilario excogitatum: unum Christi, alterum Dei. Primum constituitur a duplici mystica Civitate Hierosolyma, nempe ab Ecclesia militante in terris, atque a triumphante in Caelis. Christus nempe regnat in Sanctis super terra viventibus, & ex hisce efformat sensim Caelestem Civitatem, de qua Apostolus ad Hebr. XII. 22. *Accessistis ad Sion Montem, & Civitatem Dei viventis, Hierusalem Caelestem, & multorum millium Angelorum frequentiam & Ecclesiam primitivorum, qui conscripti sunt in Caelis, & spiritus Justorum perfectorum.* Haec Regnum Christi est, quippe ex Animabus constata, quas ipse suo sanguine, veluti Populum acquisitionis, sibi comparavit. Descendit enim de Caelo Filius Dei accipere sibi Regnum, ut ipse testatus est Luc. XIX.

12. Postquam vero Apostolus Prima ad Corinth. XV. 23. Resurrectionem mortuorum depraedicavit, haec addidit: *Deinde finis, quum (Christus) tradiderit Regnum Deo & Patri, quum evacua-verit omnem Principatum &c.* Itaque tunc secundum Hilarii mentem exordium erit *Regno Dei*: & quod antea *Regnum Christi* appellabatur, incipiet nuncupari *Regnum Dei*, *Regnum Caeleste*, *Regnum Aeternum*, quia consummatae perfectaeque Beatitudinis apicem Iustorum Animae una cum recepto Corpore attingent. Hilarius ipsum audi in Psalm. CXLVIII. num. 8. *Regnat itaque Dominus* (en *Regnum Christi* duraturum usque ad Resurrectionem omnium) *traditurus Deo Patri Regnum* (nempe post universale Judicium, ubi dicturus est Iustis: *Possidete paratum vobis Regnum*) non *Regni potestate cariturus*, nam Regni ejus etiam post Resurrectionem non erit finis. At in quo situm est Christi Regnum? Pergit dicere Hilarius: *Sed Nos, qui Regnum ejus sumus, Deo Patri traditurus in Regnum. Regni traditio nostra provelitum est.* Quum ergo Hilarius ait, *interim Fideles Omnes ad introitum Regni Caelestis per Custodiam Domini reservari*, non negat Iustis praesentem Beatitatem in Regione ac Regno Caelorum; sed dicit, nondum eos ingressos esse in Regnum illud absolutae Beatitatis, quod appellabitur *Regnum Patris, Regnum Dei*, & quod tum tantummodo sperandum est, quum mortale hoc, scilicet Caro nostra, induerit immortalitatem. Certe quum Hilarius sentiat, *Fideles omnes reservari*, non eximit ex eorum numero Apostolos & Martyres, quos tamen nuper ipse affirmavit translatos in *Locum Beatitudinis, in Regionem Viventium, in Dei Domum, idest in Caelestis Domicii habitationem*. Dixerat etiam, Iustos hinc excedentes frui *Consortio Christi*, qui procul dubio est in *gloria Patris*. Quod ut manifestius etiam assequare, repetendum est, Caelestem Civitatem, mysticam nimirum & beatam Hierosolymam in Caelis, quae sensim a Iustorum Animabus hinc decedentibus aedificatur, appellari ab Hilario *Regnum Christi*. De ipsa loquitur idem sanctus Episcopus Tractat. in Psalm. CXXXI. num. 3. inquiens, terrenam Hierusalem praefigurasse speciem *Aeternae illius & Caelestis Civitatis*. Et quia in omne tempus, & usque ad Saeculi consummationem, & per omnium generationum aetatem, aedificatio Caelestis hujus Civitatis explenda est: ideo aedificari eam sine temporis definitione significat, dicens: *Aedificatur ut Civitas; donec, ut Apostolus ait, intret plenitudo gentium*. Quis autem, nisi desipiat, Beatitudinem a sancta & Caelesti Civitate illa, atque a Regno illo Christi exulare arbitretur.

arbitrètur? Eoque minus id excogitare licet, postquam auctor est ipse Sanctus Hilarius, Justos in fine Mundi e beatissima illa Civitate progressuros in *Regnum Dei Patris*. En ejus verba Prolog. in Lib. Psalmor. num. 11. *Quum enim primus gradus sit ad salutem, in novum hominem post peccatorum remissionem renasci* (en *Regnum Christi in Sanctis super terra degentibus*) : *Sitque post poenitentiae confessionem Regnum illud Domini in sanctae illius & Caelestis Hierusalem reservatum* (en *Regnum Christi in Sanctis ex hoc Mundo ad Caelestem Gloriam translatis*) : *Et postea consummata gloria* (nondum enim perfecta est illorum Beatitudo sine Corpore) *in Dei Patris Regnum, per Regnum Filii proficiamus*. Rursus hunc transitum describit Hilarius Tractat. in Psalm. CXLVIII. num. 8. inquires : *Illud Sanctorum est Regnum, per quod, Regnante Domino, ad beatum Regnum Dei Patris ascendent*. Et infra : *Illis ergo proprius hymnus est, qui Deo propinquabunt, qui per hoc sanctae Hierusalem Regnum Beatum, Aeterno Regno proximi, post Regnum Domini nostri Jesu Christi in Regnum Dei Patris, Domino congregante, transibunt &c.* Ergo vides, Sanctos in *Regnum Dei Patris*, quum Corpora recipient glorificata, transferendos, jam in *Caelesti Hierusalem*, sive in Caelis, hoc est in *sanctae Hierusalem Regno Beato*, versari : ac propterea Beatos esse, quamquam in assumptione Corporum eorum demum augenda sit Beatitudo, & de Beatitudine in alteram majorem Beatitudinem sint transaturi. *Regnum itaque Dei*, non Animarum jam Beatarum, sed Corporum Gloria, sive Glorificatio est.

Quanti autem Hilarius faceret conferendam Corpori aeternitatis gloriam, & incorruptionis munus, complura ejus loca evincunt; immo donum hoc Corpori Christi jam conlarum multis extollit. Et quanta quidem in Caelesti illa Hierusalem sit jam Sanctorum Beatitudo, ex ipso Hilario intelliges ita scribente Tractat. in Psalm. LXII. num. 3. *Sitivit Anima mea ad Deum vivum, quando veniam, & parebo ante Faciem tuam? Hoc Animae desiderium, haec sitis Spei ejus est, ut Dei sibi proveniat Adspectus, ut quamprimum raptus in nubibus, Deo Christo obviam elevatus appareat*. Infra addit : *Sed in Sancto Dei non aliter apparebunt Deo, quam secundum illud: Qui me vidit, vidit & Patrem. Apparens Filio, Patri apparebit in Filio. Atque ut in Sancto appariturus Deo, subjicit: Ut viderem virtutem tuam & gloriam tuam. Eum videlicet ut videret, qui secundum Apostolum & Virtus Dei est, & in Gloria*

Dei est: visurus autem non ad aliud, quam ad consortium Aeternitatis merendum, & ad Regni Caelestis aeternitatem sortiendam: quia haec per misericordiam Dei ultra vitae hujus beatitudinem praeparentur. Igitur Justus, quum hinc dissolvuntur, sunt cum Christo, quem qui videt, videt & Patrem; & Christum intuentur in Gloria Dei. Nega his, si potes, Beatitudinem ac Visionem Dei in Caelo. Ad haec, ut infra videbimus Cap. XIV. nihil aliud Hilarior est Paradisus, nisi Regnum Caelorum, quo etiam ait translatum fuisse poenitentem Latronem. Huic autem Latroni alios quoque similes ait, in illam propterea Gloriam invehctos. Scimus, inquit Tractat. in Psalm. LXV. num. 26. plures sacramentorum divinerum ignaros, exemplo Martyrum ad martyrium cucurrisse; & extra scientiam Fidei ante viventes, factis Fidei praesentis edictos, ipsam illam consummatam in martyrio Fidei Gloriam Consequutos. Qualis fuit ille, qui Dominum in sua damnatione confessus est, dicens: Memento mei, Domine, quum veneris in Regnum tuum. Qui mox tale martyrii hujus a Domino munus accepit: Amen dico tibi, hodie mecum eris in Paradiso. Si in Paradisum, hoc est in Regnum, devehctus est Latio: ergo & ceteri Martyres, sive testes Fidei Christi, illuc fuere deducti. In Libro quoque X. de Trinitat. num. 61. ait: Promissio Paradisi, viventis Dei Regnum est. Auctor est etiam idem Sanctus Episcopus Tractat. in Psalm. LXVII. num. 27. Dominum Salvatorem nostrum in Caelestem Regiam ingressum, Virtutibus Caelestibus, Animisque Sanctorum, iter ejus praecuntibus: atque adeo non oclusa, ut Burnetus dicitur, sed jamdiu reclusa Justis fuere Caelorum ostia. Neque in locis dumtaxat indicatis, sed & in aliis Hilarior ipse prodidit minime procrastinatam Sanctorum Beatitudinem in Caelis. Tractatu in Psalm. LI. num. 17. de viventium terra, cujus non semel supra fecimus mentionem, agit, eamque Regnum Christi esse nos docet, hoc est beatum in Caelis cum Christo consortium. Avulsus, inquit, de tabernaculo, eradicabitur & de viventium terra. Qui enim non manebit in Christo, Regni Christi incolae non erit. Non erit autem, non quod sibi non patuerit incolatus; universis enim patet, ut consortes sint corporis Dei atque Regni &c. Propterea, teste eodem sancto Antistite, in fine ejusdem Tractatus num. 24. Justus in hoc Mundo Domini nostri Jesu Christi nomen expectat: Jesum scilicet videre, id est Salvatorem suum nosse (quocum post mortem futurus est.) Expectat autem non occulte, non trepidus, non solus: sed in conspectu Sanctorum ejus, fide scilicet libera, testimonium expectationis suae, vel sub Sanctorum Caelestium consien-

conscientia: non recusant, vel Sanctis omnibus, qui in Terra sunt, in se ipso praebens expectationis exemplum. Nimirum expectat Justus Beatitudinem conscientia Sanctorum Caelestium, idest conscius & certus, jam alios Sanctos in Caelum deductos Regnare cum Christo. Expectat etiam, ut & alii Sancti nondum Corpore soluti exemplo suo ad spem & expectationem Praemii alacrius excitentur. Tanta autem fide Hilarius inchoatam jam Sanctorum Beatitudinem credit, ut ne judicandos quidem in Judicio novissimo eos credere videatur. Sunt ejus verba Tractat. in Psalm. LVII. num. 7. Quum ergo Sanctus non judicandus sit, qui in Vitam sit transiturus a Morte, & Infidelis jam judicatus ad Poenam sit, intelligitur, in eos reliquum esse Judicium, qui pro gestorum qualitate inter peccata fidemque medijs sunt. Justus post Mortem transfertur statim in Vitam Caelestem: Infidelis illico transfertur ad Poenam: ergo utriusque in Morte Judicium peragitur, Praemio uni, alteri Poena conlata.

Denique, ut finem faciam, Tractat. in Psalm. LXIV. num. 5. Sanctus Hilarius haec scribit: *Omnis, seu omnium, perfectio bonorum, inhabitationis Caelestis est Requies. Multas Mansiones Dominus in Caelis esse testatur: sed Patrem orat, ut Apostoli, ubi & ipse sit, maneant, dicens: Pater, quos dedisti mihi, volo, ut, ubi ego sum, ibi & illi sint mecum. Ex pluribus mansionibus Apostolis eam, quae sibi est propria, Communicat. Scit Propheta, quanta Beatitudo sit, in Tabernaculis Dei esse &c. Tandem ait: Beati quidem sunt, qui Jam ad habitandum in Tabernaculis ejus electi sunt. Sed festinare nos in Consortium hujus Beatitudinis congruum est, operationibus id atque orationibus expetentes. Et viva quidem spe: nam, ut idem antea Hilarius monuerat, concludens Tractatum in Psalm. II. Non trepidam spem, neque ambiguam, perfectio Beatitudinis exigit. Fidelis enim est, qui ait: Qui credit in me, non judicabitur; sed tranſiet de Morte ad Vitam. En quam diserte affirmet Sanctus Hilarius, in Requie Caelestis habitationis, in mansione Caelestis una cum Christo jam diversari ac stare rectorum Christi Fidelium Animas: quam aperte agnoscat, quanta Beatitudo sit, jam in Tabernaculis Dei esse: quam solícite nos etiam in terra viventes excitet ad spem istius non retardandae Beatitudinis, dum in via mandatorum Dei fideliter curramus. Haec negat Burnetus; hanc spem ille in nobis frangit, aut nobis eripit; festinationem nostram irridet; Hilarium quoque quasi sibi suffragantem inducit: quam immerito, quam parum pie, ne dicam impie, aequi rerum aestima-*

tores perspicere & decernere in posterum, ut spero, poterunt. Eoque propius intelliges, quantum a Burneti visionibus abist Beatus Hilarius, quando is non aliter, atque nos, Apostoli verba est interpretatus. Inquit enim Tractat. in Psalm. CXLII. num. 8. *Velociter exaudi me Domine. Moras Corporis sui Propheta non patitur; & secundum illud Apostoli: Dissolvi me melius est, & cum Christo esse; & illud: Miser ego homo! quis me liberabit de Corpore mortis huius? & illud: Quia in hoc veteri tabernaculo congemiscimus, desiderantes superindui; taedium ipse in hoc mortis Corpore patitur. Sed velocitatem auxilii deprecatur. Quid enim sibi proderit, exauditum esse velociter, nisi tamquam fidelis & Deo placens, & Beatis locis Quieturus, excedet e Corpore? Ut his denique finem faciam, accipe, quid Tractat. in Psalm. CXIX. num. 11. ad ea verba: Heu mihi, quia incolatus meus prolongatus est, Hilarius idem disseruerit: *Querelam istiusmodi, ait, a plurimis Sanctis audivimus, de tarditate scilicet suae morosae Corporum dissolutionem desistentium. Dominus in Evangeliiis suis docuit, ACCELERATIONEM REGNI CAELESTIS ESSE ORANDAM. Impatientem enim caritatem esse eorum, quae amet, convenit: atque ideo dici oportet, quod ut dicamus, a Domino praecipimur, ADVENIAT REGNUM TUUM. Paulus beatus inhabitationem Corporis sui congemiscit, per incolatum Carnis peregrinari se a Deo conquerens. Quo contra peregrinandum in Carne scit sibi esse, ut ei CUM DEO SIT INCOLATUS; sed tamen MELIUS ei ESSE DISSOLVI, ET CUM CHRISTO ESSE. Et Ecclesiastes ait: Et laudari omnes, qui mortui sunt, super omnes, qui vivunt usque nunc: liberata per Dissolutionem Corporis Anima ore atque consortio huius periculosa Carnis. In hoc igitur nimium prolixo IN CORPORE INCOLATU, CONGEMISCIT PROPHETA, FESTINANS PEREGRINARI A TERRIS ET INCOLERE CAELESTIA, UT derelictis corruptilibus atque praesentibus CONSEQUATUR INVISIBILIA ET AETERNA. Relege, quaeso, iterum, ac serio ista perpende: ac demum edicto, an ferendus sit Burnetus, qui & Hilarium, & Apostolum Gentium, veluti suis somniis indulgentes producit, & Iustorum desideria de Corporis dissolutione, atque impatientiam, ut cito consequantur quod amant, falsi arguit. Haec sunt, paene dixi, machinamenta hominis, Invisibilia & Aeterna neque sperantis, & per consequens, neque credentis,**

CAP.

C A P. XIII.

*Perperam pro sua opinione laudatus a Burneto Sanctus Ambrosius.
 Varia illius loca expensa. Pseudo-Esdræ Libris ille usur.
 Perspicue ab eo confirmata Sanctorum Beatitas.*

SANCTI quoque *Ambrosii* auctoritatem in suae opinionis patrocinium adscivit *Burnetus*. Jure-ne, an injuria, videamus. Haec ejus verba laudat ex Libro de Bono Mortis Cap. X. *Coronae enim dies expectatur ab Omnibus, ut intra eum diem & Vicerubescant, & Victores palmam adipiscantur victoriae.* E. Cap. XI. haec alia mutuatur, ubi laetitiam Animarum ante Resurrectionem exponens, ait: *Quarto, quia incipiunt intelligere Requiem suam, & futuram suam Gloriam praevidere; eaque se consolatione mulcentes in habitaculis suis cum magna tranquillitate Requiescunt, stipatae praesidiis Angelorum.* Denique e Lib. II. Cap. 2. de Cain & Abel, haec alia excerptit: *Solvitur a Corpore Anima post finem vitae hujus; adhuc tamen futuri Judicii ambigua suspenditur.* Haec ille ex *Ambrosio*: cujus postrema verba praetermitti poterant, uti inopportuna. Plerique enim Christi Fidelium, & praesertim qui mundaena & inutilia sectantur (hosque revera *Ambrosius* tunc monuit) ad finem praesentis vitae deveniunt, incerti ac dubii, quodnam futurum sit de se Judicium Dei. Contra non eam *Justis* ambiguitatem injicit *Ambrosius*, quum in eodem Libro de ipso Bono Mortis Cap. XI. eorum Animas Corpore solutas laetari diserte fateatur: *Quod servatae a se legis divino testimonio fulcianur, ut factorum suorum incertum supremo Judicio non vereantur eventum.* Eadem ingeminat Exposition. in Psalm. CXVIII. Sermon. VII. num. 17. inquiens: *Beatus itaque ille, qui illud caeleste Judicium laetus expectat.* Scit enim, sibi Regnum Caelorum, Angelorum Consortium, Coronam quoque bonorum repositam esse meritorum. At quando nam haec eventura sunt? Non postremo tantum die desinentis hujus Mundi, sed etiam post occultum & peculiare Judicium hominum hinc decedentium. Nam, ut idem sanctus vir in eodem Sermone num. 3. ait, *Justus remunerationem fidei, meritorumque sperat fore. Deus autem Sanctis quaecumque sponderit, implere consuevit, nostrarum immemor iniquitatum, suarum non immerito sponsonum.* Plura sane *Judicia Dei Ambrosius*

brofius quoque agnovit, atque inter cetera in excidio Judaici Regni unum ex iis deprehendit. *Verum autem dictum est* (ait in Exposition. Evangel. Lucae Lib. X. Cap. 21.) *juxta propofita de Templo, quod Salomon condidit; idque Judicii esse tempore subvertendum.* Hoc profecto Ambrosius non ignorabat, Vespafiani ac Titi tempore jam fuiffe completum. Reliqua duo loca a Burneto producta expendenda nunc reftant, defumta videlicet ex Libro *de Bono Mortis*. Primo, ubi demus, Sanctum Epifcopum non aliam ibi, quam quae Burneto placuit, tradidiffe doctrinam, vellem ego certius pateret, quo Anno haec ille fcripferit. Circiter Annum CCCLXXXVII. elucubratum centent Librum iftum, fed mera tantum conjectura ducti, Monachi Benediftini. Fortaffis & antea fcripffiffe is potuit, hoc eft, quum nondum erat *veteranus Sacerdos*: quo tempore revera is fatetur in Epiftol. XLV. ad Sabinum, fe composuiffe Librum *de Paradiso*. Discrimen autem temporis in hifce minime negligendum. Alia enim fenfit tiro in Eruditione Ecclefiaftica; alia, hoc eft meliora, *veteranus Epifcopus*. Quod fi oftendam, Ambrofium alibi ab iis difsentire, quae in Libro *de Bono Mortis* difseruit, veri videatur fimile, rejciendam hanc fententiarum difcrepantiam in diverfitate temporum, quibus ille fcripfit. Atque is reipfa nobis occurreret, poftremis vitae fuae annis aliter de ftatu Animarum judicaffe: quod fatis futurum eft nobis. Quis autem neget, quin Ambrofio veterano, quam tironi, major habenda fit fides & obfequium? Secundo, ut ut velis, retardata ab illo fuiffe Proemia ac Supplicia Animarum ufque ad fupremi Judicii diem, necesse eft animadvertas, quem opinionis hujus vadem ille fibi adfciverit. *Efdrae Librum Quartum* is unice laudat, & ab eo fe didiciffe affirmat *Animarum habitacula* poft Corporis Mortem. Scilicet Apocrypho dumtaxat Libro, quem numquam recepit, immo femper uti adulterinum foetum Ecclefia abjecit, Ambrosius fe debere fatetur *illa Animarum promptuaria*. Proinde dicere liceat, fandum virum incaute deceptum videri a fuppoftitio nomine Efdrae, atque improvide *Scripturae* loco habitum ab eo fuiffe Librum, quem tamen emanctioris naris Scriptores fpuriis femper mercibus adjungendum cenfuerunt. Quale ergo pondus opinioni relictum eft, quam ex adeo inani Libro hauit Ambrosius?

Verum tamenfi tenebrofa valde fint, & peregrinum quid, atque a Catholica fententia alienum fonent heic magni Ambrofii verba,

verba, fortasse tamen, ubi attentius expendantur, quod primo aspectu adversari nobis videtur, tandem nobiscum facere deprehendatur. Postquam *Libris Esdrae* usus sanctus Episcopus, *habitu- cula Animarum* post mortem commemoravit Cap. X. num. 45: ejusdem Libri de Bono Mortis, pergit dicere: *Haec sunt habitationes, de quibus dicit Dominus* (Johann. XIV. 2.) *multas mansiones esse apud Patrem suum: quas suis pergens ad Patrem suum Discipulis praepareret. Sed Esdrae usus sum scriptis, ut cognoscant Gentiles, ea, quae in Philosophiae libris mirantur, translata de nostris.* En ut Ambrosius probat interpretationem a me supra Cap. III. adhibitam, ubi *Mansiones* a Christo Domino suis Apostolis paratas dixi, non in fine Mundi eis dandas, sed illico post eorum obitu- m datas. Atqui *Mansiones* istas esse in domo Patris mei, Dei Filius, hoc est ipsa Veritas, jamdiu prodidit, atque adeo in *Caelis*, ubi pro diversitate meritum diversa erit Gloria Justorum, uti Patres atque Interpretes cuncti fatentur. Habemus ergo jam Ambrosium tradentem, Proborum Animas, mox ut corporeo erga- titulo solvuntur, recipi in mansiones apud Patrem, hoc est in *Domum Dei Patris*, sive in Caelos. Hoc posito, secundum rectiores calculos Interpretum, consequi deberet, ab Ambrosio quoque ad- mittendas fuisse ad aeternam Beatitudinem illorum Animas. Quis enim cogitet, Animam translata in *Domum Dei Patris*, atque ibi manentem cum Christo, volente Johan. XVII. 24. *ut ubi sum ego, & illi sint mecum*, summa tunc posse Beatitudine carere? Verum Sancto Ambrosio alia mens fuit; eamque, ni fallor, inter ejus tenebras detexisse mihi videor. Scilicet non ille cunctis Justo- rum Animabus ineffabile illud gaudium continuo pollicetur; *Se- ptem* quippe earum *Ordines*, Septemque Mansiones, *Esdras* inter- pretans, excogitavit. In primo Ordine eas collocavit, quibus tan- tum est *Laetitia*, quod vicerint *Carnem*. In secundo illas, quae laetantur, quod *securitate* potiantur. In tertio eas posuit, quibus est gaudium, quod *factorum suorum incertum supremo Judicio non vereantur eventum*. In Quarto constituit illas, quibus est *Laetitia*, quia incipiunt intelligere *Requiem suam*, & *futuram sui Gloriam praevidere*, eaque se consolatione mulcentes, in *habitaculis suis cum magna tranquillitate requiescunt, stipatae praesidiis Angelorum*. Haecenus Ambrosius earum Animarum Ordines recensuit, quae Beatitudinem tantummodo inchoatam assequutae sunt. Nihil ergo verba haec, nobis a Burneto objecta, Catholicorum sententiae of- ficiunt; neque enim omnibus indiscriminatim Justorum Animabus

nos statim a Morte obvenire Beatorum Gloriam credimus. Sed accipiat Lector, quae in Ambrosii narratione subsequuntur. Scilicet Quintum Animarum Ordinem, in superiori Mansione situm, hisce ille verbis describit: *Quintus autem Ordo Exultationis Ubertimae habet suavitatem, quod ex hoc corruptibilis Corporis carcere IN LUCEM, LIBERTATEMQUE PERVENERINT, & repromissam sibi POSSIDEANT HEREDITATEM.* Addit postea: *Erit igitur ORDO diversus CLARITATIS ET GLORIAE, sicut erit Ordo Meritorum.* Processus quoque Ordinum processum exprimit Claritatis. Nihil autem aliud est Possidere Hereditatem, Pervenire in Lucem & Libertatem, & frui Claritate & Gloria, nisi Caelesti aeterna Beatitudine donari. Progreditur sanctus Antistes, & Sextum Animarum Ordinem ita delineat: *Sexto Ordine demonstrabitur illi, quod vultus earum, sicut Sol, incipiat resurgere, & Stellarum luminibus comparari, qui tamen fulgor earum corruptelam jam sentire non possit.* En uberiorem Beatitatem & Gloriam. Septimus denique Ordo hisce verbis exprimitur: *Septimus vero Ordo is erit, ut exsultent cum felicitate, & sine ulla cunctatione confidant, & sine trepidatione laetentur, festinantes Vultum Ejus Videre, cui sedulae servitutis obsequia detulerunt: de quo innoxiae conscientiae recordatione praesumant gloriosam mercedem laboris exigui, quam incipientes recipere, Cognoverunt indignas esse hujus temporis passiones, quibus REMUNERATIONIS AETERNAE GLORIA TANTA REFERTUR.* Tum haec adtexit: *Hic Ordo, inquit (Esdras), Animarum, quae sunt Iustorum. Quos etiam Immortales non dubitavit dicere in Quinto Ordine; eo quod spatium, inquit, incipiunt recipere, FRUENTES & IMMORTALES.* Felicius, quam ego, expiscari poterunt alii in editis Pseudo-Esdras Libris, quae haec & infra a Sancto Ambrosio veluti inde excerpta adferuntur.

Illud interea certum est, haec ab illo dici de Animabus, *separatae fuerint de Corporibus*, atque ante Resurrectionem Corporum. Et quamvis obscura sint, aenigmati quoque similia videantur illius verba, neque haec in sacris Literis fundata, sed potius ex spurii Esdrae, aut ex Origenis phantasia prodierint: vix tamen ullus ambigendi locus restat, quin ille in tribus postremis Ordinibus Beatitudinem veram Animabus jam conlatam significet. Diserte quippe affirmat, saltem Animas in Ordine Septimo positas, *incipere recipere Gloriosam mercedem laboris exigui, idest, Vultum Ejus Videre; cui sedulae servitutis obsequia detulerunt.* Proinde sermonem continuans ait: *Ergo qui JUSTI HANC REMUNERATIONEM HABENT, UT VIDEANT FACIEM DEI, & Lumen illud, quod*

illumi-

*illuminat omnem hominem, ab hinc induamus hujusmodi studium, ut appropinquet Anima nostra Deo, appropinquet oratio &c. Vide-
mus nunc per speculum in aenigmate: tunc autem Facie ad Fa-
ciem. Et ne quis cum Burneto excogitet, tantummodo tunc Ju-
stos ad tantae felicitatis apicem devehendos, quum Corpora in
Resurrectione recipient, diserte monet. sanctus Doctor, vel sine
Corpore Beatitatem ejusmodi Animabus esse deferendam; subdit
enim: **TUNC REVELATA FACIE GLORIAM DOMINI SPE-
CULARI LICEBIT**, quam nunc Animae Corporis hujus concretis
visceribus involatae, & quibusdam Carnis hujus maculis & collu-
vionibus obumbratae, sincere videre non possunt. Propterea audito-
ribus suis animos addit, ut intrepide diem Mortis, de qua agit, ex-
cipiant, quia ipsam remuneratio, non retardata in Saecula, uti
Burnetus dicitur, sed cito subsequetur. *Non timeamus igitur, in-
quit, recipi (idest abscedere) ab hominibus; non vereamur illum de-
bitum omnibus Finem, In Quo Esdras Remunerationem suae devotio-
nis Invenit, dicente ei Domino: Tu enim recipieris ab hominibus,
& CONVERSABERIS RESIDUUM CUM FILIO MEO, ET
CUM SIMILIBUS TUIS. Quod si illi gloriosum & jucundum erat
cum similibus conversari: quanto nobis gloriosius erit & jucundius AD
MELIORES PERGERE, & Conversari cum iis, quorum facta mi-
ramur? Esdras revelavit secundum conlatam in se revelationem JU-
STOS CUM CHRISTO FUTUROS, FUTUROS CUM SANCTIS.*
Animadvertite heic, quam corrupta sint in editis Pseudo-Esdras ver-
ba ab Ambrosio commemorata. Scilicet Lib. IV. Cap. XIV. 9. le-
gitur in vulgatis: *Tu enim recipieris ab omnibus* (idest, diem tuum
obibis.) *Converteris residuus cum consilio meo & cum similibus tuis,
usquequo finiantur tempora.* Quae postrema verba mirifice confir-
mant, secundum Esdras, sive Ambrosii mentem, Justos cum Chri-
sto in Beatitate futuros, antequam postremus humanarum rerum
& Saeculi finis adveniat. Parum tamen est, quod haecenus dixi. Me-
ridiem nobis facit Mediolanensium decus Ambrosius Cap. XII. sub-
sequenti. Lectorem non pigeat plura ejus accipere verba: *Hic igitur
freti, intrepide PERGAMUS AD REDEMTOREM NO-
STRUM JESUM: intrepide AD PATRIARCHARUM CONCIL-
LIUM: intrepide AD patrem nostrum ABRAHAM, quum dies (utique
Mortis, de cujus Bono loquitur) advenit, proficiscamur.* Sanctum Cy-
priam in Libro de Mortalitate, ad calcem hujus Opusculi mei legen-
do, Ambrosius heic prae oculis habuit, atque aliis verbis est imitatus.
Propterea subdit: *Intrepide PERGAMUS AD illum SANCTORUM**

Q

COE.

COETUM, JUSTORUMQUE CONVENTUM. IBIMUS enim ad *Patres nostros: ibimus ad illos nostrae Fidei Praeceptores: ibimus & UBI SINUM suum ABRAHAM SANCTUS EXPANDIT*, ut suscipiat *Pauperes, sicut suscepit & Lazarum. IN QUO SINU REQUIESCUNT*, qui in hoc Saeculo gravia atque aspera susceperunt. Consistamus heic aliquantulum. Vides, per verbum *Requiescere* ab Ambrosio quoque Beatam in Caelis Vitam designari. Vides, quid Mediolanensi Episcopo fuerit *Sinus Abrahae*, Beatorum videlicet Locus, *Patriarcharum Concilium, Sanctorum Coetus, Justorumque Conventus*, ubi Abraham cum Patribus beatifico Vultu Dei Patris, ac divini ejus Filii fruitur, suoque Sinu eos maxime complectitur, qui prae ceteris crucem in hoc Mundo pro Dei amore portarunt. Locum hunc nos nunc *Beatorum Paradisum* appellamus, seu *Regnum Cae'orum*. Quamobrem frustra agit Burnetus, quum *Sinum Abrahae* apud quosdam ex antiquis offendens, inde Beatitudinem Animarum exclusam putat, quum & ipsi veteres eo nomine significarint Locum ineffabilis Beatitudinis, ante Resurrectionem Justis conlatae. Idem nuper nos docuit Sanctus Hilarius. Paria quoque didicimus ex antiquissimis Liturgiis, ac praecipue ex Liturgia Sancto Jacobo tributa. Sed nemo luculentius quam Ambrosius expressit, quid sit *Abrahae Sinus*, & quanta ibi Justorum Spiritus Beatitate donentur.

Accipe, quae beatissimus ille Antistes dicere pergat in eodem Cap. XII. *Sed nunc, Pater*, (ita Redemptorem nostrum alloquitur) *etiam atque etiam extende ad suscipiendum nunc Pauperem manus tuas. Aperi gremium tuum. Expande Sinus tuos, & Plures suscipias, quia plurimi in Dominum crediderunt &c. IBIMUS AD EOS, QUI RECUMBUNT* (inquit *Recumbunt*, non vero *Recumbent*) *IN REGNO DEI CUM ABRAHAM, ISAAC, ET JACOB, quoniam rogati ad Coenam non se excusaverant. Ibimus eo, UBI PARADISUS EST JOCONDITATIS: ubi Adam, qui incidit in latrones, nescit jam vulnera sua flere: ubi & Latio ipse REGNI CAELESTIS CONSORTIO* gratulatur: *UBI non frigus, non grandis &c. sed sola DEI FULGEBIT CLARITAS. Dominus enim erit Lux omnium; & illud Lumen verum, quod illuminat omnem hominem, Fulgebit omnibus. Ibimus eo, UBI servulis suis Dominus JESUS MANSIONES PARAVIT, UT UBI ILLE SIT, ET NOS SIMUS.* En quo sensu veteres accipiebant Apostoli verba cupientis dissolvi, & esse cum Christo: nempe hinc abire, ut extemplo in beatissimum Domini nostri Confortium & Regnum transferretur. Tum Ambrosius ostendit, non

Apo-

Apostolis tantum, sed & reliquis Justis jam paratas esse beatas illas in Caelo Mansiones. Quod si adhuc sciscitarius, quid significet *Terra Viventium*, quid *Requies*: respondet sanctus Doctor, nihil aliud hisce vocibus significari, nisi Sinum ipsum Abrahae, in quo Beatorum vita, in quo illud Bonum, quod videre desiderabat David, ideoque dicebat: *Credo videre bona Domini in Terra Viventium*: & Convertere Anima mea in Requiem tuam. In quo Bono est Requies: pax, Lux immortalis, Gratia perpetua, Hereditas Animarum pia, & secunda Tranquillitas: ubi non umbra sed Gloria. Reliqua praetermitto.

Itraque habemus Ambrosium, non Burneti fomniis, sed Catholicae veritati aperte faventem. Et ne ipsum velimus sibi contradicentem, quum dicit: *Coronae Dies expectatur ab Omnibus, ut intra eum Diem & Victi erubescant, & Victores palmam adipiscantur victoriae* (quae nobis nuper opponebantur): concilianda haec sunt cum aliis dilucidis ejus verbis, ut significant manifestationem aut perfectionem Praemii aut Poenae, quae Omnes manet in supremo Christi Judicio; aut haec de Corpore dumtaxat dici, cui tunc Poena vel Gloria retribuetur. Vide eundem sanctum Praefulem Lib. II. num. 88. de Fide Resurrectionis. Et praesertim id faciendum, quia sanctus vir, uti haec diserte fatetur non prorogata usque ad consummationem Saeculi Justorum Beatitudinem, ita alibi agnoscit inrogata Improbis Supplicia statim post Mortem in Inferis. En ejus verba in Psalm. XLVIII. num. 24. ubi de hominum morte agit, quos bona Opera sequuntur: *In Paradisum ascenditur, in Infernum descenditur. Ideoque Lazarus pauper per Angelos in Abrahae Sinum est Elevatus. Dives luxuriosus elevans in Inferno oculos suos, rogat Abraham, ut mittat Pauperem, & digito suo contingat linguam ejus, quo requiem aliquam in Ardore Maximo constitutus, posset adipisci. Vide illum Pauperem Bonis Omnibus abundantem, quem sancti Patriarchae Requies Beata circumdabat. Vide hunc vacuum &c. qui nunc iners Morte Cruciat. Neque in Libro dumtaxat de Bono Mortis, septem in Caelo Mansiones & Ordines Ambrosius designavit. Eisdem quoque delineavit Enarration. in Psalm. XXXVIII. num. 17. nam commemoratis Johann. XIV. 2. verbis: *In domo Patris mei Mansiones multae sunt*, haec adtexit: *Dat ergo unicuique locum Dominus Jesus, hoc est aptam pro uniuscujusque meritis Mansionem. Unusquisque enim in suo Ordine. Praecessit ergo, ut pararet in se credentibus Locum. Et ille quidem ascendit super omnes Caelos ad Dei sedem: Homines autem A PRIMO CAELO ad Secundum, deinceps a secundo ad tertium, & ab illo per di-**

inctiones fere **AD SEPTIMUM CAELUM**, atque **IN ipsam apsidem & SUMMITATEM CAELORUM**, qui merentur, **ASCENDUNT**. Atque heic non perfunctorie expendas velim locum Sancti Hilarii Pictaviensis, quem in calce Capituli praecedentis produxi: nisi enim mea me fallit opinio, istum Ambrosius expressisse videtur, utpote qui aemulatus est in tot aliis Sancti illius Episcopi stilum atque ingenium. Scilicet inquit Hilarius Tractat. in Psalm. LXIV. num. 5. **Omnis perfectio bonorum INHABITATIONIS CAELISTIS EST REQUIES**. Multas Mansiones Dominus in Caelis esse testatur: sed Patrem orat, ut Apostoli, ubi & ipse sit, maneant. Ex plurimis ergo Mansionibus suis eam, quae sibi est Propria, Communitat. Scit Propheta, quanta Beatitudo sit in Tabernaculis Dei esse, alio loco dicens: Concupiscit & deficit Anima mea in Atria Domini. Sed non ob id Bonorum Caelestium spes adimitur, si **NON OMNES AD COHABITATIONEM DEI ELIGENTUR**. **PLURES enim MANSIONES diversae dignitati habitantium PRAEPARANTUR**: Sed licet diversa sit dignitas (disert enim Stella Stellae in Gloria) tamen **QUOTQUOT HABITATIONIBUS, VARIIS LICET, DIGNI HABEBUNTUR**, fidei fructum, & **HONOREM CAELESTIS GLORIAE SORTIENTUR**. Supra vidimus cum sententia Catholicae Ecclesiae concordem Sanctum Hilarium. Ipsum quoque dogmatis ejusdem habemus heic testem disertum. Auctor nempe est, multas in Caelis esse Mansiones: In supremam, ubi cohabitant Animae Justorum beatissimae cum Christo, citius unae, serius alterae conscendunt; nulla tamen ex eis bonore Caelestis Gloriam fraudabitur. Paria tradit Ambrosius.

Sed & alia loca supersunt, in quibus sanctus Doctor stabili doctrina mentem heic suam testatam fecit. Accipe, quae is protulit Lib. II. Cap. 9. num. 31. de Cain & Abel. **Deus**, inquit, **Iustus suos audit, etiam mortuos, quoniam Deo vivunt. Et merito pro viventibus habentur; quia etiamsi Corporis gustaverint Mortem, Vitam tamen incorpoream capiunt, & illuminantur suorum Splendore meritorum, LUCE quoque FRUUNTUR AETERNA**. Ad haec subsequenti Cap. X. num. 36. ait: **Inseritur hoc loco dogma de incorruptione Animae, quod ipsa Vera & Beata Vita sit, quam unusquisque bene conficius vivit multo Purius ac Beatius, quam hujus Carnis ANIMA NOSTRA deposueris involucrium, & quodam carcere isto fuerit absoluta Corporeo, IN SUPERIOREM REVOLAT LOCUM** &c. En quam longe Ambrosius abscedat a Burneti phantasmatis, a quo Animae hinc migrantes dormire, ac veluti semisopitae parum

parum aut nihil operari jubentur. Ad Librum de Bono Mortis rede-
 gredior. Ibi Cap. III. num. 8. post laudata Apostoli verba, cupien-
 tis Dissolvi, & esse cum Christo, utpote multo melius, haec addit:
*Solutio autem ista quid aliud agit, nisi ut Corpus resolvatur &
 quiescat? Anima vero convertatur in Requiem suam, & sit libera?*
Quae si Pia est, Cum Christo Futura sit. Ubi vero futura sit illius
 Requies, rursus tradit hisce verbis: *Itaque docet, & istam Mortem*
in hac Vita positam expetendam, ut mors Christi in corpore nostro elu-
ceat; & illam Beatam, qua corrumpitur exterior, ut renovetur in-
terior homo noster, & terrestri domus nostra dissolvatur, UT HA-
BITACULUM NOBIS CAELESTE RESERETUR. Rursus Cap.
 IX. num. 38. ejusdem Libri, optandam nobis mortem ait, quod
 Corpus, Vitiis scilicet seminarium, in terram resolvatur; *id*
autem, quod familiare Virtutibus, amicis disciplinis, studiosum
gloriae, sequax boni, Deo subditum est, ad illud sublime Evo-
let, & CUM illo PURO & PERPETUO BONO atque IMMOR-
TALI MANEAT, IPSI ADHAEREAT, & CUM IPSO SIT.
 Sunt & alia id gentis in eo Cap. quae missa facio. Haec enim
 apertissima sunt documenta sententiae Catholicae: & quidem
 ex eo ipso Libro desumpta, unde Burnetus sua adversus nos de-
 cerpsit. Verum si Ambrosius manifeste affirmat, Justorum Ani-
 mas; deposito Corpore, *evolare in Sublime, cum illo Puro &*
Perpetuo atque Immortali Bono Manere, ipsi Adhaerere, & cum
ipso Esse, quid ultra quaerimus? De Apostolis vero & Mar-
 tyribus quid a Deo factum jam fuerit, si Ambrosium percon-
 temur, is secundum constantissimam primitivae ipsius Ecclesiae
 doctrinam, de qua supra actum fuit, haec respondebit Lib. de
 Virginitat. Cap. XVIII. num. 119. *Captus a Petro STEPHA-*
NUS minister Altaris, non reti sed hamo levatur, UT RIVO
sui sanguinis ELEVARETUR AD CAELUM. Tum Cap.
 XX. num. 131. *PETRUS homines elevavit, mare sprevit,*
CAELUM ACQUISIVIT. Item de Paulo haec habet
 Lib. II. num. 94. de Fide Resurrectionis: *Utique mortuus est*
P. AULUS, & passione venerabili VITAM corporis CUM IM-
MORTALI GLORIA COMMUTAVIT. Ita Lib. VII.
 num. 5. Exposition. Evangel. Lucae: Nec *JACOBUS, & JO-*
HANNES mortui, filii tonitru, quibus IN USUM GLORIAE
CAELESTIS ADSUMTIS, non praevalent terrena, sed subja-
cent. De Sancto Sebastiano in Psalm. CXVIII. Sermon. XX. num. 44.
 inquit: Romam profectus est. Ibi passus est, hoc est, ibi Coronatus
 Itaque

Itaque illic, quo hospes advenit, DOMICILIUM IMMORTALITATIS PERPETUAE COLLOCAVIT. De Sanctis Gervasio & Protasio in Epistol. XXII. ait: *QUORUM ANIMA IN CAELO, Corpus in terra.* In Exposition. Evangel. Luc. Lib. X. Cap. 21. num. 12. *Mortuis Regibus, IN perpetuum MARTIRES REGNUM CAELESTIS gratiae honore SUCCEDUNT.* At fortassis inquires: Aequum fuit, tam grandi privilegio & gaudio donari Apostolorum & Martyrum Animas. Gloriosius enim certaminibus magnifica debebatur merces. Reliquis Justis, non tanta operatis, quid sperandum est? Profecto dispar praemium: praemium tamen & ipsis fuit, atque erit in Caelis. Praesto mihi est ipsemet Ambrosius, qui Exposition. in Psalm. CXVIII. Serm. 8. num. 11. Latroni dictum ait: *Hodie Mecum Eris In Paradiso. Futurum promittit: sed id, quod futurum est, unius diei spatio non patitur protelari. Denique potuit dicere: Mecum eris in Paradiso; sed addidit, Hodie, ne dilatione gratia minueretur. Sed non illi soli dicit Dominus Jesus: Hodie mecum eris in Paradiso: SED ET TIBI DICIT; MECUM ERIS IN PARADISO, SI CONFITEARIS DOMINUM JESUM, SI EJUS PATROCINIUM TIBI POSCAS, SI ET IPSE DICAS: Memento mei, Domine, dum veneris in Regnum tuum. Sed tibi non dicit: Hodie Mecum Eris. Dicit Martyri, Hodie mecum eris in Paradiso. Tibi non dicit, quia adhuc in hoc febrienti Corpore constitutus. Sed quum potueris dicere: Dirupisti vincula mea, hoc est, solvisti cursum hujus Vitae, liberaisti me ex hoc Mortis Corpore: tunc tibi dicit; Hodie Mecum Eris In Paradiso.* Qui Latini sermonis gnarus est, atque ista legit, num aliquid supra desiderat, ut sanctum Ambrosium agnoscat firmissime credentem, & discretissime fatentem, Justis quibusvis, statim ac Corporis contubernio Anima solvatur, Caelestis Glorae possessionem esse sperandam? Infra idem Sanctus Sermon. XX. num. 47. testatur, ceteris quoque Justis nomen ac praemia Martyrum non esse deneganda. Itaque abeat Burnetus, qui ex illustri hoc Ecclesiae Catholicae Doctore ad sua somnia persuadenda suffragium petere se posse putavit. Sed quoniam *Paradisi* facta est mentio, progredi nolo, nisi antea quaesiero, quid hoc nomine veteres, & praesertim Ambrosius, significarint: quod subsequenti Capite praestabo.

CAP. XIV.

*Paradisi vox quid apud veteres significarit. Communiori Patrum sententia Beatorum Regnum in Caelis designat. Sancto Ambrosio idem visum fuit. Varia, eaque diversa illius testimonia pro Felici Ju-
storum sorte in Regno Dei.*

AMbigua profecto, variisque significationibus obnoxia apud veteres Patres fuit vox *Paradisus*. Polluce teste, *barbaricum nomen videtur*, atque ex Persica Lingua in Graecam translatum. Testatur autem Xenophon in Lib. V. Memor. *Paradisos* a Persis appellatos fuisse *Hortos*, deliciis omnibus instructos: quod & Plutarchus in Demetrio, & Philostratus in Vita Apollonii confirmarunt. Ecclesiastes II. vers. 5. habentur haec verba: *Feci Hortos & Pomaria*. Pro *Pomaria* legunt alii *Παράδεισος* *Paradisos*. Atque hanc significationem confirmat Nysenus Homil. IX. in Canticum. Proinde *Paradisi* nomen inditum fuit Locis ad delicias paratis, atque in primis sub ea voce apud Judaeos & Christianos celeberrimus evasit amoenissimus ille Locus, in quo primos nostros parentes in creatione Mundi Deus collocavit, & unde propter inobedientiam ii exciderunt. Hunc autem terrestrem & corporalem Locum fuisse, communior veterum & recentiorum sententia fuit. At in Novo Testamento quid vocabulo isto significetur, nostra nunc interest investigare ac nosse. Lucae Cap. XXIII. 42. felix Latro dicebat ad Jesum: *Domine, memento mei, quum veneris in Regnum tuum. Et dixit illi Jesus. Amen dico tibi: Hodie mecum eris in Paradiso*. Vexavit non parum sacros Interpretes vox ista. Sunt qui tradidere, concessisse poenitentis Latronis Animam in Paradisum terrestrem: alii in Sinum Abrahæ: alii in Caeleste domicilium, ubi Angeli summa Beatitudine fruuntur, qua post Christi Redemptoris mortem Sancti quoque Patres in Limbo propter ejus praesentiam frui coeperunt, & ad quam plenius cum Christo ascendente ad Caelos admissi fuere. Neque defunt, quibus creditur eo ipso die Anima Latronis in Caelum translata, & perspicua Visione Dei donata, qua numquam caruit Anima beatissima Christi. Ad terrestrem Paradisum quod attinet, explosa jamdiu fuit uti inanis illorum opinio, qui illuc una cum Latronis Anima migrasse Redemptoris Animam autumarunt. Egregium in hanc rem

rem Iustini Martyris locum nobis servavit Anastasius Synaita Lib. VII. in Hexameron, excerptum e Libro jam deperdito beatissimi illius Philosophi Christiani, qui *Paradisum* in novo Testamento indicatum, Caelestem Felicitatis locum, atque a Mosaico terrestri plane diversum fuisse sensit. En illius verba, prout ex Graeco translata fuere a Johanne Ernesto Grabio, Tom. II. Spicilegii Sanctior. Patrum. Unde etiam (inquit Anastasius) *divinus in omnibus Ambrosius, & Iustinus Martyr, a Deo inspiratus, in suis ad Hexameron Commentariis ea persequentes, quae dicta sunt de Paradiso, postquam dixerunt de sensibilibus arboribus, & aquis, & fructibus, & Paradiso a terra genito; in medium adduxerunt proposita divini Ezechielis verba de Paradiso Caelesti, eaque persequuti, magnam & subtilem de iis examinationem & contemplationem subjunxerunt, dicentes: Quod sit turpissimum, & Deo invisum dicere, aut omnino cogitare, beatam & adorandam Dei Verbi Divinitatem cum iusto Latrone ingredi in fluxum & materialem Paradisum. Et quae nam est digna merces illius venerandae, & quae Deum decet, confessionis, malorum punitorum, pyrorum, uvarum, & ficum esum, tamquam mercedem, reddere Latroni? Quis autem, rursus inquit, mentem habens divina sapientem, dixerit: in cucumeraria, ubi ligone & securi vexantur homines, in Caelos cursum dirigentem, ad volatum traductum esse Paulum? Et quae neque in secundo, neque in tertio Caelo invenit ineffabilia, ea in terreno agro aquis irrigato, mystice esse enuntiata a puro & divino ore Christi? Haec Anastasius e Sancto Iustino. Quod est ad illos, qui *Paradisum* statuerunt idem esse atque *Sinum Abrahae*, diversis ii principiis usi, in duas diversas abiire sententias. Nam nonnullis visum fuit, Iustorum Animas in loco illo Felicitatis adservari, usquequo adveniat Resurrectio Corporum: qua peracta ad consummatam perfectamque Beatitudinem totius hominis tunc aecedent. Intermedium hoc tempus *Regnum Christi* appellarunt, subsequiturum vero post universale Iudicium *Regnum Dei*: parum animadvertentes, nuncupari *Aeternum Regnum Domini nostri & Salvatoris Iesu Christi*, Secunda Petri I. vers. 11. In ea opinione, ut supra vidimus Cap. VIII. fuit Auctor Quaestionum ad Orthodoxos, quae olim perperam Sancto Iustino tribuebantur. Eadem quoque Tertulliano placuit. Verum & qui ita sensere, minime expertem Beatitudinis locum illum, ex quo Christus pro nobis vitam dedit, arbitrati sunt. Ipsum illum Auctorem Quaestionum ostendimus non dissentem, quin Iustorum Animae ab Angelis abducantur in *Paradisum, ubi consuetudine**

tudine & aspectu fruuntur Angelorum & Archangelorum, immo ipsius quoque Salvatoris Christi, pro eo atque dictum fuit: Peregrinari a Corpore, & praesentes esse ad Dominum: quod satis est ad evertenda Burneti commenta. Beatus quippe sit necesse est, qui cum Christo glorificato versatur, atque illius beatifico aspectu fruatur. Alii vero duobus vocabulis *Paradisi*, & *Sinus Abrahae*, ex quo Christus se Patri holocaustum obtulit in Cruce pro omnibus, designari censuerunt Vitam Beatam in Caelis, atque in Conspectu Dei, augendam tantummodo & perficiendam in fine Mundi, quum Corpora resumta ad Beatitudinem & ipsa transibunt. Id supra palam factum fuit Cap. XII. Denique non defuere, qui *Sinum Abrahae* alium a *Paradiso* opinati fuerunt. Tertullianus Millenariae familiae Scriptor Lib. IV. Cap. 34. advers. Marcionem, commemorat *Sinum Abrahae*, etsi non Caelestem, sublimiorem tamen Inferis Regionem, interim Refrigerium praebituram Animabus Justorum, donec consummatio rerum, Resurrectionem omnium Plenitudine Mercedis expungat. Ita ille, quod nempe & in Sinu Abrahae crediderit jam inchoatam Animarum Mercedem sive Beatitudinem. Tum ipse in praeclaudato Lib. de Anima Cap. LV. agnoscit, *Paradisum* alium esse locum a Sinu Abrahae, atque in Caelo positum, in quem tamen solas Martyrum Animas convolare sibi fingit. An vero *Paradisum* ipsum, quamquam ineffabilis Beatitudinis locum, idem fuerit opinatus atque Regnum Dei, sive Caelorum Regnum, aliis inquirendum relinquo. Ipsum vide in Lib. de Resurrectione. Cap. 43. ubi haec ejus verba: *Nemo peregrinatus a Corpore* (id est nulla Anima corporeis exuta vinculis) *Statim immoratur Penes Dominum, nisi ex Martyrii praerogativa, Paradiso scilicet, non Inferis deversurus.* Fuere etiam Patres, qui Adami *Paradisum* in Caelo situm censuere.

Quod in praesentia nosse proderit, communior antiquorum semper sententia fuit, per *Paradisi* nomen, utpote adinventum ad significandum quemlibet amoenitatis, Felicitatisque locum, in novi Testamenti Libris designari Animarum statum in Beatitudine Caelesti; atque in eo sensu ab omnibus fere Christi Fidelibus nunc etiam usurpatur. Si Tertulliani ipsius verba non perfunctorie expendis, perspicies, jam tum complures e Christianorum schola censuisse, non solum Patriarchas & Prophetas adductos in *Paradisum* a Christo ascendente in Caelum, sed & reliquis Justorum Animabus patere post mortem beatam illam Regiam, ipsorumque Patriarcharum consortium. Immo, inquis, (ita Christianos alios sibi reponentes Tertullianus inducit) *dormitio nostra in Pa-*

R

radiso,

radiso, quo jam tunc & Patriarchae, & Prophetae, appendices Dominicae resurrectionis, ab Inferis migraverint. Porro Sanctus Cyprianus, uti infra ex ejus Libro de Mortalitate, heic recudendo, ediscas, apertissime Paradisum & Regnum Caelorum unum idemque putat, & beatissimam hanc Sedem singulis Justis sperandam statim a morte affirmat. *Amplectamur diem*, inquit, *qui assignat singulos domicilio suo: qui nos istinc ereptos, & laqueis saecularibus exsolutor PARADISO RESTITUIT, ET REGNO CAELESTI.* Quid autem hoc nomine indicatum censuerit Chrysostomus, is nobis edisserat Homil. 79. ad Populum Antiochenum. *Latro*, inquit, *in cruce distentus, paucis verbis CAELESTE REGNUM est assequutus.* Rursus ille in Concione de Lazaro: *Abraham necdum erat IN PARADISO, quia necdum Christus intraverat cum Latrone. Crux Christi clavis est. Crux Christi aperuit PARADISUM.* Nonne nobis dixit, quod REGNUM CAELORUM vim patitur, & violenti rapiunt illud? Et Crux, & STATIM PARADISUS: sed magnitudo poenarum facit magnitudinem Praemiorum. Ita in Homil. de Cruce & Latrone: *Latro AD PARADISUM inducitur. Christo non injuriae fuit, sacram ingrediti Patriam, facere ingressus sui Latronem participem. Quum publicanos & fornicarios AD CAELORUM REGNUM introduxit, non Caelorum Regnum infamavit, sed etiam magis honoribus ampliavit, ostendens talem Dominum Regni esse Caelorum, qui & indignas in tantum meliorari fecit personas, ut etiam illius dignitatis GLORIAM mereretur.* Anastasii quoque Synaitae verba sunt in Oratione de Sacr. Synax. Tom. I. Canisii: *Latro ille cum Christo crucifixus, homicida erat: at Judas, Apostolus & Discipulus erat. Intra exiguum temporis spatium mutatio accidit. Latro IN REGNUM ingressus est. Discipulus in interitum ruit. Sanctus Hilarius Tractat. in Psalm. I. num. 9. agens de Ligno, quod plantatum est secus decursus aquarum, illudque appellans Lignum Vitae, hoc est Sapientiam, ait plantatum juxta decursus aquarum, in possessione scilicet REGNI DEI, idest IN PARADISO. Illic enim plantatum hoc lignum est, quo Latronem illum, se Dominum confitentem, Dominus, qui Sapientia est, introduxit, dicens: Amen dico tibi: Hodie mecum eris IN PARADISO. Ubi vides, Paradisum accipi pro Regno Dei, atque illuc jam invecum fortunatum Latronem. Illic etiam invehetur quilibet alius Justus, Hilario teste, quum translati Latronis in Paradisum modo, secundum decursus aquarum & ipse plantetur. Ipsum quoque vide Tractat. in Psalm. CXVIII. Lit.*

XV.

XV. num. 8. & Lib. X. num. 34. de Trinitate, ubi Christus ab eo dicitur *IN CAELO Latroni Martyri suo PARADISUM promittens, & CONSUMMATAE BEATITUDINIS delicias pollicens*. Atque hinc dicimus, Paradisum accipi pro Deliciarum Loco; Paradisum vero Christianorum esse in Caelo, ibique *Consummata Beatitudine* Justorum Animas frui. In eandem sententiam conspirantia non pauca habemus loca Sanctorum Cyrilli-Hierosolymitani, Ephraemi, Macarii, Augustini, & aliorum, qui concorditer sententia *Paradisum* statuunt idem esse cum *Regno Caelorum*. Et sane non alium quam hunc sensum reddere posse videntur Domini verba ad poenitentem Latronem: *Hodie mecum eris in Paradiso*. Ingentem Felicitatem ille spondet, & praecipue dum ait *Mecum*. Jesus glorificatus Paradisum summamque Beatitudinem, ubicumque est, facit. Id experti fuerunt ejus Apostoli, quum *transfiguratus est ante eos in monte excelso*. Nonne ipse est *splendor Gloriat*, quem qui videt, videt & Patrem? ut missa faciam tot alia Scripturarum de ipso elogia. Ad haec Paulus Secunda ad Corinth. XII. 2. ait, se raptum *usque ad tertium Caelum*, atque *in Paradisum*, ubi *audivit arcana verba, quae non licet homini loqui*. Quo plus animum huc advertas, eo plus intelligas, agi illic de ineffabilis Beatitudinis loco, quem Paulo Dominus revelaverat, & de quo ipse gloriari poterat. Num in terreno aliquo loco, num in inferiore, quam *Tertium Caelum*, excogitare possumus audita ab eo arcana illa verba? Denique dicente Angelo in Apocalypf. II. 7. *Vincenti dabo edere de ligno vitae, quod est in Paradiso Dei mei*, vix aliter interpretari licet haec verba, nisi de Martyribus & Sanctis, usque ad finem vitae in caritate Dei perseverantibus, quibus mox spondetur aeternum praemium *in Paradiso*, non terrestris seu Mosaico, sed Dei. Sunt qui Talmudistas in hanc rem adferunt, & Philonem Hebraeum commemorant, quasi *Paradisi* notio Christi tempore *Hortum Deliciarum* tantummodo significarit; quum tamen Philo ne Adami quidem Paradisum pro Horto reali accipiat, sed Allegorice Felicitatem Adami innocenti conlatam per illud nomen indicari putet. Quod nobis veri videatur similis, Christus Latroni Chaldaice loquens, *Locum Delictis omnibus affluentem* promississe credendus est, qualis revera super omnia est Caelestis Regia. Hunc autem Locum vocabulo *Paradisi* Lucas Graece scribens expressit, non terrenum Hortum significaturus, cujus arboribus ac pomis Animae Corpore solutae frui non possunt, sed quidem Caelestem, in quo Justorum Spiritus visione & contemplatione Dei

fruuntur, & ad quem raptus est Paulus. Propterea, ut vidimus; plerique Patrum *Paradisum Caelestem* in Libris novi Testamenti unice agnoscunt, atque in primis Sanctus Hieronymus, vir certe in Hebraica & Graeca eruditione latissime versatus. Is Lib. IX. Cap. 28. in Ezechiel. ad illa verba: *Et posui te in monte sancto Dei*, scribit: *Haud dubium, quin Paradisum significet, ad quem post tertium Caelum Paulus Apostolus raptum esse se dicit. Addit infra: Si Cherub (idest Lucifer) ejectus est de Monte Dei, hoc est de habitatione Paradisi &c.* Apud Ezechielem vero legitur: *In deliciis Paradisi Dei fuisti*: Hieronymus consulto *Paradisum Dei* appellatum scribit, ut a terrestri Paradiso Heden, in quo locatus Adam fuit, hic distinguatur. Haec ipsa idem confirmat Lib. XIII. Cap. 44. in eundem Ezechiel. inquit: *Priusquam Salvator hominum corpus assumeret, clausa erat Lex & Prophetiae. Clausus erat Paradisus. Postquam autem ille pendit in Cruce, & loquutus est ad Latronem: Hodie tecum eris in Paradiso; statim velum Templi scissum est, & aperta sunt omnia &c.* Eundem quoque audi ad verba illa Job Cap. 36. *Requies autem mensae tuae erit plena pinguedine, in haec verba loquentem: Amoenitatem Paradisi & jocunditatem, Requiem nominando significavit. Immensam vero abundantiam Vitae Beatae, quae esset plena ubertatis pinguedine, ac loci illius felicitis referta deliciis, voluit demonstrare, cujus terram sanctam Mansueti secundum repromissionem Domini possidebunt. Quare quum familiaris nobis sit vox Paradisi ad significandum locum immensae Beatitudinis, qua nunc Sancti fruuntur, jam perspexerit Lector, id veterum auctoritate fieri: quod & luculentius confirmatum in sequentibus ibo.*

Redeo nunc ad Sanctum Ambrosium, inquisiturus quid ille de Paradiso senserit. Is utique in Epistola LXXI. olim 19. ad Horontianum distinguere videtur *Paradisum a Regno Caelorum*. Quippe ait: *Latroni contenti dicitur: Amen, amen dico tibi; Hodie tecum eris in Paradiso. Ille dixerat: Memento mei, quum veneris in Regnum tuum. Christus non de Regno respondet, sed ad causam: Hodie tecum eris in Paradiso. Idest, reformandum est ante, quod amissum est; postea conferendum id, quod augendum est, ut per Paradisum ad Regnum perveniat, non per Regnum ad Paradisum. Ad quae haec deinde adtexit: Servatur Discipulis, quod plus conferatur pro laboribus: ideoque Incolatum promisit (Latroni), Regnum distulit. Itaque is, qui sub ictu mortis convertitur, & confitetur Dominum Jesum, mereatur incolatum Paradisi. Qui vero multo ante se exercuit, &*

Christo

Christo militavit, adquisivit Populorum animas, pro Christo se obtulit, habeat paratum stipendiis suis DEI REGNUM, cuius se Remuneratione donatum gaudeat. Negare nequeas, quin heic Ambrosius *Paradisum* capiat pro Mansionem a *Regno Dei* diversa. Et quidem non unam Mansionem Animabus Justorum destinatum in Caelis, uti in praecedenti Cap. vidimus, idem sanctus vir recte opinabatur. Verum ne puta, *Paradisum* hunc exsortem Beatitudinis ab Ambrosio fuisse reputatum, quum ipse fateatur, *id, quod augendum est, postea conferendum esse*, hoc est, augendam postea Latronis Felicitatem, quum ad *Regnum Dei* conscendet. Quod plus est, agnoscimus & heic, everti prorsus a sancto Episcopo male compactam Burneti molem. Sole meridiano quippe clarius est, tradi ab Ambrosio, Discipulos Christi, hoc est Apostolos, ceterosque Justos, qui non, ut Latro, in limine Mortis se ad Deum converterunt, sed sese diu ante in Virtutibus exercuerunt, plus, quam Latro, adipisci, idest recipi in *Regnum Dei*. Idque contingere non in fine Mundi; nam tunc saltem, si non prius, & ipse Latro e Paradiso ad *Regnum* conscendet: sed sine mora ac dilatione post Corporis mortem ad *Regnum* Martyres, & Justi transferuntur, ut plus eis conferatur, quam Latroni, cui dedit *incolatum Paradisi, & Regnum* distulit. Itaque ex isto loco videas, Catholicorum sententiam fortius stabiliri. Attamen evidentior adhuc lux superest apud ipsum Ambrosium, qui Enarration. in Psalm. XXXVII. num. 18. nihil a Regno Caelesti *Paradisum* differre, verbis minime dubiis affirmat. En ejus verba: *Audi illum ex duobus Latronem dicentem Domino: Memento mei, Domine, quum veneris in Regnum tuum. Respondit Dominus: Amen dico tibi; Hodie mecum eris in Paradiso.* Ille adhuc rogabat, ut meminisset sui, quum venisset in *Regnum suum*; & Dominus, quum nondum venisset, ei jam *REGNUM CAELES-* *TE* tribuebat. *Quam velox Misericordia! Tardius votum precantis, quam Remunerantis est Praemium.* Eadem repetit in Psalm. XXXIX. num. 17. & 19. Hujusmodi vero summae Felicitatis locum statim a morte Justis ceteris a Deo promitti, affirmavit idem sanctus Doctor Exposition. in Psalm. CXVIII. Sermon. 8. cuius verba protuli in calce Capitis praecedentis. Porro ipsum in eadem doctrina constantem perspicies Lib. II. num. 101. de Fide Resurrectionis, sive de Excessu fratris sui Satyri. *Videmus igitur, ait, Caelum patere* (non clausum per tot Saecula esse, uti Burnetus perperam opinatur) *Virtutibus. Nec hoc esse Paucorum. Multi enim* (Matth. VIII. 11.) *venient ab Oriente, & ab Occidente, & Austro,*

& Austro, & recumbent in REGNO DEI, Delectationem Perpetuae Quietis, sepulchris animorum motibus, exprimentes. Sequamur Abraham moribus, ut nos recipiat in gremium suum, & tamquam Lazarum suae humanitatis beredem, propriis circumfusum virtutibus pio foveat amplexu. En ut habitare in Sinu Abrahae, & recumbere in Regno Dei, pro una eademque sede ac re habentur. Et quandoquidem dormitanti, aut vigilant, sed illuso cerebro Burnetus venditavit, Iustorum & Injustorum Retributionem expectandam esse e supremo tantum Iudicio, mature in ejusmodi phantasma inductus est idem Ambrosius Lib. I. Cap. XV. de Officiis, ubi ait: *Post obitum vero utriusque, Pauper erat in Sinu Abrahae, Requiem habens, Dives in Suppliciis. Nonne EVIDENS EST, meritorum aut PRAEMIA, aut SUPPLICIA POST MORTEM MANERE? Et recte, quia in certamine labor est: post certamen aliis Victoria, aliis Ignominia. Numquid, priusquam cursus conficiatur, Palma cuiquam datur, aut deferatur Corona?*

Semel Ambrosium nobis objecit Burnetus. Non ego illum antea dimittam, quam suspiciones qualvis dissipet, quibus illius doctrinam aspergere Britannus Scriptor conatus est. Igitur Sanctum Praefulem audi Lib. V. Cap. 12. num. 151. de Fide. *Melius est, inquit, esse cum Christo. Dissolvi enim, & cum Christo esse (Philippens. 1. 23.) multo melius. Quum in hoc Mundo sub peccato sumus, Christus nobiscum est, ut per unius obedientiam Iusti constituantur multi. Et si peccatum hujus mundi evasero, Incipiam Esse Cum Christo. Denique ait: Veniam iterum, & adsumam vos ad me. Et infra: Volo, ut, ubi ego sum, & isti sint Mecum. Ergo nunc sub Regno Christi sumus, dum in Corpore versamur. Quum vero GLORIAM EJUS VIDERIMUS, quam habuit, priusquam Mundus esset, ERIMUS IN REGNO DEI, IN QUO PATRIARCHAE SUNT ET PROPHETAE, de quibus scriptum est: Quum videritis Abraham, Isaac, & Jacob, & omnes Prophetas in Regno Dei; ut jam pleniore DEI COGNITIONE potiamur. Optat-ne dilucidiora quam ista Ambrosii verba, ut intelligas, quantum ab ejus mente atque a veritate distet Burneti opinio? Profecto habemus heic plene confirmatas interpretationes, quas in prioribus Capitibus adhibuimus ad Apostoli verba. Verum quum in eandem sententiam dixerim confluere ipsius Apostoli locum Secunda ad Corinth. V. 8. ubi Iustos ait percipere magis Peregrinari a Corpore, & Praesentis esse ad Dominum, animadvertite, non aliud ea verba sonasse Ambro-*

Ambrosio, quam nobis, in Epistol. XXXIV. ad Horontianum. *Unaqueque Anima, inquit, videns se corporeo isto clausam gurgustio, quae tamen terrenae hujus habitationis consortio non degeneravit, ingemiscit gravata Corporis hujus conjunctione; simulque cognoscens, quia per fidem ambulat, non per speciem, Peregrinari vult de Corpore, & Adesse ad Dominum.* Supra etiam nos monuit Johannes Apostolus, Beatos esse, qui in Domino moriuntur: *Opera enim illorum sequuntur illor.* Paria quoque tradidit Sanctus Ambrosius Exposition. in Evangel. Luc. Lib. VII. num. 122. inquires: *Sola Virtus comes est defunctorum. Sola nos sequitur misericordia, quae Caelestium Dux praevia Mansionum, pecuniae vilis usura, Tabernacula Defunctoris Adquirat Aeterna.* Proinde si in Beatorum Animas ira caderet, de Caelo irasceretur, ut puto, beatissimus Praeful Ambrosius, adversus perniciosum Burneti consilium, qui Christianorum Spem, si non extinguere, certe enervare supra modum molitus est. Ab ejusmodi deliramentis totus ille alienus, jamdiu contra clamavit, praesertim Exposition. in Psalm. CXVIII. Sermon. XV. num. 26. ubi Justorum vitam imminentis Praemii spe enixe roborat atque solatur. *Suscipe me, inquit, secundum consilium tuum, & non confundas me ab Expectatione mea. Si vivit, qui in Sinu est Patriarchae Abraham, ut ille Lazarus Pauper: quanto magis vivit, qui suscipitur a Christo? Quando enim potest non in Aeternum vivere, quem sempiterna Vita suscepit, quem totum sibi Christus adsumsit? Sed & qui in Sinu Abraham sedet, susceperit a Christo est.* Intolerandae autem praesumptionis videretur dicere Deo: *Suscipe me; nisi promissum ejus adjungeret, hoc est: Ut hoc auderemus, ipse fecisti; tuo te chirographo convenimus, qui nostrum chirographum sustulisti. Nos fecimus chirographum mortis. Tu scripsisti chirographum vitae. Ergo non confundas ab expectatione sua servulum tuum; quia in te spero. Spes enim non confundit.* Dulcia sunt, & praetermississe piaculum foret, quae infra in nostrum omnium solatium addit summe pius Episcopus, fide profecto dignior, quam visionarius Burnetus. *Non erubescet, ait, qui sperat in Christum. Ideo qui bene sperat, dicit: In te confido; non erubescam. Et bene ait: Confido. Robur enim spei nostrae, & quaedam sperantis auctoritas confidentia est. Spera igitur semper, & nemo te ab expectatione confundit. Expectatio nostra, Vita Aeterna est. Expectatio nostra, REGNUM DEI, ANGELORUM CONSORTIUM, benedictiones sunt spiri-*

spirituales. Spera quotidie. Finem ista res non habet: nescit inducias. Spera etiam postus in adversis &c. Subdit infra: Sequitur, Adjuva me, inquit, & saluus ero &c. Hic non magna, non vera est salus. Tunc saluus ero, quum fuero IN PARADISO, quum vivere coepero inter Angelos electos tuos &c. Ergo vel inter Angelos adnumeratus, dicas oportet justificationes Dei semper; & illam, quam ADEPTUS es GLORIAM, non tuis meritis arroges, sed divinae miserationi semper adscribas. Denique sub finem Sermonis XIV. in Psalm. CXVIII. cuicumque Iusto beatam istam spem, statim post obitum complendam, ingerit, inquiens. Merito ergo vir Evangelicus dicit: Hereditate quaesivi testimonia tua in aeternum, quoniam exultatio cordis mei sunt. Quis non exsultet, qui Caelum & terram hereditate quaesivit, quia quaesivit Deum, de quo dicit Sanctus: Portio mea Dominus; quaesivit Dominum Jesum; quaesivit Spiritum Sanctum; & post illa quaesivit Angelos, & cum illis Vivit, non Hodie tantum & Cras, sed in Aeternum.

Haec doctrina divini Ambrosii, eademque & doctrina Catholicae Ecclesiae. Hanc ipsam beatus idem Episcopus, quoties occasio rulit, confirmavit, depraedica vit. Vide illius Epistolam XV. ad Ecclesiam Thessalonicensem, Anno Christi CCCLXXXIII. scriptam. Diem suum obierat Acholius, ejusdem Urbis Episcopus, vir magnarum virtutum, splendidique meriti in Ecclesia Dei. Quo sancti hujus viri Anima de terra abierit, non a Burneto, sed ab insigni Doctore Ambrosio edisce. Is ergo ait, se de illius aegritudine certiore minime factum, ne illi longaevitatem vitae hujus deprecemur, cui Vitae Aeternae jam Praemia deserebantur. Abiit ergo, non obiit, & emigravit a nobis veteranus Christi Jesu, CAELO TERRAE istius SOLUM MUTANS &c. Est igitur SUPERIORUM INCOLA, POSSESSOR CIVITATIS AETERNAE illius Hierusalem, quae IN CAELO est. VIDET illic Urbis ejus mensuram immensam, purum aurum, lapidem pretiosum, LUMEN sine Sole PERPETUUM. Et haec omnia jamdudum sibi comperta, sed nunc FACIE AD FACIEM manifestata videns, dicit: Sicut audivimus, ita & Videmus In Civitate Domini Virtutum, in Civitate Dei nostri &c. Neque putes, tunc sententiam hanc viguisset tantummodo de Spiritibus Sanctorum perfectorum. Erat & eadem de reliquis Piis & Justis, in caritate & pace Ecclesiae decedentibus, quos aut statim, aut brevi in Aulam Caelestem migraturos Ecclesia Catholica sperabat. Propterea de Valentiniani pii Principis morte in funebri Oratione idem

idem Sanctus Ambrosius loquens ait: *Quam beata fuisset res publica, si cum diutius servare potuisset! Sed quia VITA SANCTORUM* (idest Justorum) *non hic in terris est, sed IN CAELO* (Justi enim Vivere Christus & Mori lucrum, quia dissolvi & cum Christo esse, multo melius) *dolendum est, quod nobis cito raptus sit: consolandum, quod AD MELIORA transferit.* Proinde in fine Animam illius alloquitur, quae nunc Lumen a Sole Justitiae mutuata, clarum diem ducit. Petit, ut Gloriam Suam suis Sororibus monstret, & rursus ad Hierusalem illam Civitatem Sanctorum regredi festinet, ubi abundant meritorum Praemia, ubi cum Fratre conjunctus AETERNAE VITAE FRUITUR VOLUPTATE. Qui plura cupit, ipsam Orationem adeat. Piissimum quoque Imperatorem Theodosium Magnum altera funebri Oratione Ambrosius laudavit Anno Christi CCCXCV. de eo inter cetera praefatus: *Et ille quidem abiit ACCIPERE sibi REGNUM, quod non deposuit, sed mutavit, IN TABERNACULA CHRISTI jure pietatis adscitus, IN illam SUPERNAM HIERUSALEM, ubi nunc positus dicit &c.* Tum num. 28. de illo interpretatur verba Psalmi CXIV. 7. *Convertere, Anima mea, in Requiem tuam,* per illa designatum inquires paratum Justis Regnum a constitutione Mundi, Regionem vivorum, & Civitatem Hierusalem, de qua dictum est: *Et Reges terrae ferent gloriam suam in illam* (Apoclyps. XXI. 24.) *ILLA EST VERA GLORIA, quae ibi sumitur: illud REGNUM BEATISSIMUM, quod ibi possidetur, ad quod festinabat Apostolus, dicens: Audemus ergo & consentimus magis peregrinari de Corpore & Adesse ad Dominum.* Sunt & alia non minus dilucida hac de re in eadem Oratione, quae post tantam lucem referre supervacaneum puto. Quare nunc eat Burnetus accersitum in sui tutelam splendidissimum Mediolanensis Urbis Antistitem Ambrosium, ut suis Britannis persuadeat, Justorum, immo & Impiorum Animas in ignotis sibi locis diuturno immanique somno propemodum sepultas jacere, quousque postrema Mundi dies adveniat. Habemus jam Ambrosium hujusmodi somniis insensum: habemus pro Catholicae Ecclesiae sententia firmiter stantem, ut mirari subeat incuriam, seu pravam potius Burneti mentem, qui inde praesidium causae suae petere voluit, unde gravio rem ruinam ipsa contraxit.

CAP. XV.

Johanni Chrysostomo tributum durum quoddam assertum, atque illud ad trutinam revocatum. Apostoli locus in Prima ad Corinthios explicatus. Chrysostomus cum Ecclesia Catholica concors. Requies apud illum nihil aliud nisi Caelis Beatitudo. Quibus calumniis eum sibi adversantem Burnetius exceperit.

AD Sanctum Johannem Chrysostomum, sacrum illum, atque admirandum Graecae Ecclesiae Demosthenem, subinde nos appellat Burnetius, quem secum omnino facere contendit. Et sane magni momenti sunt, quae excerpit Burnetius ex Homil. XXXIX. in Cap. XV. vers. 19. Epist. Prim. ad Corinth. videlicet: *Quid ais, Paule? Quomodo in hac vita tantum spem habemus, nisi Corpus resurgat, licet Anima maneat, & immortalis sit?* Respondet sibi: *Licet Anima maneat, licet millies esset immortalis, ut est: bona illa infabilia sine Corpore non reportaret, quemadmodum nec punitur. Omnia enim manifestabuntur ante tribunal Christi, ut unusquisque quae fecit, iidem recipiat in Corpore sive bona, sive mala. Propterea dicit Apostolus: si in hac vita tantum spem in Christo haberemus, omnium essemus miserrimi: nisi enim resurgat Corpus, incoronata manet Anima extra illam Beatitudinem, quae in Caelis est.* Rursus idem Chrysostomus eandem doctrinam confirmat Homil. XXVIII. in Cap. XI. 40. ad Hebraeos, ad illa verba: *Hi mercedem non receperunt*, ubi ait: *Nondum receperunt mercedem, sed adhuc expectant. Qui isthoc modo obire, in tanta tribulatione, nondum illi acceperunt? Tantum habent temporis, ex quo ricerunt, nondum receperunt mercedem. Vos autem nondum finito certamine, moras aegre fertis. Cogitate, quaeso, quid & quantum sit, Abrahamum, & Apostolum Paulum expectantes, quando tu consummatus fueris, ut tunc tandem possint mercedem recipere &c.* Addit Burnetius, Animarum sedes appellari a Chrysostomo ἱερὰ ὑπόδοχα *Sacra Vestibula*, saepius autem *Sinum Abrahae*, in hanc rem laudans illius Homiliam XXIV. in Prim. ad Corinth. & Homiliam XL. in Genes. & Sermone I. de Resurrectione. Sixtum Senensem, qui tandem naevos hosce in Chrysostomi Libris deprehenderat, atque in suam Bibliothecam intulerat, heic etiam expilasse Burnetius videtur. Equidem ex iis, qui divinum Johannis Chrysostomi ingenium, & egregiam illius non in Allegorico, sed in Literali divinarum Literarum sensu exponendo, peritiam admirantur, nemini concedere me fateor; immo

immo hunc paene unum, uti sacrae Eloquentiae incomparabile absolutumque exemplar suspicio. Atque utinam illum supra ceteros magistrum sibi adhiberent, & quantum vires ferunt, imitarentur, quicumque in Ecclesia arti Oratoriae dant operam. Et apud illum quidem innumeras gemmas reperiatis; dolendum vero nunc, quod in ejus Libris Burnerus illud tantummodo expiscatus sit, quod nemo Christi Fidelium laudet aut probe. Nihil ego moror *Sacra illa Vestibula*, nihil *Sinum Abraham*: nihil enim horum obfistit, uti toties diximus, quin & ibi Beatitudine Sancti fruantur. Nam etsi integram nondum Hereditatem receperunt, in eam tamen immissi jam sunt, laetantur in Vestibulis, exsultant in atriis. Neque negotium facessit, quod Abraham & Paulus dicantur *nondum recepisse mercedem, expectantes quando & tu consummatus fueris*. Etenim illi nondum perfectam illam obtinuerunt mercedem, quae nos manet post solemne omnium Judicium, quum Corpus quoque sua gloria donabitur, ac totus homo coronabitur. Quamquam, ut idem Chrysostomus ibi animadvertit, *non dixit Apostolus: Ne sine nobis coronentur; sed, ut non sine nobis consummarentur*. Hoc est, ut non sine nobis ad culmen Beatitudinis conscenderent: quod in omnium Resurrectione continget. Quum vero Apostolus in eadem Epistola ad Hebraeos XII. 22. in *Caelesti Hierusalem* jam statuerit *Spiritus Justorum consummatorum*, scilicet Animas Corpore solutas, & jam consummatas, sive Gloria donatas: restat, ut *consummatio*, quam sine nobis neutiquam Abraham & Paulus consequentur, respiciat restitutionem Corporis nostri, quam ante nos neque Paulus, neque alii Sancti accipient. Adde etiam plenam & absolutam illam Gloriam, in quam cum resuscitato Corpore Justi immittentur. Atque hunc sensum antea Apostolus nos docuerat, nempe Cap. II. 9. ejusdem Epistolae, ubi de Christo Domino ait: *Vidimus Jesum propter passionem mortis Gloria & honore coronatum*; & vers. 10. *Decebat enim, eum, qui multos filios in Gloriam adduxerat, auctorem salutis eorum per passionem Consummare*, idest ad Gloriam apicem adducere, ad quam reipsa tum Anima, tum Corpore glorificato post Resurrectionem Dominus ascendit.

Verum quod in Cap. XV. Primae ad Corinthios scripsisse dicitur Chrysostomus, videlicet: *Licet maneat Anima, licet millies esset immortalis, ut est: bona illa ineffabilia sine Corpore non reportaret, quemadmodum nec punitur* &c. tam longe abest a sapientia Chrysostomi, ut justae suspicioni aditus aperiatur, locum illum aut corruptum in membranis, aut malo alicujus consilio deturpatum fuisse.

se. Quamobrem? petas. Mecum ne venire te pigeat, primo ad Apostolum, tum ad Chrysostomum. Igitur inquit Paulus: *Quomodo quidam dicunt in vobis, quoniam Resurrectionis Mortuorum non est? Si autem Resurrectio mortuorum non est: neque Christus resurrexit &c. Quod si Christus non resurrexit, vana est fides vestra; adhuc enim estis in peccatis vestris. Ergo & qui dormierunt in Christo, perierunt. Si in hac vita tantum in Christo sperantes sumus, miserrabiliores sumus omnibus hominibus.* Duplex heic adhibetur interpretatio. Aut enim pauci illi e Corinthiis, contra quos Paulus pugnat, Carnis tantummodo Resurrectionem negabant, Animae immortalitate retenta; aut & Animam, & Corpus evanescere ac perire in morte cum Sadducaeis arbitrabantur. Si primum, Apostolus *miserrabiliores omnibus hominibus* non immerito appellabat Christianos, quia & abstinebant in hac vita a voluptatibus ob spem futurorum, & Judaeorum ac Gentilium odiis atque infestationibus passim obnoxios se se sentiebant ob confessionem nominis Christi. Sublata vero Resurrectione, spes quoque tollebatur praemii & remunerationis in altera Vita. Nam secundum eorum opinionem Caro non resurrebat; & rursus Animabus, etiamsi immortalibus, si Christus non resurrexerat, reliqua non erat spes certa salutis, & *remissionis peccatorum*, quum haec pendeat non e Morre solum, sed etiam e Resurrectione Christi: *Qui*, ut ait idem Apostolus ad Roman. IV. 25. *traditus est propter delicta nostra, & resurrexit propter justificationem nostram.* Id quoque eidem Chrysostomo visum, dum ait ibidem: *Si Christus non resurrexit: neque fuit occisus. Si autem non fuit occisus: neque peccatum est abolitum. Si autem non fuit abolitum: in eo estis.* Quod si immortalitatem Animae quoque adimebant: potiori jure *miserrabiliores omnibus hominibus* reputandi erant Christiani, quibus tot acrumnae & incommoda pro Christo in vita praesenti devorabantur, nullumque in altera vita Praemium neque Animae, neque Corporis expectandum erat. Atqui Apostolus e certitudine Resurrectionis Christi firmissimam de Resurrectione quoque nostra doctrinam deducit: nihil autem heic habet de statu Animarum post mortem; neque negat, quin & ante Resurrectionem carnis eisdem conferri Beatitudo possit. Satis nempe illi est, Resurrectionem Mortuorum stabilire. Hac enim posita, inde etiam consequitur, Animas non perire post Mortem; & Corpora suo tempore esse vivificanda. Age vero, quid heic Chrysostomus, si tamen Chrysostomus? Obicientem quempiam Paulo inducit, & dicentem: *Quei tu nos omnium hominum miserrimos appellas, si*

Re

Resurrectio Corporum futura non creditur? Nonne post mortem Corporis Anima superstes est, quippe immortalis? Pro Paulo respondet Chrysostomus (seu potius ejus Interpolator) necessario admittendam Resurrectionem Carnis, quum Anima etiam si sit immortalis, *sine Corpore bona ineffabilia Caeli reportare nequeat*, immo ne *puniri* quidem; ipsamque, donec societatem Carnis recipiat, *manere sine Corona extra Beatitudinem, quae in Caelis est*. Sed & nos Chrysostomo reponimus, inopportunam esse hujusmodi objectionem, nutante nimirum illius supposito. Nam si Corinthii, in quorum opinionem decertat Paulus, admississent, Animam superesse ac vivere post Corporis dissolutionem, non dixisset: *Ergo & qui dormierunt in Christo, perierunt*; neque *si in hac vita tantum in Christo sperantes sumus*. Haec indicare omnino videntur de immortalitate quoque Animae illos dubitasse. Attamen largiamur, vitam Animae ne ab iis quidem fuisse negatam. Quid tum? Si, ut supra monui, *Remissionem Peccatorum* Animae Iustorum neutiquam assequebantur, certe Christiani omnium miserrimi fuissent appellandi, utpote tot in vita malis exagitati, & nullo post mortem praemio donandi. Contra Chrysostomus eorum sortem miserrimam opinatur, nisi Caro resurgat, quia sine Carne neque praemium, neque poena retribuetur; eamque in rem adfert Apostoli verba Secundae ad Corinth. V. 10. *Omnes enim nos manifestari oportet ante tribunal Christi, ut referat unusquisque propria Corporis, sive bonum, sive malum*. At verba ista, si de extremo Judicio interpreteris, minime obstant, quin Animae antea poenam aut praemium in privato & occulto Dei Judicio acceperint; nam Apostolus ait, tunc homines relatores *propria Corporis*, quae explicare licet de gloria aut poena Corporum, tunc solum inchoanda. Et quod est ad Animas, ideo solemne illud Judicium habendum est, ut coram omnibus pateat, qui Iusti aut Injusti fuerint; & in omnium conspectu confirmetur, quicquid clam de illorum meritis jam divina Iustitia decreverat. Quamquam eadem illa verba non immerito interpretari possumus de peculiari illo Judicio, in quo statim atque e vita homines emigrant, eorum Animae stant ante tribunal Christi, ut referant aut poenam, aut praemium operum, quae gesserunt, dum erant in Corpore. Apostolus paullo antedixerat, vehementer cupere Iustos *peregrinari a Corpore*, idest mori, & *praesentes esse ad Dominum*; post quae subdit, *omnes nos manifestari oportere ante tribunal Christi*. Iustis autem id fore gratissimum, quia referent statim praemium bonorum operum: quod fieri non potest, dum
sumus

sumus in Corpore, & peregrinamur a Domino. Neque Chrysostomus ipse secretum hoc Animarum Judicium negavit, quum Homil. XXXVII. in Cap. XI. Matth. scripserit: Praesens haec vita recte vivendi occasionem & opportunitatem habet. Postquam vero diem tuum obieris, Judicium & Poena consequitur. Paria tradiderat Homil. XIV. in Cap. XIV. Matthaei, inquit: Sicut illi, qui e carceribus educuntur, una cum ipsis catenis ad Judicium pertrahuntur: sic omnes Animae, Quum Hinc Emigraverint, variis peccatorum catenis implicitae, ad terribile illud Ducentur Tribunal. Nihil enim praesens vita differre videtur a carcere.

Atqui instat Chrysostomus: neque Praemio donari, neque Poena affici Anima sine Carne poterit, atque adeo expectanda Resurrectio est. Quid, quaeso, ais, o summe venerandum, & summe mihi carum caput, si tamen haec, quae dicis, revera tua sunt? Neque gaudia, neque supplicia, nisi recepto Corpore? Ac propterea, nisi Resurrectio Carnis credatur, omnium hominum miserrimi Christiani a Paulo creduntur? Ignosce homuncioni dicere audenti, aliena haec esse a sacrarum Literarum dogmatis. Tute nosti, Paulum ad Philippens. I. 23. urgeri desiderio deponendi Corporis. Et cur? Quia mortem Corporis extemplo consequeretur, Animam esse cum Christo: quod multo magis melius, quam degere in hac vita existimabat. Rursus idem, ut nuper dixi, summo opere cupiebat peregrinari a Corpore, & praesens esse ad Dominum. Reliquis parco, in hoc uno insistens. Quum Justorum Animae solutae Corpore vivant cum Domino, ejusque praesentia, procul dubio beatifica, fruantur: num Christianos omnium miserrimos appellasset Apostolus, nisi etiam pristinum Corpus Anima recepisset? Quis tantummodo memor Lazari pauperis, & poenitentis Latronis, haec in animum inducere possit, nisi qui cum Burneto desipere velit? Ad haec nonne sine Corpore Anima Evangelici Divitis torquetur in Inferis? Reliquum ergo est, ut interpretatio ista abjiciatur, uti absona, Literisque divinis adversans, atque alteram e duabus nuper a me propositis amplectamur. Verum & quae haecenus disserui, sepellenda sunt. Nam aut numquam Chrysostomus ea literis consignavit, sed alter ipsi supposuit: aut si Chrysostomum auctorem habent, alium, quam putet Burnetus, sensum habent. Scilicet ille dumtaxat innuerit, Animas sine Carne percepturas nos esse absoluta illa Beattitudinis praemia, aut exquisita supplicia, quae tum conferuntur, quum postremam sententiam pronuntiabit Iudex vivorum atque mortuorum, & quae Catholica quoque agnoscit Ecclesia. Denique ubi etiam
Chry-

Chrysostomus eo in loco ad Burneti mentem scripsisset, certum est, ipsum in aliis, paene dixi, innumeris disertissime prodidisse, se recessisse a tam absurda sententia, atque in ea firmissime conquevisse, quam a tot Saeculis Catholica tuetur Ecclesia. Jam Cap. II. apertissima duo illius hanc in rem effata produximus. Nunc idem, fortassis etiam ad satietatem, ostendendum mihi sumo. Veritatis enim cura heic non pauca exigit, ne qua superfit Burneto Novatori spes, posita in Chrysostomi patrocinio. Iraque cedo beatissimi illius viri Libros eximios, ut inde hauriamus, quae familiaris ei fuerit de praesenti quaestione doctrina.

Et primo, quam alienus is fuerit a credendo, non antea puniendos post mortem Improbos, quam contubernium Carnis recipiant, ea ostendunt, quae is saepe tradidit non de Evangelico tantum Divite, sed & de reliquis in peccato morientibus. Hos enim confestim in Gehennam atque in tormenta rapi, minime expectato Corpore, statuit. Ejus verba accipe ex Homil. II. in Cap. I. ad Colossenses. *Si nullum alium, eum quidem certe imitare DIVITEM, qui IN GEHENNA dicebat: Pater Abraham, mitte ad cognatos meos, ne veniant in hunc locum.* Is profecto ibi ante Resurrectionem; adhuc enim ejus cognati in Mundo versabantur. Hoc idem Chrysostomus permultis aliis in locis repetit. Et cur non repetat, quando apertis verbis Evangelista prodit, Divitem illum *IN FLAMMA* ac *TORMENTIS* luere poenas intemperantiae & crudelitatis suae? Ita in Homil. XXIV. in Cap. VI. ad Ephes. parem cum isto Divite calamitatem obvenisse dicit reliquis sine poenitentia debitum naturae persolventibus. *Magna est, ait, calamitas, hinc excedere HABENTES magna PECCATORUM ONERA.* Nam in Inferno, inquit, quis confitebitur tibi? Illic est Judicium: non est tempus Poenitentiae. *Quomodo flebat Dives, & nihil effecit? Quam multa dixerunt, qui Christum non aluerunt? Sed tamen ABDUCTI SUNT IN IGNEM AETERNUM.* Gemina sunt, quae habet in Homil. XXV. ad Populum Antiochenum. *Nondum in Infernum descendisti, ubi nemo confitebitur. Nondum solutum est theatrum tuum, sed adhuc es intra stadium constitutus. Nondum eo deductus es, UBI DIVES TORQUETUR.* Quum autem illo migraveris, horum neutrum utiliter facere poteris. Pariter in Paraenesi, sive Epistol. V. ad Theodoretum lapsam, *Si quando, ait, Hinc Abierimus, nondum consequuti vehementissimam Poenitentiam, manebit nos quiddam acerbius. Nam tum vel dentibus frendemus, vel plangemus, vel rogabimus infinita, sed ne summo quidem digito paulum*

lulum quiddam refrigerii distillabit Ardentibus nobis. Praeterea sub finem Opusculi de Virginitate scribit, non paucas e Virginitibus, quod sola castitate contentae in vitia prolapsae sunt, CRUCIARI IN GEHENNA, nam istas SEMPITERNIS FLAMMIS cetera vitia tradiderunt. Ex Homil. XLII. in Cap. XV. Primae ad Corinth. ad poenitentiam nos urget, donec habemus hoc parvum vitae viaticum; ne, sicuti ille Dives, inutiliter illic lamentemur, Quum Excesserimus, & desleamus; sletus autem nihil nobis remedii afferat. Plura non addo. Satis haec sunt, ut intelligamus, Chrysostomum ad Animarum Poenas in altera Vita minime exegisse consortium Carnis, neque diem postremi Iudicii. Divinae vero benignitatis abundantiam & ille agnovit & depraedicavit Homil. XXXVI. in Cap. X. Matth. inquit: Non ad puniendam solum, verum etiam Multo Magis ad Bona Largiendum paratus est Deus. Propterea si Improbi absque mora in Supplicia detruduntur, Iusti quoque, minime expectato Corpore, ad aeterna Praemia convolent oportet. Et hoc re ipsa eodem in loco testatur Chrysostomus, futuram Vitam & Iustis, & Injustis ob oculos ponens, ubi tam bonorum Praemia, quam malorum Supplicia reservantur.

Secundo, ubicumque res tulit, verbis minime dubiis scriptum reliquit, Animas Apostolorum & Martyrum, mox ut e corporeis vinculis evaserunt, ad beatissimam in Caelis, & apud Deum, vitam evolasse: quod dogma constantissimum in Ecclesia Dei semper fuisse nemo neget. In encomio Sancti Martyris Ignatii ait, Ecclesias quasque, per quas ille victus Romam ducebatur, mira consolatione fuisse perfusas, cernentes Martyrem tanta cum alacritate ad mortem currere, utpote qui AD REGNUM CAELORUM PROFICISCERETUR. Ac re quidem ipsa, ex prompta illius hilaritate dicebant, eam non esse mortem, ad quam properabat, sed peregrinationem quamdam & transitum atque ascensum in Caelum. Tum de illo subdit: Multo quidem mitiora censebat ora ferarum, quam Ty-ranni linguam. Nec immerito; siquidem haec ad Gebennam vocabat, illa autem ad Regnum mittebant. Quum igitur illic vitam posuisset, immo vero in Caelum profectus esset, reversus est deinceps Coronatus. Ita in Lib. contra Gentiles, Sancti Babylae Martyris Animam in Caelo statuit. Non dissimilia profert in Sermon. IX. de Ascensione Domini, recitato in Aede Martyrum, ubi illorum Animas in Caelis esse affirmat. Laudationem quoque Sancti Martyris Iuliani huc verbis exorditur: Si tales in terris honores Martyribus deferuntur, postquam excesserint ex hac vita: quales Coronae san-
ctis

Etis eorum capitibus IN CAELIS nectuntur ? Si tanta est ante Resurrectionem Gloria, quantus post Resurrectionem erit splendor ? Heic, rogo, consiste, ut discas, quae Chrysostomo mens fuerit, quoties in tot aliis locis Resurrectionem, & praemia tunc Iustis conferenda extollit. Ipsum habemus testem, multiplicem quoque Coronam, ingentemque Gloriam, & quidem in Caelis, Martyribus conferri vel ante ipsam Resurrectionem. Augebitur sane in Resurrectione gaudium illorum, & gloria: verum & antea Beatitudine fruuntur. Quod etiam de Paulo Apostolo dixit idem Chrysostomus sub finem Homiliae XXXII. in Cap. XVI. ad Romanos, nos exhortans, ut patrocinium tanti Apostoli in Caelo degentis procuremus, *ne heic solum vocem Pauli audiamus, sed & illic, Postquam Discesserimus* (hoc est, statim ac Anima nostra Corporeis nexibus exsolvetur) *Athletam hunc Christi videre mereamur. Immo, si heic audierimus, & illic ipsum omnino videbimus, licet non e propinquo stantes* (neque enim par gloriae gradus nobis est sperandus.) *Videbimus tamen prorsus prope apud Regalem Thronum splendentem. Ubi Cherubin Deum glorificant, ubi Seraphin volant, illic Paulum videbimus cum Petro in Sanctorum choro coryphaeum existentem & praesidentem, genuinaque illic dilectione fruemur.* Infra addit : *Paulus homo fuit, ex eadem nobiscum natura participans. Verum quoniam multum dilectionis erga Christum ostendit, Caelos ipso transcendit cum Angelis constitutus.* Quo in loco, & quam Beatus jam sit Paulus, habes. Expectat quidem, ut & nos consummemur, atque ut adveniat dies magna Domini, qua uti nos, ita & ipse Carnem suam recipiat, atque ampliori mercede donetur. Attamen & nunc in Beatorum Gloria sedet, ante Thronum Dei, & in coetu Angelorum atque Sanctorum: quod idem Sanctus Johannes in Apocalypsi testatus fuit, ut vidimus. Quum vero Chrysostomus reliquorum Patrum more affirmet Homil. III. in Cap. III. vers. prim. ad Thessalonicens. & Homil. XI. in Cap. VI. ad Hebraeos, varia esse Martyriorum genera, simul etiam, vel sine sanguine posse perveniri ad beatam illam sortem, ostendit.

Tertio, etsi haec de Apostolis ac Martyribus tam grande praemium Chrysostomus depraedicavit, is tamen ne Confessores quidem, immo ne cereros quidem Iustos, ab eadem Gloria, quamquam in inferiori mentione, exclusit. In elogio Sancti Meletii Archiepiscopi Antiocheni, qui ante quinque annos, migraverat ad Jesum, quem desiderabat, ait: postquam visum Deo fuerat, sanctum

T

Episco-

Episcopum vocare ex praesenti vita, eumque referre in chorum Angelorum, orandum esse, ut nos superstites obtineamus illic posse esse prope Beatum & Aeternum ejus Tabernaculum. In altera quoque Oratione alterum illustrem Antiochenum Antistitem laudat, hoc est Sanctum Eustachium, qui in Caelum commigravit, & ad eum, quem desiderabat, Jesum profectus est; qui ad Locum pervenit turbarum expertem, unde dolor & aegritudo & gemitus abest: non illic mutationis est imago, non vicissitudinis obumbratio (nempe apud Patrem luminum, ut ait Jacobus Apostolus Cap. I. 17.) sed omnia fixa & immobilia, omnia firma & stabilita, omnia incorrupta & immortalia, omnia interitus expertia & aeterna. Progrediamur nunc, a Chrysostomo percontaturi, sit-ne ad illa Beatitudinis loca praeclusus, an apertus aditus reliquorum Justorum Animabus purgatis. Quid ille respondeat Homil. VIII. in Cap. II. ad Philippenf. accipe. Non igitur lacrymis dignus est Justorum obitus, sed laetitia. Si ipsi gaudent, gaudendum cum ipsis est. Absurdum enim fuerit, gaudentibus illis, nos lugere. Gaude, quemadmodum Paulus, qui ita dicebat: Nihil mihi molesti accidit, sed etiam gaudeo ad Christum abiens. Et vos gaudete, inquit, & congratulamini mihi. Gaudemus igitur & nos, quum Justum viderimus interitisse. Nam discessit laborum suorum Mercedem accepturus. Qualis vero haec Merces? Chrysostomum audi in subsequenti Homil. XII. istis verbis nos ad bonum certamen heic certandum adhortantem. Sursum specta, inquit, ubi palma est. Heic palmae adspectus auget studium voluntatis; spes adimit laborum & molestiarum sensum. Longinquitas facit, ut brabium appareat exiguum. Quodnam illud est? Regnum Caelorum, Requies sempiterna (vide quid sit Requies) Gloria cum Christo, Hereditas, Fraternitas, Innumerabilia Bona &c. Si palma potitus in Caelum iveris, magno illic cum honore poteris incedere. Angeli te reverebuntur palmam illam ferentem &c. Deorsum quidem Jesus te certare voluit, sursum vero Coronat. Non heic, ubi certamen, est etiam Corona illa, sed in Splendido Loco. Idem in subsequenti Homilia repetit, inquiens: Paullulum laboremus, ut in omne aevum Requiescamus. Cur non malumus heic vexari, ut ibi Requiescamus? Idem repetit & ego, ut Lector luculente demum agnoscat, quanta in nocte sit Burneus, qui quoties in sacris Literis & apud Patres ostendit Requiem, Requiescere, atque horum similia, nihil aliud intelligit, nisi ignobilem quamdam Somni speciem, quo, si Superis placet, absorbentur Justorum Animae post mortem. Idem esse Requiescere, ac Beatitudine frui, ex apertis etiam Chrysostomi verbis constat.

constat. Ille propterea Oratione in verba Apostoli de *Dormientibus* Prim. ad Thessalonicens. IV. lamentationes damnat in funere Justorum, inter alia scribens: *Si enim sibi persuaderent, in vitam meliorem Justum introiisse, baud lugerent.* Eja, deinde subdit, *Deum gloria affice, quod cito in meliore statu collocaverit.* Deo gratias age, qui eum accepit. *Sanctos ex hac vita decedentes, & ad majores Honores ascendentes, bonis omnes verbis deducamus.* Ibi est Paulus; ibi est Petrus; ibi universus *Sanctorum chorus.* Quare vides, e felicitatis loco, ubi Apostoli Cum Christo sunt, Cum Christo regnant, atque beantur, reliquos Justos minime excludi.

E sacris etiam ritibus, quibus Justos in funere suis quoque temporibus Ecclesia prosequatur, Chrysostomus alibi, hoc est Oration. IV. in Cap. II. ad Hebr. elicit deformitatem immoderate lugentium eorum mortem. *Dic mihi, ait, quid sibi volunt claræ lampades? An non eos tamquam Athletas deducimus? Quid autem Hymni? An non Deum glorificamus & gratias agimus, quod Eum, qui excessit, jam Coronaverit? Convertere, Anima mea, in Requiem tuam, quoniam Dominus benefecit tibi, dicit: & lacrymaris? Vis autem iterum scire, quænam sit hæc Requies?* Chrysostomum ipsum adi Homil. VI. in Cap. IV. ad eandem Epistolam, ubi *Sabbatissimum & Requiem* ab Apostolo deprædicatam diserte statuit esse *Regnum Cælorum: Ingrediemur enim in Requiem, qui credidimus.* Beatissimum deinde statum illum describit omnium eloquentissimus vir, inquit: *Revera est illa Requies, ubi aufugit dolor, tristitia, & gemitus; ubi neque curæ, neque labores, neque angor, neque metus animam percellens & quatiens, sed solus Dei metus cum Voluptate. Omnia sunt pax &c. omnia sunt dies, omnia lux, omnia Splendida. Non potest, non potest capi satietas.* Tum aliis imaginibus usus, pergit describere Paradisum, ejusque ineffabilem Gloriam, quando *viderimus Regem, & æterna SANCTORUM TABERNACULA FLXA IN CAELIS.* *Suscipient enim, inquit, vos in æterna Tabernacula. Quando videbitis unumquemque resplendentem plusquam radii Solis, non ex ære & ferro, sed ex illa Gloria, quorum fulgores non potest videre humanus oculus. Et hæc quidem in hominibus, (id est videbimus in Sanctis ante nos ad beata illa loca profectis.) Quid vero dixeris multa Angelorum millia, Archangelorum &c. quorum pulcritudo omnem superat intelligentiam?* Reliquos dimitto vivacissimos colores, quibus beatissimam illam Requiem, hoc

est Beatorum Gloriam describit; nam heic nos interpellat Apostolus, inquiens in eodem Cap. IV. ad Hebr. 11. *Festinemus ergo ingredi in illam Requiem*. Haec ad Hebraeos, jam Christi Religionem amplexos, dicebat Paulus: sed & hisce nos adhuc viventes alloquitur, singulos urgens, ut per opera virtutis ad tam nobile praemium, atque ad beatam Caelorum Requiem enitatur. *Cursu opus est* (ita in hunc locum scribit Chrysostomus) *eoque vehementi. Qui currit, nullum videt ex omnibus, etiamsi ingrediatur per prata, etiamsi per loca arida & aspera. Qui currit, non aspicit ad spectatores, sed ad Praemium*. Verum dolendum est, immo indignandum, quod temporibus nostris emerferit in Britannia, qui quamquam Christianam legem profiteretur, Apostolo tamen contraria diceret. Ejus quippe dogma eo recidit, ut Christi Fidelibus non in aurem insusurret, sed palam ullo sine pudore haec cantet: **Quid festinatis INGREDI IN ILLAM REQUIEM?** Festinate quantum vultis, contendite quantum potestis: non ingrediemini. Aditum illuc nequicquam speratis: adhuc obstrusa sunt ostia fortissimo vecte. Festinarunt Apostoli: nihil sollicitudinis omisere tot Martyres, Confessores, & Virgines, ut illuc pedem inferrent. At jam Mille septingenti & ultra fluxerunt Anni, atque haecenus nemini datum fuit ingredi. Expectant adhuc illi: expectandum est & reliquis Justis. Nisi veniat dies magnus Domini, & consummatio Saeculi, quae forsitan nisi post aliquot alia annorum Millia futura erit, nulla spes superest, in beatissimam illam Requiem intrandi. Ita Burnetus, qui etsi conceptis verbis haec non dicit, satis tamen per temerarium suum dogma dicit, ut unusquisque fatebitur. At quis Christi & Christianae Reipublicae amator, non hominem exsecratur, aliud, quam Paulus Apostolus Christi, nos docere volentem, & perniciosam hac doctrina eos remorantem, ac veluti irridentem, qui spe vicini praemii sibi a Christo & Apostolis facta sollicitati, alacres in itinere suae salutis festinant? At hujusmodi Novatore parumper dimisso, Chrysostomi scholam rursus adeamus.

Et is quidem portas Caeli minime Justis praeclusas ostendit; verum illos-ne etiam (petis) ad Visionem Dei admisit? quod Catholica Ecclesia credit, Burnetus autem visionibus tantum suis fisis negat. Utique admisit, & non semel, admirabilis ille sacrarum Literarum interpres, & sapientissimus Orator. In Homilia LXX. ad Populum Antiochenum haec habentur: *Non malum est mors: sed malum, si mortuus Tormentis tradatur. Neque rursus*

vursus est bonum mors; sed bonum, si defunctus Saeculo, cum Domino Vivat. Peccatores, quum heic quoque supersunt, sunt omnibus miserabiliores, quoniam Deum offendunt. At JUSTI, quum hinc quoque migraverint, FELICES OMNINO: AD CHRISTUM enim TRANSIERUNT. Justi sive heic, sive ILLIC, CUM REGE SUNT, & ILLIC amplius & PROPINQUUS, non per Introitum, non per Fidem, sed FACIE AD FACIEM. At inquires: minime certum est, sit-ne Chrysostomi is Sermo. Centonem ex ejus Libris collectum, sunt qui suspicantur. Non abnuo. Sed & ipsi, qui dubitant, haec pertinere posse ad Chrysostomi Libros non dubitant. Et revera desumpta sunt haec omnia ex Homil. III. in Cap. I. ad Philipenses, uti quisque intueri poterit. Quare nulla superest dubitatio, quin haec auctorem habeant Chrysostomum ipsum. Neque aliam fuisse illius mentem atque doctrinam, ex aliis documentis palam fiet. In Homilia ad Baptizandos sunt ejus verba: Non enim ad simplicem Gloriam ELEVARI SPERATIS, sed AD IPSAM IMPERII POTESTATEM: immo nec simpliciter AD IPSUM IMPERIUM, sed CAELESTE. Et ideo vos peto, ideo omni deprecatione vos posco; ut quando AD illud REGNUM veneritis, mei memores esse velitis. Tum proposito exemplo Josephi, in carcere sese commendantis pincernarum principi, subdit: Non vos Pharaon, sed Caelorum Dominus ad pristinam patriam revocabit, & Hierusalem Caelesti restituet. Mementote igitur mei, QUANDO VOS illud SUSCIPIET REGNUM, quando REGALE vos proteget INDUMENTUM, quando purpura Dominico sanguine tincta decorabimini, quando CORONAM Solis radiis splendidiorum SENTIETIS IN CAPITE. Talia enim illius Sponsi dona esse consueverunt, quae nostrum quidem meritum vincunt, sed dantis sunt congrua pietati. Et ideo VOS ante ingressum sancti Thalami BEATOS APPELLO. Hinc etiam discere potes antiquissimam Catholicae Ecclesiae praxim, quae se Sanctorum vitam functorum precibus commendat. Si illi in Regno: ergo cum Rege, ergo in illius conspectu. Et istud quidem Regnum Sanctis hinc decedentibus, non post innumeros Annos, sed statim, sed brevi incundum, idem sanctus Episcopus alibi satis significat, in exordio videlicet Lib. III. de Providentia ad Stagirium Monachum, ubi eum hisce verbis solatur: Dic, oro, si quis te ad Regnum terrestre & Imperium vocaret, atque ante Ingressum ejus Civitatis, in qua Coronandus esses, in stabulum divertere necesse esset &c. An non illa omnia, quasi nihil essent, gaudio & spe Regni con-

contemneres? Indignum foret, Aeterni Regni spe elatum atque cre-
dum, & ad Caelos accersitum, per singula, quae in diversorio con-
tingunt tristitia, decidere atque perturbari. Tum ei in mentem re-
vocat, Sanctos Patres, dum in corpore viverent, semper se ipsos
reputasse & appellasse *Hospites & Peregrinos*: quod & nos facimus,
a sacris eruditi Literis; non enim habemus heic Civitatem manen-
tem, sed futuram inquirimus. Ita Apostoli, ita Patres, quia cer-
ti, se per misericordiam Dei posse, post brevem hanc peregrina-
tionem, ad Patriam, ad Regnum conscendere. Quid nunc dicendum
de Burneto, qui vel ipsos Apostolos tamdiu hinc sublatos, ab ejus-
modi Patria adhuc arcet, & peregrinos etiamnum atque hospites,
immo & in exilio esse, temere profecto, jubet?

Rursus autem Chrysostomus in Homilia de Militia spirituali, heic
certandum monet, si coronam cupimus: *Christus vires in agone da-
bit; & tu victorem Regem sequeris*, atque *A MORTE TRANSIBIS
AD VITAM AETERNAM*; & ab hominibus injuriarum passus, ad
DEI GRATIAM transfereris: *ET sanctorum ANGELORUM
CONSORTIO FRUERIS*. Terra *TE CIVEM* non *SUSCIPINET*,
sed *CAELUM*. Non incolam te suscipiet Mundus, qui persequutus
est; sed *ANGELI TE PORTANTES PRAESENTABUNT
CHRISTO*, & *Amicus Dei* vocaberis, & desiderabilem laudem ex
ipsum Domini voce audieris: Euge, serve bone & fidelis &c. Percipies
a Rege Caelesti omnium bonorum communionem; & hymnum dicens,
choris mixtus aeternis, & *INTER ANGELOS sanctos accinctus
laetitia, REGALEM CORONAM PORTABIS IN CONSPE-
CTU REGIS DOMINI*: & coaeternalis Domino tuo factus, CUM
ipso *AETERNAE BEATITUDINIS LARGITORE LAETABE-
RIS*. Et ne quis putet, tantam praemii ubertatem unis Martyri-
bus ab eo reservari, audi, quam consolationem ille adhibuerit in
Paraenese ad Viduam juvenem in morte mariti. Sin autem, ait, *Vir
tuus ad quietum, placidumque delatus est Portum*, atque ad suum
vere profectus est Regem: nullus heic lacrymis, sed laetitiae locus
est. Etenim haec mors non est mors, sed migratio, ac domicilii mu-
tatio a deterioribus ad meliora; a Terra ad Caelum; ab hominibus
ad Angelos & Archangelos, atque adeo ad ipsum Archangelorum
Dominum &c. Audisti sane ex beato Paulo, quum ita diceret: *Longe
satius est Dissolvi, & esse cum Christo &c.* Tum sub finem ejus-
dem Opusculi ait, male ejus viro fuisse futurum, si diutius vixisset:
*Primum quidem tardius vidisset Caelum, & ea, quae in Caelis sunt
&c.* Nunc quidem confidimus Dei gratia, illum evolasse in locum
Re-

Requiritis, quod nullam ex iis culpis in se admiserit, quae a Regno Caelorum excludunt. Haec eadem Catholici etiamnum dicunt de morientibus in Domino. Paria habet in Homil. XXXIII. in Cap. IX. Matth. ubi inter alia inquit: Si vero Iusti decesserunt, evaserunt jam e periculis, & tuti Supremam Beatitudinem Possident. Sunt & ibi alia, quae brevitati consulens intacta dimisi. Et quenam sit Gloria, quae Iustorum Animas manet post mortem, idem Chrysostomus indicavit Homil. LVI. in Cap. XVI. Matth. ubi Dominum ita loquentem inducit: Cur igitur reformidas, Petre, quum morituum me audis: Videbis enim tunc me in Gloria Patris. Si vero ipse in Gloria ero, & vos similiter. Non enim praesens haec vita terminum vobis apponet, sed VERA BEATITUDO VOS SUSCIPIET. Certe diem postremi Iudicii non expectabit Dominus Iesus, ut sit in Gloria Patris. Ergo qui jam cum eo sunt, ejusdem Gloriam luce ac voluptate fruuntur. Ceterum quae haecenus congesti, majori in lumine collocabit ipsemet Chrysostomus Homil. VI. in Prim. ad Thessalonicens. Cap. IV. Agit ibi de Vidua, cui mors filium eripuerit, ac inter alia haec habet: *Cogitatione aperi Caeli portas. Disce eam, quae illic est, Regiam. Vide eum, qui illic est, Regem. Reputa, an ii, qui sunt in terra, possint esse clariores Filio tuo, qui illic est. Et tunc suspira & ingemisce.* Tum de iis, qui in Caelesti Regia versantur, haec addit: *Non habent famulos, qui ipsos praecedunt, sed ipsos Angelos. Non assistunt Regi mortali, sed Immortali, Regi Regum, & Domino dominantium. Non habent circa lumbos zonam pelliceam, sed Gloriam illam ineffabilem &c.* Itaque tempus est, ut agnoscat Lector, quantam Chrysostomus injuriam inroget Burnetus, quando eum veluti suis somniis patrocinantem inducit. Nemo sane consolatorem in morte sua aut suorum, Britannum Novatorem adhibuisset, postquam is ne Apostolis quidem & Martyribus post tot Saecula licuisse dixit, pedem inferre in Beatam Caeli Regiam; ac tum eorum, tum ceterorum Iustorum spem rejecit in postremum Iudicii diem, a nobis fortasse per complura, & fortasse plurima Saecula adhuc remotum. Attamen heic aliqua praeter suum morem sinceritate usum fuisse Burnetum dissimulare nolo, quippe qui pag. 66. agnoscit, Chrysostomum aliis in locis liberius sublimiusque loqui de hac Beatitudine intermedia. Sed quid ille? Ut haec cum sua opinione conciliet, subdit: *Oratores inter perorandum, saepe incallescunt aliquantulum, neque singula verba in aurificis staterna ponderant. Quumque Sermones populares, aut Orationes funebres adornant, multat sunt caus-*

causae, quae perorantem incitare possunt ad exaggerandam Felicitatem mortuorum in Domino; nullae vero ad diminuendam, praeter ipsius veritatis conscientiam. Utile esset ad consolandum & erigendum animos contra vim mortis, praesertim insubeundo Martyrio, ad excitandos affectus, & pietatem confirmandam, callide liberior loqui de proxime futura Sanctorum Beatitudine; sed nulli consilio, nullis usus inseguiret, frigidius quam par erat, & tenuius eandem repraesentare.

En egregiam solvendi hujus nodi rationem a Burneto excogitatam. Sed pudeat tandem Britannicam gentem, tam perdiri consilii, ac tam impudentis (sit verbo venia) ingenii hominem in suo sinu perperisse ac tolerasse. Nam quid aliud persuadere possunt illius verba, nisi ut jam credamus, nefas minime in Britannia censeretur, aliquid tamquam dogma Ecclesiae credere, & nihilominus indoctum miserumque Populum contraria pascere doctrina, & ex ipso sacro suggesto fallere nimis credulam Plebem? Deinde haec eo collineare nemo non videat, ut erga Sanctos Patres omnis exuatur reverentia, neque ullus amplius honor eorum non solum verbis, sed ne moribus quidem habeatur, quando eos & mendacio, & imposturis operam dedisse in erudiendo grege suo deprehendamus. Quod sacri Oratores in aliquo laudando interdum limites exacte non servant, venia illis plerumque neganda non est: quod etiam sacri Ministri spem faciant de aeterna salute omnibus, qui in pace Ecclesiae & poenitentia diem suum obierunt, dum divina judicia in obscuro sunt; id semper licuit atque licebit. At sibi fingere ac palam venditare Ecclesiarum Pastores, qui doctrinam Fidei credant, Justorum & Injustorum Retributionem in fine dumtaxat Mundi expectandam; & Populo interea venditent, Caelum patere Justis ante Resurrectionem, atque in Infernas poenas ruere Improborum Animas: calumniatoris tantummodo facinus est, quod quisque probus execreretur, & confestim a veritate alienissimum sentiat. Mentiri semper malum est: pessimum vero & execrabile in Religionis negotio, uti Sanctus Augustinus nervosa oratione non semel ostendit. Proinde nemo tam indigne Sanctos Patres habet, quam qui illos & mendacii, & imposturae in re tanti momenti insinulat. Quidni ergo hoc etiam titulo deploratam sentis Burneti causam, cui opus fuit denigrare famam praeclarissimorum Ecclesiae Patrum, ne eos imaginationibus suis adversantes Christiana Respublica revereatur? Et ad Chrysostomum quod attinet, is non tantum in Sermonibus ad Populum, sed & in scriptis ad singulares personas, eadem confirmavit dogmata, quae hactenus ostendimus ab ipso palam depraedicata.

dicata. At inquit heic Burnetus: nonne stat, Chrysostomum multis in locis affirmasse, Justorum Animas hinc abeuntes in *Sinum Abrahae* deferri? Nomen istud statum beatitudinis intermedium, & *Caelesti inferiorem* notat. Hoc mihi in sequenti Capite expendendum propono.

C A P. XVI.

Sinus Abrahae Chrysostomo idem cum Regno Caelorum. Eiusdem varia, perspicuaque loca, quibus Beata in Caelis vita non Martyribus tantum, sed & ceteris Justis jam conlata firmatur.

EXtra controversiam est, a Chrysostomo saepe mentionem factam *Sinus Abrahae*, in quem recipiantur Spiritus Justorum, quibus nihil restat purgandum in altera Vita. Immo is locum, in quo Abraham nunc degit, distinguere videtur a Regno illo, in quo post Resurrectionem Iusti devehentur. Sed numquid *Sinus Abrahae* propterea apud Chrysostomum evasit incognitus quidam carcer, & quidem subterraneus, in quem Burnetus conjecit tam Proborum, quam Improborum Animas, ubi secundum ejus somnia nunc quiescunt, seu dormiunt, ignobili quadam *Inactione* languentes? Apagē ejusmodi deliramenta. Supra jam vidimus, veteres sub nomine *Sinus Abrahae* post mortem divini Redemptoris nostri designasse locum Beatitudinis, quo Iusti evolantes e Mundo deferuntur, locum perennis Glorïae & Felicitatis, ipsūque in Caelis, atque ante Thronum Dei, cujus beatifica Visione fruuntur fortunatae illae Animae. Hanc ipsam Chrysostomo mentem fuisse, palam faciunt quaecumque hactenus ex illius Libris excerpimus. Quum enim ille toties testatus fuerit, ad ineffabilem Gloriam, atque in Caelestem aulam, solutas Corpore Animas Justorum conscendere, simulque eas excipi in Sinum suum a patre Abraham, in ea felicitate posito: nonne manu tenes, nihil aliud hocce vocabulo significatum fuisse, quam Beatitudinis Caelestis locum in domo Patris situm, in quo multae mansiones, hoc est jugis Gloria & Felicitas, quamquam varia pro varietate meritorum? At quandoquidem non idem esse Abrahae Sinum nunc a Sanctis inhabitatum, & Regnum in Corporum Resurrectione nobis promissum, interdum innuere videtur Chrysostomus: noveris, *Regnum* quoque ab illo appellari praesentem Sanctorum statum beati-

tissimum in Caelis, eorumque gaudia in Caelesti Hierusalem; per alterum vero Regnum significari completam illam perfectamque Beatitudinem, qua totus homo donabitur in Resurrectione & supremo Judicio, quum videlicet Corpus, recepto pristino confortio, cum Anima & ipsum glorificabitur, Christus vero Regnum, idest omnes sua gratia bene usos, tradet Patri, regnaturus tamen in aeternum, cum illo. Testem habeo Chrysostomum ipsum, cujus haec sunt verba Homil. XIV. in Cap. VIII. ad Roman. ubi locum Apostoli explicat, nempe *Adoptionem expectantes*. Itaque scribit: *Quid ais, obsecro? nunc bonum hoc in spe reponis, qui scribas adoptionem ipsam expectari oportere? Hoc igitur inductione corrigens, ait: Redemptionem Corporis nostri: hoc est, numeris omnibus ABSOLUTAM GLORIAM*. Ceterum ne nunc quidem, dum Corporis Redemptio expectatur, ineffabili Gloria carere Sanctos, Chrysostomus ipse antea in illa ipsa Homilia innuissse videtur, proponens Apostoli verba: *Existimo enim, quod non sunt condignae passionibus hujus temporis ad futuram Gloriam, quae Revelabitur in nobis; ad quae magnus ille Orator atque Interpres: Non dixit: ad futuram Requiem, sed quod majus est, ad futuram Gloriam. Etenim ubi Requies, ibi non omnino Gloria: ubi autem Gloria, ibi omnino Requies. Deinde posteaquam futuram illam dixit, ostendit ipsam Jam Esse; neque enim dixit: ad Gloriam, quae futura est, sed quae Revelabitur, tamquam quae quidem nunc sit, occultetur tamen adhuc*. Nimirum, adveniente novissimo omnium Judicio coram universo hominum genere Revelabitur Gloria, qua electi donati jam fuerant. Ad normam istorum scribit idem Chrysostomus Homil. XLVI. in Cap. XX. Actor. Apostol. Judicis aeterni verba referens: *Venite, inquit, in hereditatem: Possidete paratum vobis Regnum. Non dixit; Accipite, sed in hereditatem possidete: id quod in his, qui proprie possederunt, dicitur*. Clariora tamen poscis de Beatitudine, nunc in Sinu Abrahae (quem nos *Paradisum* appellare consuevimus) Sanctis exhibita? Non pauca dabo, eaque ex ipso Chrysostomo excerpta.

Pauperem Lazarum in *Sinu Abrahae* ab Angelis post mortem deductum, dubitare nos non sinit Evangelica narratio. Monet etiam Dominus in Evangelio, non heic, sed in Caelis, a Deo petendam nobis esse mercedem bonorum operum. Idcirco Chrysostomus Homil. XXI. in Cap. VIII. 1. ad Corinth. scripsit: *Qui autem INTEGRAS ILLIC EXIGIT CORONAS, existit longe admirabilior, sicut Lazarus ille, qui ILLIC OMNIA BONA RECEPIT*. Audin' omnia Bona?

Bona? Excludere hinc Beatitudinem, si potes es. Rursus Chrysostomus Homil. II. ad Populum Antiochenum luculentius idem prodidit, in haec verba loquens: *Qui dixit: Divitibus hujus Saeculi; demonstravit, & alios futuri Saeculi Divites esse: qualis ille Lazarus erat, in praesenti quidem vita pauperrimus, in futura vero Dives; non auro & argento & ulla tali corruptibili & marcescibili materia affluens, sed ARCANIS ILLIS BONIS, QUAE NEQUE OCVLVS VEDIT, neque in cor hominis ascenderunt. Haec namque verae divitiarum & opulentia: quando & immarcescibilia sunt bona, & nullam capiunt mutationem.* Quid, quaeso, deest Sinui Abraham, ut immensae Beatitudinis domicilium intelligamus, quando nihil ibi desideratur exiis, quae de Regno Caelorum & Paradiso tum sacrae Literae, tum quotidie dicimus? In quinta quoque Homilia ad eundem Antiochenos beatissimus Antistes, postquam Divitem crudelem, ceterosque Peccatores jam detrusos ait *in poenas intolerabiles, atque in tormenta sempiterna*, non vero dormientes adhuc, atque flammarum expertes, uti Burnetus commentus est, subdit: *Non ita Lazarus; verum digressus hinc, AETERNIS POTITUS EST BONIS IN ABRAHAE SINU GAUDENS.* Idem ille exemplum Divitis & Lazari refricat Homil. XLIX. ad eundem Antiochenos. Tum sic argumentatur: *Numquid unum esse tibi videtur, in corruptibili Corpore & in mortali graviter torreri, deinde Coronari, & Post brevem illum languorem Immortalibus frui Deliciis: an contra Post brevem delectationem in infinitum torqueri?* Quo Justis atque Injustis post mortem deferantur, & hinc discimus. Quod si dubitas, an Chrysostomo sit tribuendus hic Sermo, quamquam certum illius auctorem stilus prodatur: fateare saltem, nos a Graecis hanc Homiliam accepisse. Mature igitur animadvertere possis, quo in loco futura sit nobis nimia Burneti confidentia, scribentis pag. 50. *Patres Graecos generatim a partibus nostris in hac causa stetisse non dubito.* Jam perspeximus, uberius etiam perspicimus, quantum fallatur, aliove fallere velit, qui haec jactitat. Neque secus de eodem Lazaro Chrysostomus loquitur in Opusculo, *Quod nemo laeditur, nisi a se ipso.* Ecce illius verba: *Quid autem & Lazarum? nonne aegritudo & ulcera & egestas ad Beatitudinem perduxit? & afflictio hujus Mundi, Coronas ei in Aeternum paravit?* Et infra: *Angustias rerum magis solidatus est, & hinc illi Coronae paratae sunt, unde infelicio putabatur: inde ei Palma victoriae, inde Aeterna Remuneratio, unde cruciatus multiplicabatur & injuria. Fames illa Abundantiam praeparabat futurorum Bonorum: aegritudo illa Vitam*

conciliabat Aeternam. Quid sit *Vita Aeterna* in Evangelii sermone, nihil est, cur ego commemorem. Haec autem paullo ante suum obitum, non in concionibus ad Populum, sed privatis Literis scribebat Chrysostomus ad Olympiadem mulierem nobilissimam, in aerumnas gravissimas conjectam. Et ea quidem scribebat, ut illi in mentem revocaret, quae Praemia statim a morte opperiri debeat Justus, persecutionem passus propter iustitiam. Eat nunc Burnetus, & *Sinus Abrahæ*, perinde ac foret apud Sanctos Patres desertus locus, despicatur Chrysostomum quoque in Homiliis ad Populum veluti aestu Orationis abreptum venditet. Quam imperite, quam inique, nemo nunc non intelligit.

Sed ne funem longius producamus, Chrysostomus ipse, quid sibi esset *Sinus Abrahæ*, Homil. XXII. in Cap. VIII. Matth. aperte significavit, unum cum *Regno Caelorum* eundem faciens locum: si tamen locum appellare licet. Interpretatur ille Salvatoris nostri verba: *Dico autem vobis, quod multi ab Oriente & Occidente venient, & recumbent cum Abraham & Isaac in Regno Caelorum*, atque in hanc sententiam loquitur. *Neque hac ratione tantummodo novum, ut videbatur, atque inauditum hunc dicendi modum lenit, verum etiam, quia CAELESTE REGNUM non suo nomine, sed SINUM ABRAHAE appellavit &c.* En quid nomine *Sinus Abrahæ* significarint Sancti Patres, Regnum Caelorum, Regnum Beatitudinis, quo nunc Sancti fruuntur. Quod supra Cap. XII. aliis veterum testimoniis ostendi, confirmatum heic vides. Confirmavit alibi & idem Chrysostomus, videlicet Homil. LXX. in Cap. XXII. Matth. ubi Angelicam Monachorum sui temporis vitam describit, haec inter cetera scribens: *De futuris semper philosophantur, & quasi alium quam nos orbem habitantes, quasi in Caelum translati, atque ibi viventes, sic de Caelestibus semper, de Sinu Abrahæ, de Coronis Sanctorum, de Societate Christi disputant: praesentium autem nulla apud eos commemoratio, nullus sermo est.* Quemadmodum nunc Sancti de Paradiso, quo nomine Aeternam Vitam atque Beatitudinem designant, saepissime cum admirabili delectatione colloquuntur, ita illi de *Sinu Abrahæ*: nam sub hoc vocabulo paratum Iustis Regnum, promissam Fidelibus Beatitatem prae oculis habebant, & votis atque operibus conquirebant. De iisdem propterea Monachis Homil. LIX. ad Popul. Antiochen. scribit: *Nec ullus audeat dicere, ille mortuus est, sed ille consummatus est. Tum gratiarum actio, laetitia, gloria multa, unoquoque talem finem habere orante; ita a laboribus & certaminibus quiescere; & VIDERE CHRISTUM.* Istam proinde ob causam Homil. XXI. in Cap. IX. Actuum Apostol. idem sanctissimus Orator ostendens, nequaquam

quam licere lacrymis prosequi morientes in Domino, sed quidem Pec-
 catores, ita loquitur: *Dic autem, oro, si sedentibus nobis mittat Rex*
quemdam, vocans in Regna: plorandum-ne erit ac lacrymandum?
Angeli e Caelo veniunt, illinc missi ab ipso Rege, ut conservum suum
vocent: & tu ploras? Et quidem beati, qui illic sunt & erunt, quia,
 ut nuper vidimus, in *Societate Christi* sunt atque erunt. Propter-
 ea Apostolus cupiebat dissolvi & esse cum Christo. Ibi videre Jesum,
 cum eo versari, cum eo colloqui, Paradisus est, & immensa Feli-
 citas. Neque meis tantum verbis heic loquor, sed Chrysostomi, qui
 Homil. XV. in Prim. ad Timoth. Cap. V. hisce nos hortatur: *Dili-*
gamus Deum, quaeso, toto affectu cordis, non Gehennae metu, sed de-
siderio Regni. Quid enim, oro, Visioni Christi conferendum est? nihil
profecto. Quid atque optandum, ac Bonis illis Aeternis & Immortali-
bis frui, quae nec oculus vidit, nec auris audivit &c.? Ita Homil.
 XXIV. in Cap. VII. Matth. Ponamus igitur, ait, adolescentem ali-
 quem esse mirabilem, eundemque & cunctis florere virtutibus, &
 totius tenere Orbis imperium. Quid non istius Patrem pati existima-
 tis libenti animo, ne talis Filius privetur conversatione? quod vero
 vel grande malum non esse subiturum, modo ut illum etiam videat,
 atque illius praesentia perfruatur? Hoc igitur de futura quoque Glo-
 ria cogitemus. Neque enim sic filius patri, etiamsi virtutibus mille
 decoretur, desiderabilis est atque mirabilis, ut Caelestium fructus Bo-
 norum; & Dissolvi, & Esse Cum Christo. Perspicua haec sunt Chry-
 sostomi verba de beatifica Visione, qua Sancti in Caelo donantur;
 clariora tamen fient, si quae ille scribit Homil. LV. in Cap. XVI.
 Matth. acie mentis & oculorum contemplemur: *Quod lumen, ait,*
qui receperunt, ista viderunt, & non ad Gehennam, sed eo perveniunt,
unde dolor & molestia semper fugit &c. ubi Vita Aeterna, ineffabi-
lis Gloria, inenarrabilis Pulcritudo, Majestas Regis inaeestimabilis:
ubi Bona illa sunt, quae oculus non vidit &c. ubi Virgines, quae ful-
gidas habent vestes, & omnes, qui nuptialem habent amictum, conver-
santur &c. Adi etiam, si vis, illius Homiliam XII. in Cap. I. Johan-
 nis, ubi esse cum Christo, ejusque Gloriam intueri, Beatitudinis cul-
 men appellat. Vide insuper, quae idem scripsit Homil. VII. in Cap.
 IV. ad Hebraeos. Sunt haec illius verba: *Nunc est tempus doni. Nemo de*
spe desperet. Tunc est tempus desperationis, quando clausus fuerit tha-
lamus; quando Rex fuerit ingressus ad videndos eos, qui ac cubant;
quando SINUS PATRIARCHAE sunt accepturi eos, qui iis sunt di-
gnandi: nunc autem nondum. Adhuc enim consistit theatrum, adhuc in-
stat certamen, adhuc pendet Praemium. Nisi qui ingenio sit hebeti, heic

non

non videat, tempus mortis Christianis esse tempus Retributionis, si-
ve ad Poenas, siue ad Praemia. *Tbalamus* Nuptias significat,
ad quas prudentes Virgines in Evangelio admittuntur, hoc est
Beatitudinem in Caelis. *Ingressus Regis* ad convivium ad videndos
discumbentes, innuit Supplicia inrogata homini nuptiali veste ca-
renti. Ergo & ingressus in *Sinum Abrahæ* non aliud indicat, nisi
Beatitudinem eandem. Dum vivimus, certaminis tempus est, non
Praemii. Ex quo vivere heic Iusti desinunt, non amplius pendet
Praemium, sed acquiritur. Ut paucis omnia concludam, ubicum-
que Chrysostomus de *Sinu Abrahæ*, de *sacro Vestibulo* loquitur,
ita loca illa describit, ut nihil aliud nisi Beatitatis domicilium per
eas voces intelligere cogamur. Atque heic addere juvat, *Sanctum*
Asterium Amasenum Episcopum eisdem, quibus Chrysostomus,
floruisse temporibus. Is vero Homilia in Divitem & Lazarum, a
Combesfio edita, auctor est, *Sinus Abrahæ* vocabulo non signifi-
cari locum quemdam peculiarem, sed quidem gaudium beati Abra-
hæ suscipientis Iustos in Gloria, siue in Regno Caelorum. Nam
& in altera Homilia adversus Avaros, Divitis ejusdem ac Lazari
exemplum repetens, ait: *Byssus computruit, Regnum ad alium*
transiit. Idem praeterea in Oratione de Sanctis Martyribus, eos
laudat, uti *praeclaræ mortis titulo immortales effectos; vitæ con-*
temtu, perpetuo viventes, quippe sanguine suo Regnum sibi emerunt,
& omnes, infra ait, *in Angelorum collegium cooptatos*, quorum Glo-
ria in Resurrectione omnibus apparebit.

Atque his visis, quid est, quaeso, quod Burnetus Sanctum Jo-
hannem Chrysostomum nobis obtrudit, veluti ab asserenda ineffa-
bili Sanctorum Beatitate, antequam Corpora resurgant, alienum?
Habemus sanctissimum Antistitem pleno ore in ejusmodi somnia
& deliria insurgentem, & cum Catholicorum sententia plane con-
cordem. Imponit ergo sibi (vellet & aliis) Novator Britannus,
dum in eximii illius viri Libris mentionem ostendens *Sinus Abra-*
hæ, aut *sacri Vestibuli*, hisce tantum vocibus insistit, & nihil pen-
si habens, quid per illas significetur, inania sua meditamenta ab iis
confirmatum iri confidit. Quid sit *Abrahæ Sinus*, jam vidimus,
nihil nempe a Regno Caelorum diversum. Et quum *sacrum* illud
Vestibulum alio nomine *Sinum* ipsum designet, quodnam somniis
suis suffragium inde Burnetus exculpit? In Templo Hierosolymi-
tano *Vestibulum* intima pars illius fuit: Sancta Sanctorum in con-
spectu illius erant: Sacerdotes *inter Vestibulum & Altare* rem divi-
nam faciebant, ut habetur Joelis Cap. II. 17. Porro ad instar hujus
Templi

Templi figuratam novimus a divinis Literis Caelestem Regiam in beata Hierusalem, quae in Caelis est. Ibi quoque *Vestibulum*, ibi *Altare*, utraque praesentia Dei & Agni glorificata. *Est Altare in Caelis (illuc enim preces nostrae & oblationes diriguntur) & Templum, quemadmodum Johannes in Apocalypsi ait: verba sunt Sancti Irenaei Lib. IV. Cap. 34. seu 18. Ac propterea in divinis Mysteriis antiquissima Liturgia Romanae Ecclesiae rogat, ut vota precesque Fidelium in sublime Altare tuum deferantur. Idem habetur in Liturgia, quae Sancto Marco tribuitur. Sed & Chrysostomus ipse satis alibi innuit, non aliud sibi esse sacrum Vestibulum, quam Regnum Caelorum. Haec nimirum scribit Homil. XIX. in Cap. V. Matthaei. Quomodo igitur, responde quaeso, videbimus REGNUM FUTURUM? quomodo SACRUM illud MERE BIMUR ADIRE VESTIBULUM, qui ne Publicanis quidem ipsis invenimur meliores? Ibi vero de Caelesti Beatitudine agit vir sanctus, Praemia honorum enumerans, ut est, Deum Videre, Regnum Accipere Caelorum, & In Dei Filios Adoptari, & Deo Similes Fieri &c. Hoc idem antea tradiderat Homil. XV. verba Redemptoris interpretans: Quoniam merces vestra copiosa est in Caelis. Inquit enim: Tu vero, etsi per singulas Beatitudines Regnum audias repromitti, nequaquam moerore turberis. Etsi enim Retributiones ipsas differenter appellat, tamen profecto cunctas ad unum Caelorum Regnum adducit. Quando enim dicit: Et Lugentes consolabuntur, & Misericordes misericordiam consequentur &c. nihil omnino aliud nisi Caeleste Regnum per haec cuncta designat. Vidimus etiam Cap. XV. Burnetum loco illo abuti, ubi Chrysostomus ait, *Abraham & Paulum* adhuc expectare mercedem. Non aliud, quam Resurrectionem Carnis, & Beatitatem numeris omnibus absolutam, in postremo Judicio electis conferendam, verbis iis significari jam monuimus. Sed numquid interea Apostoli Pauli Anima secundum Chrysostomum in Caelis Beatitate caret? Gerrae ac nugae. Quae multa haecenus ex eodem Chrysostomo produximus, Burneto os obstruere possunt. Praestat tamen novis idem confirmare documentis. Sermone IV. in Cap. I. ad Philippenf. Pauli verba, *Dissolvi multo magis melius, & quid eligam, ignoro*, hisce admirandus ille Orator excipit: *Quid ais? Quum hinc abiens AD CAELUM SIS MIGRATURUS, & CUM CHRISTO FUTURUS: ignoras, quid eligas?* En quo statim a morte abitura erat Anima Pauli, & quocum futura. Quicumque sapit, Beatitudinem haec intelligit: idque in praecedenti Sermone III. Chrysostomus ipse, aperte suam mentem prodens, scripserat, eumdem*

dem Apostoli locum sua oratione versans & inquires, ideo lucrum putari a Paulo mortem, *quoniam major mihi notitia Christi erit, & familiarius cum ipso versabor.* Proinde hinc deducit, legendum esse Peccatorum obitum, non vero Justorum. Nam illi quidem etiam dum vivunt, mortui sunt. Hi vero etiam quum mortui fuerint, vivunt. Illi etiam dum heic sunt, omnium elicere misericordiam debent, quoniam Deum offendunt. Hi vero illuc translati, Beati sunt, quoniam ad Christum profecti sunt. Peccatores, ubi sunt, procul a Rege sunt: propterea lacrymis digni. JUSTI autem sive heic, sive IBI, CUM REGE SUNT: atque ibi quidem multo magis ac PROPIUS, non quasi quodam interjecto Vestibulo, non per fidem, sed FACIE, inquit, AD FACIEM. Itaque non exspectat, sed jam assequutus est Beatitudinem Paulus; neque is tantum, sed & ceteri Justi, quibus nihil in altera Vita expurgandum restavit. Nam & hoc Chrysostomus non semel agnovit, dum preces & oblationes pro defunctis faciendas suasit. Subinde vero mirantem se exhibet divinus Orator, quare Paulus dubius sit in eligenda morte, per quam transiturus erat ad vitam longe meliorem. *Ecquis, ait, mercator navi vellet, innumerabilium thesaurorum plena, si liceat subire portum & requiescere; mari adhuc iacturi malit? Ecquis athleta, quum liceat Corona potiri, adhuc certare postulet? Ecquis dux, qui a bello cum gloria & trophæis liberari queat, & cum Rege in Regia quietus degere, ac deliciarum: adhuc & sudare præceptet, & in aciem prodire?* Ostendit Chrysostomus, recusasse quidem Paulum apud Christum esse, ut plures adhuc Animas Christo conquireret. Tu interim vide, quid sit Portum subire; quid Corona potiri; quid cum Rege in Regia degere.

Scriptum etiam Paulus in Secunda ad Timoth. IV. 6. *Ego jam delibor, & tempus resolutionis meae instat. Bonum certamen certavi, cursum consummavi, fidem servavi. In reliquo REPOSITA EST MIHI CORONA JUSTITIÆ, quam reddet mihi Dominus IN ILLA DIE iustus Iudex.* Non solum autem mihi, sed & iis, qui diligunt Adventum ejus. Quandonam tam glorioso Athletæ reddenda est Corona ista justitiæ? Mox ut Anima e Corpore abierit, inquit Chrysostomus Homil. IX. in Secund. ad Timoth. Cap. 4. nam in illa Die respicit diem Resolutionis: quod & Theophylactus censuit Enarrat. in Cap. I. ad Philipenses. Neque tanta Felicitas uni Paulo reservata. Ejus quoque participes erunt, quum evitaverint, Justo ceteri, qui diligunt adventum Christi.

Et

Et qualis hic *adventus*? Non postremum, sed primum indicari his verbis Chrysoſtomus ſcribit Homil. LXVI. in Cap. XIX. Matthæi. Quamobrem in prælaudata Homil. IX. Paulum loquentem inducit: *Non ergo dolendum eſt, quod proficeſcor percepturus Coronam, quam imponat capiti meo Dominus Jeſus Chriſtus. Non ſolum autem mihi, ſed & omnibus, qui diligant adventum ejus. Ex his, ſubdit ſanctus Interpres, item illum erigit verbis: nam ſi omnibus, multo magis Timotheo. Non ait, & tibi, ſed, omnibus: multo magis & tibi.* Tum explicat, quid ſignificet diligere adventum Chriſti, & præter alia hoc ait: *Qui illius adventum diligit, omnia faciet, ut ANTE UNIVERSALEM illum SINGULARIS fiat ad eum QUIDAM SALVATORIS ADVENTUS.* Viden', ut non ſolemne tantummodo Adventum Domini in fine Mundi Chryſoſtomus admitat, ſed alios etiam ſingulares, nobiſque ignotos, in morte videlicet noſtra, ut ſupra & ego monui? Vellem præterea, Burnetus animadvertiſſet (ſaltem æquus Lector animadvertat) quæ idem Chryſoſtomus Homil. V. ad Popul. Antiochen. ſermocinatur. Sæpe is contra terrorem mortis auditores ſuos armat, idque ſemper facit, ibique præfertim, ſpe vicinæ Felicitatis, inquiens: *Quid enim grave mors habet, dic mihi? Num quod te CELERIUS AD tranquillam PORTUM, & pacatam illam TRANSMITTIT VITAM? Tot exſpectans BONA, quæ nec oculus vidit, nec auris audivit, nec in cor hominis aſcenderunt: ad fruendum differs & negligis & torpes?* At ille adulabatur, ideſt mentiebatur: fortaliſ & heic Burnetus repoſuiſſet. Sed ſi quis hiſce armis adverſus Chryſoſtomi auctoritatem uteretur, peto ego, num dignus in poſterum foret, qui Britannicæ gentis magiſterium aſſumeret? Et Religionem, & Libros, & meditationem quamlibet abjiciamus oportet, ſi Sanctorum calumniatorem, ſi Pyrrhoniſtam audire volumus, eique fidem adhibere. Ego hæc amatoribus tantum veritatis, juſtiſque rerum judicibus propoſita volo. Pergit deinde Chryſoſtomus dicere in eadem Homilia: *Paulus vero propter præſentem gemebat vitam, & Romanis ſcribens Capite oſtavo dicebat, quod creatura congemſcit, & nos ipſi ſpiritus primitias habentes gemimus. Et hæc dicebat, non condemnans præſentia, ſed futura deſiderans.* Guſtavi, inquit, gratiam, & non ſero Dilationem. *Aſcendi in tertium Cælum: vidi Gloriam illam ineffabilem: vidi Aulas ſplendidas: didici, quibus heic immerant Bonis cavere; propterea gemo. Dic etenim mihi: ſiquis te in Regias duxiſſet aulas, & de parietibus aurum undique fulgens, & omnem*

alium ornatum tibi demonstrasset: postea te inde in Pauperis cellam induxisset; & Post Breve Tempus in Regias reduciturum illas, & Perennem ibi Mansionem se tibi Daturum Promississet: numquid non deberes affici desiderio, & vel ipsos paucos dies aegre ferre? Ergo post breve tempus tum Paulo, tum ceteris Deo in iustitia fideliter militantibus, Regia Caelestis conceditur; & nihilominus a beatissima illa sede Paulum adhuc exclusum dicitur, & Chrysostomum testem Burnetus appellat. Ad haec Apostolus in Secunda ad Timoth. I. 12. ait: Scio, cui credidi, & certus sum, quia potens est, Depositu meum servare in illum diem iustus Iudex. Burnetus pag. 40. Depositu sumit pro Anima deponenda apud Deum, dum veniat postremi Iudicii dies. Quod etiam si accipiamus, nihil nobis officiat; nam apud Deum esse, nobis Beatitudinem sonat, idque tot loca Patrum haecenus congesta evincunt. Verum ne, quaelo, Burnetus sibi aduleatur, veluti sumens certam ejusmodi interpretationem. Norunt enim Eruditi, alia significare Depositu illud apud veteres & recentiores divinorum Librorum Interpretes. Chrysostomo praefertim Fides & Praedicatio per illud vocabulum designari creditur. Ad haec idem sanctus Doctor Homil. XVI. in Cap. IX ad Roman. Apostoli verba explicans, cupientis Anathema esse a Christo pro fratribus, ait: Ac si diceret, vel si liceret, vellem ab eo Choro separari atque alienari, qui Christum circumdat, non ab ipsius amore &c. Sed & illa Fructus & Gloria privari sustinuerim, ut ne Dominus meus convicio afficiatur. Infra addit: Quomodo Anathema se ipsum a Christo esse precaretur? Mors enim ejusmodi illum magis Choro conjungebat, cooptabatque, qui Christum circumdat; tum efficiebat, ut Gloria illa perfrueretur.

Sunt & alia Chrysostomi loca, quae in praecedentibus Capitulis protuli. Superfunt & alia complura, quae, ne nimis sim, dimitto. Nam quid ultra moror? quando is in Homilia de Sancto Philogonio, quid ipse crederet, quid etiam nobis credendum sit, luculentissime proposuit. Lectorem non taedeat accipere, quae in hanc rem is longo sermone persequutus est. Maximopere, inquit, gratulor ejus Sancti felicitati, quod, quamquam translatus est, atque hanc, quae apud nos est, Civitatem reliquit: tamen in alteram transit Civitatem, nempe Dei, ac digressus ab hac Ecclesia, ad illam pervenit, quae est Primogenitorum descriptorum in Caelis; & relictis hisce festis transit ad celebritatem Angelorum. Etenim quod & superne sit Civitas, Ecclesia, ac Celebritas, audi Paulum dicentem (Hebr. XII. 22.) Accessistis ad Civi-

Civitatem Dei viventis, ad Hierusalem Caelestem, & Ecclesiam Primogenitorum descriptorum in Caelis, & ad innumerabilem Angelorum frequentiam. Cur vero Apostolus Panegyrim, sive frequentiam, beatissimum illum locum appellavit, hisce aliis verbis explicat. Non solum autem ob multitudinem Virtutum Caelestium, verum etiam ob abundantiam Bonorum, ac jube Gaudium & Lacertiam, Panegyrim, hoc est totius multitudinis Coetum appellat totam illam Vitam. Petis-ne, an praeter Angelos tanta ibi felicitate fruuntur Animae quoque Justorum? respondet Chrysostomus: Spiritus Justorum perfectorum (eorum scilicet, quibus nihil restat luendum & purgandum in altera Vita) Animarum virtutes, vitaeque recta facta, per omnes Caelos videre licet. Non vester aut amictus, sed Coronas quovis auro pretiosiores: tum brachia, certaminum Praemia, aliaeque innumera Bona, reposita iis, qui recte fecerint. Quod si cupis rescire, quos complectatur beatus ille Coetus, quid Chrysostomus subdat, accipito. Ad hanc, ait, ibi est multitudo congregatorum, longe tum copiosior, tum honoratior. Neque enim constat ex viris urbanis indigenisque; sed illic sunt Angelorum infinita millia; illic sodalitia Prophetarum; alibi Martyrum chori; Apostolorum ordines; cunei Justorum; omniumque, qui fortiter rem gesserunt, varii Coetus. At nihil haecenus, inquis, Sanctus Orator de Visione beatifica dixit, quam Ecclesia Catholica Fideles suos sperare jubet. Neque hoc ille omisit: pergit enim dicere: Jamque id sane majus est omnibus, quod in media Frequentia (sive Coetu) versatur eorum omnium Rex. Etenim ubi dixisset, ad innumerabilem Angelorum Frequentiam, subjicit: Et ad Judicem universorum Deum. Quis unquam vidit in Panegyrim prodeuntem Regem? Hic quidem nemo vidit. ILLIC autem QUI ADSUNT, PERPETUO VIDENT, quatenus ILLUM Videre licet, NON SOLUM PRAESENTEM, VERUM ETIAM SUAE GLORIAE SPLENDORE CONDECORANTEM UNIVERSUM COETUM. De felicitate perpetua beatae illius Civitatis alia is addit, & narrationem hisce concludit: Ad hanc Beatam Requiem transit Beatus Philogonius, Episcopus Antiochenus, nimirum circiter Annum Christi CCCXXI. ad Caelestem Patriam a Deo accitus. Quinam ergo post tantam lucem speret in posterum Burnetus se persuasurum, tamdiu in sua somnia inclinasse eximium Ecclesiae Catholicae Doctorem Chrysostomum? Jam vidimus, jam tenemus ipsum cum Catholicis in quaestione ista concordem. Quare ad ea, quae restant, progrediamur.

CAP. XVII.

Frustra Sancti Augustini auctoritatem ad suae opinionis patrocinium Burnetus contorquet. Dissolutae objectiones ex ipso petitae. Compluribus ejus locis Romanae Ecclesiae doctrina de Beatitudine Sanctorum solidata atque illustrata.

Sancti quoque Augustini auctoritatem in medium profert Burnetus. Si illi fides pag. 71. Sanctus Doctor communiter Piorum omnium Animas (saltem si Martyres excipias) extra Caelum, & extra Gloriam, in secretis receptaculis detinet usque ad Resurrectionem & Diem Judicii; ut ex his infra locis, si per otium consulas & conferas, manifesto patebit. Expos. in Psalm. XXXVI. vers. 10. ad illa verba: Adhuc pusillum &c. Enchirid. ad Laurent. Cap. 118. Genes. ad litteram Lib. XII. Cap. 35. De Civitat. Dei Lib. XII. Cap. 9. Retraction. Lib. I. Cap. 14. Confession. Lib. IX. Cap. 3. Ita Britannus Scriptor, se onere levans producendi verba Augustini. Producam ego; neque committam, ut in me Lector sinceritatem desideret, quam in Burneto optassem. Nam etsi fatear, Augustinum in praesenti quaestione jejunum interdum, circumspectumque non leviter fuisse, immo diu fluctuasse; nihil tamen ille posuit, quo sententia Catholicae Ecclesiae quicquam labefacteretur; immo multa habet, unde eadem confirmetur. Sunt ejus verba Enarrat. in Psalm. XXXVI. Serm. I. v. 10. Ergo longe sit Dies Judicii, quando erit retributio Injustorum & Justorum. Tuus certe dies ultimus longe abesse non potest. In Enchiridii Cap. 118. ait: Haec sunt tertia bona spei hominis: in quibus si pia perseverantia quisque proficiat, postrema pax reseat, quae post hanc vitam in Requie Spiritus, deinde etiam in Resurrectione Carnis implebitur. Poterat Burnetus addere, quae sanctus Doctor fuerat praefatus Cap. 109. ejusdem Enchiridii, videlicet: Tempus autem, quod inter hominis mortem, & ultimam Resurrectionem interpositum est, Animas abditè receptaculis continet, sicut unaquaeque digna est vel Requie, vel Aeternae, pro eo quod sortita est in Carne, quum viveret. Praeterea Lib. XII. Cap. 35. de Genesi ad litteram scribit: Quid opus est Spiritibus Corpora sua in Resurrectione recipere, si potest iis etiam sine Corporibus summa illa Beatitudo praebere? Tum. Lib. XII. Cap. 9. de Civitate Dei in haec verba loquitur: Cujus pari, quae conjungenda immortalibus Angelis ex mortalibus hominibus congregatur, & nunc mortaliter peregrina-

tur

tur in terra; vel in eis, qui morte obierunt, secretis Animarum receptaculis, sedibusque Requiescit. Quae ex Lib. I. Cap. 14. Retractationum Augustini deducenda monet Burnetus, omnium quoque oculis exhibeo. De supremæ Beatitudinis loco agit ibi sanctus Episcopus. Et Angeli quidem sancti, ait, quod ibi sint, nulla quaestio est: sed de sanctis hominibus, utrum ipsi saltem dicendi sint, jam in illa possessione consistere, merito quaeritur. Jam enim Corpore quidem corruptibili, quo Anima aggravatur, exuti sunt: sed adhuc expectant etiam ipsi Redemptionem Corporis sui, & Carorum requiescit in spe; nondum in futura incorruptione clarescit. Denique Lib. IX. Cap. 3. Confessionum, de Nebriodio ad plures jam profecto cum Deo colloquens, haec habet: *Quem non multo post conversionem nostram Carne solvisti; & nunc ille vivit in Sinu Abraham. Quidquid illud est, quod illo significatur Sinu, ibi Nebriodius meus vivit, dulcis amicus meus, tuus autem, Domine, adoptivus ex liberto filius.* Haec ex Augustino Burnetus. Poterat & alia id genus ex magni illius viri Libris excerpere. Sed quid demum ex iis conficisset, non video. Homini huic quidquid subluceat, gemma est: sed penitius intueri opus est, ne pro gemma crystallum quandoque sumatur. Itaque curae mihi erit, ut, quae revera fuerint Sancti Augustini placita in ejusmodi quaestione, palam fiant.

Et primo, si quicquam in ejus Libris occurrat, unde videatur Sanctus Episcopus ad Resurrectionem usque differre Justorum atque Injustorum Retributionem: velim, semper meminerit Lector, olim ipsum opinioni Millenarii Regni adhaesisse. Nos hac de re ille monuit cando sibi familiari Lib. XX. Cap. 7. de Civitate Dei, uti supra vidimus Cap. V. Quare nil mirum foret, si aliquid ei excidisset, opinioni huic conforme, quam postea ipsemet ejuravit atque impugnavit. Non recedat hoc, inquam, velim e Lectoris memoria. Secundo, Augustinus ea saltem principia statuit, unde per justa confectionaria sequatur Catholicorum sententia. Videlicet ille, praeter solemne atque universale Judicium in fine Mundi a Filio Dei habendum, agnoscit etiam singularia illa & occulta Judicia, in singulorum morte ab ipso Christo habita, per quae aut Praemiuni, aut Poena Animarum hinc abeuntium decernitur. Hoc idem, uti supra Cap. VI. animadvertimus, tradidere pariter Hieronymus & Johannes Chrysostomus. En Augustini verba Lib. II. Cap. IV. de Anima & ejus origine. *Nam illud, quod Rectissime & valde salubriter Vincentius Victor credit, Judicari Animas, quum de Corporibus exierint, antequam veniant ad illud Judicium, quo eas oportet jam redditus Corporibus Judicari, atque in ipsa, in qua beic vixerunt, Carne torqueri sine gloriari: hoc ita ne tamdem ipse nesciebas? Quis adversus Evangelium t. a. a.*
offi.

obſtinatione mentis obſcurdui, ut in illo Paupere, qui poſt mortem ablatus eſt in Sinum Abrabae, & in illo Divite, cujus in Inferno cruciatus exponitur, iſta non audiat, vel audita non credat? Fieri non poſſe Burnetus cenſet, ut quiſquam puniatur, aut praemio donetur, niſi Judicium praeeſſerit: hoc autem ille ſibi fingit tantummodo in conſummatione Saeculi futurum. Burneti fallam opinionem, immo & temeritatem, jamdiu redarguit Auguſtinus, uti evidens in ſacris Literis ſtatuendo, *quum de Corporibus exeunt, Animas a Deo judicari.* Tertio, in ea ſententia ſemper fuit magnus iſte Theologorum dux, homines in peccatis ex luce hac decedentes, in Inferorum poenas & tormenta e veſtigio detrudi. De Divite gloriante Lucae XII. 19. ob fortunarum copiam, cui Deus dixit: *Stulte, hac nocte animam tuam repetent a te,* loquitur ſanctus Doctor Sermon. 178. Cap. 3. inquiens: *Tale in quemquam Dei verbum, Judicium eſt. Numquid enim Deus Stultis daturus eſt Regnum Caelorum? Quibus autem non eſt daturus Regnum Caelorum, quid eis reſtat, niſi poena Gebennarum? Conſpicere hoc videmur. Aperte hoc Maniſeſteſque videamus. Nam & ille Divis, qui induebatur purpura & byſſo, mortuus eſt, & ſepultus; & quum apud Inferos in Tormentis eſſet, levavit oculos ſuos &c.* Ita Lib. XX. Cap. I. de Civitate Dei: *Homines plerumque aperte, ſemper occulte, luunt pro ſuis faclis divinitus Poenas ſive in hac vita, ſive poſt Mortem.* Rurſus Lib. XII. Cap. 32. de Geneſi ad Liter. ſcribit, Improborum Animas, quum de Corpore exeunt, ferri ad Loca Poenalia, ad Infernales Poenas. Idem repetit in Lib. de Vera Religione Cap. 52. & Enarrat. in Pſalm. LVII. num. 17. & Quaestion. Evangelic. Lib. II. Quaest. 38. ut alia loca praeteream. Qui haec ſtatuit, non ſolum admittit ante ſupremum Adventum Domini Judicium quoddam peculiare Animarum in morte hominum, ſed etiam urgere nimium deinceps nequit Apoſtoli locum Secund. ad Corinth. V. 10. ſcribentis: *Omnes enim nos manifeſtari oportet ante tribunal Chriſti, ut referat unusquiſque propria Corporis, prout geſſit, ſive bonum, ſive malum.* Non poteſt, inquam, urgere verba haec, quaſi ad Reſurrectionis, poſtremique Judicii diem Poena Injuſtorum ſit differenda. Nam aut Pauli verba interpretari opus eſt de occulto tribunali Chriſti, ſive de ſecreto in morte hominum illius Judicio, quemadmodum ea interpretatur idem Sanctus Auguſtinus Enarrat. in Pſalm. XXXVI. Sermon. III. num. 13. aut ſi ad ſupremum Judicium pertinent, indicare dumtaxat poſſunt, coram omnibus tunc *Revelandam* fore damnationem & Poenas, in quas antea Injuſti incurre-

currerant; sive Poenas hasce non tunc inchoandas, sed tantummodo augendas atque complendas; aut denique de unius Corporis poena aut gloria tunc inchoanda locum illum esse intelligendum. Quod si Peccatores, mox ut hinc emigrant, Poenas luunt, nec esse est, sicuti jam ostendi Cap. VI. ut vicissim ad Praemia perveniant Justorum Animae, minime expectato Corporum suorum contubernio. Et quod de Revelatione dixi, non temere dixi. Sanctus Petrus in Epistol. I. Cap. I. 5. commemorat *Salutem, paratam Revelari in tempore novissimo*. Tum Cap. IV. 13. addit: *Gaudete, ut & in Revelatione Gloriam ejus gaudeatis exultantes*. Profecto non in fine Mundi exordium capiet Gloria Christi Redemptoris; sed quod antea erat, Revelabitur. Sunt & alia vocis hujus exempla in divinis Libris. Propterea de Martyribus Augustinus postquam Sermon. CCCVI. Pauli verba attulit Roman. VIII. 18. *Non enim condignae sunt passiones ad futuram Gloriam, quae Revelabitur in nobis*, haec subnequit: *Sed donec Reveletur, abscondita est. Et quoniam abscondita est, ideo Visi sunt oculis insipientium mori. Sed numquid, quia abscondita est, etiam Deo abscondita est, apud quem pretiosa est? Ideo pretiosa est in conspectu Domini mors Sanctorum ejus*. Licet hic addere, Sanctum quoque Isidorum Pelusitanae, celebrem inter Graecos Patres, & iisdem, quibus Augustinus, temporibus inter mortales versatum, Lib. IV. Epistol. 63. annuuntiatum, non frustra Revelari adhibicum fuisse ab Apostolo Roman. VIII. 18. quum ait: *Existimo, quod non sunt condignae passiones hujus temporis ad futuram Gloriam, quae Revelabitur in nobis*. En Isidori verba: *Non sine causa vero dixit, quae Revelabitur; videlicet ut ostenderet, Esse quidem eam Gloriam Nunc quoque, sed Occultari, dum expectat victorum ac triumphatorum labores*. Quarto, uti vides, ineffabili Beatitudine Martyres donatos post mortem Augustinus semper censuit: quod etiam tot testimoniiis supra congeillis ostendimus creditum semper fuisse in Ecclesia Dei. Proinde is Sermon. CCLXXX. ait: *Resolutae bis vinculis Animae Martyrum post labores periculosi certaminis, Triumphis Angelicis exceptae atque resectae sunt, ubi non eis dicitur: Implete, quod jussi; sed, Accipite, quod promisi. Qua nunc jocunditate spiritualiter epulantur! Quam securi in Domino, & quam sublimi Honore gloriantur, quis terreno docere possit exemplo?* Ita Sermon. CCLXXIII. *Illi acceperunt pro temporali salute Aeternam Coronam, sine fine Immortalitatem*. Tum Sermon. CCXCVIII. Paulum inducit cupientem Dissolvi & esse cum Christo, tum addit:

Grat.

*Gratulabatur, quod ista vincula essent aliquando solvenda. Solvenda vincula carnalium membrorum, accipienda indumenta & ornamenta aeternarum virtutum. Securus ponebat Carnem, Coronam accepturus. Felix mutatio, sancta migratio. Quam beata Mansio! Fides eam videt, nondum oculus: quia nec oculus vidit, nec auris audivit &c. Tempus, inquit, resolutionis meae instat. Bonum certamen certavi &c. de cetero superest mihi Corona justitiae. Merito festinas, merito te immolandum esse laetaris: superest enim tibi Corona Justitiae. Paria quoque profert Sermone CCCXXXI. inquiens de Martyribus: Quia Christum non negaverunt, transferunt de hoc Mundo ad Patrem. Quaesierunt Christum confitendo: tenuerunt moriendo. Magno itaque lucro perdiderunt animas suas, foenum perden-
 tes, Coronam promerentes. Coronam, inquam, promerentes, & Vitam sine fine tenentes.*

Certum quoque putabatur in Ecclesia Dei, Martyrum beatas Animas ad videndum Deum conscendere. Neque id praetermisit Augustinus. Sunt ejus verba in Sermon. CCCIII. de Sancto Laurentio Martyre: *Clauduntur oculi in persecutionibus, sed patet Caelum. Mors infertur, sed Immortalitas sequitur. Occiso Mundus eripitur, sed restituto Paradisus exhibetur.* (quid heic Augustino sit Paradisus, animadvertite). *Vita temporalis extinguatur, sed Aeterna reparatur. Quanta est dignitas, & quanta securitas exire hinc laetum, exire inter pressuras & angustias gloriosum; claudere in momento oculos, quibus Homines Videbantur & Mundus; aperire eos statim, ut Deus Videatur, etiam feliciter migrando. Quanta velocitas? Terris repente retraheris, ut Regnis Caelestibus reponaris? Si post praefulgidum hunc locum de Martyrum Beatitudine alia adtexerem & Sancti Augustini Libris excerpta (quod nullo labore praestare possem) chartam inutili merce onerare mihi videretur. Quid? quod & ipse Burnetus diffiteri ausus non est, quin Augustinus agnovit conlatam statim a morte Beatitudinem fortissimis illis Christi Athletis, eorumque Animas in Regnum Caelorum illico convolasse. At hoc posito, quisquis argumentandi leges novit, videre ac facili cogitur, non ita interpretanda esse quaedam Scripturarum loca, quasi ante supremum diem Domini, sive ante Judicium universale, nulla sit Justorum & Injustorum Retributio. Nunc etiam ipsis a Deo aut Praemium confertur, aut Poena inrogatur; sed nobis haec Retributio ignota atque occulta est. In consummatione Saeculi coram omnibus justum Dei Judicium, factum in morte hominum, Revelabitur, & solemniter perpetuae sententia a Christo con-*

confirmabitur. Quod si de Martyribus hoc factum credis, de ceteris vero Justis dubitas: hanc etiam tibi dubitationem Augustinus evelleret. Is enim cum aliis Sanctis, quos supra eduximus, plane concors, Martyrii dignitatem & meritum, quamquam inferioris gradus, in iis quoque agnovit, qui Deo fidehiter famulantes Mundum vincunt, atque in pace Ecclesiae moriuntur. Vide illum Sermon. IV. *Semper, inquit, Coronaberis, & Martyr hinc exies, somnes tentationes Diaboli superaveris.* Idem repetit in Sermon. CCLXXXVI. itidem in CCCXXVI. atque, ut alia loca omittam, hoc in primis ab eo depraedicatum habes in Sermon. CCCIV. alias 37. de Divers. *Christum, ait, sequuti sunt Martyres sancti, usque ad effusionem cruoris; sequuti sunt, sed non Soli. Non enim, postquam illi transierunt, pons incisus est; aut postquam ipsi biberunt, fons ipse siccatus est. Quae enim spes Fidelium bonorum, vel vel foedere conjugali jugam Matrimonii caste & concorditer ducunt; vel sub continentia Viduali domant carnis illecebras; vel etiam sanctitatis apicem celsius erigentes, & in nova Virginitate florentes, sequuntur Agnum, quocumque jert? Quae istis, inquam, quae omnibus spes est, si non sequuntur Christum, nisi qui pro ipso sanguinem fundunt? Perdura est ergo si hos suos, quos tanto foecundius, quanto securius, tempore pacis caesa est mater Ecclesia? Absit. Habet, habet, fratres, habet hortus ille Dominicus non solum Rosas Martyrum, sed & Lilia Virginum, & Conjugatorum Hederas, Violasque Viduarum &c. Quod si das, Martyrum Animas in Caelestem Beatitudinem jant raptas, idque negas Confessorum, Virginum, & reliquorum Justorum Animabus, quantvis in hac vita aut post mortem purgatis (nam & Augustinus quoque purgationem Animarum in altera vita agnovit) dic, quaelo, quid obilet, quominus aequae ac Martyres isti recipiantur in Caelum. Si iis, qui Christum confitentur coram Hominibus, aeterna Vita ac Visio beatifica Dei promissa fuit: nonne Dominus, si non parvis ponderis, certe ejusdem generis Gloriam & Beatitatem pollicitus fuit Pauperibus spiritu, Mitibus & Mundis corde? Fortassis instas, & ais: Victoribus iis, & tanta pro Deo perpeffis, Corona statim confertur. Ceteris quoque dabitur, sed non tam cito. Expectent iterea in loco quietis, in Requie, in Somno, dum sonet ultima tuba: tunc & ipsi in Resurrectionem vitae, in immensam Gloriam transibunt. At ego tibi reponam, quae Augustinus differebat Sermon. CCXCIV. Cap. 6. adversus Pelagianos, *Vitam quidem aeternam parvulis non baptizatis perperam concedentes, Regnum vero Caelorum incongrua opinione negantes: Quid offends Justis, dic mihi, ut non intret in Regnum Caelorum, ut separetur a sorte Sanctorum, ut sit exsul a societate**

Angelorum? Videris enim tibi misericors, quia non ei auferis Vitam: damnas tamen, quem separas a Regno Caelorum. Damnas: non eum percussis, sed in exilium mittis. Nam & qui exsulant, vivunt; si sani sunt, in doloribus corporis non sunt; non torquentur, non carceris tenebris affliguntur. Haec illis sola poena est, non esse in Patria. Si amatur Patria, magna Poena. Si autem non amatur, peior est cordis Poena. Parvum malum est in hominis corde, qui Societatem non quaerit Sanctorum, qui non desiderat Regnum Caelorum? Si non desiderat, poena est de perversitate: si autem desiderat, poena est de fraudata caritate. Sed si, quod vis, parva sit poena: & ipsa parva magna est, si nulla culpa est. Hic defende iustitiam Dei. Quare vel parva poena infligitur innocenti, aut in quo nullus amplius invenitur reatus? Quam vellem, haec considerasset Burnetus, antequam Catholicae Ecclesiae sententiam impugnandam sibi summisset; antequam in exilium tam diuturnum, tamque incerti temporis, detrussisset Sanctos, & Iustos, quotquot ab exordio Mundi ad nostra usque tempora Religio sancta peperit. Sed quod ille infelicit gloriose cupiditate seductus contempsit, alii Christi Fideles diligentius considerent, neque a Novatore fucum sibi fieri patiantur.

Reperamus nunc, quae ex ipso Augustino nobis objecit idem Burnetus. Si in Enarration. in Psalm. XXXVI. diem Judicii commemorat, quando erit Retributio Injustorum & Justorum, haec ideo sanctus Doctor, non secus ac alii Sancti Patres, dicit, quia tunc Iustus & Injustis plene retribuetur: & tunc solum integro homini Praemium aut Poena solemnii Judicio Christi Domini decernetur. Interim tamen Animae aut plectuntur in Inferis, aut gaudent cum Christo in Caelis. In eadem ipsa Enarratione Sermon. II. Divitis Evangelici Animam Augustinus statuit in Gebennae ignibus. Tum tribulatis animos addit, quia brevis est labor, brevis temporalis tribulatio tua: qua finita venies ad Felicitatem infinitam. Pauci dies sunt tota vita hominis: quo labore transacto, venit Regnum Aeternum, venit sine fine Felicitas. Immo & eodem in loco, ubi diem Judicii nobis in mentem revocat, ait Animas Justorum post depositam Corporis sarcinam transire statim in Requiem & Sinum Abrahamae: de quo infra sermo nobis futurus est. Interim habe, in eodem Opere fateri Augustinum, praesentem Sanctorum jam vita sanctorum Beatitudinem in Caelesti Hierusalem. Nam Enarration. in Psalm. CXIX. ad ea verba: *Memento mihi, quia incolatus meus prolongatus est*, haec scribit: *Incolatus peregrinatio est. Incola dicitur, qui habitat in terra aliena, non in Civitate sua. Fratres mei, quum peregrinatur homo, inter meliores vivit, quam in Patria sua forte viveret. Sed non sic est, quando de illa Hierusalem Caelesti peregrinamur &c. Non sic est Patria ILLA*

HIE.

HIERUSALEM, UBI OMNES BONI. Quicumque inde peregrinatur; inter Malos est; nec recedere a Malis potest, nisi quum redierit ad Societatem Angelorum, ut ibi sit, unde peregrinatur. **IBI OMNES JUSTI ET SANCTI, qui FRUUNTUR VERBO DEI** sine lectione, sine literis. Quod enim nobis per paginas scriptum est, **PER FACIEM DEI ILLIC CERNUNT.** Quum in Cap. 118. Enchiridii memoratur Augustino postrema Pax, quae post hanc vitam in Requie Spiritus, deinde in Resurrectione etiam Carnis implebitur, nescio quid exsculpere inde possit Burnetus. Immo illic sub nomine Pacis, satis sanctus Doctor Beatitatem Animarum designat, eoque magis, quum *Requiem Spiritus* ait; hac enim voce idem significare consueverunt veteres, & Augustinus in primis. Tractatu XXVI. in Johann. num. 16. ad illa verba: *Qui manducat meam carnem, & bibit meum sanguinem, habet Vitam Aeternam*, haec adnotat: Et ego resuscitabo eum in novissimo die. Ut habeat interim secundum **SPIRITUM VITAM AETERNAM IN REQUIE, QUAE SANCTORUM SPIRITUS SUSCIPIT.** Quod autem ad **CORPUS, NEC ejus VITA AETERNA FRAUDETUR, sed IN RESURRECTIONE** novissimo Die. Quid significet *Vita Aeterna*, norunt omnes in sacris Literis periti. Qui ergo dicit haec *Pacem*, & *Requiem* in Resurrectione Carnis impleri, nihil aliud dicit, nisi Beatitudinem, jam in Anima inchoatam, compleri deinde ac perfici, resumta & tunc primum beatificata Carne. Dixerat etiam Augustinus ibidem Cap. 109. *Animas additis receptaculis contineri, sicut unaquaeque digna est vel Requie, vel Aerumna.* De Receptaculis infra agemus. Interim vides, Animas hinc emigrantes, vel in *Requiem* deferri, vel in *Aerumnam*, hoc est ad loca Beatorum, vel ad poenas Inferorum. Eadem repetit Augustinus Lib. XII. Cap. 9. de Civitat. Dei, quum ait, *Iustus, qui mortem obierunt, secretis Animarum Receptaculis Sedibusque Requiescere. Requiescere*, quum de Justis ex hac vita profectis sermo est, nihil aliud esse, nisi Beatitatem Justorum, non semel supra ostendimus. Hoc in Caelo futurum est, non in exilio. **IBI erit SANCTIFICATIO NOSTRA plena, UBI CUM DEO sine fine REQUIESCEMUS**, inquit idem Augustinus Sermon. 251. Cap. 7.

Ad haec e Libro Primo Cap. 14. Retraction. Burnetus, ut supra vidimus, quaedam sancti Doctoris verba in suae opinionis patrocinium adferebat. Liceat mihi integrum locum illum producere, ut quae sit Augustini mens, Lector quisque mecum diligentius exploret. Scripserat in Lib. de Utilitate credendi, Cap. 3. *Quae sunt enim personae in Religionem laudabiles. Una eorum, qui jam invenerunt, quos etiam Beatif-*

simos judicari necesse est. Alia coram, qui studiosissime & rectissime inquirunt. Primi ergo sunt in Possessione. Alteri in Via, qua tamen certissime pervenitur. Veritus sanctus vir, ne quis putet, Beatissimum quemquam a se dici in hac vita, haec adnotat: In his verbis meis, si illi, **QUI JAM INVENERUNT**, quos **IN ipsa POSSESSIONE** esse jam diximus, sic accipiantur **BEATISSIMI**, ut non **IN hac VI-TA**, sed in **EA**, **QUAM SPERAMUS**, **ET AD QUAM** per **Fidei** viam **TENDIMUS**, sint: non habet iste sensus errorem. **IPSI** enim judicandi sunt quod quaerendum est Invenisse, qui **JAM IBI SUNT**, quo nos quaerendo & credendo, idest viam Fidei tenendo, cupimus pervenire. Jam nos tenemus, Augustino teste, negari non posse Beatissimum Vitae statum iis, qui post hanc Vitam eo pervenerunt, quo nos adhuc per Fidei tendimus. Scribit deinde, tantum Felicitatis nemini mortalium dari in hac vita: Neque enim, quod ait Apostolus, Videmus nunc per speculum in aenigmate; & Nunc scio ex parte: non cernitur mente. Cernitur plane, sed Beatissimos nondum facit. Illud autem **BEATISSIMOS FACIT**, quod ait: **TUNC** autem **FACIE AD FACIEM**. Qui hoc invenerunt, ipsi dicendi sunt **IN BEATITUDINIS POSSESSIONE** consistere, ad quam ducit via Fidei, & quo credendo cupimus pervenire. Haec tenus haec adversus Burnetum militant. Quae subsequuntur, e prae laudato Lib. I. Cap. 14. Retractionum deprompta, ille pro se adsumit: Sed quinam, addit Augustinus, sint illi Beatissimi, qui jam sunt in ea Possessione, quo ducit haec vita, magna quaestio est. Et Angeli quidem sancti quod ibi sint, nulla quaestio est. Sed de Sanctis Hominibus jam defunctis, utrum ipsi saltem dicendi sint in illa Possessione consistere, merito quaeritur. Jam enim Corpore quidem corruptibili, quo Anima aggravatur, exuti sunt; sed adhuc expectant etiam ipsi Redemptionem Corporis sui, & Carorum requiescit in spe: nondum enim in futura incorruptione clarescit. Sed utrum ad contemplandam cordis oculis Veritatem, sicut dictum est, Facie ad Faciem, nihil ex hoc minus habeant, non hic est locus disputandi. Quid hinc nobis deducendum sit, Burnetus tacuit. Numquid enim per haec improbari ab Augustino Catholicae Ecclesiae sententiam? Neutiquam sane; nam etsi minime in hoc loco affirmat, Sanctos in Possessione esse Beatitude illius, qua procul dubio fruatur Angelus, non negat tamen, quin ibi sint, aut esse possint. Ipsemet contra, tam saepe Martyres in beata illa sede positos dixit, ut si secus sentiret heic, sibi met ipsi palam contradiceret. Sed quid velit hisce verbis Augustinus, aperiarn ego. Alterum ejusdem sancti Doctoris locum laudavit Bur-

Burnetus, veluti suae opinioni perutilem, videlicet e Lib. XII. Cap. 35. de Genes. ad litteram, ubi petit, *quid opus sit Spiritibus Defunctorum Corpora sua in Resurrectione recipere, si potest eis etiam sine Corporibus summa illa Beatitudo praebere?* Haec, & non plura, Burnetus inde excerpit, reliqua Lectorum oculis subducenda ratus, ne suae causae officerent. Sed quando is in tanti momenti rebus sinceritate caret, non verum quaerere, sed Lectorem fallere velle omnino videtur. En integrum Augustini locum. Praedixerat ille, non immerito appellari posse *Paradisum* sedem, ubi sunt *Animae Beatorum*, hoc est Regnum Caeleste, in quo *Animae* beantur. Tum subdit: *Sed si quem movet, quid opus sit Spiritibus Defunctorum Corpora sua in Resurrectione recipere, si potest eis etiam sine Corporibus summa illa Beatitudo praebere, difficilior quidem questio est, quam ut persciscere possit hoc sermone finire. Sed tamen MINIME DUBITANDUM est, raptam HOMINIS a Carnis sensibus MENTEM, ET POST MORTEM ipsa Carne deposita, transiens etiam similitudinibus corporalium, NON SIC VIDERE POSSE INCOMMUTABILEM SUBSTANTIAM (Dei) UT sancti ANGELI VIDENT, sive alia latiore causa, sive ideo quia inest ei naturalis quidam appetitus Corporis administrandi: quo appetitu retardatur quodammodo, ne tota intentione pergat in illud summum Caelum, quamdiu non subest Corpus, cujus administratione appetitus ille conquiescat.* Libros de Genesi complevit Augustinus eodem sermo tempore, quo *Retractiones* scripsit; ac proinde tum heic, tum ibi eandem quaestionem proposuit, atque heic pro suo modulo diremit. Scilicet is concedit, Iustorum Animas, non expectata Resurrectione Corporis, Caelesti Beatitudine donari: verum non eam plenam absolutamque arbitratur, qualis demum erit, quum pristinam societatem cum Carne recipiet. Neque Visionem Dei Iustorum Animabus negat; sed & istam ait nondum perfectam esse posse, neque parem illi, qua nunc Angeli fruuntur, sed tum futuram, quum *Anima hoc Corpus, jam non animale, sed per futuram commutationem spiritale, receperit, Angelis coaequata, Perfectum habebit naturae suae modum, obediens & imperans, vivificata & vivificans, tam ineffabili facilitate, ut sit ei Gloriam, quod sarcinae fuit.* Itaque non solum nihil ex hoc loco laeditur, sed inde roboratur Catholicae Ecclesiae dogma, quae lubens agnoscit, augendam Animae Beatitatem in Caelis, quum glorificata etiam Caro in illius consortium redibit. Augustinus vero in aliis bene multis locis sensit, in ipsa Resurrectione & glorificatione Carnis situm esse apicem Beatitudinis, reservatae mortalibus in Caelis.

Inquit

Inquit praeterea Burnetus, ab Augustino in Lib. IX. Cap. 3. Confessionum, statui Animam Nebridii amici sui ad plures profecti in *Sinu Abraham*. En *abdit*a quoque & *secreta Animarum Receptacula*, quae supra ab eo commemorata vidimus. Diu tamen est, perspectum a nobis fuisse, Burnetum nudis insistere vocibus. Ut autem dignoscat, quid haec vocabula significant, nulla ei cura inest. At Lector in Augustini Libris minime hospes, nullo negotio intellet, per *Sinum* quoque *Abrahae* (quo nomine *Receptacula* illa designantur) locum Beatitudinis in Caelis ab ipso indicari. Nam quamvis interdum sanctus Doctor *Caelum*, *Paradisum*, & *Sinum Abrahae* diversa loca censuisse videatur, attamen a nullo ex iis caelestem Beatitudinem & Visionem beatificam Dei exclusit. Nuper ille Lib. XII. Cap. 35. de Genesi ad Liter. fatebatur, Animas Iustorum nunc intueri *incommutabilem substantiam Dei*, utique in Caelo: sed non perfecte; tum vero perfectam evasuram esse Visionem, quum una cum Carne glorificata Spiritus *perget in illum summum Caelum*. Ergo Beatarum Animarum Mansiones omnes in Caelis sunt, sed non omnes in Caelo summo. Apud Deum, atque in Domo Patris illae beatam vitam degunt; sed tum in culmine Beatitudinis erunt, quum Resurrectio contingeret. Animum adverte ad eum ipsum Confessionum locum. Hoc idem evidenter ibi Augustinus tradit, dum ait; *Quidquid illud est, quod illo significatur Sinu, ibi Nebridius meus vivit. Nam quis alius tali Animae locus? Ibi vivit, unde me multa interrogabat homuncionem inexper- tum. Jam non ponit aurem ad os meum; sed SPIRITALE OS AD FONTEM TUUM, & bibit quantum potest Sapientiam pro aviditate sua, SINE FINE FELIX. Nec sic eum arbitror inebriari ex ea, ut obliviscatur mei, quum tu, DOMINE, QUEM POTAT ILLE, nostri sis memor. Quid sit, inebriari in altera Vita, habes Augustinum ipsum explicantem Enarrat. in Psalm. XXXV. num. 14. ad vers. Inebriabuntur ab ubertate domus tuae, quum scilicet Facie ad Faciem Deus a Sanctis conspicitur. Ergo Nebridius quidem in Sinu Abrahae, sed sine fine Felix, hoc est infinite Beatus, quia ad Fontem vitae inebriatur, & Facie ad Faciem Deum intuetur. Non ergo excusandae Burneti artes, qui loco illo Confessionum utitur ad substituendam sui aedificii molem; sed reliqua celat, unde molem ipsam, aeream plane, deijci manifeste conspiciamus. Neque heic tantum Sanctus Augustinus suam mentem aperuit. In Opusculo, sive Sermon. de Disciplin. Christian. Tom. VI. edition. Benedictini. inquit: Pretiosa in conspectu Domini mors Sanctorum ejus.*

ejus. Quidquid ergo est, quod exhorres in morte, omnino non exhorreas, si eos imitaris. Id age, ut Bonam Vitam habeas; & quaecumque occasio fuerit, ut ex eas de hoc Corpore, EXIS AD REQUIEM, EXIS AD BEATITUDINEM, QUAE NON HABET timorem, nec FINEM. En rursus quid sit Requies, videlicet Beatitudo, eaque sine Fine. Pergit Augustinus, idem confirmare exemplo Inopis illius, quem contigit mori, & efferrī ab Angelis in Sinu Abrabae, ac propterea in Beatitudinem illam, quae non habet Finem: Ad ista pertinet, quod idem Beatus Doctor praeterea habet Enarration. IV. in Psalm. XXX. num. 8. ubi ait: Abscondes eos in abscondito Vultus tui. Qualis est Locus iste? Non dixit: Abscondes eos in Caelo tuo. Non dixit: Abscondes eos in Paradiso. Non dixit: Abscondes eos in Sinu Abrabae. Multis enim nominibus Loca futura Sanctorum in Scripturis sanctis posita sunt. Vilescat totum, quidquid praeter Deum est. Qui nos tuetur in loco Vitae huius, IPSE POST ISTAM VITAM SIT LOCUS NOSTER. ERGO ERIMUS IN VULTU DEI ABSCONDITI. Sive ergo locum Caelorum appelles Caelum, sive Paradisum, sive Sinum Abrabae, Iusti ibi erunt in vultu Dei absconditi. Et quando? Post istam Vitam; non vero, uti Burnet excogitavit, post extremum Iudicium. Infra quoque eadem haurias ab Augustino scribente: Proteges eos in Tabernaculo tuo. Quod est Tabernaculum? Ecclesia huius temporis. Tabernaculum enim ideo dicitur, quia adhuc in hac Terra peregrinatur. Tabernaculum enim habitaculum est militum in expeditione positorum. Pugna in expeditione peregrinus, ut salvus factus in Tabernaculo, GLORIOSUS RECIPIARIS IN DOMO. Erit enim IN CAELO DOMUS TUA AETERNA, si modo bene in hoc Tabernaculo vixeris. Viden', ubi Tabernaculum sit, habitaculum peregrinantium? In hac Terra. E Tabernaculo secundum Augustinum pergitur ad Domum, & quidem Aeternam; non vero in alterum Tabernaculum extra hanc Terram, quale foret deserta illa habitatio, in quam Britannus Scriptor Iustorum Animas detrudit. Atque heic praeterire nolo, Sanctum Hilarium praecessisse Augustino in ejusmodi sententia. Explicans ille Psalmum XIV. Domine, quis habitabit in Tabernaculo tuo, aut quis requiescet in Monte sancto tuo: statuit, Tabernaculum esse Ecclesiam, in qua prior est habitatio. Christum vero esse Montem, in quo posterior est Requies. Primus gradus ad Caestiam ascenditibus, habitare in hoc Tabernaculo. Ex eo in Montem ascensus. Ad hunc mysticum Montem, subdit ille, post habitationem Ecclesiae scanditur, in illo IN DOMINI SUBLIMITATE REQUIESCITUR; in illo

cum

cum Angelorum choris, quum & nos fimas Dei Civitas, sociabimur. Aliud ergo neque Hilarius, neque Augustinus domicilium Iustorum perfectorum post mortem agnoscunt, nisi *Caeleste*, ubi *cum Angelorum choris in Domini sublimitate Requiescitur.*

Praeterea Sanctus Augustinus, an inter *Paradisum*, & *Sinum Abrahae* discrimen intercederet, decernere minime ausus est. *Utrum Sinus ille Abrahae* (sunt ejus verba in Epist. CLXXVII. olim 57. ad Dardaanum) *ubi Dives impius, quum in tormentis esset Inferni, Requiescentem Pauperem vidit, vel Paradisi censendus vocabulo, vel ad Inferos pertinere existimandus sit, non facile dixerim.* In Pauperis morte, vel *Requie* non sunt *Inferi* nominati: sed, *Contigit* (inquit) *mori Inopem illum, & auferri per Angelos in Sinum Abrahae.* Deinde ardenti *Livingi* dicit *Abraham*: *Inter nos & vos chaos magnum firmatum est, tamquam inter Inferos, Seseque Beatorum.* Non enim facile, alicubi *Scripturarum, Inferorum nomen positum invenitur in bono.* Tum addit, veri perquam simile esse, *Paradisum, & Abrahae Sinum* sub duobus nominibus idem significare; nam *generale Paradisi nomen est, ubi Feliciter Vivitur.* Propterea Enarrat. in Psalm. XXXVI. Sermon. II. num. 7. *Paradisum* sine haesitatione appellat locum, in quem ab Angelis ulcerosi Pauperis. Anima devecta fuit. Ubinam vero *Paradisus*? Si *Burnetum* audimus, extra Caelos, extra Regnum Caelorum, ignotis in locis, fortasse sub terra. Bene tamen cecidit, quod jamdiu errorem hunc infectatus est Augustinus Lib. II. Cap. 10. de Anima & ejus origine. Infantibus sine sacro lavacro morientibus pollicitus fuerat Vincentius Victor *Paradisum, non tamen ut Caeleste inducantur in Regnum, praecipue quia multas Mansiones apud Patrem suum Dominus profitetur.* Ad ista quid respondeat Augustinus, accipe. *Cernis hominem, inquit, Paradisum, atque Mansiones, quae sunt apud Patrem, a Regno separare Caelorum, ut etiam non baptizatis abundant Loca Sempiternae Felicitatis.* Nec videt, quum ista dicit, ita se molle baptizati cujuspiam parvuli *Mansionem a Caelorum Regno separare, ut ipsam Dei Patris Domum, vel aliquas partes ejus, inde separare non timeat.* Neque enim Dominus Jesus in universitate creaturae, vel in qualibet universitatis parte, sed in *Domo Patris mei, dixit, Mansiones multae sunt. Quomodo ergo erit in Dei Patris Domo non baptizatus, quum Deum patrem habere non possit nisi renatus?* En ubi statuat Augustinus *Paradisum: in Regno Caelorum.* Ibi multae *Mansiones: & quidem in Domo Patris mei, inquit Dominus; & quidem loca unaquaeque ineffabilis Beatitudinis,*

titatis, quamquam diversi gradus, diversae claritatis, pro diversitate meritorum, quia singulae mansiones in *Domo Patris*. Proinde sanctus idem Doctor infra Lib. III. Cap. XI. ad ipsum Vincentium Victorem scribens, ait: *Noli credere, nec dicere, nec docere: aliquas Mansiones esse extra Regnum Dei, quas esse Dominus dixit in Domo Patris sui, si vis esse Catholicus. Neque nunc opus est, quaerere, atque differere, utrum Regnum Dei, Regnumque Caelorum, cum aliqua differentia sit intelligendum, an res una sit duobus appellata nominibus. Mansiones autem aliquas constitutas in Domo Dei separare a Regno Dei, quam sit a veritate devium, puto, quod jam intelligas.* Infra Cap. XIII. Errorem rursus appellat, quo Vincentius Victor a Regno Dei Paradisum separare audet. Porro alibi, hoc est Lib. II. Quaestion. Evangelicar. Quaest. 37. sanctus idem Augustinus magnifice de Sinu Abrahae loquitur in haec verba: *Sinus Abrahae, Requies Pauperum beatorum, quorum est Regnum Caelorum, in quo Post hanc Vitam recipiuntur.* Immo is infra sub Lazari nomine significari posse Dominum ipsum putat, haec inter alia scribens: *Jam Sinus Abrahae intelligitur Secretum Patris, quo post passionem resurgens assumptus est Dominus.* Reliqua ibi vide, ut demum percipias, quum Augustinus de *Receptaculis*, de Sinu Abrahae, de Mansionibus loquitur, semper de locis sempiternae Beatitudinis loqui, & quidem in Caelo positis, atque in Domo Patris: quod etiam rursus inculcavit Tractat. LXVII. in Johannis Evangelium.

Et quamquam magnus Hipponensis Antistes non semel sensisse videatur, *Regnum Dei*, aut *Caelorum*, non idem esse cum *Paradiso*, atque in eo tantum Regno, quum Resurrectio advenerit, sperandam esse numeris omnibus absolutam Beatitatem, perfectamque Dei Visionem: ne puta, visum fuisse ipsi Paradisum ac Sinum Abrahae experiri Beatitudinis, Visionisque & Praesentiae Dei. Id supra ostendimus. Id rursus confirmatum eo. In eo ipso Libro XII. Genes. ad litter. quem nobis Burnetus frustra opposuit, auctor est Augustinus Cap. 32. Animam, quum de Corpore exit, non ad Corporalia, sed Incorporalia Loca ferri, sive *Poenalia*, sive *Quietis* atque *Gaudiorum*. Neque enim, ait subsequenti Cap. 33. *Abraham, vel ille Pauper in Sinu ejus, hoc est, in secreto Quietis ejus, in doloribus erat, inter quorum Requiem, & illa Inferni Tormenta legimus magnum chaos firmatum: sed nec apud Inferos esse dicti sunt.* Tum Cap. 34. postquam dixit, *Paradisum* dici posse *Tertium Caelum*, quo raptus fuit Apostolus, addidit: **Quanto magis ergo POST HANC VITAM etiam SINUS ILLE ABRAHAE PARADISUS DICI POTEST**, ubi jam nulla tentatio, ubi tanta Requies

post omnes dolores vitae hujus? Neque enim & LUX IBI non est propria quaedam, & sui generis, & profecto MAGNA &c. Haec etiam infra adtexit: Quapropter Animae illius Latronis, cui dixit: Hodie mecum eris in Paradiso, non utique Inferos praestitit, ubi Poenae sunt peccatorum: sed aut illam REQUIEM SINUS ABRAHAE; non enim alicubi non est Christus, quum ipse sit Sapientia Dei, adtingens ubique; aut illum PARADISUM, sive IN TERTIO CAELO, seu ubicumque alibi est, quo post Tertium Caelum est raptus Apostolus; si tamen non aliquid unum est diversis nominibus appellatum, UBI SUNT ANIMAE BEATORUM. Si vero nomine Tertii Caeli summum illud Caelum intelligimus, ubi Anima ipsam Dei substantiam, Verbumque Deum ineffabiliter valeat videre & audire: non incongruenter arbitramur, & illuc esse Apostolum raptum, & ibi fortassis esse Paradisum omnibus meliorem, & si dici oportet, Paradisum Paradisorum. Ita nempe in divinis Libris occurrit etiam Caelum Caeli, & Caeli Caelorum. Haec Augustinus, qui concordii sententia Tractat. XCI. in Johann. Evangel. de Domino Paradisum promittente Latroni ait: Secundum id, quod homo erat, Anima ejus ipso die futura erat in Inferno, Caro in Sepulcro. Secundum autem id, quod Deus erat, utique & in Paradiso erat. Et ideo LATRONIS ANIMA, a pristinis facinoribus absoluta, & illius munere jam BEATA, quamvis ubique sicut ille esse non poterat; tamen etiam ipso die cum illo IN PARADISO ESSE POTERAT, unde ille, qui ubique semper est, non recesserat. Propterea nimirum non ei fatis fuit dicere: Volo, ut, ubi ego sum, & illi sint; sed addidit Mecum. Nichil profecto intelligit, qui non intelligit, Augustinum firmissime credidisse, beatum illum Latronem adductum fuisse in locum inaeestimabilis Beatitudinis, in quo speciali modo Divinitas praesens, simulque visibilis esset. Quid enim novi, aut singularis Beatitatis pollicitus illi fuisset unigenitus Dei Filius, si non alia in Paradiso foret praesentia Divinitatis, quam quae ubique in universitate creaturae est, nullis mortalium oculis spectabilis? Idem quoque factum de Stephano Protomartyre scribit Augustinus Sermon. CCCXIX. alias 51. de Divers. ubi illum dicentem inducit: Domine Jesu, accipe Spiritum meum. Fecisti me victorem, recipe in triumphum. Dic Spiritui meo. Intra in gaudium Domini tui. Hoc est enim: Accipe Spiritum meum. Sed Spiritum illius quo accepit Jesus? In quam Mansionem, in quod Caelum Caeli? quis comprehendit? quis explicat? Vis audire compendio? Audi ipsum Christum: Pater, volo, ut ubi ego sum, & illi sint mecum. Esse, ubi est Christus, quae potest comprehendere cogitatio?

tatio? Cujus ad hoc explicandum sufficit sermo? Atque heic obiter animadvertite, non aliter in his duobus locis Augustinum interpretari, quam ego supra Cap. III. fuerim interpretatus, verba Domini in Evangelio Johann. XVII. 24. Rursus autem, quid sit esse cum Christo in altera vita, edisseruit Theologorum coryphaeus Augustinus Enarrat. in Psalm. XLVIII. Sermon. I. num. 10. ubi de Evangelico Epulone in ignem, & Mendico in Sinum Abrahae devedcto ait: *Sic desideravit ille guttam de digito, quomodo ille micar de mensa Divitis. Sed illius labor finitus est, & illius vita finita est. Labor hujus in aeternum. Vita illius in aeternum. Non heic habemus vitam, qui forte heic laboramus in terra: & non sic erimus postea. ERIT enim VITA NOSTRA CHRISTUS IN AETERNUM.*

Sed numquid unus ille Evangelicus Pauper, numquid Martyres tantum ad beatam in Caelis vitam deducuntur? Nunc sciscitari juvat ab ipso Augustino. Is Sermon. XIV. olim 110. de Tempor. pauperem superbientem, atque haec dicentem nobis exhibet: *Nestrum genus est, cui debetur Regnum Caelorum; non illi generi, qui induuntur purpura & bysso, & epulantur. Talis enim erat ille, ante cujus januam jacebat pauper ulcerosus &c.* Tum eloquentissimus Antistes tumorem istius castigat, non negando, quin serantur in Caelum pauperes, sed pauperes spiritu, quales etiam possunt esse divites. *Quid inflaris, ait, & non imitaris? Ego, inquit, pauper levor in Sinum Abrahae. Si superbis contra eos, qui habent pecuniam, & negas eos ad Regnum Caelorum pertinere; quum in eis inveniat humilitas, quae in te non invenitur: non times, ne tibi, quum mortuus fueris, dicat Abraham: Recede a me, quia blasphemasti me?* Et heic habes nullum discrimen statui inter Sinum Abrahae, & Regnum Caelorum; pariterque Augustini tempore communem fuisse sententiam, non differri ad consummationem Saeculi Beatitudinem, praecunte Lazari exemplo. Eos quoque infantes, qui post susceptum Baptismum e vivis abeunt, beatifica Dei Visione donari, scribit Augustinus Lib. I. Cap. XIX. de Peccator. merit. quum ait: *Verumtamen si percepto Baptismo de hac vita emigraverit, soluto reatu, cui originaliter erat obnoxias, perficietur in illo LUMINE Veritatis, quod incommutabiliter manens in aeternum, JUSTIFICATOS PRAESENTIA CREATORIS ILLUMINAT.* Locum supra nobis obiecit Burnetus ex Libris Augustini de Civitate Dei petitum, ubi *secreta Animarum Receptacula* memoratur. Sed quam inaniter nudis ille vocibus in suae opinionis praefi-

dium utatur, haecenus palam factum est. Ex non obscuris, sed clarissimis sancti illius viri, ex Opere ipso depromtis, poterat Britannus Scriptor ediscere, quae fuerit Augustini sententia de Justorum Animabus corporeo nexu solutis. Sub nomine *Mille Annorum* scribit ille Lib. XX. Cap. 9. de Civitat. Dei, significari a Johanne Apostolo in Apocalypsi tempus Ecclesiae ad finem usque Mundi. Tum inquit, *plerum Animas mortuorum non separari ab Ecclesia, quae etiam nunc est Regnum Christi*. Addit infra: *Quamvis ergo cum suis Corporibus nondum, jam tamen eorum ANIMAE REGNANT CUM CHRISTO, dum isti Mille Anni decurrunt*. Unde in hoc eodem Libro Apocal. XIV. 13. & alibi legitur: *Beati mortui, qui in Domino moriuntur. A modo & jam dicit Spiritus, ut requiescant a laboribus suis; nam opera illorum sequuntur illos. Regnat itaque cum Christo nunc primum Ecclesia in vivis & mortuis*. Propterea enim, sicut dicit Apostolus Roman. XIV. 9. *mortuus est Christus, ut & vivorum & mortuorum dominetur*. At quoniam Johannes dixerat de Martyribus: *Regnaverunt cum Jesu mille Annis*: Augustinus scribit, non de iis tantum haec enuntiari, verum & de reliquis in Domino morientibus. Ideo, inquit, *tantummodo Martyrum Animas commemoravit, quia ipsi praecipue Regnant mortui, qui usque ad mortem pro veritate certaverunt*. Sed a parte totum, etiam ceteros mortuos intelligimus pertinentes ad Ecclesiam, quod est Regnum Christi. Atque haec satis jam esse possunt, ut Lectori dubitatio omnis eripiat, an cum Ecclesiae Catholicae doctrina concors abierit immortalis ille Ecclesiae Doctor. Pauca tamen adhuc adjicere mihi liceat. Sub finem Enarration. in Psalm. XXXVIII. interpretatur Augustinus verba illa Davidis: *Remitte mihi, priusquam abeam; atque inter cetera ait: Respexit ergo BEATAM illam REGIONEM, BEATAM PATRIAM, BEATAM DOMUM, UBI PARTICIPES SUNT SANCTI VITAE SEM- PITERNAE ATQUE incommutabilis VERITATIS: & timuit extra ire, ubi non est esse; ibi desiderans esse, ubi est Summum esse*. En quo in loco nunc sint, & quanta Beatitudine Sancti fruuntur. Ac propterea intelligis, quid sibi velit idem Augustinus, quum patrem, cui mors unum e filiis surripuit, hortatur, ut elemosynas pro illo erogat, Sermon. X. alias 96. de Tempor. num. 20. ubi ita disserit: *Mortuus est, sed praecessit ad Deum; parsi ipsius pauperibus debetur: illi debetur, ad quem perrexit. Qua fronte venturus es ad filium tuum, qui praecessit, cui praecedenti non mittis partem suam in Caelum? An non potest mitti in Caelum?* In eodem

argu-

argumento iterum versatur Augustinus Sermon. LXXXVI. olim XLIII. de Divers. Cap. X. *Christianum*, inquit, *filium amisisti*. Non ergo amisisti, sed praemisisti. Mittatur ergo illi, quo praecessit ille: ad rem suam venire non potest. Res ejus ad eum ire potest. Vide cum quo sit. Si in Palatio militaret filius tuus, & amicus Imperatoris fieret, & diceret tibi: Vende ibi partem meam, & mitte mihi; numquid invenires quid responderes? Modo cum Imperatore omnium Imperatorum, & cum Rege omnium Regum, & cum Domino omnium Dominorum Est Filius tuus: mitte illi &c. Haec doctrina Augustini est, non qualem phantasia Burneri sibi finxit, non qualem is propinare nobis cupiebat, sed qualis etiamnum ab Ecclesia Catholica custoditur. Quod si quando videatur Augustinus ad Resurrectionem referre destinata Justis a Deo praemia: statuendum est, aut illi haec excidisse, quum Millenarii Regni opinione tenebatur, quam postea ejuravit; aut nihil aliud ipsum indicasse, nisi culmen Beatitudinis illius, qua Anima cum Corpore tunc in Regno Dei donabitur. Absolutissimam hanc Felicitatem in consummatione Saeculi Sanctis promissam, cui tamen praecessit Animae Justae Beatitudo, & Improborum poena in Inferorum igne, nos quoque agnoscimus. Agnovit & Augustinus, cujus sunt verba Tractat. XLIX. in Johann. Evangelium: *Habent ergo Omnes Animae*, ut ex hac occasione instruat *Caritatem vestram*, **HABENT OMNES ANIMAE, QUUM DE SAECULO EXIERINT, diversas receptiones suas. Habent GAUDIUM BONAE; MALAE TORMENTA.** Quale sit hoc *Gaudium*, qualia *Tormenta*, nos haecenus abunde perspeximus. **SED QUUM FACTA FUERIT RESURRECTIO, & BONORUM GAUDIUM AMPLIUS ERIT, & MALORUM TORMENTA GRAVIORA:** quando **CUM CORPORE** terquebuntur. Atque ex his tandem intelligis, quid ille significet, quum Enarr. in Psalm. 149. ait: *Quaere, qualis sit qui moritur, quo post mortem iturus est, non unde de vita exiturus.* Non inquit, post supremum Judicium, sed post mortem. Possem & plura alia ex Augustini Libris excerpta exhibere; sed haec satis superque.

CAP. XVIII.

Neque Gelasius Cyzicenus, neque Theodoretus Catholico Dogmati adversantur, immo adstipulantur. Quid sit Consummatio & Consummari in sacris Literis, quum de Animabus separatis a Corpore agitur. Explosum fragmentum Graeci Scriptoris, quem Cajum, aut Hippolytum nonnulli suspicantur. Andreae, & Aretbae Caesariensium Episcoporum, atque Oecumenii sententia a Catholica minime discors. Theophylactus cum ipsa plane concors. Quid senserit Euthymius Zigabenus. Graeculi quidam, & Armenii a Majorum dogmate declinantes.

Burnetum pag. 50. jaſtantem vidimus, neque dubitantem, quin *Patres Graeci generatim a partibus ſuis in hac cauſſa ſteterint*. Haſtenus hominem injurium veritati deprehendimus. Quae is ſubinde adtexit de Graecorum recentiorum Libris mutuatus, quanta poſſumus brevitate expendamus. *Gelaſii Cyziceni* Hiſtoriam de Concilio Nicaeno Lib. I. Cap. 23. laudat, quod ibi Macarius Epicoſopus Hieroſolymitanus dixerit, Philoſopho exponens incarnationem Verbi, Chriſtum deſcendiſſe *ſic K'ſur, in Haden*, ſive *in Infernum*, ut ſimilis vobis fieret per omnia: quae verba non Gelaſii, ſed Burneti ſunt. Gelaſius quidem haec haberet, ab eodem Burneto producta: *Deſcendebamus nos poſt mortem ad Inferos. Suſcepit Chriſtus & hoc, deſcenditque ſponte ad eos: non tamen detentus, ſicut & nos, ſed deſcendit tantum. Non enim erat ſubjeſtus morti, ſed mortis dominus. Quumque ſolus deſcendiſſet, cum multis rediit*. Atqui ne forcipe quidem adhibita aliquid pro ſe hinc exſculpet Burnerus. Id tantum Gelaſius in conſecta illa concertatione Macarii cum Philoſopho tradidit, ſcilicet Prophetas & Juſtos ante Chriſtum mortuos fuiſſe: & *eorum nemo, ſubdit Gelaſius, ſe ipſum a poteſtate mortis redimere potuit*. Venit *Salvator omnium*, atque nos redemit. Nos ante Chriſti adventum poſt mortem deſcendebamus ad Inferos, ibique erant Prophetarum & Juſtorum Animae. *Ad eos deſcendit Chriſtus; quumque ſolus deſcendiſſet, cum multis rediit*. Itaque non ſolum nihil haberet Gelaſius contra Catholicorum ſententiam; ſed etiam eidem ſuffragium praebet, innuens, Patrum antiquorum Animas per adventum Chriſti ab Inferis liberatas, atque una cum eo deinde

in Cac-

in Caelum ascendisse : quae veterum valde communis sententia fuit. *Theodoretum* quoque in aciem trahit *Burnerus* in *Commentar.* ad *Cap. XI. 40. Epistol. ad Hebr.* ubi exponens *Apostoli* verba, scilicet : *Hi omnes testimonio Fidei probati, non acceperunt remissionem, ut non sine nobis consummarentur*, in haec verba loquitur : *Eorum ergo fuerunt tot & tanta certamina : sed ii tamen Coronas nondum acceperunt. Expectat enim universorum Deus aliorum certamina, ut soluto studio, omnes, qui victoriam fuerint assequuti, simul victores renuntiet, & remuneretur.* Non dissimilia ad hunc locum tradiderat sanctus *Johannes Chrysostomus*, quem exscripsisse, ut in aliis solet, haec etiam videtur *Theodoretus*. Attamen supra meridiano Sole clarius vidimus, a *Chrysostomo* statui, multique in locis confirmari sanctarum Animarum Beatitatem in Caelis, antequam Corpora in Resurrectione recipiant. Quid ergo sibi vult *Theodoretus*? quid *Chrysostomus*? Non aliud, quam quod *Apostolus*. Is profecto in aliis locis, quae supra adduximus, Beatitatem Animarum, quae post mortem cum *Christo* sunt, sive praesentes sunt ad Dominum, satis expressit. Sed nondum *Consummatio*, nondum plena & perfecta *Corona* advenit. Hanc in fine Mundi tum nos, tum *Iusti* ante nos vita sancti, expectamus, & largiente Deo consequemur. Videlicet tunc *Caero* recepta glorificabitur : tunc totus *Homo* Coronabitur. Atque ad hunc ipsum sensum nos ducit vis ipsius vocabuli *Consummatio*. Neque enim aliud est Graecum verbum *Τελειω* ; sive *Consummo* ; nisi manum alicui rei postremam dare, ut nos vulgo dicimus ; hoc est perficere, sive ad perfectionem adducere, quod jam bene inchoatum fuerat. Eruditi tamen Interpretes abundant, quibus videtur dici ab *Apostolo* reservata huiusmodi *Τελειωσις*, sive *Consummatio*, non postremo *Judicio*, sed novi Testamenti temporibus ; nam ante Christum nemo ad Caelestem Gloriam admittebatur. Neque suis fundamentis caret eorum interpretatio. *Chrysostomus* vero, *Theodoretus*, ac alii ipsam referunt ad omnium hominum Resurrectionem : quo tempore jam inchoata & percepta in Caelis Beatitudo cum Carne resumta perficietur. Hanc autem esse *Chrysostomi*, aliorumque mentem, sexcentis possem locis evincere. Nam ex antiquis Patribus nemo ferme est, qui non agnoverit, saltem *Martyres Coronam* in Caelis a Deo consequi, mox ut e Saeculo emigrant. Saepe id professus fuit *Chrysostomus* : professus est & *Theodoretus*. *Libro VIII. de curand. affect.* Graecor. haec ejus verba sunt : *Si Caelum sedes illorum est,*
qui

*qui Pie vixerunt : hunc profecto finem sui cursus & Martyres jam Consequuti Sunt. His enim magis pium esse nihil potest. Infra addit: Ideoque majori sorte merito perfruuntur Martyres, qui nunc a cunctis late mortalibus honores amplissimos ferunt, & Aeternis sunt insigniti Coronis. Agnoscit ergo Theodoretus occultas illas Coronas, quibus Deus Animas Sanctorum post Corporis mortem donat in Caelis. Propterea Spiritus consummati memorantur ab Apostolo in Caelesti Hierusalem. Sed nondum consummatus ibi totus Justus, quia plenior Corona e Resurrectione expectanda est. Alibi eadem innuit Theodoretus, videlicet Lib. III. Cap. XV. Ecclesiastic. Histor. ubi gloriosum finem describit Juventini & Maximi Martyrum sub Juliano Apostata, haec inquit de impio Augusto: *Gravibus illor, atque acerbis tormentis excruciator, hac vita privavit; immo, ut verius dicam, infelicitate illius temporis liberavit, eisque Victoriae Coronas procuravit.* Ita Cap. XVI. subsequenti, Valentinianum postea Imperatorem, quod Juliani impia sacrificia fuerit aversatus, *Utrumque Regnum consequutum fuisse* asserit, Terrenum videlicet atque Caeleste. Vitam quoque Sancti Theodosii Anachoeni Abbatis describit Theodoretus in Philotheo Cap. X. atque hunc ait morientem *migrasse ad Choros Angelorum.* In eodem etiam Libro Cap. VIII. ipsum audi de Sancto Aphraate Anachoreta loquentem: *Ea, inquit, nunc quoque benedictione fruor, utpote qui credam cum vivere, & una cum Angelis ebros ducere, & majori, quam olim, apud Deum uti fiducia.* Nunc enim, deposito onere perturbationum animi, ut athleta Victoria positus, fiducia & libera loquendi facultate utitur *Apud Agonothetam.* Qui heic Agonotheta dicitur, sive certaminum moderator, & victorum Munerator, Christus Dominus est, cujus praesentia nunc fruitur, & a quo praemia victoriae sanctus ille Anachoreta recepit, ideoque *una cum Angelis in Caelo tripudiat atque laetatur.* Vide infra Cap. XXV. hujusce Disquisitionis meae, pari phrasi usum Nicephorum Gregoram in Vita Sancti Codrati Martyris. Denique Theodoretus in praelaudato Cap. VIII. ita in rem nostram loquitur: *Ac generosae quidem TRIUMPHANTUM ANIMAE CAELUM OBAMBULANT, & incorporeorum SPIRITUUM CHORIS INTERSUNT &c. Urbes & pagi eorum APUD univrsorum DEUM utentes interventus, divina per ipsos munera consequuntur.* I nunc, & si potes, Theodoretum in somnia Burneti consentientem tibi persuade. Si jam Martyres acceperunt repromissionem, eorumque Animas, Aeternis insignitas Coronis, Caelestis Beatitudo accepit: ergo Apostoli locum*

cum interpretari opus est *de repromissione Resurrectionis*, quam Sancti nondum acceperunt, *ἵνα μὴ χάρις ἡμῶν Τηλειωθῶσι*, hoc est, *ut non sine nobis consummarentur*.

Commemoratur etiam Burneto pag. 56. vetus fragmentum Graeci Auctoris (sive ille sit *Cajus*, sive alter perantiquus Christianus) ab Hoefchelio primum editum in Noris ad Bibliothecam Photii Codice XLVIII. Ibi Ἄδης *Hades*, *subterraneus Locus* appellatur, in quem tum Justorum, tum Injustorum Animae deducuntur, diversa tamen domicilia sortientes. Amoenum videlicet Justis conceditur, *Sinus Abrahæ* ab aliis appellatus. Improbis inferius habitaculum, terroribus plenum, assignatur. Eo in loco usque ad Resurrectionem continentur omnium Animæ. Ita in eo fragmento. Apud Hoefchelium *Josepho* Hebraeo, a Dodvvello autem per conjecturam *Cajo* Presbytero Romano tribuitur, quemadmodum suspicatus quoque fuerat Photius de altero pari Opusculo. Denique Stephanus le Moyne, & Johannes Albertus Fabricius in editione Operum Sancti Hippolyti Episcopi & Martyris, fragmenti hujus Auctorem opinati sunt eundem *Sanctum Hippolytum*. Sed quicumque is Auctor fuerit, apud amantes veri Theologos nullius ponderis futura est illius auctoritas, non ea solum de causâ, quod nihil certi habeamus, *Cajus-ne*, an *Hippolytus*, an quisquam alius, hæc literis consignarit; sed etiam, quod Visionarium & fabulosum Scriptorem heic habeamus, utpote qui Receptracula illa Animarum, earumque varia officia tam graphicis coloribus nobis pingit, perinde quasi ea loca suis ipse oculis lustrasset. Nemo hujusmodi Scriptorum institutioni se tradat. Quod pares fabulae in Opusculo de *Antichristo* occurrant, propterea non facile Eruditi Hippolyto Martyri illud tribuendum putant. Eoque minus hoc illi tribuendum est, quod Evangelio adverteret, Divitem Epulonem Igni jam traditum asserenti, quum in hoc Opusculo expertes adhuc flammæ Injusti dicantur. At nos immortalitatem Animæ accipimus quidem, & certa fide tenemus: Poenas quoque Improborum in Inferis jam inchoatas credimus; Justorumque Praemia amplectimur, sed *sub terra* negamus. Certiorem nempe habemus Apostolicum sermonem, quo hac in re fides nostra innitur; nam Justis *cum Christo* sunt; & Sancti, dum heic degunt, cupiunt peregrinari, id est separari a Corpore, & praesentes esse ad Dominum. Ad evidentiam vero supra ostendimus, communem fuisse sententiam, vel primis Ecclesiae Saeculis, Martyrum Animas in Caelum, atque ad Deum, ex hac vita emigrare. Neque ab ea Sanctum Hippolytum deviasse par est credere: quod nunc, nisi tot

Aa

ejus

ejus Libri periissent, facile, ut reor, dignosceremus. Praeter haec vidimus, *Sinum Abrahæ* non *Locum* esse, quum vocabulo illo designetur consortium cum Abraham patre credentium; & si quidem pro *Loco* accipere velis, ineffabilis certe Beatitudinis *Locum* esse dicendum, quem non *sub terra*, sive in *Inferis* quaeras, sed rectius in *Caelis*; & quem nemo tenebricosum carcerem, ut Pseudo-Hippolytus ille somniavit, sed admirabili luce recreatum credat. Atque heic animadvertas velim (quod supra praetermisi) *Sinum Abrahæ* ab eximio Doctore Ecclesiae Chrysostomo reputatum fuisse Regnum ipsum Caelorum. Homilia nempe XXVII. in Cap. VIII. Matth. interpretatur sanctus ille Antistes Domini verba: *Dico autem vobis, quod multi ab Oriente & Occidente venient, & recumbent cum Abraham, & Isaac, & Jacob in Regno Caelorum*; atque ita loquitur: *CAELESTE REGNUM* non suo nomine, sed *SINUM ABRAHÆ* appellavit. Et infra: *Adeo Patriarchas & Abraham admiratur ac laudat, ut SINUS EORUM ultimum BONORUM OMNIUM FINEM arbitretur ac praedicet*. Sed ubinam mentio Sinus Abrahæ in verbis Domini? Subintelligitur: idem quippe sonat *cum Abraham*, atque in *Sinu Abrahæ*. Causam rei minus peritis exponam. Sacris in Literis sub tropica imagine opipari Convivii describitur Aeterna Beatitudo in Caelis. Dominus Jesus Luc. XXII. 29. *Et ego, ajebat, dispono vobis, sicut disposuit mihi Pater meus, Regnum; ut edatis & bibatis super mensam meam in Regno meo*. Et in Apocalypf. XIX. 9. *Beati, qui ad Coenam nuptiarum Agni vocati sunt*. Idem quoque significat *Recumbere cum Abraham*: nam convivæ *Accumbere & Recumbere* ad mensam dicebantur. Honoratior locus principi convivii deferrebat. Qui propius illi assidebat, sive in lecto ad mensam jacebat, hic in *Sinu* illius *Recumbere* phrasi apud veteres nota dicebatur. Ita Johannes Apostolus *supra pectus Domini in Coena Recubuit*: quod idem est, ac si dicas, in *Sinu Domini* recubuit. Quae de hujusmodi more apud veteres, etiam Ethnicos, adnotarunt Eruditi non pauci, & praesertim Grotius, Hammondus, Varenius, & Clericus, omitto. Quare quum dicitur Lazarus in *Sinum Abrahæ* ab Angelis deportatus, nihil aliud ea phrasi significari credendum est, nisi ad Convivium Caeleste illum fuisse devecum, in quo apud Abraham statio non mediocris honoris decreta illi fuit. Itaque non *sub terra* Sinus Abrahæ locandus, sed in *Regno Caelorum*, ibi nempe, ubi ipsa veritas Christus pronuntiavit, Ethnicos etiam ad Fidem convertos accubituroidesse *cum Abraham*. Propterea ante Chrysostomum Caesariensis

sariensis Episcopus Eusebius *Sinum Abrahae* in nuper laudato Matth. Cap. VIII. 11. invenit, eoque nomine Beatorum Felicitatem in Caelis indicari ait. En ejus verba Lib. XIII. Cap. 10. Praeparation. Evangelic. ubi Apostoli auctoritate utitur: *Si terrestres domus nostra hujus habitationis dissolvitur, aedificationem ex Deo habemus, domum non manu factam, Aeternam IN CAELIS*. Et peregrinantes (sive migrantes) a Corpore, versamur (sive habitamus, aut habitatum imus) cum Domino. Uti etiam in eum sperantibus promissum est, qui (ἐν τοῖς κοινοῖς) *IN SINIBUS ABRAHAE, ISAACI, & JACOBI REQUIESCENT*, atque in ceterorum Prophetarum, Justorumque consorcio, qui inter Hebraeos Deo cari fuerunt, *IN BEATA VITA* longum aevum degent. Ecce ubi nobis quaerendus, nobis sperandus est *Abrahae Sinus*, non autem in Pseudo-Hippolyti somniis.

Suo quoque agmini Burnetus pag. 36. adjungit *Andream & Aretham Caesarienses Archiepiscopos*, qui Commentarios in Apocalypsin scripsere, non semel typis traditos. Arethas autem, qui Andreae Praedecessoris sui totum ferme Opus expilavit, haec scribit: *Haec est regio nobis inconspicua, sive nos latens, & notitiam fugiens, quae Animas nostras hinc emigrantes excipit*. Is deinde ad Cap. VI. ejusdem Apocalypseos de Animabus sub Altari clamantibus ait: *Propter haec Mundi consummationem expectere Sancti videntur, quoniam expectare atque moram ferre jubentur usque ad fratrum suorum mortem, ne ante illos, juxta divinum Apostolum consummentur*. Candidae autem *Stolae virtutum splendorem, qui illustri in illis existit, insunt*. Quo circumfusi, etiamsi promissiones nondum adepti sint, eorum tamen bonorum spe, quae spirituali oculo jam contemplantur, ab omni interim materia crassa liberati, merito laetantur, in Sinu Abrahae pacate requiescentes. Multorum enim *Sanctorum sententia est, unumquemque virtutis cultorem, Locum factis suis dignum post hanc vitam sortiri, ex quo de gloria sibi preeparata certam conjecturam facere valeat*. Non ab similia legas in Andreae Commentariis. Nescio, an magnum aliquid se attulisse putarit Burnetus, quum Scriptores hosce Graecos pro se laudavit. Illos Coccius, & alii quidam floruisse Saeculo post Christum natum Sexto sunt arbitrati. Caveus, Dupinius, & alii, homines incertae aetatis censuerunt. Et merito sane. Quod etiam subodorari possumus ex Cap. LII. Arethae, ubi *Babylonem magnam* appellat, non Romam veterem, sed novam, *Constantinopolim* videlicet, in qua olim colebatur *justitia*. Nunc autem in ea homicidae habitant, ex mutua conventionem, dum cives Laici Ecclesiasticis aequari contendunt, & ne aequales quidem fieri contenti sunt &c. Haec hominem produunt, qui inclinante

Graecorum imperio scribebat. Atqui pluribus conjecturis Oudinus adductus censet, Andream Saeculo Nono, & Photii temporibus vixisse. Sed quo revera tempore inter mortales versatus fuerit Arethas, diligentia atque eruditio Cl. V. D. Bernardi de Montsaucon Benedictini e Congregatione Sancti Mauri, nos edocebit; qui Lib. IV. pag. 275. Paleograph. Graecae, Codicem Graecum venerandae antiquitatis commemorat, in Regis Christianissimi Bibliotheca adservatum, & scriptum manu Baanis Notarii *Arethae Archiepiscopi Caesareae Capadociae, Anno Mundi 6422.* idest *Anno Christi DCCCCXIV.* Iis igitur temporibus vixit & scripsit Arethas Caesariensis, ac proinde non Saeculo Sexto, sed Decimo, sed post Schisma Photianum. Porro aevo illo quidam e Graecis coeperunt ceteris suae Sectae erroribus hunc etiam adjuicere, contententes nimirum contra majorum suorum, immo contra Catholicae Ecclesiae sententiam, Iustorum Animas non recipere repromissionem, sive mercedem laborum, nisi in consummatione Saeculi. Quid hoc quaeso ad nos? Non a Graeculis quibusdam recentioris aevi, sed ab antiquis & insignibus Ecclesiae Patribus, atque a vetusta Traditione petenda nobis est de statu Animarum doctrina. Ceterum nihil moror, an Arethas *Haden* appellarit *Regionem nobis ignotam*, atque *inconspicuam*, nam & supra vidimus, idem fuisse traditum a Tertulliano, Lactantio, & aliis, supra quorum tamen opinionem praevaluisse semper ostendimus Ecclesiae Catholicae sententiam. Accedit, quod ille hoc nomine non Carcerem, non Locum quemdam designavit sub terra situm, sed quidem *vitalis statum incorporeum & invisibilem Animarum*, uti nonnulli alii inter veteres censuerunt. Neque dicere ausus est, in eo desiderari praesentiam Christi Domini, qua Sanctos post mortem frui Apostolus significavit. Quae vero Andreas & Arethas scripsere ad Cap. VI. de expectata a Sanctis *Consummatione* Saeculi, ut & ipsi cum fratribus *consummentur* secundum Apostoli verba: jam non semel monuimus, referenda esse ad Corporis Resurrectionem, consummatamque Gloriam, quam Iusti post supremum Iudicium Carne quoque adipiscuntur. Neque aliter ii sensisse videntur, nisi discordes ipsos a se ipsis velimus. Nam ad Andream quod attinet, is Cap. X. ait: *Thronum in Caelo positum vidi. Per hanc autem sedem, Christi in Sanctis Requies designatur: siquidem in illis veluti in throno quodam insidet.* Et infra: *Per haec ostenditur, Thronum Dei nihil fere aliud esse, quam Regnum Dei,*

Dei, jocundamque in eisdem Sanctis Requiem. Cernit autem in Regno illo Seraphin &c. Tum Cap. LX. Martyribus, ait, iudicandi potestas data est, per quam Daemones, ut nostris oculis videmus; judicare non desinunt, usque ad praesentis Saeculi consummationem Glorificati cum Christo. Sub finem quoque Libri dilucidius ait in Apocalypsi demonstrari, quomodo Martyres cum Christo Regnent, Beatitudinemque etiam ante Antichristi adventum obtineant. Ergo Repromissio, exspectanda dumtaxat in fine Mundi, Gloriam tantummodo reditivae Carnis indicat, aut additamentum & complementum Beatitatis, quo tunc Iusti, Anima & Corpore simul conjunctis, donabuntur. Tradit etiam Caesariensis ille Andreas Cap. XLII. Beatos esse non omnes, sed illos dumtaxat, qui in Domino moriuntur, & Deo placuerunt. Talium namque ex Corpore exitus veram a laboribus Requiem adfert. Quod autem ex operibus nascitur, illud immarcescibilem Coronarum, gloriosorumque Praemiorum causa existit. At, inquires, Scriptor hic Cap. XVII. de Sanctis sub Altari quiescentibus, in haec verba loquitur: Interim usque ad fratrum suorum mortem, ne ante illos juxta Apostolum consummentur, moram istam patienter ferre jubentur. Splendore tamen circumfusi, etiamsi promissorum bonorum hereditatem necdum adepti sunt. Ita sane. Verum, quae subsequuntur, animadvertite. Eorum itaque, ait, bonorum spe, quae spiritali oculo nunc contemplantur, ab omni interea crassitudine exuti, merito Laetetur, necnon in Abrahae Sinu pacate Requiescere feruntur. Quid vero sit Sinus Abrahae Scriptori huic, is nobis edicat. Describit ille Cap. LVI. mysticas Agni nuptias, hoc est Beatorum vitam ac delicias in Caelis; atque inter cetera inquit: Quum varia & magna futuri Saeculi sint Bona, quae omnem mentem & cogitationem multis partibus superant, illorum usus & participatio variis multisque nominibus exprimitur. Quandoquidem praeter incomparabilem Gloriam, Splendorisque magnitudinem, Beatorum merces aliquando Regni Caelestis nomine designatur. Nonnumquam vero, quod Bonorum omnium copia, quae numquam deficiunt, affluat, & esculentorum spiritalium omnium apparatu abundet, Paradisus vocatur. Quandoque autem Sinus Abrahae appellatur, ea fortassis de causa, quod vita defuncti ibi sortiantur Requiem. Interdum denique Thalami & Nuptiarum vocabulo insinuantur &c. Verbis-ne meis indiget Lector, ut intelligat post haec, quid in superiori loco Andreas significet, quum ait, Sanctos nunc in Abrahae Sinu pacate Requiescere? Rursus vero, nisi ipsum velis

velis foedissime sibi met ipsi contradicentem, fateri cogeris, nihil ad-
versari praesenti Justarum Animarum Beatitati, quod ab ipso di-
citur, scilicet nondum Sanctos *Repromissionem*, seu *Hereditatem* ac-
cepisse. Et praecipue postquam ipse in Praefatione dixit, Anago-
gicum Scripturarum sensum convenire in homines vitali hac luce
perfusos, in quibus Carnis sensu motuque perfecte subjugato, solus
Spiritus Regnum obtinet.

Quod vero pertinet ad *Aetham*, vix alia illi mens fuisse potu-
erit, quum is Andreae Commentarios in suum paene transfude-
rit. Et profecto Cap. X. ad Apocalypseos verba; *Et abjicientes*
Coronas suas, IV. 10. haec ille adnotat: *Coronas misisse ante thro-*
num, victoriam prae se fert, quemadmodum & nunc videre est in
illis, qui vincunt certamina. Est porro insigne Regni Corona. Quid
igitur aliud isti, Coronas suas ante Thronum mittendo, indicant,
quam quod certum ac verum Regnum, & contra omnes obtentam
victoriam, Deo super omnia referunt? dicentes: Tibi, Domine, ab
omnibus gloria debetur &c. Qui haec scribit, num sustinere in po-
sterum poterit, Animas Sanctorum nunc in *Hade* (si locum hunc
extra Caelum statuas) concludi, ibique Gloriam expectaturas,
usquedum tandem adveniat in gloria Judex vivorum atque mor-
tuum? Non est mihi Graecus hujus Scriptoris textus, ut dili-
gentius expendam, quae is addit ad verba, nuper a Burneto pro-
ducta. Certe in versione, alioqui parum concinna, Maximi Flo-
rentini Monachi, edita Tom. IX. Bibliothecae Patrum, ista sub-
sequuntur: *Non oportet eos, qui libere & cum splendore fiducia-
liter Christum confessi sunt, lugere. Ob quam etiam confessionem e*
corruptibili hoc Mundo exire viriliter sustinuerunt, quique Nunc ad
Vitam Incorruptibilem & jocundam appulerunt, perinde ac satie-
tate hujus accepta, evulsionem ex satietate acceperint. Tenebrosa
sunt postrema haec, uti & subsequencia, quae propterea prae-
tergredior, aliisque in Graeco textu expendenda relinquo. Ad haec
Aethas Cap. XXII. ad illa verba: *Et stetit super Altare*, inquit:
Altare hoc Christus est, in quo omnis administratoria (idest Ange-
lorum) *Sanctaque* (nempe Sanctorum) *consistit Synodus, ac Mar-*
tirum victimae offeruntur. Atque hinc disce, quid sit apud *Aeth-*
tham, sub Altari. Et revera *Altaris* nomine designatum Domi-
num, non pauci alii tradiderunt. Tradidit etiam Andreas Caesa-
riensis, de quo nuper egimus. Tum Cap. XXXIX ad verba: *Hi*
sunt, qui sequuntur Agnum, Martyres laudat praeclaudatus *Aeth-*
thas, inquiens: *qui proprii sanguinis effusione, hac ratione, ut ab*
ipso

ipso possideantur, assequuti sunt. Enimvero quemadmodum Gloriam Manſiones variat sunt, ita & Supplicii. Propterea etiam dictum est, unumquemque propriam accipere Mercedem secundum laborem suum. Lucidiora sunt, quae idem Scriptor sub finem Cap. XLII. disserit ad illa verba: *Amodo jam dicit Spiritus. In hunc modum, ait, constructio est faciendae. Spiritus dicit: Scribe, amodo, perinde ac certantes inungens, pollicitatione videlicet, quod cessatura sint ea, quae illis laboriosa sunt; ipsi vero Bona illa Ineffabilia assequuturi sint. Simul atque enim e medio sublatis fuerint labores, Operum Retributio inducetur. Ergo statim post mortem agnovit Arethas Retributionem, hoc est Praemium & Gloriam Justorum. Gemina idem Scriptor tradidisse videtur Cap. LV. ubi ait: Quod vero post Lamentationem conversio facta sit ad Laetitiam, nequaquam eorum, qui in Mundo sunt, Canticum est; sed Caelestium (utpote deleti jam loco, ubi eis decertare contigerat) qui in typo victoriae Corona redimiti fuerant, sive Prophetae, sive Apostoli, sive Sancti, seu Pontifices, & si quis alius superest eorum Coetus, qui Deo placuerint, Gaudii numquam expungendi deinceps participes facti sint, indefessa & tranquilla Apud eum digni habiti Vita, qui numquam non iuste judicare novit, hoc est, laborum Rependere Praemia. Praeterea Cap. LXI. de Sanctis loquitur Dei amicis, qui ex quo neque capti sunt, neque per impudentiam, neque per opera mala insigniti, merito cum Christo & vixerunt, & Regnarent, idque usque ad consummationem. Quae ergo contra nos proferatur Scriptor iste, non assequor. Demum accipe quid Archiepiscopus idem Caesariensis (si tamen idem est) in Oratione, a Surio edita ad diem XV. Novembris, dixerit de Sanctis Martyribus Samona, ac sociis. *Conjuncti sunt cum Angelis. Transierunt ad Agonothetam (idest certaminis Arbitrum) Christum, sudore adhuc sanguineque ob exhaustos in stadio labores, certaminaque madentes. Porrigit eis dexteram egregius Munerarius, suosque Atletas in Aeternis Tabernaculis collocat. Sed quae sunt haec? Nempe ubi, quod suum est, unicuique Praemium pro merito Tribuitur. Et cujusmodi hoc, scire fortasse desideras? Eiusmodi nimirum, cui simile nullum tam ante Legem, quam in Lege quis possit ostendere &c. Talis beatis viris carius fuit; tantus labor; huiusmodi in terris periculum; huiusmodi Praemia celeberrimorum horum laborum. Si idem est Arethas iste cum eo, qui Apocalypsin interpretatus est, ipsum fatentem habemus, Martyrum Animas ad beatificum Christi Domini adspectum deductas, Praemio donatas, positaeque jam in aeternis**

nis

nis Tabernaculis. Quod si alter est, Presbyter tamen ejusdem Caesariensis Ecclesiae, aetate junior, nihilo fecius inde discimus, quae sententia vigeret in Ecclesia illa de Beatitudine Sanctorum.

Ad *Oecumenium* quod attinet, is Graecus Auctor, & quidem incertae aut inferioris aetatis fuit. Quod & ipse Apostolos *irremuneratos nostram expectantes ministrationem* dixerit, Apostoli locum ad Hebr. XI. 39. prae oculis habens, Burnetus illius auctoritate utitur. Sed supra non semel ostendimus (semperque repetendum est) *Consummationis* vocabulo designari Resurrectionem Carnis, & absolutam perfectamque Beatitudinem, quam quilibet Justus expectat, quum tamen interim Sanctorum Animae in Caelis Beatae requiescant. Et sane Oecumenius ipse in Cap. IX. ad Hebr. agnoscit in *Paradiso*, atque in Caelestibus deliciis jam partam piorum Spiritibus Beatitatem, quum veteres Patres a Christo in Caelum devectos affirmat. *Theophylactus* quoque accedat, qui, uti Burnetus post tot alios animadvertit, eundem Pauli locum exponens, scripsit, *nondum Sanctos assequutos esse Caelestium Bonorum promissiones*. Norunt Eruditi, floruisse & scripsisse Theophylactum Achridiae Archiepiscopum circiter Ann. Christi MLXX. atque adeo posterioris aetatis Auctorem esse, & in Graecorum Schismate enutritum: quare si ejus auctoritati multum deferre nollemus, nefas minime foret. Quamquam & ipse nihil aliud tradidit, nisi quod nuper innuimus de Carnis Resurrectione, & perfecta plenaeque Sanctorum Gloria ad postremi Judicii diem reservata, quo Corpora Animabus sociabuntur. Nam quae ibi Theophylactus adnotat, e Chrysostomo pro more depromsit, a quo jam vidimus apertissime tradi Animarum Beatitatem, etiamsi nondum advenit Corporum Resurrectio. *Non dixit* (verba Theophylacti sunt) *ut non Coronarentur, sed ut non Consummarentur*. Proinde tunc *Perfecti videbuntur*. Praeterea jam Nunc arrhabonem & pignus Honoris habent. Unde enim eis potestas esset, ut succurrere queant invocantibus se? unde ipsis, quod fiduciam intercedendi habent? Propterea idem Theophylactus Enarrat. in Cap. VIII. ad Roman. illam appellat *Perfectam Gloriam, quae est in incorruptibilitate Corporis*. Laudatur etiam Burneto alter ejusdem Scriptoris locus ad Cap. XXIII. Luc. ubi Christus Latroni Paradisum pollicetur. En Theophylacti verba: *Latro igitur Paradisum assequutus est, non autem Regnum Caelorum; assequetur autem, quando & ceteri omnes, quos Paulus enumeravit. Interea Paradisum habet impraesentiarum, spiritalis quietis Regnum*. Sed justa causa succensendi Burneto est, qui

qui in hoc etiam loco suis Lectoribus illudit, dum Theophylacti mentem, & quae pluris facienda erant apud illum, perverso consilio praetermittit. Haec enim ex aliorum tantummodo opinione Scriptor ille retulit; sed quanam postea sententia sibi probetur, deinde aperit, inquires: Haec quidem multi saepe numero dixerunt. Dicendum autem est, IDEM ESSE REGNUM CAELORUM ET PARADISUM. Nihil prohibet ergo, & Dominum vera dicere & Paulum. Nam Latro quidem est in Paridiso, hoc est in Regno, & non solus ipse, sed etiam Omnes, quos enumerat Paulus. Alioquin non frueretur perfecta Bonorum participacione. Nam sicut condemnati, in Regnis non sunt, sed in custodiis clausi tenentur in deputatis poenis; bonorabiles vero & in Regna ingrediuntur, & nunc in eis versantur: deinde quum venerit tempus distribucionis Regalium donorum, illa assequuntur; ita & Sancti, tamen si nondum Perfecite Bonis fruuntur, jam tamen in locis lucidis & fragrantibus, & Regiis denique Tabernaculis, etiamsi distributionem Regionum Bonorum nondum Perfecite assequuntur. Ita & Latro in Paradiso fuit, etiamsi nondum Perfecite acceperit, ut ne absque nobis Perfecitus, sive Consummatus sit. Et hoc opinor Verissimum omnium. Paulus autem Promissionem dicendo, Integram Felicitatem posuit. At illam nondum Integram acceperunt; & sunt in Regno ac Paradiso. En lucidissime expressam Catholicae Ecclesiae sententiam. En ut hic locus superiorem Arethae, Occumenii, atque ipsius Theophylacti locum explicat. Quare laudet qui potest Burnetum haec dissimulantem, ac satis prodentem, quanti apud se esset Veritatis amor. Praeterea Theophylactus Enarrat. in Cap. V. Secundae ad Corinthios, locum Apostoli: Audentes autem & scientes, quoniam, dum sumus in Corpore, peregrinamur a Domino &c. eadem ratione interpretatur, qua & nos supra faciendum ostendimus; idest: Valde desideramus exuere Corpus hoc, atque esse cum Domino. Non dixit, desideramus Immortalitatem adsequi; verum, quod praestantius est, cum Domino esse. Id enim plus est, quam Immortalitas. Ita Enarrat. in Cap. I. ad Philippenf. exponens Pauli locum; Mibi vivere Christus est, & mori lucrum, ait: Christum constituit sibi esse Vitam. Mori autem lucrum est, quia tunc apertius cum ipso versabor. Lucrum itaque mibi praebebunt, festinantes me ex hac vita ejicere, Christo, qui est vita mea, me allegantes &c. Quod si Theophylactum consulimus Enarrat. in Cap. XVI. Luc. quid sit Sinus Abrahae, continuo assequemur; inquit enim: Sinum autem Abrahae vocant complexionem, sive comprehensionem, (τὸν περισχόν) Bonorum, quae

regesta sunt Justis, qui a tempestate hujus maris ingrediuntur in Portus Caelestes: quoniam & in mari Sinus appellamus loca portubus & quieti apta. Hanc sententiam a Gregorio Nysseno in Lib. de Anim. & Resurrect. didicit Theophylactus. Eamdem quoque tenuit alter Graecus Scriptor Theophanes in Homil. VIII. ubi Sinum Abrahae non corporaliter accipiendum esse, sed quidem bonum Animae statum, in quo Verbum (scilicet Christus divina sua praesentia) Justos reficit ac recreat. Itaque Immensum Bonorum demonstrationem Sinus nomine indicat, ad quem omnes, qui vitae hujus navigationem cum virtute faciunt, postquam hinc solverunt, velut ad tranquillam Portum Animas appellant. En ergo quam insauktis a vibus ad Theophylactum se contulerit Burnetus, ut inde suffragium somniis suis peteret; & quam nullo jure Graecos Scriptores jactitarit veluti in suis castris militantes. Habemus heic praeter alios hactenus productos Theophylactum a nobis stantem, cui Theophanem quoque adjungendum cernimus.

Euthymii Zigabeni Graeci hominis Commentarios ad idem Cap. XXIII. Lucae, Burnetus subinde laudat, ubi Scriptor ille haec habet: *Latro ignorans, quod esset ejus Regnum, non ad determinatum aliquid & cognitum fecerat petitionem; sed solum per hujusmodi petitionem precabatur, ut Bonum aliquod consequeretur. Christus vero sciens ejus intentionem, promisit quod illi omnium optatissimum videbatur. Noverat enim Latro Paradisum e doctrina Mosaiica. Et tunc quidem dedit ei conversationem in Paradiso, tamquam archaonem Regni sui, quod est fructio ineffabilium ac aeternorum Bonorum, quae oculus non vidit &c. Nondum enim quisquam Justorum accepit promissionem, veluti magnus docuit Paulus. Postmodum vero & hoc tradet Regnum tempore universalis Retributionis.* Floruit Euthymius, ut omnes norunt, Anno Christi MCXVI. temporibus scilicet illis, quibus nemo sane nostrum veram Ecclesiae doctrinam expiscatum eat in Graeciam, posthabitis venerandis veterum Saeculorum Patribus. Graeculi tunc post Schisma a Romana Ecclesia factum, in varias opiniones secedebant, suae quique mentis arbitrium, non vero antiquam Ecclesiae Traditionem sectantes. Atque heic res poscit, ut aliquid innuam de eorum placitis ad statum Animarum pertinentibus. Erant enim inter eos, qui pravam putam Burneti opinionem induisse videntur, Justis Beatitudinem tunc solum conferendam rati, quum quisque mortali ad visibile Christi tribunal adstabit. Apud Canisum, atque in Tomo XXVII. Bibliothecae Patrum, editum habemus Anonymi

nymi Tractatum contra Graecos., Constantinopoli elaboratum Anno Christi MCCLII. in aedibus Fratrum Praedicatorum, tunc dominantibus Latinis. *Opinio eorum est*, scribit ille Anonymus, *quod neque in Paradisum bonae, neque in Infernum ante diem Iudicii vadunt Animae reproborum.* Sequentes quemdam hujus Haereseos Inventorem Archiepiscopum quondam Caesareae Cappadociae, *Andream nomine* (de qua nuper egimus) qui dicit, propria Corpora praestolari, ut cum eis, cum quibus boni vel mala commiserint, retributiones similiter factorum recipiant. Qui etiam ad confirmandam suam opinionem erroneam, auctoritatem Apostoli ad Hebraeos pro se introducunt, qua dicitur: *Et hi omnes non receperunt reprobissimam &c.* Ejusmodi errorem Anonymus ille impugnatur, prolata auctoritate Chrysostomi, atque Athanasii, quem postremum putat auctorem Quaestionum ad Antiochum. Deinde vero miratur, quae potuerint Graeci illi deficere a majorum suorum sententia, quum vel in ipsis Templorum suorum picturis Angelos exhiberent, deferentes Animas Sanctorum in Caelum: Unde, subdit, *quomodo nunc ad tantam dementiam devenerint, ut dicant, defunctos nec Paradisi perfrui gaudiis, nec cruciatibus Infernales pro varietate meritorum sustinere, nescimus, sed solum mirari possumus.* Praesertim quum de hoc Populi aures repleant in Ecclesiis in officio suo frequentato. Dicunt enim de Martyribus sic: *«Famississimi Martyres, vos terra non absorbit, vel occultat, sed Caelum suscepit; & intus existentes Ligno Vitae Remunerati estis: apud Christum intercedite»*, &c. Item: *«Vos, qui pro Verbo passi estis usque ad mortem Athletae, Animas quidem habetis in Caelis in manu Dei»*, &c. Item in eodem officio talia cantantur: *«Chorus Sanctorum invenit fontem Vitae, Januam Paradisi»*, &c. Item: *«Per vos, qui praedicantes Agnum Dei, occisi estis ut oves, & ad Vitam, quae sine senio est, & Sempternam transpositi estis. Hunc enim Agnum attentini, Martyres, petite, debitorum solutionem nobis impetranter.»* Item in officio mortuorum talia pro Defunctis vivant: *«Dona Requiem, Deus, famulis tuis, & ordina eos in Paradiso: ubi chori Sanctorum sunt, Domine, & Justi fulgent in Gloria.»* His ita se habentibus, quis eorum potest excusari de ignorantia? Haec ille Anonymus. Suspicio tamen mihi oborta est, an is intime satis in illorum Graecorum opinionem penetrarit. Vix enim fieri potest, ut adeo impudenter ii abjeterint omnium ferme Theologorum doctrinam, qui concordantes ab initio Ecclesiae ad nostra usque tempora tradiderunt, Improborum Animas post hanc

vitam in eum Flammaram ac Tormentorum locum detrudi, in quo Divitis Evangelici Animam cruciari exploratum habemus; & gloriosos Martyrum Spiritus Beata Vita in Caelis donari. Nihil fortassis aliud Graeci illius aevi sentiebant, quam quod alii Scriptores, ut saepe vidimus, crediderunt, videlicet desiderari adhuc a Sanctis integram illam Beatitudinem, quae Iustos in die Iudicii manet.

Affinia tamen, immo pejora, sensit ante aliquot Saecula Armeniorum gens, Christi olim nomen professæ. Catalogum errorum, quibus ille Populus imbutus fuerat, Benedicti XII. Papæ cura scriptum circiter Annum Christi MCCCXXXV. publici juris fecit Dominicus Berninus Tom. III. pag. 508. Histor. Haeres. Ibi inter alia num. 7. hæc leguntur: *Item quod dicti Armeni dicunt, quod Animæ hominum adultorum, qui mortui sunt, vel morientur post Christi passionem, vadunt in aere, vel in terra, quæ est juxta Paradisum terrestrem, vel alibi, ubi Deus ordinat ipsas manere, usque ad diem Iudicii, sive sint Christiani, sive non. Nulla tamen Anima ipsorum vadit ad Infernum, vel Paradisum Caelestem, vel Terrestrum, usque ad dictum tempus Iudicii &c. Item quod Armeni dicunt, quod Animæ puerorum baptizatorum, & Animæ multum perfectiorum hominum post generale Iudicium intrabunt in Regnum Caelorum, ubi carebunt omni malo &c. Non tamen videbunt Dei essentiam, quia nulla creatura eam videre potest: sed videbunt claritatem Dei, quæ ab ejus essentia manat, sicut lux Solis emanat a Sole, & tamen non est Sol. Et in dicta visione dictæ claritatis erunt diversi gradus, ita quod perfectius dictam claritatem videbunt Angeli, quam quicumque hominum: & Prophetæ & Apostoli. Denique num. 9. hæc ibi scripta leguntur: Item de pueris non baptizatis, & de non perfecte justis hominibus, qui scilicet non pervenerunt ad perfectionem Apostolorum, Martyrum, Confessorum, & Virginum, dicunt Armeni, quod post generale Iudicium ibunt ad Paradisum terrestrem & non caelestem, ubi carebunt omni molestia corporali, & delectabuntur inter Ligna Paradisi &c. Si & hisce Theologis uti in rem suam velit Burnetus, per me liceat. Sapientes profecto viri minime utentur: In tot errores ea gens declinavit, ut sana Ecclesiæ dogmata minime sint inde speranda. Vide duas Invektivas Magni Armeniorum Catholici Isaac adversus sui Populi errores, Anno, ut creditur, M.C.L. conscriptas, atque a Combessio editas in Auctario Patrum Tomo I. Invaluit præterea in aliorum Graecorum posterioris aevi Libris altera opinio, Animas scilicet Justorum in Paradisum recipi, at Paradisum suum esse extra Regnum Caelo-*

Caelorum: in quod postremum tantummodo immittentur, quum Christus Iudex in maiestate veniens ad eos dixerit: *Possidete paratum vobis Regnum*. Opinionis hujus, a nonnullis de beato Latrone loquentibus propositae, mentionem fecit Theophylactus, uti nuper vidimus, eamque veluti ab ipso Theophylacto adoptatam arripuit Burnerus: immerito tamen. Neque enim *Paradisum a Regno* Scripor ille sejunxit. At Euthymius in eam concessisse videtur. Quod etiam si demus, nihilo tamen secius inde continuo non sequitur, Euthymium assentiri Burneti phantasmatis. Nam siue is in Caelo atque in Regno Caelorum *Paradisum* statuatur, siue illinc ipsum excluderit: certum est, secundum Euthymii mentem *Paradisum* fuisse Locum deliciarum, atque admirandae Felicitatis. Neque Loco illi Beatitatem defuisse, verba Domini persuadent, dum Latroni dicit: *Hodie Mecum eris*. Propterea Euthymius addit: *Sed quomodo dixit: Hodie Mecum eris in Paradiso? Quia tamquam Deus, qui replet universa, ubique simul erat, & in Sepulcro, & in Inferno, & in Paradiso, & in Caelo*. Quod Dominus pollicitus fuit, inquit: *Mecum eris*, idem significat atque illud Apostoli, *Esse cum Christo, & Praesentes esse ad Dominum*. Tu-ne Beatam negabis Animam, quae posita in deliciis Paradisi, divina Christi praesentia & Visione illic persfruatur? Eundem quoque Scriptorem adi, ubi de Divite & Paupere Evangelico disserit Cap. LIX. in Lucam, ubi ait: *Peccatores quidem Iustorum vident fructiones, quo magis doleant, videntes quibus privati sunt Bonis*. Addit, *diviti additamentum Suppliciorum esse, videre Lazarum in tot Bonis*. Adfert etiam Gregorii Dialogi, idest Magni, verba, ubi de Iustis scribit: *Non dolent, quamquam compatientes sint: tunc enim fugit ab eis dolor, moeror, ac gemitus, ut pure Laetentur*. Quibus coloribus Beatitudo Caelestis delineatur Apocalypf. XXI. 4. Qui ergo ex ipsis Graecis *Paradisum a Regno Caelorum* distinguere videntur, non ab hoc Beatitudinem Animatum *Paradiso* adiungunt, neque ipsum extra Caelum, neque extra Regnum locant, uti paullo antea nos edocuit Theophylactus. Nempe beatam Iustorum vitam ante Iudicium extremum nonnulli statuebant in *Paradiso Caelesti*; integram vero & plenam Beatitatem in fine Mundi eis conferendam sub nomine *Regni Dei* designare consueverunt. Atque hoc idem Euthymius fortassis indicavit antecedenti Cap. L. in Lucam, ubi de Patrefamilias ostium claudente agit. *Ipsa Christus*, ait, *Paterfamilias intelligitur. Domus autem Regnum Caelorum*. Per hoc ergo quod sedet, &

det, & amicos Recipit, significatur usque ad Mundi consummationem expectare; & eos, qui digni sunt, Recipere. Per hoc vero, quod surgit, & ostium claudit, finis Mundi denotatur. Neque omitendum quod ipse Euthymius scribit Cap. LVIII. in Matth. ubi ad Lucae verba: Ideo & vos estote parati, quia qua hora non putatis, Filius hominis venturus est; inquit: De proprio autem sine dicunt quidam, quod unusquisque Christiano moriente adest Dominus cum sanctis Angelis, quando etiam rationem reddit Anima. Quibus verbis confirmatam vides interpretationem, quam supra ad eum locum adhibuimus, & quam Theophylactus quoque laudat. Denum quaecumque fuerit Euthymii sententia, nihil nostra interest scire, quando brevi demonstraturi sumus a praestantiori veterum Graecorum, immo & recentiorum choro, non differri usque ad finem Mundi Beatitatem Animarum Iustarum: a quorum sententia veri non videtur simile, Euthymium virum doctum discessisse.

CAP. XIX.

Bernardi Claravallensis peculiaris opinio de Beatitudine Sanctorum. A qua tamen is recessit. Catholicae sententiae luculentus & ipse adsertor plurimis in locis.

Restat nunc Sanctus Bernardus, grande Ecclesiae Gallicanae ornamentum, quem postremum Sixtus Senensis, Cardinalis Bellarminus, & alii, denique vero Burnetus, uti discordem a Catholicae Ecclesiae sententia exhibuerunt. Ejus verba accipito. Sermone III. de omnibus Sanctis: Advertisti, inquit, ni faller, tres esse sanctarum status Animarum. Primum videlicet in Corpore corruptibili. Secundum sine Corpore. Tertium in Beatitudine consummata. Primum in tabernaculis: secundum in atriis: tertium in domo Dei. Et infra subdit haec alia: In illam beatissimam Dei domum Animae nec sine nobis intrabunt, nec sine Corporibus suis, id est nec Sancti sine plebe, nec Spiritus sine Carne. Sermonem Quarto exponens Apocalypseo verba: Vidi sub Altare Animas interfectorum, haec habet: Interim sub Christi humanitate feliciter Sancti quiescunt, in quam nimirum desiderant etiam sancti Angeli prospicere, donec veniat tempus, quando jam non sub Altari collocentur, sed exaltentur super Altare. Sed quid dixi? Numquid humanitatis Christi Gloriam non dicam hominum, sed vel Angelorum

rum assequi quis poterit, nedum superare? Quoniam igitur modo super Altare dixerim exaltandos eos, qui nunc sub Altari quiescunt? Visione utique & contemplatione, non praelatione. Ostendet enim tunc nobis Filius, ut pollicitus est, semetipsum, non in forma servi, sed in forma Dei. Ostendet etiam nobis Patrem & Spiritum Sanctum, sine qua nimirum visione nihil sufficeret nobis. Haec Bernardus: cuius sane opinio de Humanitate tantum Filii Dei interim ab Animabus Iustorum spectanda, peregrina cuicumque videbitur. Neque enim quisquam antiquorum haecenus nobis occurrit, qui talia tradiderit. Verum ubi Lector non unum aut alterum Scriptorum locum, a ceteris avulsum (quae Burneti consuetudo fuit) adsumat, sed & reliqua colligat, & simul conserat: tunc eorum mens & consilium probe elucescit. Id & nos experiamur: quo facto liquebit, ut spero, nihil praesidii Burneto collocandum fuisse in Sancti Bernardi verbis. Et primo praeclarissimus Claraevallensis Abbas diserte testatur, secundum peculiarem Opinionem suam ea se proponere, quae nuper legimus: scilicet neutriquam contendens, hanc esse certam, eoque minus esse hanc Ecclesiae mentem. *De Altari illo Caelesti* (inquit in exordio ejusdem Sermone IV.) *tempus est, ut jam dicamus, quod de eo nobis sentire datum est, sine praesudicio sane, si cui forte aliter fuerit revelatum.* Et infra: *Altare ipsum, de quo nobis habendus est sermo, ego pro meo sapere nihil aliud arbitror esse, quam Corpus ipsum Domini Salvatoris.* Non ergo haec statuta Bernardi sententia. Quicumque ad sacras Literas interpretandas se confert, nunc unam, cras alteram expositionem praefert; atque alias subinde etiam, si opus est, excogitat: sed non ita comparatus est, quum de caliginosis locis disserere cogitur, ut firmissime in una consistat; reliquorum vero sententias ita veneratur, ut eas anteferri posse suae non dubitet. Itaque non plus deferendum opinioni Bernardi, quam ipse voluerit: eoque minus censendum est, fuisse hanc sententiam Ecclesiae, quum singularem suam ipsemet aperte appellavit. Tunc autem pendente adhuc postremo hac de re Ecclesiae decreto, nefas minime erat, quam quisque veller, opinionem tueri. Secundo, ne ipse quidem sanctus Abbas Beatitudinem Animabus Iustis negavit tempore ipso decurrente inter eorum mortem, & Resurrectionem Corporum. Nam *Akrabae Sinus*, in quo praesens Sanctorum Requies, sine dubitatione credendum ait situm in luce multa, atque in Caelo. Addit, intueri ibi Sanctos Humanitatis Christi Gloriam, in quam nimirum desiderant Angeli ipsi proficere. Paria dixerat Sermo. I. in eodem Festo omnium Sanctorum,

rum, de Christo inquit: *Totus desiderabilis, in quem non solum Populi, sed & ipsi quoque Angeli sancti desiderant profluere. Nimirum hae sunt deliciae Angelorum.* Vide heic, quanti esset Bernardo, Christi nunc in Caelis beatissimi Visio atque Consectus. Infra quoque addit: *Beati mundo corde, quoniam ipsi Deum Videbunt. Beati plane, & omnino Beati, qui Videbunt, in quem desiderant Angeli profluere, quem Videre Vita Aeterna est.* Quibus verbis habuisse prae oculis Bernardus videtur Salvatorem dicentem Johann. XVII. 24. *Pater, quos dedisti mihi, volo, ut ubi sum Ego, & Illi sint Meum, ut videant Claritatem meam, quam dedisti mihi.* Idem est Claritas atque Gloria: hanc autem conspiceret Beatitudo est. Atque hanc ipsam Beatitudinem rursus agnovit Bernardus Sermone II. in Sanctorum Animabus ad Caelum translatis; nondum tamen perfectam neque consummatam dicit (quod & nos fatemur); expectanda quippe consummatio est post Resurrectionem Carnis. Sunt haec ejus verba: *Operae pretium puto de communi Sanctorum omnium Felicitate, in qua Beata jam Requie perfruuntur, & futura, quam praesolantur, Consummatione, sermonem facere &c.* Propterea infra inquit: *Consummato militiae tempore gaudium habent Sancti etiam in spiritu suo &c.* Conversatio nostra IN CAELIS est. Verumtamen non sic nostra, sicut ipsorum. Ipsorum enim substantia IBI est; nostra autem desideria. Ipsi per *PRÆSENTIAM*, nos per memoriam IBI sumus. Itaque de Sanctis vita funditis testatur dictum a Johanne in Apocalypsi. XIV. 13. *Beati mortui, qui in Domino moriuntur &c.* Licet non plenam, habent tamen laetitiam multam in corde suo, donec veniat dies illa, qua implebit eos laetitia cum vultu suo &c. Quanta est Felicitas eorum, quam immensa Laetitia! Longe aliter afficiuntur in hujusmodi meditationibus, & multo amplius delectantur, quam nostra aut cogitatio capere, aut explicare queat oratio. Audi enim, quomodo labores Propbeta inculcans & multiplicans verba, nec tamen sic dignis magnificare valens quod intendit: *Quam magna, inquit, multitudo dulcedinis tuae, Domine, quam abscondisti cernentibus te! Quid tamen addidisti? Perfecisti eis, qui sperant in te, in conspectu filiorum hominum.* Est ergo multitudo dulcedinis (in praesenti videlicet Justorum Gloria) quae abscondita est, Magna quidem, & Magna Valde, necdum tamen Perfecta; quoniam in manifesto Perficietur, non in abscondito, quando non sub Altari requiescent Sancti, sed super thronos tamquam Iudices residebunt. Perfectionem igitur caelestis Felicitatis statuit Bernardus in resurrectione Corporis glorificandi, quum tamen interim ineffabilis Gloria non desit Justorum Animabus. Neque enim (ait ille Sermone III.) praestari de et integram Beatitudinem, ducit

donec sit homo integer, cui detur. Acceperunt tamen Iusti jam singulas stolas; sed non vestientur duplicibus, donec vestiamur & nos. Stola prima ipse est, quam diximus, Felicitas & Requies Animarum; secunda vero Immortalitas & Gloria Corporum. Propterea addit, Sanctos expectare Carnem, quia ipsorum sine ea compleri Laetitia, perfici Gloria, consummari Beatitudo non potest. Adeo siquidem viget in eis desiderium hoc naturale, ut necdum tota earum affectu libere pergant in Deum. Haec ex Augustino Bernardus. Quae is deinde subdit, Visionem Dei ipsis Animabus concessam indicare videntur. Unde, ait, & beatus Iohannes, qui multa nobis de eo statu, in quo feliciter beatæ Animæ Requiescunt, per spiritum reſeravit. Sine macula, inquit, sunt ante Thronum Dei. Sine macula, inquam, sed necdum sine ruga, donec veniat dies, quum sibi gloriosam Christus exhibebit Ecclesiam. Confer ista cum Burneti opinionem, quæ Sanctorum Animas ad vilem somnum & inactionem, eamque nescio quibus in latibulis extra Cælum damnat; atque an cum illo Bernardus faciat, extemplo decernes.

Quod tamen præcipuum est, perpenſo accuratius hocce argumento, simulque conlatis tot aliis ejusdem sancti viri locis, necesse est decernere, aut non eam, quæ primo adſpectu videtur, fuisse Bernardi opinionem, aut ipsum ab ea meliori consilio recessisse. Eum quippe alibi, immo & in ipsis Sermonibus de Feste omnium Sanctorum, habemus cum Ecclesiæ Catholiciæ doctrina omnino concordem. De Martyrum prærogativa loquitur ille Sermon. I. de eodem Feste. Hos sine mora in Caelestem Beatitatem immisos, in Ecclesia Dei creditum semper fuisse, ad satietatem usque ostendimus. Non alia fuit Bernardo sententia, qui de iis a Domino pronuntiatum ait. *Gaudete in illa die & exsultate: ecce enim Merces vestra Copiosa est in Caelis.* Immo Bernardus tantæ etiam sortis participes facit voluntariam paupertatem pro Christo amplexos. *Verumtamen, inquit, quid sibi vult, quod eadem promissio facta est Pauperibus & Martyribus, nisi quia vere Martyrii genus Paupertas voluntaria est?* Beatus vir, ait Prophetæ, qui post aurum non abiit &c. Denique propterea Pauperibus pariter & Martyribus Regnum Cælorum promittitur, quia paupertate quidem emitur, sed in passione pro Christo ABSQUE OMNI DILATIONE percipitur. Tum Sermon. V. de eodem Feste Martyres primo commemorat, qui post multos agnes jam NUNC TRIUMPHANT IN CAELIS CORONATI. Duplex etiam Sanctorum genus agnoscit, e quibus alii versentur in Cælo, alii adhuc in terra decernit; alii qui-

Cæ

dem

dem secundum Consummationem Sancti vocentur, alii juxta solam adhuc praedestinationem. De postremis dictum ait: *Timeate Dominum, omnes Sancti ejus*. De jam Consummatis, & in patriam receptis subdit: *Longe aliter Beati, in quibus jam perfecta Caritas foras missi timorem; nec jam timent ambulant in viis, sed laudant potius habitantes in Domo, sicut idem ait: Beati, qui habitant in Domo tua, Domine: in saecula saeculorum laudabunt te*. Hocce autem tuto laudari posse inquit: siquidem non est quod laudare vereamur verissime certissimeque laudabiles: non est, quod glorificare cunctemur sic **ABSORPTOS IN GLORIA**, ut nostra omnino nequeant laudatione moveri. Eos quoque ita in laudem Creatoris intentos & extentos, in quo nimirum **TO TA EIS REPOSITA EST BEATITUDO**, ut mutuis numquam vacare laudibus possint. Infra eloquentissimus, simulque Dei amantissimus Abbas, prae oculis, ut reor, habens Sancti Cypriani Opusculum de Mortalitate, nos urget ad conquirendum in beatissima illa vita Sanctorum consortium. *Conversatio nostra, inquit, in Caelis est; verumtamen non sic nostra, sicut illorum. Ipsorum enim substantia ibi est; nostra autem desideria. Ipsi per Praesentiam; nos per memoriam ibi sumus. Quando & nos addemur ad Patres nostros? quando essentialiter praesentabimur eis? Hoc enim primum desiderium, quod in nobis Sanctorum memoria vel excitat, vel incitat magis, ut eorum tam optabili societate fruamur, & MEREAMUR CONCIVES ET CONTUBERNALES ESSE SPIRITUUM BEATORUM*, misceri coetui Patriarcharum, cunctis Propbetarum, senatui Apostolorum, Martyrum exercitibus numerosis, Confessorum Collegiis, Virginum choris: **IN OMNIUM** denique colligi & collectori COMMUNIONE SANCTORUM. Haec Bernardus, admirandi ingenii vir raraeque sanctitatis, antiquis Patribus aetate longe minor, merito autem & eloquentia illis profecto aequandus. Sed percontaris-ne, an Sancti in Caelo degentes, beatifica Dei Visione donentur? Aures eidem Bernardo praebe, qui infra ait, quaerendum nobis esse Deum in jejunio & fletu; non ita vero Sanctis, qui jam transierunt ex hoc Mundo ad Patrem; nam de illis dictum fuit: *Iusti epulantur in Conspectu Dei & delectantur in laetitia & exultatione. Qui nondum Iustus est, nonnisi in jejunio & fletu Eum reperiet. JUSTUS autem, qui JAM CONSPECTUM MERUERIT, non qui adhuc rivat ex fide, in laetitia & exultatione*. Pergit infra dicere: *Equidem utrisque est Caput unum, sed non uno modo membris omnibus exhibetur. Quibusdam enim ascenditur caput hirsutum spinis, inclinatum in Cruce, ut humilientur pariter & compungantur. Quibusdam gloriosum apparet, ut ab ipso glorificentur, ut in ipso glorientur, facta ei similia, QUEM VIDENT, SICUTI EST.*

EST. Num clariora de sententia illius documenta desideras?

Neque suspicio alicui oboriatur, tribui a Bernardo tam grandem praerogativam Martyribus unis. De reliquis etiam Sanctis id ille certissimum censuit. Anno Christi MCXLVIII. hoc est quatuor aut quinque ante ipsius Bernardi obitum Annis, ad meliorem vitam pertransiit in Claraevallensi Coenobio Malachias Episcopus in Hibernia. Amicum, sanctumque virum geminis Orationibus laudavit Bernardus, in quarum prima eum inquit *evocatum ad Caeleste Palatium, jam Concivem Sanctorum, & Domesticum Dei*; de quo dictum fuit: *Quum dederit dilectis suis somnum, ecce Hereditas Domini*. In altera de ipso ait: *Dilectus a Deo & hominibus, non immerito hodie Malachias in Consortium Angelorum recipitur, re adeptus, quod nomine dicebatur. Et quidem ante Angelus erat non minus puritate quam nomine; sed nunc felicius gloriosi in eo interpretatio nominis adimpletur, quando PARI CUM ANGELIS GLORIA ET FELICITATE LAETATUR*. Addit infra: *Sanctus Pontifex hodie per semetipsum introivit ad Altare Dei, ipse hostia & Sacerdos. Assumptus & in Sanctam Civitatem, & pergit TOTUS IN DEUM, & ADHAERENS ILLI, unus est cum eo spiritus in aeternum*. De illo quoque ad Fratres in Hibernia scribens Epistol. 374. ait: *Praevenit nos ad Patrem spirituum Spiritus Patris nostri. Ejus vero Animam sanctam alloquens, haec adjicit: Absit autem, ut tua nunc, o Anima sancta, minus efficax aestimetur oratio, quando Praesenti vividius supplicare est Majestati, nec jam in Fide ambulas, sed IN SPECIE REGNAS. Absit, ut imminuta, nedum exinanita tua illa operosa Caritas reputetur, quum ad Fontem ipsum Caritatis Aeternae procumbis, pleno hauriens ore, cujus & ipsa prius stillicidia sitiebas. Qui stilum sacrarum Literarum, & Ecclesiastici eloquii phrales novit, in his habet disertissimam Bernardi confessionem de Visione Dei, Sanctis, simul atque ex hac valle emigrant, conlata in Caelis. Ita Sermon. XLII. de Divers. luculentissime depraeedicat doctrinam Catholicae Ecclesiae, tria loca agnoscens, quae Mortuorum Animae pro diversis meritis sortiuntur, Infernum, Purgatorium, Caelum. QUI IN CAELO SUNT, GAUDIO GAUDENT AD VISIONEM DEI, Christi fratres in natura, coheredes in Gloria, similes in aeternitate jucunda. Eandem sententiam ille confirmat Epistol. XCVIII. inquires: Nostri autem Martyres cupiunt Dissolvi, & Esse cum Christo: certi, ubicumque est corpus, illo sine mora congregatum iri & aquilas. Mox, inquam, IBI EXSULTANT JUSTI IN CONSPECTU DEI, &*

deleantur in Laetitia. **IBI, IBI, benionissime Iesu, IBI STATIM** ut de hoc Saeculo nequam, **SANCTUS QUIQUE** eripitur, **ADIMPLETUR LAETITIA CUM VULTU TUO.** Una ibi vox júbilo resonat sempiterno, vox una exultationis & salutis in tabernaculis Ju-
 storum. Nec putemus solos Martyres esse dilectos. Beati mortui, qui in Domino moriuntur. Non soli, qui pro Domino, sicut Martyres; sed & qui in Domino moriuntur, sicut Confessores, profecto Beati Sunt. Sic in Sermone de obitu Humberti Monachi, de ejus Anima haec habet: Volat ad Creatorem suum, quem tam ardentem concupierat. Tum ipsum alloquens, Ecce, ait, jam Coram Te Est, Pater dulcissime, Fons ille Puritatis, quem tanto ardore sitiebas: ecce immersus es in illam divinae pietatis abyssum, cujus memoriam abundantiae pietatis tam devote eruere solebas. Sed potissimum adeas velim Sermonem II. in Natali Sancti Victoris Confessoris, ubi praeter alia multa de eo splendidissima ait num. 4. **JAM CAELOS INGRESSUS**, quos & ante apertos beatis oculis suspiciebat, **VERE NUNC REVELATA FACIE SPECULATUR GLORIAM DEI**, absorptus quidem, sed non oblitus clamorem pauperum. **BEATA VISIO**, qua in eandem imaginem transformatur de claritate in claritatem, tamquam a Domini spiritu. Sunt & alia id genus, quae ex melliflui Patris Libris excerpere quisque per se potest: ego vero, ne nimius sim, praetermitto. Sat lucis jam nobis est, ut merito asfirmemus, aut a priori illa sententia Bernardum meliora edoctum abscessisse; aut quum in ea fuit, nihil aliud significare voluisse, nisi quod toties inculcavimus uti familiare antiquis Patribus: scilicet nunc quidem ad Beatitudinem & Visionem Dei Sanctorum Animas Corpore solutas advolare, ibique ineffabili, sed non perfecta Felicitate frui in Conspectu Dei; sed tum demum consummandam, complendamque fore eorum Beatitatem, quum in fine Mundi mortale hoc induerit incorruptionem, & totus homo, qui Deo placuit, coronabitur. Neque conjecturis tantum rem ago: Sanctus ipsemet Bernardus suam hanc esse mentem alibi aperuit, hoc est Sermone LXXXVII. editionis Mabillonianae. Ibi de Contemplatione Dei differens, tres illius modos pro diverso statu temporum in Sanctis agnoscit. Et primo quidem, ait, vocatur cibus, secundo petur, tertio ebrietas. Prius comedunt, dum in Carne adhuc corruptibili degunt. Postmodum vero **CORPORE EXUTI, ET IN CAELUM TRANSLATI**, jam bibere dicuntur eadem, quae prius comederant; quia **JAM PER SPECIEM CONTEMPLANTUR** sine labore, quae prius per Fidem crediderant, dum in Corpore positi peregrinarentur a Domino.

Manu

Manu jam tenes, a praesenti Justorum Beatitudine minime Bernardum exclusisse Visionem & contemplationem Dei, quae *per Speciem* fit. Verum haec sancto viro in consummatione Saeculi augenda, perficiendaque uberius creditur. Propterea subdit: *IN HOC ergo STATU postii SANCTI bibere quidem possunt, sed inebriari non possunt: quoniam A PERFECTISSIMA CONTEMPLATIONE DIVINITATIS QUODAM MODO RETARDANTUR, DUM ADHUC RESURRECTIONEM CORPORIS IN FINE SAECULI PRAESTOLANTUR.* Hanc sententiam, ut supra vidimus, antea tradiderat Augustinus: hanc Augustini studiosissimus Claraevallensis Abbas suam fecit. Proinde dicere pergit: *Resurrectione facta, ita Corpus Menti, & Deo Mens inhaerebit, ut jam deinceps nihil sit, quo ab interna ebrietate Contemplationis revocari possit.* Quamobrem nihil est, cur Burnetus, aut quisquam alius, in praesentem controversiam invitum trahat Bernardum, quando eximium virum tot in locis habemus cum dogmate Romanae Ecclesiae prorsus concordem, ut is prae ceteris sit testis veritatis ejusdem, quam nunc inquirimus.

C A P. X X.

Praesentem Justorum Beatitatem in Caelis agnoscunt Sancti Basilius Magnus, Gregorius Nyssenus, Ephraem Syrus, & Gregorius Nazianzenus. Quid huic Sinus Abrahac fuerit.

ATque haecenus quam parum, quam nihil valeant copiae, quas pro sua opinione Burnetus in aciem eduxit, jam, ut spero, Lector animadverterit. Nunc interruptum iter repetamus. Complures jam vidimus ex antiquis Patribus in idem dogma aperte consentientes, quod Ecclesia Catholica tuetur. Eos ipsos, quos pro se laudavit Burnetus, nobis potius, aut unis nobis, militare deprehendimus. Ad reliquos haecenus mihi insalutatos, atque ad Saeculum a Christo nato Quartum spectantes, quos ille caute, sive subdole declinavit, nostra demum revertatur oratio. *Sanctus Basilius Magnus* elogium Barlaami Martyris circiter Annum Christi CCCLXXII. contexens, exsultare Martyres inter tormenta ait: *Nam desiderium felicioris vitae jugulationis dolorem extinguit. Pericula non respicit Martyr: Coronas respicit. Plagas non borret, sed Praemia numerat.* Prostat etiam ejusdem sancti Episcopi Homilia de Quadraginta Martyribus. Qualis spes foret in beatis illis Dei Athletis, ibi prodit; non praemii ad complura annorum millia differendi, uti

Bur-

Burnetus aëvo nostro vendicat ; sed Praemii ineffabilis continuo post mortem accipiendi . Ad Imperatorem dona offerentem manus ex iis Martyribus dicebat : *Vides hoc Caelum ut aspectu pulcrum , ut magnum ; & Terram quanta est , quotve in ipsa mirabilia ? Nihil horum , Iustorum Felicitati ac Beatitudini equiparari poterit . Illa namque velociter transeunt : haec Perpetuo durant , Unam tantum iustitiae palmam expecto ; circa unam Gloriam , quae in Regno. est Caelorum , sollicitor . Martyres autem hyberno frigori expositi hisce animos sibi addebant : *Acris est hyems , sed dulcis Paradisus : affligens Glacier , sed delectabilis Requies .* Brevi tempore durantes , Sinus Abrabae nos Perpetuo fovebit . Unam noctem cum Aëvo Sempiterno commutabimus . Aduratur frigore pes , ut cum Angelis Perpetuo tripudiet . Diffuat frigore manus , ut liberam facultatem habeat se AD DEUM attollendi . Fiat sacrificium nostrum coram te , Domine , & nosmet hoc saevo gelu immolantes , abs te Recipiamur . Diligenter , quacso , ista inter se confer : perspicias , sub variis nominibus , unum Regnum Caelorum a Basilio designari . Antea dixerat , Martyres istos jam translatos fuisse in veram ipsorum Patriam ac Civitatem . Patria istorum Martyrum , Dei Civitas est , cujus auctor atque conditor ipse Deus , superna Hierusalem &c. chorus paratur , accessio magna eorum , qui a Saeculo Dominum glorificant ; non sigillatim congregati , sed acervatim translati . Hic autem beata Civitas appellatur Paradisus , Requies , Sinus Abrabae , Angelorum consortium , & apud Dominum habitatio . Atque illuc , mox ut certamen confecere , invicti Martyres deducti . Uni autem ex iis generosa mater adstans ajebat : *O nate , perferce cum tuis contubernaliibus iter beatum , ne unus de his illorum choro , ne reliquis serius DOMINO PRAESENTERIS .* Quamobrem Basilius , postquam in peroratione eos appellavit legatos APUD DEUM potentissimos , ita ad eos conversus ait : *Vos non terra contexit , sed CAELUM EXCEPIT .* Apertae sunt vobis PARADISI portae ; dignum profecto exercitiis Angelorum , Patriarchis , Prophetis , & Iustis omnibus spectaculum . Paria tradidit illustris ille Caesariensis Ecclesiae Antistes in Elogio Sancti Gordii Martyris , miram ejus hilaritatem in adeundo tormenta referens , utpote qui non licetorum , sed Angelorum manibus sese committeret , qui Statim post mortem , veluti olim Lazarum , assumptum eum AD CAELUM deferrent . Porro certum est , ceteros quoque Iustos Basilii aëvo per similitudinem nomine Martyrum fuisse donatos , ideoque & illos ad grandia in Caelis Praemia :*

mia admissos, communi Patrum consensu existimatum fuisse:

Basilio magno frater fuit, aetate quidem, sed non eruditione, sanctisque moribus minor, *Gregorius Episcopus Nyssenus*, qui circiter Annum Christi CCCXCV. ad Superos evocatus fuit. Legitur ejus Oratio, de magno Martyre Theodoro, ubi postquam ait, ipsum *praeclaro ac beato itinere ABIISSE AD DEUM*, eundem hisce verbis alloquitur: *Sive in sublimi aethere habitas, sive per caelestem aliquem circulum versaris, aut in choros Angelorum cooptatus DOMINO ADSISTIS, aut cum Virtutibus & Potestatibus, ut servus fidelis, Adorationis officio fungeris: parumper ab iis officiis vacationem deprecatur, veni ad hos, qui te honorant &c.* Luculentius quoque, non de Martyre, sed de Confessore loquutus est idem sanctus vir in Oratione de Sancto Ephraem Diacono Edeseno, synchro suo, utpote qui eodem Saeculo Quarto inclinante ad meliorem vitam a Deo fuerat accitus. Inquit enim Cap. VIII. *Ad tranquillum AETERNI REGNI PORTUM feliciter emigravit, sanctaeque ac Deo grata accessione numerum Beatorum, qui ab initio fuerant Saeculi, cumulavit. Nam IN CAELESTIBUS ANIMA ipsius consedit TABERNACULIS, ubi Angelorum sunt ordines, ubi Patriarcharum populi, ubi Martyrum gaudium, ubi Piorum laetitiae, ubi Doctorum splendor, ubi celebres Primogenitorum coetus, ubi purae exsultantium voces, ubi illa Bona patent, in quae Angeli prospicere cupiunt. In sanctum illum locum felicissima beati clarique Patris Ephraem Anima pervenit. Arbitror vero, quum IN CAELUM ipse ascenderet, singulas, quas in hac vita excoluerat, Virtutes praecessisse; ac res illas reconditas & speciosissimas, quae mortalibus cerni nequeunt oculis, demonstrasse.* Orationem denique hisce verbis concludit. *Tu autem divino jam ADSISTENS ALTARI, VITAEQUE PRINCIPI, ac sanctissimae una cum Angelis sacrificans TRINITATI, omnium nostrum memineris, veniamque nobis peccatorum impetra.* Non ergo, is ambigebat, an Sanctorum Animae in Caelo versarentur. Communis quoque sententia erat, eas cum Patriarchis, Apostolis, & Martyribus sociatas, praesentia Dei, atque illius ineffabili Visione beari, atque invocari, ac pro nobis intercedere posse. Dubium tantummodo erat, quem locum in Caelis occuparent. Non enim unum Caelum, sed plures statuebant, e quorum tamen singulis conspiciebatur Divina Majestas, aut ibi praesens erat ac visibilis Divinitas, propior uni quam alteri, donec adveniente Saeculi consummatione in summum Caelum conscenderent, aut saltem consummata & plena fieret, varia

ria tamen pro meritis, omnium Beatitudo. Propterea Nyssenus idem in Elogio Sanctae Macrinae sororis suae, eam nobis exhibet in postrema aegritudine exultantem, quod nimirum ad Sponsum Caelestem, quem desiderabat, festinans, corporis vinculo liberata, Celeriter ipsum conveniret. Neque praetermittendum est, eidem sancto Praefuli unum atque idem fuisse Divinitatis Regiam, Paradisum, ac Caelestem Hierusalem. Ejus verba sunt Oration. I. in Resurrect. Christi: *Quod si quaeris, quomodo in Paradiso se Patris manibus Christus commendavit, tibi sublimis Isaias respondebit de Caelesti Hierusalem, quam Nihil Aliud nisi Paradisum esse credimus, ex Dei persona: Descripsi muros, inquit, tuos in manibus meis. Quare si Hierusalem, hoc est Paradisus, in manibus Patris descripta est, constat, eum, qui in Paradiso sit, in Patris manibus, in quibus descriptionem habet Divina Civitas, commorari.* Dilucidius quoque mentem suam alio in loco Nyssenus aperuit, nempe Oratione consolatoria in funere Pulcheriae: *Igitur, ibi inquit, si a te puella migravit; attamen ad Dominum recurrit. Tibi oculum clausit; verum Sempiterno Lumini aperuit. A tua mensa discessit; sed ad Angelicam adjuncta est. Hinc est avulsa planta; verum IN PARADISO confixa est. A REGNO IN REGNUM translata est. Purpurae florem exiit; ac Caelestis Regni amiculum induit.* Ita Nyssenus de Imperatoris filia; qui & heic sine ambagibus Paradisum accipit pro Regno Caelorum. Infra addit: *Doler, quod illa corporis pulcritudo non amplius videatur. Non enim veram illius Animae pulcritudinem intueris, quae nunc in festo conventu Caelestium exultat.* ὡς καλὸς ἄνθρωπος ὁ ὀφθαλμὸς, ὁ Τὸν Θεὸν βλέπων. *Quam ille pulcher oculus est, QUI DEUM ASPICIT!* Certum est ex hoc loco, Visionem Dei Iustorum Animabus a Nysseno tribui. Eundem quoque consule in Vita Sancti Gregorii Thaumaturgi: neque enim plura addere opus est.

Sed quandoquidem facta mihi nuper fuit, Sancti Ephraem Syri mentio, quem Basilii & Nyssenus viventem mirum in modum suspexerunt, mortuum vero circiter Annum Christi CCCLXXIX. uti jam dixi, Nyssenus laudavit: ipsum quoque admirabilem tum sanctitate, tum doctrina virum, de praesenti controversia sciscitemur. Is ergo Libro Primo Cap. I. de Beatitud. Animae, *Beatus, ait, qui invenerit fiduciam in bora exitus sui, quando Anima separatur a Corpore. Venient Angeli assumere Animam, & perducent eam ante tribunal immortalis & metuendi Judicis.* En peculiare atque occultum Animarum Judicium. Subdit Ephraem: *Grandis timor est,*

est, fratres, in illa hora mortis, & separationis Animae a Corpore. Adhuc enim tunc ipsi Animae opera ejus, quae die nocteque bona & mala gessit. Denique addit: Sancta Anima, quum separatur a Corpore, non timet, nec metuit; sed magis gaudens, cum fiducia pergit AD DEUM, evecta officiis Angelorum. Quemnam vero in locum evehantur Justorum Animae, dic, rogo, amantissime Dei Ephraem, & amoris erga Deum serventissime praeco. Respondet ille in Sermone ad Monachos de Sanctis Patribus, qui requieverunt: Deus valde eos diligens, collegit eos in Portum Aeternae Vitae Gaudiumque Sempiternum, quo illi exsultant INTER PARADISI DELICIAS, IN CAELESTI THALAMO immortalis SPONSO CONJUNCTI. Nam cum gaudio ingenti hinc migraverunt, PROPECTI AD DEUM, habentes secum paratas lampades suas. Horruisset, puto, celeberrimus ille Asceia, si Burnetum aliquem audisset, inconsulte adeo in miseram conditionem & somnum detrudentem Piorum Spiritus post mortem. Longe profecto alia tunc erat hac de re Patrum sententia. atque Traditio, cui aequius nunc nostram & nos accommodabimus, quam inanibus Novatorum inventis. Rursus autem in Sermone de Laudib. Sanctior. Martyr. Ephraemum loquentem audiamus. Vidisti, inquit, alacritatem ingentem, Caeleste Regnum tota fide quaerentium, Christumque Regem suum omni affectu ambientium. Vidisti caritatem flagrantem in beatissimis pectoribus Martyrum, pro qua terrena cuncta spreverunt, ut Deum suum tenerent, quem dilexerunt. Vidisti affectum Christi, quomodo a terra sublimat exaltari cupientes. Vidisti exultantem Paradisum amplecti & fovere sui avidos milites Christi, in aeterna Luce ac pace gaudentes. Infra ipsos alloquitur Martyres, nunc familiaris cum Domino conjunctos, ut pro nobis peccatoribus Dominum interpellare non desinant. Tum Beatos illos depraedicat: Nam pressurae tempore, quum poenarum dolor auferetur, vos ante mentis oculos Paradisum habebatis, vobiscum ista reputantes: Multiplicentur heic supplicia Corporis, ut illic in Paradiso voluptatis propagetur & Requies. Quumque in altum se attollerent fluctuum montes, & moles undarum per supplicia passionum, Beatitudo vobis a Deo repromissa, jugiter versabatur ante oculos perfecte credentibus, mentiri non posse Deum, qui ista promiserat. Quoniam igitur futura illa & sempiterna Bona jugiter intuebamini, certi vos eis sine fine fructuros: idcirco, beatissimi, stelli mollisque non potuit vestra constantia. Sub finem vero Sermonis illos iterum asatur, inquiens: Pro me igitur misero ANTE THRONUM MA-

Dd

JESTA.

*JESTATIS adfistite, ut vestris precibus salvari merear, ac vobiscum AETERNA BEATITUDINE perfrui. Ineluctabile hoc argumentum est, semperque erit, pravae ac falsae Burneti doctrinae, constantia videlicet, & persuasio Sanctorum Martyrum. Praemii ineffabilis vicinitas; atque immensae Beatitudinis a Deo in Caelis promissae victoribus suis, extemplo post mortem consequendae, firma fides: illud, illud erat, quod in eorum animis robur ingeminabat, eosque ad terribilia quaeque toleranda alacres efficiebat. Quis non videat, si Burneti somnia tunc viguissent, quam paucos, fortassis etiam quam nullos Martyres Religio Christiana peperisset? Sed rursus audias, velim, ardentissimum Dei famulum Ephraem Lib. I. Cap. 12. de Compunctione, ita de Justis, & praecipue de Castitatis cultoribus differentem. *Ipsi quoque Caeli, ait, non valebunt portas suas claudere coram Anima, quae Virtutibus viget; sed mox ut viderint eam, cum gaudio referantur. Mille millia Angelorum & Archangelorum cum gaudio vultus sui suscipient eam, & in manibus suis tollent, & ANTE SEDEM MAJESTATIS DEI offerent eam. Exsultabit quoque Pater in ea, & Filius cum Spiritu Santo &c. Exsultabunt super eam Caeli cum Virtutibus suis &c. Exsultabit in ea etiam Paradisus, quia hereditatem in eo sortita est.* In hoc autem Paradiso (quo nomine is usus in plurimis locis, semper significat sempiternae Beatitudinis domicilium in Caelis) jam degere Justos persuasum habet; ac proinde subsequenti Cap. XIII. teneris Deum precibus pulsât, inter alia inquit: *Exaudi me Domine, exaudi me, & praesta, ut vocari merear in Regnum tuum &c. Grex tuus electus, Monachorum quoque conventus, & omnium Sanctorum, qui placuerunt coram te, qui Nunc in Paradiso exsultant, jam deprecantur pro me, & obsecrant te solum amatorem hominum.* Tum in Libro de Resurrectione Cap. III. gemitum Sanctorum exprimit, ut quam citius e corporeo carcere exeuntes, ante faciem Dei appareant; nosque hortatur, ut respicientes ad hos viros mirabiles, & beatissima eorum sequentes vestigia, festinemus & nos ad mensuram patrum nostrorum, & omni virtute instructi, *per merita eorum cum ipsis in Regnis Caelestibus gaudeamus.* Infra subdit: *Beati, qui esuriunt & sitiunt justitiam nunc, quoniam ipsi saturabuntur de illa Regali mensa, in qua Abraham & Isaac & Jacob, & Omnes Sancti a saeculo Requiescunt.* Exploratum habemus, sub nomine Convivii Regnum Caelorum designari, uti supra monui. Ita in Sermone de Virginitate ait: *Perfecti pugnatores & centientissimi Monachi, Paradisi amoenitatem ante oculos habent, exspe-**

expectantque Bonis ipsius Omnibus perfrui, in Luce aeterna & immortali Vita. Atque haec pauca sufficiant, delibata ex aliquot Opuſculis incomparabilis illius & celebratissimi Aſcetae; viri divinitus inspirati & edocti, quem univerſa antiquitas fatetur ſe ſatis admirari non potuiſſe, & cujus Libri miram unctiorem ac divini Spiritus impreſſionem referunt. Qui plura cupit, reliquos ejus Libros conſulat, quorum pleniorẽ abſolutamque editionem ſperare propediẽm nos facit Clariff. & Eminentiff. S. R. E. Cardinalis & Bibliothecarius Angelus Maria Quirinus, Epifcopus Brianſus.

Nunc me appellat *Sanctus Gregorius Nazianzenus*, grande illud Eccleſiae Graecae lumen, in omnium diſciplinarum genere vir praecantiſſimus, atque ob profunditatem & puritatem doctrinae Theologi cognomento *xar' iſoxu* a poſteris ornatus. Is Anno Chriſti CCCLXXXIX. vel ſubſequenti ad beatam in Caelis vitam tranſlatus eſt. Ipſum audiamus in funebri Elogio ſororis ſuae Gorgonii ita loquentem: *Equidem non dubito, quiniis, quae oculis cernuntur, multo praecantiora ſint ea, quibus Nunc Frueſis, nempe ſonus epulantium, Angelorum chorea, Caeleſtis ordo, Glorïae contemplatio, cum alius, tum ſupernae Trinitatis purior & perfectior illuminatio, non jam ligatam mentem, ac per ſenſus diſſuſam, ſuffugientis; ſed totam ſeſe toti menti contemplandam & tenendam praebentis* (αἱ δὲ ὁλὴς ὁλῶς τοὶ θεωρουμένης τῆς ἐκπαινεμένης) *itotoque Divinitatis Lumine Animabus noſtris Aſſulgentis. Omnino, inquam, hiſ Frueſis, quorum, etiam dum adhuc in terra eſſes, ob ſinceram ad ea mentis erectionem, Ripulos habebas. Haec e verſione Billii. Sed adtexere etiam juvat paraphraſin Eliae Cretenſis, Graeci Scriptoris, qui Anno Chriſti DCCLXXXVII. florebat: Meliora, ſat ſcio, tum virtute tua, tum vitae tuae fretus, ac viſibilibus rebus multo ſplendidiora ſunt ea, quibus Nunc Gaudes, nempe ſonus epulantium (velut ait David: In voce exultationis & confeſſionis ſonus epulantium); Angelorum tripudium; Caeleſtes ordines, cum quibus Nunc Es, & choros agitar; Glorïae contemplatio, tam quae in tribus Angelorum ternionibus, quam quae in Trinitate lucet; ipſus Illuminatio purior & perfectior, qua fruebaris quidem etiam in praefenti vita nobiſcum degens; quum Mentem, quantum iis, qui Corpore vincti ſunt, conſequi datur a ſenſu & rebus in ſenſum cadentibus, contraxiſſes, verum obſcuris dumtaxat & exilibus quibuſdam illuminationibus. Nunc autem puriore ipſius Contemplatione Summa cum Voluptate Frueſis, non jam Mentem Corporis ergaſtulo clauſam ſuffu-*

gientis, verum a tota Mente, cujus luminibus nulla res officiat, perspectae & comprehensae, Animasque nostras splendore perstringentis &c. Omnino his purius perfectiusque Frueis &c. Quicumque haec legat, nisi oculis aut ingenio labore, e vestigio intelligit, Justorum Animas corporeis vinculis absolutas, ad Caelum ferri, ibique non solum mira Felicitate donari, sed etiam ad intuendam contemplandamque ineffabilem Triadem admitti. Nunc ea voluptate frui dicitur a Theologo Gorgonium. Quei ergo non suffundatur rubore Burnetus, qui horum minime nescius, Graecos tamen Patres secum facientes jaclitat? Eusebium, Chrysostomum, Basilium, Nyssenum, Ephraemum, aliosque jam vidimus non aliud tradidisse, quam quod Ecclesia Catholica. Gregorius autem Nazianzenus, unus utique mille Graeculos ferius natos valet; neque perspicuam ejus mentem Elias Cretensis, aut quisquam alius obscurare jam potis est.

Non absimili ratione aliis quoque in locis Gregorius est usus. In Oratione XVIII. de laudibus Sancti Cypriani, eximium illum Episcopum & Martyrem hisce verbis sub finem orat: *At tu nos de Caelo benignus aspicias, sermonesque nostros & vitam gubernes, Sanctaeque Trinitatis (ΗΣ ΣΤ' ΝΥΝ ΠΑΡΑΣΤΑ'ΤΗΣ), CUI NUNC ADISTIS, pleniorum clarioremque splendorem nobis concilians &c. Tum Oratione XIX. subsequenti, quam in funere Gregorii Episcopi patris sui habuit, eadem repetit, uti fidem facient haec ejus verba: Nec dubito, quin hoc ΝΥΝ, NUNC quoque tanto magis deprecatione sua, quam prius, praestet, ut qui corporeas compedes excusserit, ac limo illo, Mentis puritatem inficiente, liberatus sit, nudusque cum nuda illa PRIMA ET PURISSIMA MENTE (idest Deo) versetur, Angelici ordinis dignitatem & fiduciam (nisi hoc dictu audax est) consequutus. Patria Nazianzenus eloquitur in calce Orationis XX. habitae in funere Sancti Basilii Magni, amici sui. Tu vero (inquit) sacrum & divinum caput, e Caelo nos, quaeso, inspicere, atque omnem nostram vitam ad id, quod maxime conducibile est, dirige; nosque, Postquam ex hac vita migraverimus, illic quoque tuis excipe Tabernaculis, ut Simul Viventes, & sanctam ac beatam Trinitatem (cujus nunc exiguam imaginem accepimus) purius pleniusque CERNENTES, desiderii nostri finem statuamus. En quae sententia foret praestantissimi Ecclesiae Doctoris Gregorii Theologi de Justarum Animarum statu; non illa cerce, quam Burneus obtrudere incautis nunc vellet. Et ne quis de ea dubitaret, eandem*

eamdem quasi consulto non semel inculcavit. Hisce adde, quae is habet in Oratione XXI. de laudibus sancti Athanasii, qui paullo ante, vitae hujus cursum confecerat, ubi sub finem in haec verba loquitur. *Quod tandem Pietatis praemium capis? In bona senectute vitam claudit, patribusque suis, Patriarchis, & Prophetis, & Apostolis, ac Martyribus, qui pro veritate dimicaverant, Adiungitur.* Praeterea in Oration. III. adversus Julianum Augustum τοῦ παρῆσαντος, ad Constantium Imperatorem, rationem ab eo petens, cur pessimum virum sibi successorem delegerit, sermonem convertit, inquit: *Quid tibi accidit, o Imperatorum divinissime, Christianique amantissime (eo enim provehor, ut tecum velut cum praesente atque audiente expestulem, etsi multo praestantior me esse scio, quam ut a me reprehendi debeas, utpote QUI DEO ADJUNCTUS sis, CAELESTIQUE GLORIAE HEREDITATEM ACCEPERIS, atque in tantum a nobis migraris, ut Imperium cum Meliore commutares) quodnam hoc consilium suscepisti?* &c. His clariora aliunde ne spera. Sed & eamdem doctrinam confirmatam, aut saltem delineatam videre potes in variis ejusdem Nazianzeni Carminibus, quae de tenebriseducta publici ego olim juris feci in Anecdotis meis Graecis, Patavii Anno MDCCIX. editis. Carmine XXXVI. *Nicomedem*, fortassis Episcopum, ΕΠΟΡΠΑΝΟΙΕΙ, *CAELICOLIS* citissime immixtum dicit. De eodem quoque in Carm. XXXVIII. ait.

Τούτῃκα δὲ ΜΕΓΑΛΗ ὄΚΑ ΜΙΤΗ ΤΡΙΑΔΙ.

Idcirco & MAGNAE CITO MIXTUS EST TRIADI.

Quod supra non semel Nazianzenus dixerat de divina Triade, cui *adstant*, & quam *contemplantur* Justorum Animae hinc profectae, idem heic innui vides. Item Carm. LXXI. in Gregorium patrem, inquit, Corpus ejus *dulcem* nunc *somnum* carere:

Anima vero evolans Deum invenit.

Eundem Carm. LXXIII. *Nunc apud sacram Triadem degentem* ait. De matre quoque sua Nonna in Carm. CXI. scribit:

Trinitas illa, quam desiderabas,

E templo sublimi ad Caelum te rapuit.

Sed & ipse Gregorius ad eamdem Beatitudinis sedem anhelabat, seque illuc adducendum statim a morte sperabat. Hinc tres ejus versus habemus, a Tollio, atque a me editos:

Angeli, fulgentes in immenso Caeli gyro,

Trilaminis Deitatis unum jubar circumspicantes,

Susci-

Suscipite Gregorium, indignum quidem, attamen Sacerdotem.

Reliqua omitto, ut alium Nazianzeni locum perpendam.

Neque enim dissimulare volo, magnum hunc quoque virum in funebri Oration. X. in laudem Caesarii fratris affirmasse, Piorum Animas in Sinum Abrahae post Corporis depositionem ferri. Veruntamen quae is continuo addit, evincunt, nihil aliud eisdem fuisse Sinum illum, nisi Beatitudinis ineffabilis locum in Caelis; ac praecipue si cum iis conferas, quae nuper ex aliis illius Orationibus congesimus. Inquit autem: *At tu, divinum & sacrum caput, utinam Caelos penetres, atque in Abrahae Sinu, quicumque tandem ille sit, Requiescas, & Angelorum choream, ac Beatorum virorum Gloriam & Splendorem spectes, vel potius Una Cum Eis tripudies & exsultes, omnia, quae heic sunt, ex alto deridens, & Magno illi REGI ADSTANS (ΒΑΣΙΛΕΥ ΤΩ ΜΕΓΑΛΩ ΠΑΡΙΣΤΑΜΕΝΟΣ) atque illinc emicante Lumine impleretur.* Ceterum infra Theologus idem monet, ingenti quidem Beatitudine donari nunc Animas nudas ad Deum profectas: verum ejusmodi Beatitatem tum solum fore perfectam atque completam, quum una cum Anima Caro quoque iterum sociata in caelestem Gloriam transferetur. *Sapientiam, inquit, verbis adducor, ut credam, omnem Animam pulcram, Deoque caram, postquam Corporis vinculis soluta hinc abiit, Protinus in gustu & contemplatione (θεωρία) manentis Bini positam (utpote eo, quod tenebras offundebat, vel purgato, vel desposito) Mirabili quadam Voluptate delectari & exsultare; bilaremque Accedere ad suum ipsius Dominum, quippe quae de hac vita, veluti e gravi quodam ergastulo elapsa, & compedibus ipsam circumdantibus, a quibus Mentis alae deprimebantur, soluta est: & jam velut per visionem frui recondita Beatitudine. Paulo vero postea, quum cognatam Carnem receperit, tum demum eam quoque ad Gloriam Caelestis Hereditatem secum admissuram; & quemadmodum ob naturae conjunctionem aerumnarum ipsius particeps fuerat, sic etiam iocunditates suas cum ipsa communicaturam &c.* Quamquam in his subobscurum aliquid occurrat ob aliquot vocum usum, quaequid Nazianzeno significarint, minime liquet; attamen vix dubitari potest, quin & heic mirabilis Beatitudo designetur, Sanctorum Animabus hinc solutis concessa in Caelis. Neque enim patiuntur reliqua ex hac ipsa Oratione, atque ex aliis superius adducta, ut aliter interpretemur. Heic ait, Animas Confestim accedere ad De-

Dominum : supra quoque dixit non semel , eas *Adstare divinae Trinitati*. Rursus vero ipse in hac eadem *Oratione X.* scribit : *Apostolus Discessum a Corpore , Praesentiam apud Deum esse affirmat ; vitam autem corpoream , ut peregrinationem deplorat ; atque ideo quamprimum Dissolvi cupit*. Et posteaquam dixit , jam *Caesarium magno illi Regi Adstare , atque illinc emicante Lumine impleri , e vestigio addit : Cujus exiguo Rivulo beic suscepto (quantum scilicet in speculis & aenigmatibus addimbrare & conspiciari possumus) utinam ad ipsum Fontem postea perveniamus , praera mente puram Veritatem intuentes , atque hanc laboris in virtutis studio exhausti mercedem inveniamus , ut perfectius illic Summi Boni consortio & contemplatione (*συνίσις*) fruamur : quem quidem sacrae nostrae disciplinae finem tum Libri , tum Theologiae laude praestantes , esse profitentur* . In hac vita Rivulos tantum sperare possumus ; in altera Fontem ipsum . Neque Justis tanta Felicitas usque ad Resurrectionem differenda est . Supra vidisti , *Gorgonium Nazianzeni ipsius sororem , post degustatos in terra Divinitatis Rivulos , sublatam e vivis , ad Fontem ipsum jam pervenisse* . Relege ejus verba . Et haec quidem magni Nazianzeni mens , cui quum se adversarium prodiderit *Burnetus* , *Lectores* mecum *Burneto* ipsi objiciant velim , quae *Rufinus* in *Prologo* ad *Libros* ejusdem Nazianzeni a se conversos , paucis post ejus mortem annis scriptum reliquit . *Solus est , inquit , Gregorius Theologus , de cujus fide ne dissidentes quidem , ut fieri solet , partes & studia disputare potuerint ; sed id obtinuit apud Dominum & Ecclesias meriti , ut quicumque ausus fuerit doctrinae ejus in aliquo refragari , ex hoc ipso , quia ipse sit magis Haereticus , arguatur* . Manifestum namque judicium est , non esse rectae fidei hominem , qui in fide *Gregorio* non concordat .

CAP. XXI.

Theodorus Abbas , Didymus Alexandrinus , Gaudentius Episcopus Brixianus , Cyrillus Hierosolymitanus , Prudentius Hispanus , Ambrosius Iconiensis , Epiphanius Constantiensis , Damasus Romanus Pontifex , & Hegesippus (cujus aetate exploratur) Caelorum Regnum Justis corporeo carcere solutis conlatum testantur .

Praeterea quid incomparabilis Graeciae Orator Sanctus *Johannes Chrysostomus , & Sanctus Asterius Amasenus Episcopus* , post *Nazian-*

Nazianzenum, Ecclesiae Dei Scriptores, de praesenti quaestione senserint, supra Cap. XVI. dilucide explicui. Porro eodem Saeculo Quarto, ex morum sanctitate, pluribusque ex gestis, illustris fama accessit *Santo Pachomio* in Tabennensi Monasterio Aegypti Coenobialis vitae institutori. Ejus Acta, simulque *Orisii ac Theodori Abbatum*, apud Bollandistas legenda, sub figem ejusdem Saeculi, uti videtur, collegit, literisque consignavit Monachus quidam, ejusdem Tabennensis Coenobii incola. Ibi in calce Capituli XI. Sanctus Theodorus Abbascirciter Annum Christi CCCLX. de egregiis Dei servis aiebat, ipsos *pro suis persecutoribus Deum exorasse, quemadmodum, ut faceremus, ipse nobis Salvator praescripsit: unde Hereditatem quoque Ejus consequuti tandem sunt, ut scriptum est: Heredes quidem Dei, coheredes autem Christi. Quid, oro, tam grande fecisti, o homo, quod dignus habere, qui Deo adea Hereditatem?* Idem quoque Auctor infra narrat excessum ex humanis Silvani Monachi adeo pii, *ut de ipsius ex hac vita migratione fidenter pronuntiaret* (circiter Annum Christi CCCXL.) *servus Dei Pachomius: quod infinita Angelorum multitudo, magna cum laetitia & Psalmorum cantu ANIMAM Silvani suscepit; eamque ANTE CONSPECTUM DEI OBTULERIT.* Ita Scriptor ille. Magni autem nominis iisdem ferme temporibus floruit *Didymus Alexandrinus*, e cujus Libris pauci temporum injurias effugerunt. Is Cap. I. Enarrationis in Epistolam Jacobi Apostoli ad illa verba: *Beatus vir, qui suffert tentationem, quoniam, quum probatus fuerit, accipiet Coronam Vitae, quam repromisit Deus diligentibus se*, haec adnotat: *Dum sufficenter invitasset, cum gaudio suscinendas esse tentationes, per alteram monitionem suadere contendit promissionibus, ut praesentia corrigantur, Beatum esse dicens, qui tentationem suffert. Fiet, inquit, quisquis fortiter certamen exceperit, vir perfectus, & in cunctis exercitatus; qui vero apparuerit, post tristitiam merebitur ad Praemium Coronam a Deo eum diligentibus praeparatam.* Hanc certe Coronam gloriosis Martyribus statim conlatam, una semper vox fuit Ecclesiae Catholicae, uti tot veterum documentis evicimus. Sed & ceteros Justos eadem donari Didymus tradit. Idcirco addit: *Ex quibus agnoscimus, quoniam secundum uniuscujusque Virtutes Potuit a Deo Corona praeberi, alii quidem justitiae, alii immarcescibilis & rectae fidei. Super has autem reposita est & altera fruentibus Domino, & experimentum habentibus Paradisi deliciarum, & potatis de torrente deliciarum Dei.* Pertinet etiam ad Saeculum Quartum Christianae Aerae *Sanctus Gaudenius Brixianus* Episcopus, cujus Sermones elegantissima editione, atque eruditis Notis illustravit ante aliquot annos V. Cl.

V. Cl. Paulus Galleardus Brixianus Canonicus. Quoniam illius quoque sententia fuerit de praesenti quaestione, non inutile erit inquirere. Is ergo in Praefatione ad servum Christi Benevolum disferit de felici, ut videtur, Improborum statu in hac vita, & de infelici Justorum. At illos, inquit proposito Divitis Evangelici exemplo, manet post mortem poena in tormentis flammae inextinguibilis: *Et contra ad illam Beatitudinem perducitur Justorum tribulatio, ut cum sancto Abraham Patriarcha in Aeterna Vita Requiescere mereantur, qui angustias vitae hujus fidei patientia tolerantes, de Saeculo isto migraverint.* Quid sit *Vita Aeterna* in divinis Scripturis, quid *Requiescere* illic, nihil amplius opus est, ut a me ostendatur, quum concordi veterum suffragio phrasibus istis designetur ineffabilis illa *Beatitudo*, qua Sancti fruuntur, in Caelis, & quam ipse Gaudentius nuper commemoravit. Atque eundem sensum referunt infra illius verba: *Adquirant sibi thesauros in Caelo, ubi neque aerugo neque tinea corrumpit, neque fures effodiunt & furantur: ut de hoc Saeculo exeuntes possint invenire refrigerium in Sinu illius vere divitis Abrahae.* Sinum & ipse Abraham sumit non pro aliquo loco, sed pro sausto amplexu, quo Justos Abraham excipit in Caelesti Gloria. Quod & ille rursus infra innuit, dicens, per acumen hujus vitae Probum exerceri, *ut per exiguas plagas brevissimi temporis ab omnibus purgatus maculis, securior ad Aeternam migrare Requiem mereatur.* Apostolo praecunte in Epistola ad Hebraeos, jam didicimus, *Requiem* significare beatissimum Sanctorum statum in Caelesti Hierusalem; idque potissimum Ecclesiastici Scriptores indicare consueverunt, quum illam *Requiem* appellant *Aeternam*, hoc est sine fine duraturam. Neque alia Sancto Gaudentio fuit sententia de Beatitudine Martyrum, illico subsequente gloriosum illorum certamen. Ipsum audi, Tractat. XVII. habito in dedicatione Basilicae Sanctorum Quadraginta Martyrum. *Beatissimi, inquit, Martyres, Spiritu Sancto ferventes, vestibus suis procul abjectis, festini ad stadium properant: Coronam tanto certamini propositam Caelitus intuentes. Deinde hortatibus mutuis patientiae vires accendunt, Gloriam Regni Caelestis poenis praesentibus praeferunt, Ocyus ad Aeternae Lucis Beatitudinem, Vitaeque Perpetuam, gloriosae mortis compendio transaturi.* Toties inculcavi, sed numquam satis repetam, universae Catholicae Ecclesiae sententiam ab ejus exordio fuisse, sine mora Martyrum Animas in Regni Caelestis Gloriam excipi. Ad evertendam totam Burneti molem hoc unum sufficere, quicumque judicio pollet, statim intelligit.

E e

Cele-

Celebris quoque fuit inter Scriptores Graecos Saeculi Quarti *Sanctus Cyrillus* Episcopus Hierosolymitanus. Is autem in Catechesi V. postquam attulit Domini verba apud Johannem dicentis: *Qui verba mea audit, & credit Ei, qui me misit, habet Vitam Aeternam. Et qui credit, non judicatur, sed translatus est de morte ad Vitam* (quibus verbis nemo neget, quin significetur sublimis illa ac summa Sanctorum Felicitas in Caelis) continuo haec adjicit: *O magnam Dei clementiam! Justi quidem vix per multos Annos probati sunt. Quod autem illi per longae aetatis investigationem corrigentes Assequuti sunt, hoc nunc Jesus una hora nobis donat. Si enim credideris, quia Dominus est Jesus Christus, & quod Deus excitavit ipsum a mortuis, salvaberis, & Transfereris in Paradisum. Propterea & Latronem eo introduxit, ut non dubites, num id fieri possit. Qui enim Latronem una hora credentem salvum fecit, idem & te credentem salvabit.* Quae praecedunt, nos monent, *Paradisum* Cyrillo heic esse unum cum Regno Caelorum; simul quoque exemplum fortunati Latronis, illuc extemplo introducti, evincit, ceteros etiam Justos in beatissimum eundem locum aut brevi, aut sine cunctatione transferendos post mortem. Porro ejusdem Latronis mentionem Cyrillus in Catechesi XIII. repetit, inter alia inquit: *O ingentem & inenarrabilem gratiam! Nondum Abraham fidelis ingressus est, & Latro ingreditur. Nondum Moyses & Prophetae, & jam Latro iniquus ingreditur. Admiratus est te Paulus dicens: Ubi abundavit peccatum, superabundavit Gratia. Qui tulerunt aeternum, nondum ingressi sunt: & qui undecima hora venit, ingressus est. Nemo murmure contra Patremfamilias, quum ille dicat: Amice, non facio tibi injuriam &c. Quis autem nescit, in Evangelica Patrisfamilias Parabola designari immensa in Caelis Praemia, Justis a Deo destinata? Sancto Cyrillo jungendus nunc mihi est ejusdem Saeculi Scriptor *Sanctus Aurelius Prudentius* Hispanicae Ecclesiae decus. Auctorem hunc, veluti parum concordem cum sententia haecenus a nobis propugnata, produxerunt olim Sixtus Senensis, Bellarminus, & alii. Is enim Hymno X. *Καὶ οὐκ ἔστιν ἄλλος*, significare videtur, Justorum Animas hinc decedentes recipi in Sinum Abrahae, aut in Paradisum terrestrem. Haec sunt ejus verba:*

*Quanam regione jubebis
Animam requiescere puram?
Gremio Senis abdita sancti
Recubabit, ubi est Eleazar:
Quem floribus undique septum*

Dices

*Dives procul adspicit ardens.
 Sequimur tua dicta, Redemptor,
 Quibus atra e morte triumphans.
 Tua per vestigia mandas
 Socium crucis ire Latronem.
 Patet ecce Fidelibus ampli
 Via lucida jam Paradisi;
 Licet & nemus illud adire,
 Homini quod ademerat anguis.*

Mirari quisquam posset, cur Prudentium Burnetus minime retulerit in censum suorum commilitonum. Sed fortassis ille agnovit, nos certe agnoscemus, Hispani Scriptoris auctoritate ejus causam juvari nihil posse. Nam, ut omittam, non defuisse inter veteres, qui Adami Paradisum spiritaliter accipientes, illum in Caelo statuerunt: jam constat, idque compluribus documentis antea patefactum fuit, terrestrem Adami Paradisum a Patribus reputatum fuisse typum Regni Caelorum, beataeque Vitae, a novo Adamo Justis procuratae in Caelis. Is nimirum fuit tum divinatorum Librorum, tum Patrum usus, summam Beatitatem Sanctorum, & locum tantae Felicitatis nobis paratae, per sensibiles imagines designare, puta Horti deliciis affluentis, Convivii, Thalami, Nuptiarum, Templi, Civitatis supernae, Tabernaculi aeterni, Montis, Domus Dei, atque horum similitum. Quare Prudentius *Paradisi* vocabulo ad imitationem aliorum Patrum nihil aliud nobis exhibet, nisi *Regnum Caelorum*, quo Christus ipse ascendit; nam Prudentio ipso teste, Dominus Jesus sua *per vestigia mandat socium crucis ire Latronem*. Sed & *Sinum Abrahae*, ubi nunc degit *Eleazar*, id est *Lazarus*, jam novimus a Patribus collocatum in Caelis, atque in ipsa Beatitudinis Regia. Quid de eximio illo, nobisque in terra versantibus adhuc invisibili Felicitatis loco, antea dixerit Gregorius Nyssenus, praecedenti Cap. didicimus. Juvat nunc alterum ejus locum adjungere, petitem ex Lib. de Anima, ubi quae de Sinu Abrahae meliorum sententia foret, hisce verbis aperit: *Bonus Animae status, inquit, in quo patientiae athleta requiescit, Sinum Abrahae divinus sermo nominat. Primus enim hic Patriarcha per afflictationes & incommoda praesentis vitae, Eam, quae Speratur, Beatitudinem quaesivit. Ut igitur certam aliquam Pelagi partem per abusum quamdam Sinum nominamus; ita hic sermo divinus SINUS nomine (Τὸν Ἀμετρήτῳ Ἀταθῶν) IMMENSORUM illorum BONORUM significat ostensionem. In quo Sinu bono,*

qui per virtutem praesentis vitae cursum conficiunt, quum hinc solverint, tamquam in Portu fluctuum procellis minime obnoxio, Animas appulsas, & quasi subductas statuunt, quemadmodum fecit Lazarus. Petis-ne, quid sit Abrahae Sinus? Immenforum Bonorum complexio: Portus, in quem Justorum Animae recipiuntur, & ubi Eam, quae Speratur, Beatitudinem nanciscuntur. Nysseni locum hunc prae oculis habuit, immo descripsit Theophanes, Graecus & ipse Scriptor, in Homil. VIII. cujus etiam verba adferre praestat, ut uberius in dies appareat Burneti confidentia, pro suis somniis Graecorum concordium suffragia, ut non semel dixi, jactantis. Bonum, inquit, Animae statum, in quo Verbum (idest Christus Dominus) Justos reficit ac recreat, Sinum Abrahae appellavit. Hic enim Patriarcha primus per fidem, quam speramus, Felicitatem per multas molestias consequutus est. Itaque Immenforum Bonorum demonstrationem Sinus nomine indicat &c.

Ad Prudentium redeo. Apertissima est haec illius mens. Nam Hymno X. *περὶ τοῦ σώματος* de Anima ait,

— sola, quae non occidit,
Sed jure durans, dispares casus subit,
Aut Luce fulget, aut tenebris meritat.
Christum sequuta, PATRIS INTRAT GLORIAM.
Disjuncta Christo, mancipatur Tartaro.

Tum infra, quae fortibus Christianis hinc decedentibus parata sint praemia, hisce explicat:

CAELO REFUSUS SUBVOLABIT SPIRITUS,
DEI parentis PERFRUETUR LUMINE,
Regnante Christo, STANS IN ARCE REGIA.

Eadem ille repetit in Carmine, cui titulus *Ἀναμνηστικὴ*, ubi Improbos vitae huic ereptos in Tartarorum tormenta detrudi statuit.

At diversa procul REGIONIBUS IN PARADISI
PRAEMIA CONSTITUIT MAJESTAS gnata futuri
SPIRITIBUS PURIS, & ab omni labe remotis &c.
Exsuperatque Polum feruens scintilla remensum,
Carcereos exosa sitis, quibus haeserat exsul &c.

En ergo quid Paradisi nomine Prudentius significarit, non terrestrem Adami Paradisum, sed Caelestem Beatitudinis Regiam, cujus typum praetulit beata primi parentis habitatio. Ibi Justis, & praecipue Martyres, fructum suorum laborum colligunt, ac Visione Dei fruuntur. Namque ut idem sanctus Poeta ait Hymno I. *περὶ τοῦ σώματος*,
Christus illic candidatis praefidet cohortibus.

Illi vero preces mortalium piorum e beata illa sede

Audiunt, statimque ad aures Regis Aeterni ferunt.

De Sancto quoque Vincentio ait Hymno V.

Victor reliſtis artibus

CAELUM CAPESSIT SPIRITUS,

Cui reſta celſo tramite

Reſeratur AD PATREM via.

Tum Hymno X. inducitur ab eo mater puerulo Barulae animos addens ad toleranda pro Christo supplicia, quod *Mox Christum Viſurus*, atque ex eo fonte perennem vitae aquam hausturus esset. Addit infra:

Vale, ait, dulciſſime,

Et quum BEATUS REGNA CHRISTI intraveris,

Memento matris, jam patrone ex filio.

Sunt & alia id genus, quae proferre supervacaneum puto. Unum tantummodo omiſſum nolo, nempe ab eo prodi, imbecilli conatu a Burneto adhiberi Apocalypſeos verba, ubi Martyrum Animae *ſubtus Altare* viſae Sancto Johanni dicuntur. *Altare*, ut alibi monui, etiam pro *Christo* ſumſerunt nonnulli Patres, ac prae ceteris Chryſoſtomus, & Cyrillus Alexandrinus. In eamdem ſententiam conſeſſit etiam Prudentius. Quamobrem Hymno IV. Eulalam Martyrem Luſitanam laudans, de ipſa inquit:

ILLA DEI SITA SUB PEDIBUS

Proſpicit haec, Populoſque ſuos

Carmine propitiata fovet.

Juvabit etiam audire, quae *Sanctus Amphilochius* Iconienſis Epiſcopus, atque ejuſdem Saeculi Quarti Scriptor, diſſeruerit in Oratione de Domini Circumciſione, ubi Sanctum Baſilium Magnum, nuper ad meliorem vitam translatum, laudat his verbis: *Noviſſime humili iſto tabernaculo abſolutus, atque in loco Tabernaculi admirabilis uſque ad Domum Dei in voce exultationis & confeſſionis ſonus epulantis, tranſiens, cum Caeleſtibus Sion primogenitis liberis Recubuit atque Requievit.* Baſilii Confeſſoris Beatitudinem in Caeleſti aula conſtitutam heic vides, & potiſſimum, quod idem indicet *Recumbere & Requieſcere*, uti antea ſaepe animadvertimus. Amphilochio ſuccedat etiam celebrioris quidem ſamae, ſed ejuſdem aetatis, *Sanctus Epiphanius* Conſtantiensis in inſula Cypri Epiſcopus. Auctor ille eſt Haeref. LVI. ſive LXXVI. adverſus Aerium, in Reſurrectione Domini multos e Sanctis Patribus reſurrexiſſe, *qui a mortuis excitati in Tbalamum* (ideſt in beatiffimum Caeleſte Regnum) *ſimul ſunt ingreſſi.* Quod & in Anchorato repetivit Cap. 102. Ad haec ille
in

in confutatione Marcionistarum Haereseos XLII. pag. 338. *Sinum Abrahamae* commemorat, iis usus coloribus, quibus sine dubitatione exprimitur Caelestis Beatitudo. *Viden'*, inquit, *ut inter vivos ac Beatitudine donatos in illa felici Sempiternae Quietis Hereditate Abrahamus a Domino numeretur, & in ejus Sinu Lazarus acquiescat?* Sempiternae Quietis Hereditas jam parta Sanctis, hinc ad alteram vitam translatis, & jam Beatis a Deo effectis, illud est, quod nos nunc, & Sancti quoque Patres olim depraedicarunt; ita ut quo abeant Burneti suspiciones ac prava consilia, jam nemo non intelligat. Sed Epiphanius alibi quoque, hoc est in Haeresi LIX. seu LXXIX. quae est Collyridianorum, pag. 1056. luculentius doctrinam hanc expressit. Inquit enim: *Enimvero SANCTI OMNES in honore SUNT. Horum est Requies IN GLORIA: eorum ex hac vita discessus in Consummatione (sive ad perfectionem transitus est): eorumdem IN BEATITUDINE fors: IN SANCTIS DOMICILIIS* (sive *μαρῆς, Mansionibus*, quas Christus Fidelibus suis Johann. XIV. 2. pollicitus fuerat) *inter Angelorum eburos versantur: habitatio IN CAELO: decus & splendor SEMPITERNO IN HONORE consistit, quem nulla conjectura assequi potest: Praemia denique IN CHRISTO JESU Domino nostro. Veniat nunc Burnetus, & Britannis eruditis confidentissime venditet, a suis partibus generatim Patres Graecos stetisse. Jam habent illi, quid augatori respondeant, & mirentur audacis hominis, ne gravius loquar, inane ingenium. Denique in sententiam nostram confluere videas Carmina Sancti Damasci Romani Pontificis, qui Anno Christi CCCLXXXIV. vitam hanc cum meliori commutavit. Igitur ille Carmine V. Sanctam Agatham Martyrem jam remidentem quasi sponsam in Polo appellat. De Projecta, filia Flori Consulis, Carmin. XIII. ait:*

*Excepta ex oculis Flori genitoris abiit,
Aetheream cupiens Caeli conscendere Lucem.*

Tum Carmin. XXVII. de Sanctis Proto & Hyacintho pariter canit: *Te Protum retinet melior sibi Regia Caeli.*

Paria habet in subsequenti Carm. XXVIII. hoc est in Epitaphio Irenes sororis suae, ubi haec illius verba:

*Quum sibi eam raperet melior tunc Regia Caeli,
Non timui mortem; Caelos quod libera adiret.*

Rursus phrasim istam repetit in Carm. XXIX. de Sepulcro suo collocando apud corpora Martyrum, de quibus ait:

SUBLIMES ANIMAS RAPUIT SIBI REGIA CAELI.

En quale fuerit Saeculo Christianae Aerae IV. Romani quoque Pontificis,

tificis, ac Romanae propterea Ecclesiae dogma de Beatitudine Sanctorum in Caelis. Eandem quoque sententiam ibi viguiffe praecedenti Saeculo, & dum in vivis erat Sanctus Cyprianus, supra Capite X. animadvertimus.

Addere etiam liceat mihi, quae hac de re disseruit *Hegesippus* ille, cuius Libri quinque prostant de Excidio Urbis Hierosolymae, non semel editi. Is profecto post Constantinum Magnum scripsit. Porro, si verum foret, quod Mabillonius, Gronovius, & Caveus, veteres Codices MStos sequuti conjectarunt, videlicet a Sancto Ambrosio Libros illius Latio fuisse donatos, jam haberemus in ipso quoque Scriptorem Saeculi a Christo nato Quarti. Utcumque sit, Lectorem accipere non pigebit haec ejus verba, ex Libro Quinto deprompta. Ubi, inquit, *ANIMA fuerit istius Carnis absoluta vinculis, AD ILLUM PURUM, & SPLENDIDUM, SUPERIOREMQUE REVOLAT LOCUM, atque ADEST DOMINO DEO SUO, Sanctorumque Habitaculis Fruitur, & Beatorum Gaudet Consortiis*. Ita Auctor ille, quem barbaricis minime Saeculis floruisse & scripsisse, stili elegantia persuadere omnino videtur. Subit autem mirari heic Miraeum, Vossium, Oudinum, & quosdam alios, qui Auctoris hujus aetatem ad aliquot Saecula post Sanctum Ambrosium, immo & ad Saeculum Christi Decimum rejecere, non alia ratione adducti, quam quod is *Antiochiam* appellaret Lib. III. Cap. V. *Persarum quondam caput, nunc repulsorium*; quasi hisce verbis indicetur tempus, quo Civitas illa erepta Persis, sub Saracenorum ditione gemebat. Nihil aliud ibi *Repulsorium* est, nisi Munimentum, quo Persae repellebantur. Hoc autem ad Christianos ibi Quarto Christi Saeculo dominantes, & Persis oppositos, egregie refertur, loco nullo relicto somniandi Saracenos ea Urbe potitos. *Repulsorium* adhibitum videtur ad Latine reddendam vocem aliquam Graecam, quae qualis fuerit, divinare nihil in praesentia opus est, ἀπωστικόν exempli caussa. Praeterea verba illa tantum absunt, ut tempora indicent Saracenicae dominationis Antiochena in Urbe, ut potius excludant. Si enim Civitas illa, dum *Hegesippus* scribebat, Arabico imperio pressa fuisset, non ipsam is appellasset propugnaculum contra Persas (quod Christianos respicit) sed ejus calamitatem ac jugum deplorasset. Neque Saeculo Septimo, ac minus Decimo, elegantem adeo Antiochiae descriptionem quicquam e Christianis, & maxime si Latinus is Auctor fuit, nobis dedisset. Praeterea, si tunc Antiochiae Saraceni dominati fuissent, Auctor nequaquam de ea dixisset: *Urbs tertio loco ante ex omnibus*,
quae

quae in Romano orbe SUNT, Civitatibus aestimata, nunc quarto. At quomodo Antiochia appellata Persarum quondam caput? Tempore videlicet Seleuci I. Syriae Regis, qui ipsam Antiochiam condidit, & Persas quoque suo imperio adjecit. Haec pauca, quamquam extra chorum, de Hegesippi illius aetate adnotasse incongruum non fuerit.

C A P. XXII.

Hieronymus Stridonienſis, Theophilus Alexandrinus, Paulinus Nolanus, Antoninus Conſtantiensis, Proſper Aquitanus, Leo I. Romanus Pontifex, Honoratus Maſſilienſis, Maximus Taurinenſis, Petrus Chryſologus, Iſidorus Peluſiota, Syneſius Ptolemaidis Epifcopus, Arnobius Junior, Gennadius Maſſilienſis, minime dilatam cenſent ſummam Felicitatem Sanctorum in Caelis. Quid ſignificet eſſe cum Domino apud Apoſtolum.

Quamquam ad Quartum Christianae Epochae Saeculum jure pertineat *Sanctus Hieronymus*, celebratissimus Ecclesiae Catholicae Doctor, is tamen in Quinto nunc locum sibi dari non indignabitur. Si & istum nos prodiderimus non aliam, quam nos tradidisse doctrinam, altiore, ut spero, edent Burneti imaginationes ruinam. Atque is revera Lib. III. Cap. 8. Commentar. in Amos hisce verbis utitur: *Quando ANIMA, vinculis laxata corporeis, volandi, quo velit, sive quo ire compellitur, propter tennitatem substantiae habuerit libertatem, AUT AD INFERNA ducetur, de quibus scriptum est: Convertantur peccatores in Infernum &c. AUT CERTE AD CAELESTIA sublevabitur &c.* Ubinam vero nunc Sancti versentur, manifestius ipse aperuit in Commentar. ad Cap. XII. Matthaei, ubi verba illa interpretans: *Qui autem minor est in Regno Caelorum, major est illo, sic loquitur: Nos simpliciter intelligamus, quod OMNIS SANCTUS, qui JAM CUM DEO EST, major sit illo, qui adhuc consistit in proelio.* Nullis ofuscari posse tenebris Hieronymi mentem, heic cernis; idem quippe illi sonat *eſſe cum Deo*, atque *eſſe in Regno Caelorum*. Rursus ille Lib. II. Cap. 9. Commentar. in Zachariam, post laudata Davidis verba: *Eſto mihi in Deum proteſtorem, & in locum munitum*, haec addit: *Hanc autem munitiorem, ad quam Deus cohortatur victor ſpei, non aliam debemus accipere, niſi HABITATIONEM PARA-*

PARADISI, in quam primus cum Domino Latro ingressus est. Super caelestem vero Paradisum, de quo eiectus fuit Lucifer, agnovit Hieronymus Lib. IX. Cap. 28. in Ezechielem. Usus autem & ille fuit alibi vocabulo *Sinus Abrahae*, sed non dispari significatione a reliquis ferme Sanctis, a quibus illud nomen usurparum facpe vidimus ad designandam ineffabilem Justorum Felicitatem in Caelis. Itaque Epistol. XX. ad Eustochium in Edition. Martiane-
yana, de exitu *Leae* scribens, ait: *Nunc igitur pro brevi labore AETERNAM BEATITUDINEM* fruitur; excipitur Angelorum cbovis; *ABRAHAE SINIBUS* confortetur. Ita in subsequenti Epistol. XXII. super obitu Blefillae filiae ad Paulam ejus matrem scribit: *Postquam autem sarcina carnis abiecta, AD SUAM ANIMAM* revolvit *AUCTOREM*, & in antiquam possessionem diu peregrinata conscendit &c. Et infra: *Testor, mi Paula, JESUM, quem Blefilla NUNC SEQUITUR*: testor Sanctos Angelos, quorum Consortio fruitor &c. Nos, quorum exitum Angelorum turba Comitatur, quibus *OBVIAM CHRISTUS OCCURRIT*, gravemur magis, si diutius in tabernaculo isto mortis habitemus. Quia quamdiu heic moramur, peregrinamur a Domino. Multis deinde agit, ut Paulae lacrymas in morte filiae comprimendas suadeat, inter cetera inquires: *Parce, quaeso, tibi; parce filiae CUM CHRISTO JAM REGNANTI*. Tum Blefillam loquentem inducit: *Ne invidas Gloriam meam. Putas esse me solam? Habeo pro te Mariam Matrem Domini. Multas heic habeo, quas ante nesciebam &c.* Vide & Epitaphium floribus redundans, quo ille Neporianum ornavit. Ibi scriptum ab eo legas: *Scimus quidem, Nepotianum nostrum ESSE CUM CHRISTO, ET SANCTORUM MIXTUM CHORIS*, quod heic nobiscum rimabatur in terris, & aestimatione quaerebat, ibi *VIDENTEM COMINUS* dicere: *Sicut audivimus, sic & vidimus in Civitate Domini virtutum, IN CIVITATE DEI nostri*. Dicant, quaeso, Lectores in sacrarum Literarum stilo non hospites, an non Hieronymus heic tribuat piorum Animabus jam hinc in Caelum deductis beatificam Dei Visionem. Haec profecto illius mens; eademque phrasi is rursus utitur in Epitaphio Paulae, de qua scribit: *Inplevit cursum suum, fidemque servavit, & NUNC FRUITUR CORONA JUSTITIAE* (quae verba quam ab Apostolo Hieronymus fuerit mutuatus, jam intelligis, quei ille interpretatus fuerit) *sequiturque Agnum, quocumque vadit. Saturatur, quia esuriit, & laeta decantat: Sicut audivimus &c.* O beata rerum commutatio! Flevit, ut semper videret. Despexit lacus contritos, ut fontem Dominum reperiret. Cinerem sicut panem manducabat, ut in aeternum

num pane Angeiorum vesceretur, & caneret: *Gustate & videte, quoniam suavis est Dominus.* Reliqua tenoris ejusdem percurrere, si velis. Ego in paucis hisce, quae infra adduntur, consisto. *Nunc illa divitiis fruitur, & his Bonis, quae nec oculus vidit, nec auris audivit, nec in cor hominis ascenderunt. Nostram vicem dolemus, & invidere potius Gloriam ejus videbimur, si voluerimus diutius flere REGNANTEM.* Atque haec Anno Christi CCCCIV. scribebat Hieronymus: in quibus, caecus sit, qui non videat lucidissimis coloribus depictam beatissimam illam Vitam ac Visionem Dei, quam adversus vetustissimum Catholicae Ecclesiae dogma arrodere aevo hoc nostro non erubuit Burnetus. Tricis, cavillationibus non est heic locus. Quo posito, da mihi, si potes, inter veteres peritiorum & doctiorum divinarum Scripturarum Interpretem, quam Hieronymus. Eum quippe nihil fugit eorum, quae Scriptores quique Ecclesiae filii literis antea consignarant. Quum ergo tanta cum fiducia ille asserat, non differri, sed brevi, aut statim, a Piorum Animabus iniri ineffabilem Gloriam, & Requiem deliciis omnibus saturatam in Caelestibus Mansionibus, in Domo Dei, in Civitate Domini, in Regno Caelorum; quid restat, nisi ut manu tandem teneamus, primis Ecclesiae Saeculis non aliam passim floruisse sententiam, quam quae adhuc vivida est de mortuorum statu Catholica in Ecclesia, aut saltem certiorum communi calculo tunc reputatam fuisse?

Hieronymo Synchronus atque intimus amicus fuit *Theophylus Archiepiscopus Alexandrinus*, Anno Christi CCCLXXXV. ad eam Cathedram provectus. Habemus tres ejus Epistolas Paschales, aut sub finem illius Saeculi, aut ineunte subsequenti scriptas, & Latio donatas ab ipso Hieronymo. Porro is quoque in exordio primae ex iis Epistolis nos hortatur, ut *festinemus supernae laetitiae festa celebrare, & jungere nos Angelorum choris, UBI CORONAE ET PRAEMIA ET CERTA VICTORIA EST, & desiderata triumphantium palma proponitur. Nec differamus, tumentibus carnis fluctibus liberati, clavum tenere virtutum, & post grandia maris pericula tutissimum CAELORUM INTRARE PORTUM.* Haec scribebat, qui persuasum plane habebat, Praemia illa immensa parata Justis esse statim post mortem. Neque aliam fuisse constat sententiam *Paulini Nolani Episcopi*, qui initia Saeculi Quinti suis & ipse scriptis, atque sanctissimis praesertim moribus illustravit. Supra Cap. XII. vidimus, quemnam in locum Beatitudinis translata ab eo dicatur Anima Clari Presbyteri. Accipe nunc, quid ipse

ipse scripserit de Sancto Felice Presbytero Nolano, Natali III.
Occidit, & CHRISTO superis est NATUS IN ASTRIS,
CAELESTEM NACTUS sine sanguine Martyr HONOREM.
 Natali VI.

———— *Superi Felicis mente fruuntur,*
Corpore nos: Animaeque potentis Spiritus illic
Vivit, & heic meritum.

Addit infra:

Ast illum placido scandentem celsa volatu,
Et casto assumtum de corpore, laeta Piorum
Turba per aethereas suscepit obvia nubes.
Angelique chori, septemplex agmina Caeli,
Totis, qua Caelum patet, occurrentia portis,
REGIS AD ADSPECTUM, SUMMIQUE PARENTIS
AD ORA,

Sidereo volucrum laeti vexere triumpho.
Tum nivea sacrum caput ornare Corona :
Sed tamen & roseam Pater addidit, indice Christo.

Sunt & alia in eodem Natali, quae praetereo. Tum in Natali XII. quem ego publici juris feci Tom. I. Anecdotorum meorum, similia leguntur: atque inter cetera Natalem diem Sanctorum appellari illum dicit,

———— *in quo lege functi carnea*
Mortalitatis exuuntur vinculis,
ET IN SUPERNA REGNA NASCUNTUR DEO.

Ad Annum Christi CCCCXXXVII. magnus Annalium Ecclesiasticorum parens Epistolam produxit *Antonii*, sive *Antonini* Episcopi Constantiensis in Africa, quem Gennadius *Honoratum* appellat Cap. XCV. de Viris Illustrib. ubi ejusdem Epistolae mentionem facit. Hanc editam rursus habes in Tom. VIII. Bibliothec. Patrum. Ibi solatur pius ille Episcopus Arcadium quemdam in exsilium a Genserico Vandalorum Rege actum, atque inter cetera inquit: *Tribulatio, exfoliatio, exsilium, remissionem tibi contulit peccatorum. Mors autem aperit tibi Regna Caelorum. Qualis eris, quum tu cum Sancto Stephano eris? Qualis eris, quum Petrum & Paulum, quos rogare solebas ut patronos, habebis amicos? CHRISTUM MOX tua ANIMA VIDEBIT, & Corpus tuum erit in refrigerio Resurrectionis, ut & ipsa Caro videat, quod tua Anima, quum exierit, Mox Videbit.* En quid esset antiquis Dissolvi, & Esse cum Christo, nempe idem atque *Regna Caelorum* ingredi, simulque intueri Fa-

cie ad faciem Dominum: quae summa est Beatitudinis praerogativa. Hisc jungendus est *Sanctus Prosper*, celebris ille discipulus & amicus Sancti Augustini. Is Lib. I. Cap. XVI. de Vocatione omnium gentium (quod Opus nonnulli tribuunt Sancto Leoni Magno Pontifici maximo) de Parvulorum sorte post hanc vitam agit, haec inquit: *Omnes ante ullum intelligentiae sensum, ante liberum voluntatis arbitrium, ALII AD AETERNAM BEATITUDINEM regenerati, ALII AD PERPETUAM MISERIAM TRANSEUNT non renati*. De adultis vero loquens Cap. subsequenti, ita scribit: *Quod si & ad illos dirigas mentis intuitum, qui longam in flagitiis & sceleribus aetatem, sacramento Baptismatis Christi in fine vitae renovantur, & sine ullo suffragio honorum operum IN REGNI CAELESTIS CONSORTIUM TRANSFERUNTUR, quo intellectu divinum iudicium comprehendes?* Non diem unum, non unam horam, nedum multa Annorum millia (quod vcllet Burnetus) inter illorum e vita exitum, & summam Felicitatem aut miseriam, interponit Prosper: sed extemplo de eorum sorte actum esse affirmat: quamquam mitius agi cum parvulis Catholica Ecclesia arbitretur.

Sed & ipse *Sanctus Leo I. Papa*, quem nuper memoravi, haecenus traditum dogma confirmavit, dum Sermone LXXX. in Natali Apostolor. Petri & Pauli, Ethnicorum furorem ridet, quasi per *Sanctorum* *neces* gratia Dei posset extingui: cuius hoc ipsum erat maximum lucrum, ut contemptus vitae bujus occiduae, *PERCEPTIO* fieret *FELICITATIS AETERNAE*. Pretiosa ergo in conspectu Domini mors *Sanctorum* eius. Praeterea Sermone LXXXIII. in Festo Sancti Laurentii, *SUBTRAHITUR*, ait, *saeva crudelitas, inventis tuis materia mortalis, & LAURENTIO IN CAELOS ABEUNTE, tu deficis*. Denique illum audi Sermone XCVI. in Cathedra Sancti Petri, si ramen illius est. Cum die Martyrii diem Cathedrae componit eloquentissimus Pontifex, & utramque ita describit: *In illa siquidem alternantibus bymnidicis Angelorum choris, EST INEFFABILITER CORONATUS; in ista vero exsultantibus undique fidelium turmis, Pontificali Cathedra cum magna gloria est sublimatus. In illa ad suam Beatitudinem CAELI CONSCENDIT THRONUM &c.* Aequalis etiam aetate Leoni Magno fuit *Sanctus Hilarius* Arelatensis Episcopus, cuius Vitam habemus, a *Sancto Honorato* Massiliensi Episcopo ejus discipulo conscriptam, atque a Gennadio in Catalogo Viror. illustr. laudatam. Uti ex ea discimus, mortem suam praenuntiavit Hilarius, ad alumnos suos haec factus: *Hora diei undecima Anima mea de Corporis domicilio liberata ad supernum iudicem festinabit.* Quibus verbis testis & ipse nobis est, tunc
in

in Ecclesia viguiffe sententiam de peculiari atque occulto hominum
 Judicio post fingulorum mortem. Quo autem insignis illius Anti-
 stitis Anima emigrasse credita fuerit, in exordio ejusdem Vitae indica-
 vir Honoratus Episcopus illius Auctor. *AD ASTRA MIGRAVIT.*
CHRISTO ADSTAT, sunt ejus verba. Tum sub finem: *SINE DU-*
BIO, ait, *AETERNORUM COMPOS efficitur GAUDIORUM,* sicut
 arbor *PARADISI* foecunda. Infra vero ad ipsum oratione con-
 versa inquit: *Cur ANIMA tua non majora praestet IN PARADISI*
BEATITUDINE POSITA, quam in Saeculi certamine constituta?
Vocatus ab Auctore, ad laboris fructum & perenne Refrigerium perven-
nisti, in illa beatissima Patriarcharum (en Sinus Abrahami) societate
receptus &c. Fac ergo, quaesumus, ut qui te ad Christum feliciter ve-
nisse, & sine fine te Regnare cum illo gloriamur, tuis continuo precibus
muniamur, & qua frueris CUM CHRISTO GLORIA, perfruamur.
 Audi *Basilium* quoque *Seleuciensem* Episcopum, ejusdem Saeculi
 Quincti Scriptorem Graecum, qui in laudatione Sancti Stephani,
 ipsum Protomartyrem alloquens ait: *Tu labore defunctus, REGI*
REGUM CONREGNAS, & Domino Dominantium. Flagitamus sup-
plices tuae illi Regiae aggregari. Testis praeterea accedat & Sanctus
Maximus Taurinensis Saeculo ipso Episcopus. Is postquam in Homil.
 de Sanctis Martyribus, non eos tantum, qui sanguine suo Fidem
 tuentur, sed & reliquos Fideles Dei cultores, Martyrii corona donari
 scripsit, divites Saeculi cum paupertatem voluntariam amplexis con-
 fert, inquit: *Tu, quum recedis a Saeculo, relinquendo tuas divitias*
perdidisti: ego autem, quum mihi de hoc Mundo migrare contingit, di-
vitias meas AD PARADISUM vebo. Tuas divitias post mortem,
 exemplo illius purpurati divitis, ignis & tenebrae subsequuntur: meas
 divitias, exemplo Lazari, *SINUS ABRAHAE ET BEATITUDO*
suscipiet. Non semel vidimus, *Abrahae Sinum* a Patribus sumi pro
 Beatitudinis loco, ipsumque alio sub nomine esse *Paradisum.* In ea sen-
 tentia Sanctum etiam Maximum fuisse animadvertis. Ecquid vero
 fuit sacro huic Antistiti *Paradisus?* Idem atque *Regnum Caelorum.*
 Fidem faciunt ejus verba in Homil. I. de sancto Latrone, ubi ait:
BEATUS Latro, dum supplicium patitur, REGNUM CAELESTE
CONSEQUITUR. Videamus, cur tantorum criminum reus tam cito a
 Salvatore *PARADISUM* PROMERETUR. In Homil. I. de Sancto
 Laurentio ait, Xistum Romanum Pontificem, quod passioni vicinus
 foret, fuisse *Regnis Caelestibus jam vicinam.* Mitto alias de Apostolis &
 Martyribus, & de Sancto Eusebio Vercellensi Episcopo, ipsius Homilias,
 in quibus Caelestem Beatitatem eis a Deo conlatam saepe significat.

Circa An. Christi CCCXL. Ravennatem Cathedram eximius vir

San-

Sanctus Petrus Chrysologus ascendit. Prostant ejus Sermones, e quibus discas, quae illius sententia fuerit in praesenti controversia. In Sermone LXVI. pauperis Lazari, ac Divitis in Evangelio famosi Historiam sive Parabolam illustrat. De primo in haec verba loquitur: *Recipit pro doloribus REQUIEM, pro opprobrio GLORIAM, pro contumeliis HONOREM, pro despectu GRATIAM, pro poenis IMMORTALITATEM, pro vulneribus PRAEMIAM, pro siti REFRIGERII FONTEM, pro fame CAELESTIS MENSARUM DELICIAS SEMPITERNAS: Et quem Divitis angulus non cepit, Sinus Divinae Consolationis includit. Quamquam sacris phrasibus sive coloribus pingatur Lazari vita functi status, peritus tamen Lector intelligit, hisce delineari Beatorum vitam, quae pios Christi Fideles in Caelis manet; neque aliud Chrysologo fuisse Abrabae Sinum, nisi ineffabilis illius Beatitudinis sedem. Potiora nihilominus & clariora sunt, quae eloquentissimus Praeful addit intra, dum ait: Dicendo sic, tam Justos quam Injustos ante adventum Domini apud Inferos fuisse declarat, & discretos locistantum, non regionibus fuisse divisos. Postquam vero Dominus resurgens a mortuis aperuit Infernum, patefecit Caelos, Paradisi claustra reseravit, DEDIT SANCTIS PARADISI INTRARE REQUIEM, AD CAELI GLORIAM PERVENIRE. Ista qui sic credit, intelligit, quid mortalibus veniens donaverit Christus. Non credidit, non intellexit haec Burnetus. Etiam negavit, nunc Improbos in Inferorum igne cruciari. At postquam illum Judex aeternus ad se accivit, oculos ad ea, quae negabat, aperuerit. Nos interea discimus, quid ante mille & trecentos Annos Catholica crederet Ecclesia, cujus communem doctrinam complectitur & profert Chrysologus. Et vide, quam multa tam paucis exhibeat. Christianae gentis Paradisus non jam terrestris, sed in Caelo efformatus a Deo: ibi Requies, ibi Gloria, ibi Honor, ibi Gratia, Immortalitas, Refrigerium, ibi Deliciae Sempiternae, ibi ad Caelestem Mensam (quod Christus in Evangelio pollicitus fuerat, innuens inenarrabilem Justorum Laetitiam ac Felicitatem in Caelis) saturatae Piorum Animae. Qua igitur fronte Burnetus dicitur, defecisse in ejusmodi quaestione a veterum sententia Catholicam Ecclesiam? Proinde ad illum, ejusque similes incredulos, dixisse videtur infra idem Chrysologus: O si quis veniret a mortuis, & quod ibi agitur, heic referret, omnes crederent ei. Haec etiam Burnetus, ut puto, in cordis sui intimo sibi canebat. At cur ille*

ille non credidit Christo affirmanti, inhumanum Divitem illum torqueri in Flamma ac Tormentis, & quidem ante supremum solemne Iudicium patientissimum vero Pauperem jam Recepisse Bona ac Praemium Patientiae suae in Sinu Abrahae; quem Locum veteres sermone omnes pro Caelestis Beatitudinis domicilio sumserunt? *Scimus*, inquit heic Chrysologus, *scimus*, & *Vitam parari bonis*, & *malis Tormenta praeparari*; sed dum vitiis capti, virtutum tempus nolumus advenire, fingimus nescire, quod scimus; quum de Caelo Christus veniens, & ab Inferis ipse rediens, & quid bonos in Caelo maneat, & quid malos expectet in Inferno, & verbo docuerit, & firmaverit exemplo. Ceterum Chrysologus in eodem argumento de Divite & Lazaro versatur Sermone CI. ubi haec reperit: *Factum est autem, ut moreretur Pauper, & portaretur ab Angelis in Sinum Abrahae. Non immerito, fratres, sua tunc Deus omnes Sanctos suscipit in Requie, & in ipsa Caelesti Beatitudine fungitur Dispensatoris officio &c.* Quippe haec est Domini ipsius promissio Luc. XII. 37. ubi paratum Justis immensum post mortem in Caelis Praemium, hisce verbis describit: *Beati servi illi, quos, quum venerit Dominus, invenerit vigilantes. Amen dico vobis, quod praecinet se, & transiens ministrabit illis.* Denique Chrysologus in Sermone CXIX. Apostoli verba: *Omnes quidem currunt, sed unus accipit bravium*, exponens, inquit; *Si pro corruptibili corona tantus labor a quibusdam suscipitur: quanto magis nos omnem laborem sustinere debemus, quibus Praemium Caeleste, & Aeternae Glorae Corona promittitur? Si certantes vincimus, tot Coronas accipimus, quot victiorum victores fuerimus. Sancti Martyres in agone certaminis positi, non solum vitia peccatorum, sed ipsam mortem vicerunt, & Praemia Immortalitatis susceperunt.*

Sed ex Italia in Aegyptum, quaeso, navigemus, Sanctum quoque Isidorum Pelusiotam, virum magnum, interrogaturi, quatenam sibi fuerit in hocce argumento sententia. Illum, inquam, adeamus, celeberrimum Chrysostomi discipulum, qui sibi Anno Christi CCCXX. ingentem cum doctrina, tum pietate famam comparavit. Itaque is Lib. I. Epistol. 376. ait: *Pilifer ille Baptista, & Divitis janitor (idest Lazarus) qui fame ac nuditate contabuit, (Εἷς τῆν ἀλεκτον, καὶ ἀπάρτος ἀνασφίραι καὶ τὰ λυποῦνται ΒΑΞΙΑΙ'ΑΝ) IN SEMPTERNO, ac finis omnis experti REGNO versantur & consoventur.* Divitem quoque in Gehenna & Igne versari addit. Tum Lib. II. Epistol. 179. patientiae documenta tradens, scribit: *Neque enim heic est laborum praemium:*
verum

verum heic quidem *Certamina*; *POSTEA* autem *PRAEMIA*. Quod ille repetit eodem Lib. II. Epistol. 24. inquit: *Perfpicuum est, certaminum & laborum stadium hanc vitam esse; CORONARUM autem & PRAEMIORUM futuram*. Ad haec Lib. IV. Epistol. 121. Lazarum quidem fateetur ad extremam pervenisse miseriam; ea tamen calamitas ipsi Felicitati fundamentum existit Maximum ac verissimum. Nisi enim ad tantam delatus esset miseriam, numquam AD tantum *GLORIAE CULMEN* devenisset. Neque ei dumtaxat, uti nos idem Isidorus docet, sublimia haec praemia elargitus est Deus: ceteris quoque in virtutis curriculo certantibus eadem ipse paravit. *Certaminibus enim* (inquit Lib. IV. Epistol. 204.) merito consequentia sunt etiam Praemia. Atque Evangelicis decursis studiis, *CAELUM*, & quae in eo sunt Bona, *NOS MANENT*. Et ne Burnetus aliquos heic in scirpo nodos quaerat, suamque enormem somniamtam intercapedinem inter *Certamina & Praemia*, invito Isidoro, in ejus verba obtrudat, accipe quid sanctus ille Asceta scripserit Lib. II. Epistol. 151. ad Theophilum Lectorem. *Beatus*, inquit, *Timotheus frater tuus ex hominum coetu excessit, id quidem omne, quod mortale habebat, in terra deferens, ANIMA autem IN CAELUM penetrans, atque cum Divinis ac Mundo sublimioribus Virtutibus, ut confido, ebhoros agitans*. Subinde vero moerorem se abjecisse ait, quum recogitaret, rerum humanarum finem, amplissimorum ipsi Bonorum initium existitisse. Infra addit: *Verum ut probus athleta in Caelestem Aulam ad accipiendam Coronam avolavit*. Nulla ergo de Isidori mente dubitatio reliqua est. Attamen haec ille rursus confirmat Lib. V. Epistol. 388. atque Epistol. 396. ubi bene morientibus gratulandum esse ait: *Qui enim* (τῶς γὰρ ἀπας Μακαρίστους ὑπαζέται τὸν ὄρον) *Summat Beatitudinis terminum repererunt, de ceteris omnibus securi, Animam solam exornarunt*. Tum subdit, Carnem quoque in Resurrectione & ipsam fore vivificandam. In Aegypto identidem natus, & Isidoro eidem multa necessitudine conjunctus fuit Synesius Episcopus Ptolemaidis. Habemus sacros illius Hymnos, oestro non vulgari compositos, in quibus hanc eandem doctrinam disseminat. Illum audi in Hymno I.

*Beatus, qui post factus,
Post labores, post acerbas
Terrenas curas,
Ingressus Mentis vias,*

Alti-

Altitudinem vidit Divina resurgentem Luce.

In Hymno III. de Sanctis Martyribus ait:

Quos Angelicis

Coronasti, o Rex,

Fulgoribus, tuos sacros ministros.

Sed & in Hymno I. dixerat:

Eja mihi, o Anima, bibens

Ex Bonorum perenni fonte,

Conceptis suppliciter precibus ad Parentem

Ascende, neque cunctare

Terrat terrena linquens;

Mox vero juncta cum Patre,

Dea in Deo exsultabis.

Circa Annum Christi CCCCLX. *Arnobius junior*, gente, ut videtur, Gallus, Commentarium in Psalmos scripsit, non semel typis traditum. Is autem in Psalmum 137. haec nobis exhibet: *Qui pure in conspectu hominum Deo laudes obtulerat, incipit Post Depositionem Corporis in Conspectu psallere Angelorum, & adorare Templum sanctum, idest Dominum Jesum Christum, in quo Plenitudo Deitatis inhabitat.* Lucem haec ejus verba ministrabunt alteri Scriptori, qui Anno Christi CCCXCXVIII. floruit, hoc est, *Gennadio Massiliensi* Presbytero. Huic a plerisque tribuitur Opusculum de *Ecclesiasticis dogmatibus* sub Augustini nomine perperam olim editum. Quamquam is alicubi in tradenda fide Catholicae Ecclesiae a recto tramite declinarit, atque in argumento nostro se perquam jejunum exhibeat, ejus tamen verba occultata nolo. Ita ille Cap. 46. secundum editionem Benedictin. in calce Tomi VIII. Operum Sancti Augustini: *Post Ascensionem*, ait, *Domini ad Caelos, OMNIUM SANCTORUM ANIMAE CUM CHRISTO SUNT, & exeuntes de Corpore ad Christum vadunt, expectantes Resurrectionem Corporis sui, ut ad integram & perfectam Beatitudinem cum ipso pariter immutentur.* Nihil habet hic Auctor de loco, ubi Justorum Animae post dissolutionem Corporis degant: attamen sat nobis canit, quum illas ad Christum proficisci, & cum Christo esse pronuntiat. Quis enim negare audeat, quin Beatus sit, qui cum Christo sit jain posito in Caelesti Beatitate, & in Gloria Dei Patris sedente, & conspiciat atque contempletur non amplius per fidem, sed per speciem illum, qui Via, Veritas, & Vita est?

Atque heic locum habeat Sancti Athanasii doctrina in Oratione

G g

contra

contra Gentes Cap. 2. Scribit ille, Hominem in principio a Deo omnium opifice, per proprium Verbum & Salvatorem nostrum Jesum Christum, efformatum fuisse ad imaginem suam, eumque donatum propriae aeternitatis cognitione, ut videlicet hac conservata similitudine, nunquam cogitationem a Deo averteret, neque a Sanctorum convictu discederet: sed datam gratiam, & propriam ex paterno Verbo vim infusam retinens Exsultaret, & Cum Deo Familiariter Viveret, ac Vere Beatam Immortalem Vitam duceret. Nam si nulla re a Dei cognitione impediatur: Animae munditia, Patris Imaginem Deum Verbum, ad cujus quoque Imaginem factus ille est, Semper Contemplatur, summoque stupore admiratur providentiam, qua Mundus per ipsum administratur. Ita rebus quidem, quae sub sensu cadunt, & corporeae sunt, excelsior efficitur; cum his vero, quae Caelestes ac Divinae sunt, solaque intelligentia comprehenduntur, vi Mentis conjungitur. Quum enim corporibus Mens humana non adhaerescit, neque aliud ex eorum cupiditate extrinsecus admixtum habet; sed tota ipsa sursum secum est, sicuti initio facta est; tunc ea, quae sensus movent, omniaque humana transcendens, in sublime fertur, Verbumque & in Verbo Verbi Patrem Videt, cujus Contemplatione delectata, suo erga illum amore & desiderio renovatur: quemadmodum utique primum Hominem, qui Hebraea Lingua Adam dictus est, sacrae Scripturae narrant, initio summa cum libertate & fiducia Mente Deo adhaesisse, Sanctorumque societate & consuetudine potitum fuisse in illa rerum Caelestium Contemplatione, qua illo in loco fruebatur, quem Sanctus Moyses tropo quodam Paradisum appellavit. Animae enim munditia eam ad Deum per se ipsam Conduendum idoneam reddit, ut ipse Dominus ait Matth. V. 8. Beati mundo corde, quoniam ipsi Deum Videbunt. Haec Athanasius. Si ergo Patres in Visione & Contemplatione Verbi (in quo etiam Patrem Mens videt) Ratuerunt Immortalem Vereque Beatam primi Hominis Vitam: quid putandum de Anima Justorum corporeis nexibus soluta, quae ad Verbum, hoc est Christum jam glorificatum pergat, & cum Christo degens, ejusque adspectu & familiaritate fruens, & Claritatem, hoc est Gloriam illius contemplant, in Caelis habitet? Hoc certe Apostolus prospectabat veluti futurae ac speratae Beatitudinis apicem; & propterea Prima ad Thessalonicenses IV. 16. dicebat: Et sic semper cum Domino erimus. Ab ejusmodi Felicitate disjunge, si potes, Visionem beatificam Dei, quando Paulus in consortio & praesentia Christi Dei, atque in illius revelata facie Beatitatem Justorum collocare in primis videtur.

An

An Adam facie ad faciem, dum in Paradisi deliciis versatus fuit, intueretur Verbum, & in Verbo Verbi Patrem, aliis disputandum relinquo. Nos compertum habemus, id Justorum Animabus a Corpore separatis, post Crucem, Resurrectionem, & Ascensionem Filii Dei in Caelum, concedi, neque tam grande donum differri ad finem Mundi. Semper enim Christiano homini ante oculos recurrant oportet Apostoli non fallacia verba Secund. ad Corinth. V. 6. quae repetere atque inculcare semper juvabit: *Scientes, quoniam, dum sumus in Corpore, peregrinamur a Domino* (idest, remoti sumus a beato conspectu Jesu); *per fidem enim ambulamus, & non per speciem. Audemus autem, & bonam voluntatem habemus* (scilicet cupimus) *magis peregrinari a Corpore, & Praesentes Esse Ad Dominum.* Itaque cupiebat Paulus, ut finis adesset praesentis peregrinationis, atque Anima ex isto carcere exiret. Heic enim, quantumlibet sanctus sit homo, & cum Deo conjunctus, Deum tamen tantummodo per fidem, per speculum, & in aenigmate contuetur. At ubi a crassa hujusmodi materia expeditur Anima, jam sit praesens ad Dominum, ejusque divinitatem *per speciem*, idest, facie ad faciem intueretur & contemplatur. Proinde quum Paulo exploratum foret, si ex humanis abiret, se statim fruiturum beata Visione Domini nostri: propterea mori lucrum putabat, mortemque exoptabat: quod & reliqui subinde Sancti in votis habuere. Multi Patrum, uti haecenus vidimus, diserte traderunt, Piorum Animas in Caelum translatas inter Choros Angelorum, qui sane Deum vident, versari, adstare Triadi, ac Deum facie ad faciem contueri. Porro idem significant tum ipsi tum ceteri, dum scribunt, felices Justorum Spiritus *ad Dominum pergere, esse cum Christo, praesentes esse ad Dominum*; unus quippe Deus est cum Patre & Spiritu Sancto Dominus noster. Neque dubitandum, inquit Beda Sermone aestivali de Sancta Pentecoste, *quia quibus Gloria Filii revelabitur, eisdem quoque Patris & Spiritus Sancti liceat ADESSE Conspectui: quia quorum una est Divinitas, una utique & inseparabilis Visio est.*

CAP. XXIII.

Burneti videndae exclamatiōes adversus Florentinum Concilium. Fulgentius Ruspensis Episcopus, Primasius Adrumetinus, Gregorius Magnus summus Pontifex, Idefonsus, & Julianus Archiepiscopi Tiletani, Beda Anglus, Aldelmus iidem Anglus, Alcuinus pariter Anglus, Synodus Francofordiensis, Florus Maestris, Paschasius Radbertus, Petrus Lombardus, Thomas Aquinas, alique Sententiam Romanae Ecclesiae de Beatitudine Sanctorum tuentur. Ab eadem primo alienus Johannes XXII. Papa, tum ipsam confirmat.

ATque his haecenus digestis, habet, ut spero, jam Lector, unde miretur ac doleat seditiosum Burneti ingenium, simulque methodum illusoriam, qua ille usus est in pertractando hoc tanti momenti in Republica Christiana argumento. Non secus atque illi fraudulentis, aut crassa Minerva nati, qui causae alicuius civilis patrociniū suscepto, id unum curant, ut suae partis tabulas, testes, atque rationes exerant & exornent, neglectis sive contemptis, quibus adversariorum causa juvatur; Burnetus quoque in controversiam istam invasit. Quae sibi propitia in sacris Literis, atque in antiquis Ecclesiae Scriptoris visa sunt, haec ille diligenter arripuit, summaque confidentia oculis incautae gentis objecit, triumphum hac una via sibi pollicitus. At quae sibi adversari tum in eisdem divinis Libris, tum apud veteres Patres novit, aut dissimulavit, aut levi brachio excussit. Proposita autem Romane Ecclesiae sententia, Sanctorum Animabus purgatis aditum in Caelum, ac Visionem Dei tribuente: *Deus bone his exclamat pag. 59. unde desumpta sunt haec verba? Ex quo Librosacrae Scripturae? ex quibus monumentis primitivae Ecclesiae?* Immo is vix credenda temeritate pag. 74. unum Stapletonum adducens ait: *Pontificii (quorum interest maxime, ut Caelo, Gloria, & Visione Dei fruantur Sancti ante Resurrectionem) fatentur, Patres generatim ea de re nobiscum convenire.* Ridendam sane, liceat primo dicere, exclamationem. Risisset & Burnerus Ariannum exclamantem: *Bone Deus? unde desumpta vox Homeros, sive Consubstantialis? ex quo sacrae Scripturae Libro? quibus monumentis primitivae Ecclesiae?* Risisset quoque Macedonianum, Nestorianum, Euthychianum, aliosque id genus a Catholica Ecclesia damnatos, si Eccle-

Ecclesiae insultassent, quod in decretis adversus illos promulgatis verbis adhibuisset, neque in Scripturis Sacris, neque a Patribus antea diserte usurpata. Dum res in Divinis Libris contineatur, aut inde recte educatur, aut per legitimam veterum Traditionem ad nos veniat: stulte de Vocibus ineatur contentio. Nam si in Libris divinitus conscriptis dogmata quaeque conceptis verbis traderentur, nulla fortassis emerget de iis disputatio. Porro quam longe ab aequitate abscesserit Burnetus, dum pro se *Patres generatim* stare jactitat, &, quod gravius est, id *sincere* Catholicos fateri pronuntiat, in superiori certamine jam palam factum fuit. Quos ille pro se laudat, aut nullius esse ponderis deprehendimus, quoties a Catholica Ecclesia dissentiunt, aut ipsos plerumque invenimus cum ipsius Ecclesiae Catholicae sententia omnino concordēs. Nos contra, *nubem testium*, ut ait Apostolus, hoc est ingentem Ecclesiasticorum Scriptorum coetum produximus, eosque in Ecclesia praestantiores & doctiores, majorisque nominis, praecones magnificos ejusdem doctrinae, quam tandem Florentinum Concilium postremo calculo probavit. Atqui sunt ex antiquis nonnulli, qui aliter, quam nunc creditur, sensisse videntur. An ita sit, expende primo. Tum etiamsi id statuas, memineris oportet, & aliis erroribus ab Ecclesia proscriptis aliquem non defuisse antea patronum, quum nempe nondum ad Ecclesiae examen rite deducta fuerat controversia, & liberum cuique erat in re nondum definita, quam vellet, opinionem amplecti. Immo nullus error, nulla haeresis prodiit umquam, cui non varia Scripturarum loca militare ab earum propolis existimata fuerint. At numquid obstitit, aut ob stare debuit paucorum contraria opinio, aut apparatus ille e Scripturis male petitus, quo minus Ecclesia communem melioremque Traditionem sequuta, quod foret veritati magis consonum, decerneret? *Consensionem sequemur, si in ipsa vetustate, omnium, vel PAENE OMNIUM Sacerdotum pariter & Magistrorum definitiones sententiasque tenemus*: inquit, & quidem egregie, Vicefilius Lirinensis Cap. II. Commonit. Propterea postquam perspeximus, ab ipsis primis Ecclesiae Saeculis illud ipsum dogma de Beatitate Sanctorum, quod Florentini Concilii decreto firmatum fuit, viguisse in Ecclesiis Orientis, Aegypti, Africae, Italiae, Galliae, atque Hispaniae, & praestantissimos Patrum eidem adhaesisse, potioremq; Populi Christiani partem ea doctrina fuisse imbutum; temere profecto agat, qui in eo Oecumenici Concilii decreto aliquid novitii, aliquid peregrini sibi fingat, aliisque persuadere velit. Sed jam stat medius Lector ut iudex, atque

que acceptis utriusque sententiae momentis, jam, ut spero, agnovit, quanto jure Catholica Ecclesia in ea conquieverit, & standum decreverit, quam nempe variis in locis divinae Scripturae, & suffragio veteris quoque Traditionis comprobata firmatamque invenit, & quam deferere grande piaculum fuisset.

Hujusce autem Traditionis continuationem in Ecclesia post Saeculum a Christo nato Quincentum brevibus ostendam; neque enim juvat ultra, quam par est, fatigare Lectorem. Nonnullis ergo celebrioribus Ecclesiasticis Scriptoribus subsequenti aetatis contentus, expedito itinere ad metam festinabo. Circiter Annum Christi DIV. Ruspensem Episcopatum in Africa inijt insignis scientia ac sanctimonia vir *Sanctus Fulgentius*, atque Anno DXXXIII. plenus meritis vivere desuit, inter sui temporis Episcopos facile princeps. Is in Lib. de Fide ad Petrum Diaconum Cap. III. a Burneto prorsus discors, haec habet: *Illi cum Christo Regnabunt, quos Deus gratuita bonitate sua praedestinavit ad Regnum, praeparavit etiam glorificandos, ut Christi coheredes effecti, Regnum Caelorum sine fine possideant. Ad quod Regnum diversis temporibus per Sacramenta, quae ad fidem Incarnationis suae Dominus instituit, Illi Pervenierunt, quos Deus gratis, nullo bonae voluntatis, vel boni operis merito praecedente Salvavit.* Eandem doctrinam ab eo confirmatam habemus in exordio Epistolae II. ad Gallam de consolatione super morte mariti, ubi ait: *Neque enim frustra Dominus Conjugem tuum religione sincera fidelem &c. de peregrinatione hujus Vitae ad Aeternam Caelestis Patriae celeriter transulit Mansionem, nisi ut & illi Gaudia Aeterna conferret, & tibi facultatem melius vivendi conferret. Illi donavit, ut Corpore spoliatus, sit cum Christo sine fine Victurus: tibi donavit &c.* Alia dimitto Sancti Fulgentii loca, id unum moniturus, quum is de Resurrectione & supremo Judicio agit, & praesertim Lib. II. Cap. X. de Remission. Peccator. non aliud ab ipso tradi, quam quod Catholici tradunt. Scilicet *Nulla tibi erit remotio Malorum, quamvis futura sit Bonorum promotio meritorum. Illa enim manebunt in Poena; ista Perficientur in Gloria.* En ipsissimum Catholicae Ecclesiae Dogma, in Africanis Ecclesiis semper constans, & ab eximio sanctoque illo Episcopo rursus confirmatum, quem *ad Caeli Regna translatam* in ejus Vita sine haesitatione affirmat Auctor certe synchronus, illiusque discipulus, in Actis Sanctor. ad diem Primam Januarii. Sanctum Fulgentium nunc subsequatur alter in Africa Episcopus, hoc est *Primasius* Adrumetinae Sedis Antistes, qui Anno

Anno Christi DL. floruit. Ei tribuitur Commentarius in Epistolas Sancti Pauli, non semel typis traditus. De antiquis Patriarchis dixerat divinus Apostolus ad Hebr. XI. 39. *Et hi omnes testimonio fidei probati, non acceperunt repromissionem, Deo pro nobis melius aliquod providente, ut non sine nobis consummarentur.* Hoc telo non semel usus est Burnetus adversus Catholicorum sententiam, quasi verbis istis Apostolus praemia & gloriam Sanctorum usque ad consummationem Saeculi distulerit. At nos non semel respondimus, a Paulo dumtaxat indicari Gloriam redi-vivae Carnis, quam illi sine nobis nequaquam consequuntur; aut affirmari, mercedem minime illis conlatam, antequam adveniret Christus ad redimendum genus humanum. Nam tunc & illi, & Christi fideles, repromissionem accipere coeperunt: quae sententia fuit Sedulii Scoti in Collectaneis ad Epistolas ejusdem Apostoli, atque aliorum Interpretum. Accipe nunc quid Primasius scribat: *Repromissionem non acceperunt. Dicit ergo aliquis: Quid eis profuit Deo servisse, si haecenus sine praemio permanent? Alsit hoc a fidelium cordibus, ut credamus (quemadmodum Burnetus credebat) eos sine praemio manere. Adbuc quippe mortali Carne circumdati, magnum praemium perceperunt, vivendi scilicet, Deum cognoscendi, multaque mirabilia patrandi. Nunc vero quiescunt in Anima, in Beatitudine Regni Caelestis, Ineffabili Laetitia perfruenter.* Tum inquit, eos in generali Resurrectione recepturos immortalitatem & incorruptionem in Corpore, quam modo habent solummodo in Anima.

Uti Sanctus Fulgentius initium Saeculi Sexti, ita finem mirum in modum illustravit Sanctus Gregorius Magnus, Anno Christi DXC. Romanus Pontifex electus, cui paucos in sublimi loco illo pietate, prudentia, atque doctrina pares ostendere possis. Christianae Fidei lucem, aut illius restitutionem ei debet Anglia: ac proinde, si quod ille censuit de controversia praesenti, fuerimus assequeuti, duo etiam simul ediscemus; scilicet qualis foret Ecclesiae Romanae, omnium praestantissimae atque magistrae, de Beatitate Sanctorum Traditio, & quid hac de re Anglo-Saxones Britanni sentire primum coeperint. Is ergo in Praefatione ad Librum Job sub finem quaerens, cur teste Sancto Johanne in Apocalypsi VI. XI. Sanctis in Caelo datae sint *Singulae Stolae*, ait: *Ante Resurrectionem STOLAS SINGULAS ACCEPISSE dicti sunt, quia sola adhuc MENTIS BEATITUDINE PERFRUUNTUR. BINAS ergo ACCEPTURI sunt, quando CUM ANIMARUM PERFECTO GAUDIO ETIAM*

ETIAM CORPORUM INCORRUPTIONE vestientur. Tum Lib. IV. Cap. 29. in eundem Librum Job, verba illa interpretans: *cum Regibus & Consulibus terrae, ita loquitur: Potest futuros praedicatores Ecclesiae in praesentia spiritus contemplari, qui postquam de Corporibus transeunt, nequaquam per morarum spatia, sicut antiqui Patres, a Caelestis Patriae perceptione differuntur. Mox quippe ut a carnis colligatione exeunt, IN CAELESTI SEDE REQUIESCUNT*, Paulo attestante, qui ait: *Scimus, quoniam si terrestres domus &c.* In idem dogma confluunt, quae sanctissimus ille Pontifex disserit Lib. IX. Cap. XI. num. 17. in Librum eundem Job: *Interiora, inquit, Austri sunt occulti illi Angelorum ordines, & secretissimi Patriae Caelestis Sinus, quos impiet calor Spiritus Sancti. ILLUC quippe SANCTORUM ANIMAE & NUNC Corporibus exutae, & post Corporibus repositae PERVENIUNT, & quasi astra in additis occultantur.* Sed & infra luculentiori sermone haec ipsa confirmat, inquit Lib. XIII. Cap. 43. *Hoc jam caelestis muneris habemus, ut quum a Carnis nostrae inhabitacione subtrahimur, MOX AD CAELESTIA PRAEMIA DEDUCAMUR.* Hi vero, qui ante adventum Domini in hunc Mundum venerunt, quantumlibet iustitiae virtutem haberent, ex Corporibus educti, in Sinu Caelestis Patriae statim recipi nullo modo poterant: quia necdum Ille venerat, qui Inferni claustra sua descensione solveret, & Iustorum Animas in Perpetua Jam Pede collocaret. Illos autem, quum in Inferno detinerentur sine tormentis, tamen addit stravisse lectum in tenebris: *Grave enim taedium electis fuit, post solutionem Carnis, adhuc Speciem non videre Creatoris.* Itaque diserte tradit Gregorius, Sanctos ante Christi adventum a Caelesti Patria, atque adeo a Visione Creatoris exclusos esse. Quum vero ad eam Patriam nunc Iustorum Animas deferri affirmet, consequens est secundum Gregorii mentem ipsas Specie Creatoris, idest beatifico Dei adspectu frui. Quamquam dicit omnia, qui illas jam in Patria versari dicit. Quod & infra Lib. XVIII. Cap. 28. uberius indicat, ubi de Caelesti Hierusalem loquens, ait: *Quamvis in ea Sancti omnes tanta claritate fulgeant, tanta perspicuitate transluceant, ei tamen Sapientiae, de cuius imagine habent omne quod sunt, aequari non possunt &c.* Addit, illos similes esse Deo, & non similes: *Aspiciendo quippe aeternitatem Dei, fit eis, ut aeterni sint; & dum VISIONIS EJUS DONUM PERCIPIUNT, ex perceptione Beatitudinis imitantur, quod VIDENT.* Et similes ergo sunt, qui BEATI fiunt: & tamen Creatori similes non sunt, quia Creaturae sunt. Atque ad hoc ipsum argumentum.

gumentum pertinent, quae magnus iste Ecclesiae Doctor scribit Lib. I. Homil. 19. num. 4. in Evangelia, ubi de Sanctis veteris Testamenti iterum verba faciens, illos inquit etiam si recte pro percipiendo Regno vixerunt, diu tamen ad percipiendum Regnum dilati sunt: quod tunc tantummodo factum, quum Dominus Paradisi claustra hominibus interpositione suae mortis aperuit. Ubi vides nihil discriminis a Sancto Gregorio agnosci inter Paradisum, & Caelorum Regnum. Denique subdit: Nos autem post Mediatoris adventum in hoc Mundo venientes, ad REGNUM ducimur, MOX UT DE CORPORE eximus, & illud SINE MORA PERCIPIMUS, quod antiqui Patres cum magna percipere dilatione meruerunt. Adeo perspicua sunt hanc in rem beatissimi Romani Pontificis verba, ut supervacaneum videatur, alia ex ejus Libris delibare. Attamen culpam vix effugerem, si insalutatum transilirem nobilem ejusdem locum Lib. IV. Cap. 2. Dialogorum, ubi perinde ac praevidit Burnetum aliquem erupturum aliquando, qui in communem Ecclesiae Catholicae doctrinam digladiari non erubesceret, in haec verba ad Petrum interrogantem, an Nunc ante Resurrectionem Corporum, in Caelo recipi valeant Animae Justorum, respondet: Hoc neque de omnibus Justis fateri possumus, neque de omnibus negare. Nam sunt quorundam Justorum Animae, quae a Caelesti Regno quibusdam adhuc Mansionibus differuntur. In quo dilationis damno quid aliud innuitur, nisi quod de perfecta justitia aliquid minus habuerunt? Et tamen LUCE CLARIUS CONSTAT, quia perfectiorum JUSTORUM ANIMAE, MOX UT bujus CARNIS CLAUSTRA EXEUNT, IN CAELESTIBUS SEDIBUS RECIPIUNTUR. Quid & ipsa perse Veritas attestatur, dicens: Ubi cumque fuerit corpus, illuc congregabuntur & aquilae: quia UBI REDEMPTOR NOSTER EST CORPORE, ILLUC PROCUL DUBIO COLLIGUNTUR JUSTORUM ANIMAE. Et Paulus dissolvi desiderat, & Esse Cum Christo. Qui ergo Christum in Caeleste esse non dubitat, nec Pauli Animam esse in Caelo negat. Qui etiam de dissolutione sui corporis, atque in habitatione Caelestis Patriae, dicit: Scimus, quoniam si terrestris domus nostra &c. Haece est Gregorii Magni doctrina, immo Apostolicae Sedis, quam profecto non novam, neque ab eo inventam quisquam suspiciet, posteaquam stabilem ipsam deprehendimus praecedentibus quoque quinque Saeculis in universis Ecclesiis, illamque inter alias professam fuit Romana omnium Magistra, uti literae Martyrum, vivente Sancto Cypriano scriptae, & Sancti Damasi, & Leo I. antea fidem fecerunt. Quamobrem mirum semper videatur, qui Saeculo Christi Quarto decimo in mentem venerit Johanni XXII. summo Pontifici in diver-

Hh

fam

san sententiam inelinare, turbasque eam ob causam excitare in Gal-
liis. Verum qui rogavit, ne Petri fides disiceret, minime sivit, ut
ejus successor Johannes ab antiquissima Ecclesiae Traditione desciscer-
ret; atque illa eam hac etiam in re hereditatem Patrum servavit.

Subsequenti Saeculo Septimo ejusdem Traditionis testes habemus
Toletanos duos Archiepiscopos, *Ildefonsum* videlicet, qui Anno Chri-
sti DCLVII. ad eam Cathedram assumtus fuit, & *Julianum*, qui
Anno Christi DCLXXX. in eadem successit. Auctor est Sanctus
Ildefonsus in Sermon. de Assumptione Beatae Mariae, Sanctos in
Caelesti Gloria positos anniversaria illa die gratulari ob adventum
Deiparae in Caelum. Julianus vero in Libris Prognosticon fufius
de hac ipsa re agit. Et quidem Lib. II. Cap. I. duos Paradisos ita-
tuit; terrestrem nimirum, ubi primi parentes habitaverunt; alterum
vero *Caelestem*, *UBI ANIMAE BEATORUM, STATIM UT ACOR-
PORE EXEUNT, TRANSFERUNTUR*, atque digna *Felicitate*
*laetantes, expectant receptionem Corporum suorum. DE HOC PA-
RADISO* Julianus Pomerius ait: *Hinc quoque videntur Animae Justo-
rum duci vel ire in Paradisum, recedentes a Corpore: quo se raptum di-
cit Apostolus, mente profecto, non corpore. Item idem post aliquanta*
*dicit: Satis est dictum de Paradiso Caelesti, & quod in eo Sanctae Ani-
mae Statim de suis Corporibus exeuntes, Deo donante, mittantur. Quod*
*ita debere credi, Dominus noster Jesus Christus sua auctoritate firma-
vit, ubi Latroni dicendo: Hodie Mecum Eris In Paradiso, sine ulla*
ambiguitate probavit, quod Beatas Animas, suis exutas Corporibus,
Paradisus Caelestis sine ullo intervallo temporis suscipiat. Claruit *Jul-
ianus Pomerius*, heic a Toletano laudatus, Anno Christi CCCXC.
teste Gennadio in Libro de Viris Illustribus. Tum pergit Julianus To-
letanus investigare, ubi sit Paradisus, in quo Beatorum Animae re-
quiescunt: & Sancti Augustini verba e Lib. XII. Cap. 34. de Genes. ad
liter. profert, quae supra Lector a me accepit Cap. XVII. ubi San-
ctus Doctor Summum quoque Caelum appellari posse *Paradisum*
scribit, & si dici oportet, *Paradisum Paradisorum*. Deinde Tole-
tanus de Sinu Abrahæ, in quem Beatorum Animae Recipiuntur, ser-
monem habens, haec adjicit: *Sinum Abrahæ, Requiem Patris, vel*
Secretum Patris, sive etiam Paradisum, significare, multiplicium
*Doctrum sententiarum definitum esse non ambigo, quum inter ceteros Am-
brusius, Augustinus, atque Gregorius, tanti Patriarchæ Sinum nihil*
aliud significasse, elegantius decuerint. Demum Julianus Cap. 13. Ec-
clesiae Catholicae fidem hisce delineat verbis: *Si esse Sanctorum Ani-
marum in Caelo, attestatione sacri eloquii credimus, oportet, ut & Iniquo-
rum*

rum Animas in Inferno esse per omnia credamus: quia ex retributione aeternae Iustitiae, ex qua Iusti Gloriantur, necesse est, ut & Injusti per omnia Crucientur. Nam sicuti Electos Beatitudo Glorificat, ita credi necesse est, quod die exitus sui Ignis Reprobos Exurat. Et nos supra vidimus, communem hanc in Ecclesia ab ejus exordio fuisse sententiam, Divitis praeterea Evangelici exemplo confirmatam, scilicet nequam procrastinari Iniquorum supplicia post mortem; atque adeo ex retributione aeternae Iustitiae, si credimus Improbos cruciari, Iustos pariter opus est credere praemio & Beatitudine donari.

Magnam Britanniam, immo & Ecclesiam universam, initio Saeculi post Christum natum Oetavi, illustravit venerabilis Beda, natione Anglus. Itaque ille in Expositione in Cap. XI. Evangel. Johannis scribit: *Mortem nostram Dormitionis nomine Scriptura significat. Nam Corpus, dum deseritur ab Anima, dormit in sepulcro, resuscitandum in novissimo die. Animae vero, dum deserunt Corpora, diversas receptiones habent. GAUDIUM BONAE, MALAE TORMENTA. Sed quum facta fuerit Resurrectio, & honorum Gaudium amplius erit, & malorum Tormenta graviora, quando cum Corpore torquebuntur. Haec ille ex Tractatu XLIX. Sancti Augustini in Johannis Evangelium. At nunc, bone Beda, quid fieri de Sanctorum Animabus censet? Responderet ille in Sermon. aestivali de Pentecoste, Sanctos scientiae fontem conspecturos: *Quod etiam de quibusdam perfectioribus Sanctis, & Ante Tempus Resurrectionis fieri Dubium Non Est; illis videlicet, qui si ducta bonorum operum dicere cum Apostolo valent: Cupio dissolvi, & esse cum Christo; mihi enim vivere Christus est, & mori lucrum. Tum subdit: Sed ne putaremur, eum Apostolis solummodo, & non etiam nobis, stillarum exempla sequeremur, Beatitudinem divinae cognitionis polliceri, generalem post haec sententiam subintulit, & OMNIBUS SE DILIGENTIBUS eadem SUAE VISIONIS ET COGNITIONIS PRAEMIA promittit &c. Agnoscit ergo Beda, Sanctorum Animas, jam in Caelum devectas, beari in conspectu Dei summi. Praeterea objectionem exerit, quam dudum a Sancto Augustino excitatam supra vidimus, eamque ipsius Augustini verbis solvit, inquiring ad Genesis verba: *Insufflavit in faciem ejus spiraculum vitae; Quæritur ergo, si potest Anima absque Corpore inter Angelos in Perpetua Beatitudine consistere sine defectu: quid ergo opus est, ut iterum surgat Corpus, ut illam tunc immortalē induat, quam nunc mortalem deposuit? Respondet: Inest quidem Corporis administratio (fortassis administrandi desiderium) quod detardatur Animus, ut non in Illud Summum pergat, donec consurgat Corpus, ut quod nunc ei sarcinum est, tunc sit in Gloria. Ceterum Beda in***

Libro singulari aliarum Quaestionum Cap. XI. *de Animarum usque ad restitutionem Corporum mansione* agit, & Gregorii Magni verba ex Dialogor. Lib. IV. Cap. 25. nuper a me excerpta, adserens, omisso ejus nomine, sua promore facit. Tum Cap. XII. quaerit, *num toni bonos in Regno, vel mali malos in Supplicio agnoscant*. Respondet ille, verba mutuatus ex Lib. II. Prognosticon Juliani Archiepiscopi Toletani, cujus tamen silet nomen, exemplo Lazari & Divitis Evangelici de hoc esse minime dubitandum. Tum addit: *Fit autem in Electis quiddam mirabilius, quia non solum eos cognoscunt, quos in hoc Mundo noverunt, sed velut visor ac cognitos recognoscunt bonos, quos numquam viderunt. Nam quum antiquos Patres in Illa Aeterna Hereditate viderint, eis incogniti per visum non erunt, quos in opere semper noverunt. Quia enim ILLIC OMNES COMMUNI CLARITATE DEUM CONSPICIUNT: quid est, quod ibi nesciant, UBI SCIENTEM OMNIA VIDENT?* Idem vero Scriptor alibi animadvertit, Christum Dominum esse *IN PARADISO REGNICAELESTIS, quem CUM CETERIS SANCTIS, etiam confitenti se in Cruce Latroni promittere dignatus est*. Qualis ergo ante mille Annos Anglicanae Ecclesiae de hujusmodi rebus sententia foret, ab insigni Scriptore Beda Britanni nunc ediscant. Sed & idem ediscere possunt a *Sancto Aldhelmo* Occidentalium Saxonum in Anglia Episcopo, qui ante Bedam floruit, & nobile Poema nobis reliquit *de laude Virginum*, sive *Virginitatis*, a Canisio editum, ubi Sanctos non uno in loco affirmat *ad Regna Caelorum* evectos. Prostant dilucida ejus verba: haec brevitati consulens omitto.

At minime omittam, quae *Alcuinus*, sive *Flaccus Albinus*, grande alterum magnae Britanniae ornamentum, atque omnium suo aevo doctissimus, hac de re scripto mandavit. Is non semel in suis Epistolis, atque alibi etiam tradit, Sanctorum Animas in conspectu summi Pastoris ac Redemptoris nostri, aeternis Gaudiis semper adfiscere; sed potissimum in Epist. LXXXI. ad Paulinum Patriarcham Aquilejensem, virum sanctitate & doctrina supra ceteros Italiae Episcopos celeberrimum, scripta circiter Annum Christi DCCXCII. ita de Sanctorum Gloria in Caelis loquitur, ut non solum communem tunc de illa fuisse Ecclesiae Catholicae sententiam prodat, sed etiam erroris arguat, si quis contra sentiat; quamquam innuat, neminem ausum tunc fuisse palam refragari hujusmodi doctrinae: quasi contra omnium sententiam ire novatores quidam Hispani vererentur. Nam de scetatoribus Elipandi Archiepiscopi Toletani, aut Felicis Orgellitani Episcopi, agit ibi Alcuinus, qui tunc Ecclesiam Dei novitiis suis opinioibus non leviter turbabant. Igitur scribit Alcuinus: *Est quo-*
que

que in quibusdam clancula dubitatio, an Animae Sanctorum Apostolorum & Martyrum, aliorumque Perfectorum, ante diem Iudicii in Caeleste recipiantur Regnum. His & hujusmodi spiculis (de pharetris, ut aestimo, exemptis perfidiae) unitatem Sanctae & Catholicae Ecclesiae, & veritatem universalis Fidei, aliqui vulnerare nitentes, etiam & spurcissimis errorum faecibus limpidissima Fidei pocula inficiunt. Qui sic loquitur, certiores nos facit, eandem tunc viguisse & stabilem ubique fuisse in Ecclesia Dei sententiam de Beatorum Felicitate perenni in Caelis, quae demum in Florentino Concilio inrevocabili decreto roborata fuit. Quicumque vero quemquam effectum Regni Caelestis consortem ait, simul ait, ipsum beatissimo jam Dei adpectu frui. Ad quam sane Visionem ineffabilem Alcuinus idem perductum ait Sanctum Villibrordum in Homilia de Natali ejusdem Sancti Archiepiscopi. Sed, quod plus est, habemus, unde confirmetur ipsius Alcuini fides de recepta tunc per universam Ecclesiam sententia, tribuente Sanctis Beatitatem ante diem Iudicii. Anno Christi DCCXCIV. celebrata fuit plenissima Synodus Francfordiensis contra errores praedicti Felicis Orgellitani. Ad eam convenerunt Episcopi ferme universi Italiae, Galliae, atque Germaniae, praesente inclyto Francorum Rege Carolo. Eginhardo quoque teste, interfuerunt eidem Synodo Legati Hadriani summi Pontificis, hoc est Theophylactus & Stephanus Episcopi. Quare quanta fuerit sacri illius conventus auctoritas, facile intelligis. Ibi vero efformata fuit Synodica Epistola ad Praefules Hispaniae, quae una cum reliquis Actis legitur in Collectionibus Conciliorum vulgatis. Inter cetera ajunt Patres illi: Sufficit vobis Sanctorum Patrum vestigia sequi, & illorum dicta firma tenere fide. Illi enim in Domino nostri exstiterunt Doctores in fide, & duces ad vitam. Quorum & sapientia Spiritu Dei plena Libris legitur inscripta, & vita meritorum miraculis clara & sanctissima: **QUORUM ANIMAE APUD DEUM Dei Filium Dominum nostrum Jesum Christum pro magno pietatis labore REGNANT IN CAELIS.** Nos consuevimus, unum Florentinum Concilium laudare, ejusque auctoritate uti in hujusmodi argumento. Nonne veneratione dignum est & Francfordiense plenarium, ante annos nongentos & quadraginta celebratum, & consentiente Romano Pontifice, ejusque Legatis confidentibus habitum? Dignum profecto est, atque ab eo proditur, quae tum foret hac in re doctrina Latinae saltem Ecclesiae: nam de Graeca mox erit mihi sermo.

Sed

Sed & Nono Christi Saeculo non minori Pastorum, doctorumque hominum consensu Traditionem hanc custoditam invenias. *Florus Magister*, Diaconus Lugdunensis, vir multa eruditione clarus, in Expositione Canonis Missae, ad illa verba: *Memento Domine Famularum* &c. haec circiter Annum Christi DCCCXXXVII. scribebat: **LUCE CLARIUS CONSTAT, QUIA PERFECTORUM JUSTORUM ANIMAE, MOX UT hujus CLAUSTRA CARNIS EXEUNT, IN CAELESTIBUS SEDIBUS RECIPIUNTUR.** Ita verba haec, quae quidem, ut supra vidimus, sunt Gregorii Magni Romani Pontificis Cap. 2. Lib. IV. Dialogorum, Florus ipse sua fecit. Ibi quoque de his dicit: *Quamvis nondum cum suis Corporibus, JAM tamen ANIMAE eorum REGNANT CUM CHRISTO.* Eandem sententiam invenias in Libris *Theodulphi* Aurelianensis Episcopi, *VValasijdi Strabi*, *Dungalii*, *Amalontis* Lugdunensis Archiepiscopi, *Erminoldi* in Vita Sancti Solae Abbatris, *Eulogii* Archiepiscopi Toletani, *Servati Lupi*, & aliorum ejusdem Saeculi Noni Scriptorum, quos recensere supervacaneum duco. Quod autem non in istius tantum Saeculi, sed & in praecedentium Ecclesiasticorum Libris animadvertat Lector, saepe illi de Resurrectione carnis, ac de postremo Judicio loquuntur, ejusque magni dici adspectum (quod & nos nunc facimus) ad spem ac terrorem Fidelium ita describunt, ut ad illud dumtaxat tempus referre videantur poenarum & praemiorum distributionem a Deo constitutam. Verum non haec illorum mens erat. Ideo in animos Christianae gentis tremendi illius dici scenam prae omnibus ingerebant, quae nihil revera vehementius in Evangelica Lege nostras mentes concutere atque ad virtutem impellere, revocare vero a vitiis potest, quam tantus ille apparatus, simul dulcis, atque terribilis divinae Justitiae. Praeterquamquod tunc & Justorum felicitas, & Improborum infelicitas, restituta Carne, ad apicem suum est adducenda, Attamen norant illi, nihil aliud revera futurum esse supremum Judicium, nisi coram universo hominum genere Revelationem, Manifestationem, sive Confirmationem praecedentis occulti atque peculiaris Judicii, quod jam subierant, qui haec viam universae carnis ingressi fuerant. Scilicet quotiescumque occasio ferebat, agnoscebant Scriptores illi, non expectato secundo & solemni Adventu Filii Dei, Animas carneis vinculis solutas, vel ad beatam in Caelis vitam, si purgatae erant, vel ad poenas Inferorum deferri. Unum instar omnium exemplum dabo. Usque

ad

ad Annum Christi DCCCLXV. vitam suam produxisse videtur *Paschasius Radbertus* Monachus, sive Abbas Corbejenfis, vir magni nominis inter ejus Saeculi Scriptores. Prostant ejus Commentarii in Evangelium Matthaei, ubi crebra est supremi Judicii, veluti Retributionis omnium, mentio. Attamen is Lib. XI. ad illa Domini verba: *Vigilate ergo, quia nescitis, qua hora Dominus vester venturus sit*, diserte fatetur, agi illic de hora mortis singulorum Fidelium, & de occulto Christi Judicis adventu, ut rationem exigat a servis suis. Deinde ad illa verba: *Amen dico vobis, quod super omnia bona sua constituet eum*: jam Sanctis conlatum liborum praemium depraedicat. Numquid, ait, non *Petrus*, non *Paulus*, non OMNES reliqui SANCTI, nunc magis subvenire possunt, devotis hostibus, calcatis vitiis, quia CUM DEO REGNANT, quam isti, qui adhuc in agone desudant? Et Infra: *Petrus*, quod de Christo docuit, Martyrio confirmavit. Idcirco pius Dominus fecit jam quod promisit; sicut & reliquos Sanctos, quos constituit super omnia bona sua, idest IN GLORIA collocavit DEI, qua nihil est ultra melius, quod possideatur. In eandem sententiam ille loquitur Lib. VI. ad illa verba: *Qui minor est in Regno Caelorum, major est illo*. Tum Exposition. in Psalmum *Eructavit*, hunc ait decantari in natalitiis earum Virginum, quae jam cum Christo, feliciter morte solutae, introierunt ad Nuptias. Atque infra locum describens, quo Sponsus abiit secundum humanitatem, & sedet a dextris Dei, ibi Angelorum ordines adstantes & ministrantes Deo commemorat. Ibi Apostolorum chorus exultat consortio, & Martyrum candidatus cum coronis decernat exercitus. Ibi Patriarcharum turba praecinit, & Prophetarum providus respondet numerus: quia quae per eos promissa sunt, completa omnia cunctorum jam relegendur adspectibus. Ibi Sanctorum Confessorum suis pro plebibus deprecatur Sinatus, infra Aeterna Gaudia stolas. Ibi hymnidici Sanctarum Virginum chori, cum suis vittricibus palmis, sequuntur Agnum, quo nunquam vadit. Haec ante nongentos annos scribebat Paschasius, ijssima nimirum, quae & nunc in Ecclesia Catholica traduntur. Legat etiam, qui velit, postrema Capita Vitae Sancti Adelardi ab ipso conscriptae.

Ceterum minime expectet Lector, ut quicquam ego excerptam in hanc rem e Scriptoribus Ecclesiasticis Latinis Saeculi Decimi, Undecimi, & Duodecimi. Eadem toties repetere, nihil aliud foret, quam taedium dedita opera creare velle legenti. Itaque id unum in praesentia monere satis sit, videlicet concordet tempori: i-
bus

bus iis fuisse Scriptores Latinos in credenda Sanctorum Beatitate, minime dilata usque ad extremi Judicii diem; atque a nullo ex iis revocatam in dubium fuisse ejusmodi doctrinam, si Sanctum Bernardum excipias, quem tamen ab opinione sua recessisse, atque in communi conquevisse, jam supra animadvertimus Cap. XIX. Id adeo certum est, ut quo tempore *Petrus Lombardus* Novariensis, Bernardi ipsius cura ex humili fortuna ad sublimem evectus, & Episcopatu Parisiensi tandem donatus, dum circiter Annum Christi MCL. Libris Sententiarum compositis universam paene Theologiam complexus est, istud Ecclesiae dogma veluti rem exploratam statuerit Lib. IV. Distinction. 45. ubi scribit: *ANIMAS SANCTORUM DEI FACIEM CONTEMPLANTUM, in ejus veritate intelligere preces hominum, & quae implendae sint, vel non*. Rursus vero eodem Lib. IV. Distinct. 49. quaerit: *An major futura sit Beatitudo Sanctorum post Judicium, quam ante Judicium*. Quibus ex verbis intelligimus, minime tunc disputatum fuisse, num Beatitate in Caelis fruerentur Animae Justorum; sed uti dogma stabile istud receptum fuisse. Ac proinde is decernit, *majorem Gloriam post Judicium, quam ante futuram esse Sanctis ac Justis, quia tunc ampliorem Gloriam suae Claritatis Deus demonstrabit Electis*. Succedere postea clarissimi inter Theologos Scholasticos viri, ac praesertim eorum coryphaeus, videlicet Angelicus Doctor Sanctus Thomas Aquinas, quos in tradenda & confirmanda dogmatis istius medulla concordēs invenias. Quare quum circiter Annum Christi MCCCXXXIII. Johannes XXII. Romanus Pontifex, tunc in Galliis agens, excitata a se in Sermone quodam, ubi Sancti Bernardi auctoritate usus est, controversia, *num Justorum Animae a Corporibus segregatae, quibus nulla criminis labe expianda superest, Divinitatem Facie ad Faciem, ut loquitur Apostolus, ante extremi Judicii diem intueantur; in negativam partem inclinare videretur: ingenti strepitu insurrexerunt in illum Theologi universi Parisienses*. Inter istos prae ceteris tunc eminebant *Durandus a Sancto Porciano*, Ordinis Praedicatorum, olim Palatii Apostolici Magister, & tunc Episcopus Meldensis, a Scholasticis appellatus *Doctor resolutissimus*; *Petrus de Palude* Patriarcha Hierosolymitanus; *Petrus Rogerii* Archiepiscopus Rothomagensis, postea sub nomine Clementis VI. Romanus Pontifex; *Nicolaus de Lyra*, ob Libros suos vir perquam celebris; *Petrus de Casa* Episcopus Vasionensis, ut alios praeteream. Una illorum sententia fuit, adversari sacris Literis, & Fidei ortho-

xae,

xæ, qui Visionem Dei Sanctorum Animabus a Corpore separatis detraheret. Nondum revera hac de re ullum Ecclesiæ decretum, ut ajunt, definitivum prodierat, ita ut hærescos insimulandus foret, qui secus sentiret. Attamen Johannes Papa, dum ægritudine pressus ad tribunal Dei festinaret, ne quid scandali inde oriretur, coram adstantibus protestatus est, se disputandi tantum causa, & non quicquam decernendi, illa de re antea loquurum. Immo addidit: *Fatemur siquidem, & credimus, quod ANIMAE PURGATAE, SEPARATAE A CORPORIBUS, SUNT IN CAELO, CAELORUM REGNO, ET PARADISO, ET CUM CHRISTO, in consortio Angelorum congregatae. ET VIDENT DEUM, AC DIVINAM ESSENTIAM FACIE AD FACIEM CLARE, in quantum status & conditio compatitur Animae separatae.* Et quandoquidem interceptus morte Johannes XXII. solemni Bulla, ut ritus habet, suam hanc mentem & protestationem ad omnium notitiam perducere nequivit: Benedictus XII. ejus Successor, Bulla conscripta *Avenione XVI. Kalendas Aprilis, Anno Primo*, quam apud Alphonsum de Castro, atque in Annalib. Ecclesiastic. Raynaldi habemus, Praedecessoris consilium complevit, ejus protestatione publici juris facta, suoque suffragio addito, per quod anceps apud Catholicos esse deinceps desivit ejusmodi argumentum.

CAP XXIV.

Post Photianum Schisma Græculi quidam, inter quos Moses Barcephæ ineptus Scriptor, de Sanctorum Beatitudine parum scite opinati. Concorde in ejusmodi quaestione cum Ecclesia Romana Dionysius vulgo appellatus Areopagita, Michael Syncellus, Auctor Vitae Sanctae Syncreticae, Eustratius Diaconus C. Politanus, Leontius Cyprius Episcopus, Daniel Monachus Raitbu, Andreas Cretenfis, Stephanus Monachus Laurensis, Concilium II. Generale Nicaenum, Theodorus Studita, Naukratius, Philo Carpathius, Nicetas Paphlago, & alii e Græcis.

ET hæc quidem de Latina Ecclesia. Nam ad Græcos quod attinet, jam Cap. XVIII. monui, exsurrexisse post Photianum Schisma homines quosdam aut nullius momenti, aut multae audaciae, qui Sanctos vita functos aut a Visione Dei, aut a Regno Caelorum arce-

rent. Quinam hujus opinionis promotores ac propolae fuerint diligentius inquirere non vacat. Andream tamen Caesariensem Archiepiscopum, incertae aetatis virum, hac opinione Graecos recentiores aliquot dementasse, ibidem animadvertimus. Hoc certe novi, hac de re Anno Christi MCCCCXXXVIII. & sequenti, in Concilio Florentino inter Graecos atque Latinos disceptatum fuisse. Armenios quoque vidimus Anno MCCCCXXV. longo gravius hac in re caespitasse. Sed & maximus Margunius Cythereus Episcopus Saeculo XVI. dum adversus Latinos scriberet, hanc etiam litem instauravit. Accedit, quod in Tomo XVII. Bibliothecae Patrum legitur Commentarius *de Paradiso*, Auctore Mose Bar-Cepha, qui circiter Annum Christi DCCCCXC. vixisse vulgo creditur, sed fortassis etiam serius floruit. Ibi inter alia furilis ingenii meditaementa, immo inter blasphemias quasdam, Cap. XVIII. tradit, nunc Eliam & Enoch in Paradiso terrestri, unde Adam ejectus fuit, versari. Idem praeterea locus, uti ille scribit, *huic rei servit, ut in ipso habitent Animae hominum Justorum, Piorumque, atque eorum, qui per corporis sui cruciatus Christi Fidem comprobaverunt, quique fideles Deum amaverunt, exutae Corporibus usque ad Resurrectionis diem. Nam Latronis Animam eo subvexit Dominus; dicebat enim ad ipsum: Hodie mecum eris in Paradiso.* Hoc idem antea dixerat Cap. VII. hisce aliis additis: *Non autem dixit in Caelo, quia neque ipsa Domini Anima, simul atque a Corpore dissociata est, Caelum conscendit; sed die tertio rursus Corpus subiit. Neque Latro quoque eo die in Caelum potuit evadere, quum dicat Christus, neminem conscendisse in Caelum praeter eum, qui descendisset de Caelo, Filium hominis, qui esset in Caelo.* Perperam hic Auctor interpretatur Domini verba Johann. III. 13. *Et nemo ascendit in Caelum, nisi qui descendit de Caelo, Filius hominis, qui est in Caelo.* Consule Patres atque Interpretes. Immo hinc potius argumentari contraria ratione debuit sciolus ille. Nam, si Christus in terra positus, dixit, se *in Caelo* eodem esse tempore, ob Divinitatem nempe suam: ergo Latro post Christi mortem eodem esse die potuit in Caelo; nam & ibi semper fuit, & numquam inde discessit Divinitate sua Filius Dei. Praeterquam quod etiam extra Caelum futura cum Christi Anima Latronis Anima, Beata esse potuit, quum ibi summa Beatitudo sit, ubi conspiciendum Christus se praebet. Verum haec missa faciamus. Duo heic demonstranda nunc mihi sumo. Alterum est, recentiorum temporum Graecos, si qui sunt, qui Sanctorum Beatitudinem caelestem

stem distulerint ad postremum usque Adventum Domini, descivisse a sententia ac Traditione majorum suorum. Alterum est, abundasse semper, & quidem sine comparatione, inter ipsos Graecos, vel posterioribus hisce Saeculis, qui Catholicorum Latinorum sententiam suis scriptis egregie tutati sunt, & servandam censuere.

Ad primum quod spectat, meminerit Lector, quam consona cum placitis nostris supra ostenderimus verba Sanctorum Ignatii Martyris, Methodii, Dionysii Alexandrini, Eusebii Caesariensis, Basilii, Athanasii, Ephraemi, Nazianzeni, Nyseni, Epiphanii, Chrysostomi, aliorumque Graecorum Patrum. Num tot eximiis viris, tot fulgentissimis Ecclesiae Catholicae luminibus, quibuscum etiam concordem invenimus Latinos Patres, quisquam doctiores dignioresve fide arbitretur Graeculos aevi posterioris? Hisce nunc adde & alios Ecclesiae Graecae Scriptores, qui post illos effloruerunt. Ad Saeculum a Christo nato Quinctum vel Sextum nunc omnium Eruditorum calculo pertinere creduntur *Dionysii*, vulgo appellati *Areopagitae*, Libri, magni sane faciendi. Accipe, quid ille tradat Cap. VII. de Ecclesiast. Hierarchia, ubi de iis agit, quae sunt circa Defunctos. Laetissimum is ac beatum appellat piorum exitum ex hac vita, quia *vivunt, quum ad vitae terminum perveniunt, se totos percepturos Christi formem sortem: viamque ad immortalitatem suam e Vicino jam clarius intuentes, Divinitatis laudant munera, divinaeque laetitiae gestiunt, non amplius ad deteriora conversionem metuentes, sed parata Bona se firmiter perpetuoque possessoros, probe noscentes.* Propterea Sanctos morientes deprædicandos esse Beatos, uti vere sunt, inquit Auctor ille. Tum addit: Porro *Cantica divinarum promissionum ac lectiones explicant nobis Sedes illas Beatissimas, ad quas ii, qui divina perfectione præditi sunt, promovebuntur; & quae cum, qui sanctæ vitæ functus est, Excipiunt; viventes autem ad similem vitæ finem adhortantur.* Quid Sedes istae Beatissimae sint, si quis sciscitetur, respondet Dionysius: *Sanctos in Sinu Abrahæ collocari.* Tum quid hoc nomine significetur, e vestigio prodit, inquiens: *Sinus autem, mea quidem sententia, sunt Beatorum Patriarcharum, ceterorumque Sanctorum Divinissimae, Beatissimaeque Quietis (sive Requietis) Seder (atque hæc Requies nihil aliud est, nisi Beatitas, uti supra palam factum fuit) quæ vivos omnes Deiformes Excipiunt in sua insensibili, beatissimaque consummatione.* Et nos pluries supra animadvertimus, per *Sinum Abrahæ* indicari in Caelis Beatorum vitam, quam Ecclesia Fidelibus in pace Christi morientibus adprecatur. Et profecto, ut

idem Dionysius scribit, *Antistes rogat precatione illa Divinam bonitatem, ut Defuncto peccata omnia dimittat, quae per humanam infirmitatem contracta sunt, eumque in Lucem sanctam, ac Vivorum Regionem transferat & colloct in Sinu Abrabae, Isaac, & Jacob, in loco, a quo dolor & tristitia, gemitusque auferunt. Quum de Fidelibus hinc ad alteram vitam profectis agitur, Terra viventium Caelestis est Gloria, phrafi Patribus familiari, dum Psalmi XXVI. 13. verba: Credo videre Bona Domini in Terra Viventium, usurpant ad designandum Sanctorum statum in altera Vita. Neque aliud significavit Dionysius; nam haec alia confestim adtexit: *Ista, ut reor, sunt Beatissima Praemia Sanctorum. Quid enim immortalitati perfectae, omni-que tristitia vacuae, ac plenae perpetui Luminis, conferri possit? Licet multum sane promissiones illae sublimiores mente nostra sunt, quae vocabulis ad captum nostrum congruis designantur, longe tamen inferiores earum re & veritate appellationes habent. Si quidem verum omnino est eloquium illud: Quoniam oculus non vidit, nec auris audivit, neque in cor hominis ascenderunt, quae praeparavit Deus diligentibus se.**

Jam vidimus, beatissimas illas Sedes, in quibus Dionysio teste aut statim, aut brevi excipiuntur Piorum Animae, corporeo de carcere emigrantes, esse *Sinum Abrabae, ac Terram Viventium*. Porro, testante eodem, in hoc Sinu, in hac Terra recipiuntur *Praemia* illa ineffabilia, quae *oculus non vidit* &c. Ergo ad summam Beatitatem, hisce verbis ab Apostolo descriptam, deducuntur Spiritus Piorum post mortem, non expectata Corporis societate, quam forsitan Deus ad multa annorum millia restituendam servavit. Atque heic Graeci nobis edicant, quo ipsi putarint evolasse Dionysii ipsius Animam, simul atque gloriosum, ut traditur, consummavit Martyrium. Praesto mihi est *Michael Syncellus*, qui circiter Annum Christi DCCCXXX. Encomium ejusdem Dionysii contexuit. *O Divinam, ait, & admirabilem Animam illam, quae eboro stipata Angelico, in Caelorum usque verticem sublimiter avolavit. Quam honoratissime ad totius gloriae Dominum, coronarumque largitorem Jesum, ascendente, celeberrimae laborum praemia relaturam, unaqueque Caelestium Virtutum laudibus prosequuta est, multo cum bonore suscipiens ejus in certando strenuitatem: quam ipsorum Spirituum praeconium, adspirante Numinis aura, & harmoniae totius concentus circumplaudente, suo cooptavit Ordini: quam superna illa Hierusalem,*

lem, patentibus portis, & expansis undique sinibus, excepit: quam Ecclesia primitivorum, in Caelis descriptorum, circumplexa est: quam Spiritus & Animae Justorum Sanctorum, & corde humilium, exceperunt. Denique addit, castissimis Christi ulnis Animam illius fuisse constrictam, Apostolis, Prophetis, ac Martyribus certatim plaudentibus. En qualem in locum, incunte adhuc Saeculo IX. hoc est, ante Photianum Schisma, Graeci credent, inventas fuisse tum Dionysii Martyris, tum reliquorum Sanctorum Animas. In Caelum utique, in sublimem profecto Beatitatem, atque ad conspectum atque adspectum Dei. Fortassis autem ad idem Saeculum referenda est Vita Sanctae Syncleticae a Bollandi, Cotelerio, & Montfauconio edita, antiquissima certe, utpote quae in Vitis Patrum vetustissimis commemoratur, atque a Nicephoro Callisto sub Sancti Athanasii nomine jamdiu fuit laudata. De Sancta illa Virgine Graecus Auctor haec in postremis lineis habet, ejus referens mortem: *Ubi proxime fuit meta victoriae atque Coronae, visceres contemplata est, Angelorumque auxilia, Virginum item Sanctorum cohortationes ad ascensum, necnon illustrationes ineffabilis luminis, atque Paradisi regionem.* Post quae, praenuntiato die & hora exitus sui, *ad Dominum migravit Beata Syncletica, atque ab eo in Praemium certaminum accepit Regnum Caelorum.* Quibus in verbis animadvertere potuisti, esse huic Auctori unum idemque cum *Paradiso Regnum Caelorum.* Eodem Saeculo V. atque Anno Christi CCCCLVIII. ad plures abiit Sanctus Anatolius Patriarcha Constantinopolitanus, cujus Acta a vetustissimo Scriptore Graeco literis mandata edidit P. Pinius, Bollandi Continuator, ad diem III. Julii in Actis Sanctorum. Ibi Graecus Scriptor ait: *E vivis abiit Anatolius, atque ad Beatam Vitam migravit.* Tum in fine cum hisce alloquitur verbis: *Qui Magno Nunc Regi Adstas, atque ab ipso fulgore inebriaris, inde fidelissimum tuum gregem adspice.*

Anno Christi DLXXXII. plenus meritis ad aeterna gaudia translatus est Sanctus Eutychius, gloriosus Patriarcha Constantinopolitanus. Ejus laudes funebri encomio prosequutus est Eustratius magis Ecclesiae Constantinopolitanae Presbyter, ipse Sancti Patriarchae familiaris atque domesticus, quam Henschenius in Acta Sanctorum ad diem VI. Aprilis intulit Latio donatam, addito etiam Graeco textu in calce Tomi. Teste Eustratio Cap. X. ejusdem Orationis, jam senex Eutychius *discedere cupiebat a Corpore, atque ad Dominum proficisci, usurpans identidem illa verba Davidis: Quem-*
admo-

admodum desiderat cervus ad fontes aquarum, ita desiderat Anima mea ad te Deus; & Quando veniam & apparebo ante Faciem tuam. Neque enim dubitabat Sanctus vir, neque tunc meliora edocti dubitabant, quin Piorum Animae, simul atque e terreno carcere evadebant, *ante Faciem Dei* sisterentur, beatifico illius adpectu in perpetuum deinde fruituræ. Postremum tandem Eutychius diem clausit, atque, ut idem Eustratius ait, *discedens ex hac vita in senectute bona, ab Angelis ad Caelestes choros est sublevatus.* Ad-
dit infra, *illius Animam Caelesti nunc adstare Altari, ibique cum sanctis Angelis & Apostolis pro universo Populo preces effundere.* Nam, ut ille subdit, *Sancti per fidem vicerunt regna, adepti sunt repromissiones, & post vitae commutationem pollent virtute majori.* Verba sunt Apostoli ad Hebr. XI. 33. ubi affirmat, Sanctos jam adeptos fuisse, quae illis Deus fuerat pollicitus. De Abraham quoque ait in eadem Epistola Cap. VI. 15. *Et sic longanimiter ferens, adeptus est repromissionem.* Haec autem consequuti sunt in novo Testamento: antea quippe nemo ad Caelestem Gloriam ingrediebatur. Ac proinde quum infra Paulus dicat vers. 39. *non acceperunt repromissionem sine nobis,* recte ea verba interpretari licet de vita aeterna Sanctis minime conlata, antequam Christus Redemptor Ecclesiam suo sanguine fundaret, Caelumque haecenus clausum aperiret. Denique Eustratius in peroratione conversus ad sanctum Patriarcham, haec ait: *Tu vero, sanctissime ac Beatissime Pater, de Caelo nos respice, & vitae nostrae cursum ad salutem dirige, ut Quum hinc recesserimus, recipias nos in Sinum Abrahae atque in Aeterna Justorum Tabernacula, Ubi purius perfectiusque intueamur, quae abs te didicimus de sancta & sempiterna ejusdem essentiae Trinitate. Eamdem, Pater, deprecare pro nobis, ut Bona consequamur Aeterna &c. Viden', quo in loco, uti toties diximus, situs foret Abrahae Sinus? In Caelo, ubi Altare mysticum, idest Christus, ubi Angeli atque Apostoli. Ibi vero ad Visionem Dei adductae Animae, purius & perfectius conspiciunt, quae de sancta, consubstantiali, & sempiterna Trinitate didicerunt in terris, idest non amplius Fide, sed Specie beatissimum illud lumen contemplantes. Verum non heic sistit praeaudati Eustratii CPolitani in rem nostram eruditio. Post se praeterea ille reliquit egregium Tractatulum, quem tenebris ereptum primus evulgavit Leo Allatius, editumque rursus habemus in Tomo XXVII. Bibliothecae Patrum. Opusculi hujus mentionem antea fecerat Photius Cod. CLXXI. Quoniam Burnetius, uti jampridem monui, ostendit in
vete-*

veterum Libris, Mortem appellari *Somnum*, morientes vero dici *obdormire*, homini haec ad literam accipienti visum fuit, per ista innui, *statum Mortis esse statum Quietis, Silentii, & Αἰσπρίας*, sive Inactionis, nempe quoad *Mundum externum*. Praeterea, addit ille, *Expergisci dicimur & Evigilare in Resurrectione*. Quamobrem vero? nisi quod mutato statu, quasi excusso Somno, in lucem & in *Mundum visibilem* resurgamus. Sed nemo nescit, in quot deliria proruere possit, quicumque tot translata seu typicas loquutiones in sacris Literis, & apud Patres inveniens, eas in proprio sensu accipiens, superaedificare velit super iis Christianae Religionis doctrinam. Jam Sancti Patres passim ostenderunt, non de Animabus, sed de Corporibus dici *Somnum, Obdormire, Evigilare*. Neque opus est heic lucernam in meridiano Sole accendere. At bene cessit, quod ante Annos Mille & paene Ducentos eruditus Auctor Graecus, idest prae laudatus *Eustratius*, Burneti nugae (hoc enim nomine hujusmodi opiniones dignas arbitratus ille est) confoderit, ac penitus dissiparit. Nam tunc etiam scilicet aliquot existerunt, qui non palam, ut suspicor, sed clanculum mustitabant, *Animas post separationem a Corporibus, non operari*. Quare is relinquens, ut ipsi inter sese obdormiscerent, ipsorum *Nugas repellendas sibi sumpsit, sermonis sui fulcro ex sacris Scripturis petito*.

Et sane ex utriusque Foederis Libris multa congerit *Eustratius* ipse, ac praecipue illa ipsa adfert, quae & nos supra protulimus ad demonstrandam Beatitatem sanctarum Animarum in altera vita. Adhibet deinde testimonia Patrum, videlicet Gregorii Nysseni, Athanasii, Basilii, Nazianzeni, Chrysostomi, atque aliorum, diserte affirmantium, transferri in Caelum, beateque ibi agere Sanctorum Spiritus. Pleraque ex his locis & ego antea produxi. Vitam quoque Sancti Pauli primi Eremitae laudat (hanc Hieronymus aut scripsit, aut Latine reddidit) in qua Sanctus Antonius vidisse dicitur *Angelorum ordines, & Prophetarum & Apostolorum chorum, & inter eos veluti nivem fulgurantem Abbatem Paulum, & una cum illis in Caelum ascendentem*. Proinde, postquam Basilii verba attulit, in haec erumpit Presbyter CPolitanus: *Ecce enim hic Doctor simul una omnes complectens, qui a saeculo Domino complacuerunt, Patriarchas, Prophetas, Apostolos, Martyres, & Justos, commorstravit, eos cum Angelis choreas ducere, & simul cum illis gaudio subsilire. Choreas cum Angelis ducere, Actionis, non otii sive dormitionis, genus est. Et quum dicit: Martyrum Civitas, Civitas Dei est, Superna Hierusalem; Pauli, illique similibus*

*milium mater; plane demonstrat eorum mutuam concordemque Dei laudationem & Actionem. Confirmavitque haec ita se habere illis, Chorus paratus, accessio magna eorum, qui a Saeculo Dominum glorificent. Si accessio illa glorificantium Deum magna est: qua fronte vos dicitis, Martyrum Animas non operari? Utinam haec legisset Burnetus! Sed quod ille in una sua somnia intentus neglexit, non negligat Lector veritatis amator. Pergit deinde dicere Eustratius: Anima itaque Caelestem Beatitudinem tandem adepta, munia, quibus sese Caeli Incolae exercent, ipsa quoque Regione Viventium adscripta, eodem modo persolvit, uti Choro bene convenientium cencors & associata &c. Eademque ratione quicumque Angelorum choro adjunguntur, eandem atque illi Actionem & Operationem, Exscent. Ad haec Sancti Basilii locum in Expositione Psalmi CXIV. proferunt: quem quia supra omisimus, suo heic loco minime fraudandum duco. Inquit autem sanctus ille Episcopus: *Revera consistit illic Regio Viventium: quippe qui sibi ipsis similes semper sunt; in qua animo praesestienti pronuntiat Propbeta, maximopere universorum Deo se esse complaciturum, tamquam qui nulla illic externae rei cogitatione speret mentem suam deinceps interpellandam, mox ut ad scopum pertigerit verae illius, Angelis quoque nibilo disparis servitutis. Contendimus, inquit Paulus, sive praesentes in Corpore, sive peregrinantes a Corpore, placere illi. Quibus recitatis sua haec adjungit Eustratius: Vides Apostoli, Davidis Propbetae, & Ecclesiae Doctores, divina sapientia instructorum, doctrinam, dictaque, ut inter se concorditer consonent? Nam illud: Peregrinari a Corpore, & Deo complacere in Regione Viventium, in qua neque nox, neque Somnus, mortis imitatio: certe non aliud sonat, quam continuam Sanctorum Operationem. Ad haec, postquam Nazianzeni verba de laudibus Sancti Basilii, quae supra suo loco prodierunt, Eustratius in medium adduxit, hisce sermonem continuat adversus natos, aut aliquando erupturos Burnetos: *Singulae dictiones, immo syllabae, omnia vestrae contradictionis argumenta extinguunt. Quomodo enim e Caelo inspicere, aut intercedere, aut ex hac vita migrantes suscipere in suis ipsis tabernaculis, qui simul una vitam agentes Inspectiunt Sanctam ac Beatam Trinitatem, & non ita exigue, sed Purius Pleniusque poterunt; si, uti vos contenditis, non operantur iustorum Animae? Sed ejiciantur, longeque abeant similitum sententiarum portentosa. Discat hinc Lector, cavere sibi ab enormi confidentia Burneti, qui sibi Graecos veteres cecinisse venditat, quum tamen ii nisi fabulas ac portentosa tamdiu antea duxerint, quae is actate***

actate nostra ex officina sua veluti nova produxit. Infra alterum Nysseni locum Eustratius eorum temporum novatoribus opponit, excerptum videlicet e Commentario in Beatitudines, ubi ad illa verba: *Beati, qui persecutionem patiuntur*, ita disserit: *Ne doleamus igitur, & aegre feramus, Fratres, terrenis nos expelli atque prohiberi; namque qui hinc migraverit, in Caelesti Regia diversatur. Duo haec sunt in creatura rerum universarum elementa, habitationi rationalis naturae attributa: Caelum, & Terra. Locum eorum, qui per Carnem vitam sortiti sunt, Terra: Caelum autem incorporeorum est &c. Si hinc abierimus, in Caelum traducemur.* Infra haec adjicit Eustratius: *De praesenti vero Sanctorum Animarum statione jam a nobis expositum est, eas in Caelo cum Angelis choreas ducere.* Denique multis ostendit, Animas minus Justorum Fidelium indigere purgatione in altera Vita, eisque prodesse viventium preces ad Deum, & sacrificia, & eleemosynas, ut a peccatis solvantur. Haec Eustratius circiter Annum Christi DLXXX. non sua tantum, sed praeclarissimorum Ecclesiae Graecae luminum auctoritate statuebat; ita ut quicumque veritatem diligit, nequeat non irasci Burneto, apud suos Britannos venditanti, recentiorum Pontificiorum inventum, sive commentum esse, non minus Caelestem Beatitudinem Sanctis hinc decedentibus tributam, quam Purgationem quarumdam Animarum in altera Vita peragendam. Calumniari volenti numquam verba desunt: sed calumniatores quae poena maneat, nemo non novit.

Circiter Ann. Christi DCXVI. literis consignata fuit Vita Sancti Symeonis Sali a *Leontio Neapolaeo Episcopo* in Insula Cypri, cujus Scriptoris honorifica mentio occurrit in Actis Nicaeni Concilii II. Hanc habemus editam a Cl. P. Pinio, Continuatore Bollandi, in Actis Sanctorum ad diem I. Julii. Fuit Leontius Symeoni coaevus, de quo in Epilogo haec ait: *Requievit autem, postquam Angelicam & perquam mirabilem egisset vitam, Symeon &c. & in relictis secundum Deum admodum coruscavit, & virtutibus in admirationem rapuit ipsas quoque Caelestes Spirituum corpore carentium Potestates: & perenni Solio Dei & Patris luminum Adstat, ut qui libertatem acceperit, perpetuis illum hymnis celebrandi una cum omnibus Caelestibus Virtutibus.* Rursus circiter eundem Annum DCXVI. hinc ad caelestia Regna translatus est Sanctus Johannes cognomento Eleemosynarius, celeberrimus ille ob caritatem & pietatem Patriarcha Alexandrinus. Ejus Vita ab eodem *Leontio Episcopo*, Auctore synchrono, conscripta legitur in Tomo II. Januarii Aet. Sanctor. Bollandi. Sancto huic viro, dum juvenis esset, in

K k

soma's

fomnis visa fuerat virgo splendentissima, quae ei dixit: *Si me postederis amicam, ego te ducam in conspectum Imperatoris*. Misericordiam sive Eleemosynam sub virginis specie sibi oblatam fuisse censuit Johannes. Ejus vero promissa Leontius completa ait in morte sancti viri; nam *Eleemosyna & Misericordia, quam habuit circa egenos, eum in Caelorum Regnum deduxerunt*. Porro Sancto eodem Johanne vivente floruit, sed longe ante illum in Domino obdormivit, alter Johannes; sanctitate & is, tum etiam sacra doctrina clarus, *Climacus* videlicet. Ejus Vita ante illius Libros legitur Tom. X. Bibliothecae Patrum, & apud Bollandum ad diem XXX. Martii, contexta a *Daniele Monacho* Monasterii Raithu, ejusdem temporis Scriptore. Quo Sanctus ille, Monachorum in Monte Sina Abbas, post hujus saeculi certamen abierit, hisce verbis idem Daniel prodidit: *Est enim ille Nunc in illa Regia, de qua Paulus canit, quum in haec verba exclamat. Quorum Conversatio In Caelis Est: ubi sensu ab omni contagione corporis libero, sola Mente & intelligentia inexplibili modo, summa cum voluptate, Inexhausti Boni Pulchritudine fruitur, inundatur, & exsatiatur: digna sudoribus Praemia, laborumque dolores omnes sedantium Munera adeptus, & in sortem ibi Hereditatis, Regni inquam, Caelestis admissus, unus jam ex illis, semperque deinceps futurus cum illis, quorum per stetit in via recta*. Burneti nostri somnia ignorabat profecto Monachus iste. Ignorabant & tot alii Graeci, quorum seriem integram exhibere nimius esset labor. Ego paucos tantum delibo. Incerta est aetas Sancti *Andreae Cretensis* Archiepiscopi, quamquam Saeculo Christi VII. floruisse videatur: at minime incerti sunt ejus Libri. Prostat inter eos Encomium Sancti Titi Apostoli, ubi ista leguntur in fine: *Nunc enim vero, o divinum & sacrum caput, de Caelo nos inspexeris, utpote qui circum Deum Trinum Spiritu tripudies; gratiaque Gratiae Adfistas Throno, sisque Animo illustratus Divino Lumine; supplicans pro nobis, ut illic postam Beatitudinem consequamur, & una tecum habitemus in tabernaculis, in quibus ipse habitas*. Visionem Dei conlatam Sanctis hinc decedentibus tum supra, tum heic discere possumus. Quam sententiam ab eodem Andrea Cretensi confirmatam habemus in Encomio Sancti Nicolai Episcopi, ubi illum alloquens ait: *Nunc quoque nos impensius pascis, fovisque intendis, quum Deo, perfectae illi ac adorandae Trinitati pure Adhaeres, cujus in circuitu, spiritali ratione cum Angelorum ordinibus ducens choros, nos e Caelo intueris &c.* Paria quoque habes in Oratione

tionem a Sancto *Jobanne Damasceno* conscripta de laudibus Sanctae Barbarae Martyris, edita a Cl. P. Lequien Tom. II. Operum ejusdem Sancti. Ubi ejus vitam ac mortem descripsit, eamque ad Caelestes domos, & adornatam Requiem cum pompa deductam ait, ad illam orationem conversa addit: *Abi ergo, casta Virgo, ut superioribus Mundo Praemiis potiaris. Abi, ubi silet oratio, eorum quae orationis vim excedunt, Gloriam diffuse eloqui non valens. Abi, sinceris bonorum, quae cogitationem superant, delicias perceptura &c. Lactissima Sponsi specie & venustate frui, quae nec verbis offerri, nec mente concipi potest. Frui aethera & mystica in supercaelesti thalamo confabulatione & consuetudine: qua plane nihil felicius beatiusque est. Haec Damascenus circiter Annum Christi DCCXL.*

Idem Anno Christi DCCXCVII. irruptione facta a Saracenis in Palaestinam, Monasterium Laurae Sancti Sabae directum fuit, piissimi vero Monachi plerique caesi. Historiam hanc literis consignavit *Stephanus Monachus* ejusdem Coenobii synchronus, eamque editam habemus a Clarissimis Bollandistis Tomo III. Martii in Aet. Sanctior. ad diem XX. De primo inter eos mactato inquit ille Cap. IV. *Beatus es, ter felicissime, quia Christi premendo vestigia, eum ut servus bonus, docilisque discipulus fuisti sequutus, & conformis factus passionum ejus, consequenter & particeps exististi Gloriam in Regno Caelesti. Tum postquam ostendit, Martyrum quoque praemia iis deberi, qui pro Virtute quavis mortem tolerant, caesos illos omnes in epilogo alloquens, addit: Gloriam vestram, qua nunc ex merito vestro fruimini, quis sufficiat enarrare? Beati vere estis, & in Deo Beati, quod ex ea, quae super terram est, vita violenter ejecti, alterius in Caelis felicius digni estis inventi. Beati estis, quia suavescentes fructus Paradisi decerpistis, & in loco pascuae respiratis ac quiescistis; quia Christo facti estis accessio desiderabilis. Mementote etiam nostri, quamvis terrena nunc commemoratione relictas in Gaudio & Lumine cohabitatis Caelestibus. Vivificae, divinaeque & consubstantiali Trinitati, quae vos Sibi voluit in Aeternum Adstare, offerte continuum perseverantemque pro nostra congregatione orationem. Atque haec erat fides, hic sermo Graecae Ecclesiae, antequam Photianum Schisma variis erroribus lora laxaret in gente illa. Proderit etiam adire Concilium VII. Generale Nicaenum, quod sub finem ejusdem Saeculi, Anno scilicet DCCLXXVII. celebratum fuit. Uti ex Actione IV. constat, lecta ibi fuit Epistola Germani antea Patriarchae Constantinopolitani, in qua is mentionem facit *Sanctorum*, (ΤῶΝ ΕΝ ΟΥΡΑΝΟΙΣ ΑΓΓΕΛΩΝ) *QUI IN CAELIS SUNT*. Infra quoque memorat *Sanctos**

onnes, conservos quidem nostros, sed Placentes Deo, & supernam confidentiam, & BEATITUDINEM APUD IPSUM ADEPTOS, atque a Deo gratiam consequutos ad ministrandum nobis beneficia ipsius, quum per memoriam eorum in hymnis & canticis, Beatitudinem & honorem ipsorum recolimus. Ibi quoque lectus est Sermo Johannis Episcopi Thessalonicensis, ubi haec verba occurrunt: *Benedictus es, Deus hujus Sancti, atque omnium Sanctorum, qui dedisti eis patientiam, & DIGNATUS ES ILLOS REGNO TVO.* Tunc ergo communis sententia Graecorum erat, eaque in Generali Concilio probata, videlicet Sanctos e praesenti vita profectos, in Caelis, in Beatitudine apud Deum, atque in Regno Caelesti degere: quae Traditio ex primis Patribus descendens, ut vidimus, vivida semper vixit atque a melioribus firmata fuit.

Hujus quoque veritatis exemplum reliquit nobis Sanctus Theodorus Studita, celebris Saeculi Noni Scriptor inter Graecos. Vitam Sancti Platonis Hegumeni in Monasterio CPolitano Studii, atque Anno Christi DCCCXIII. ex humanis sublata, sui olim avunculi, & magistri, elucubravit Theodorus. Surius vero & Bollandi Continuatores ediderunt ad diem IV. Aprilis. Mortem illius describens, ait: Spiritum suum sanctum tradidit Angelis, ipsum ad Solem Justitiae deduxit. Et Nunc quidem ille in Caelis est, non solum Ascetico dignus effectus ordine, sed Confessorum adnumerandus eboris. Quorum enim certamina pertulit, eorum indubie etiam Hereditatem participavit. Diem vero suum obiit Anno DCCCXXVI. idem Theodorus Studita, ac de ejus obitu Encyclicam habemus, a Naucratio illius discipulo conscriptam, atque a Combesio, & in Tomo XIV. Bibliothecae Patrum evulgata. Dolorem abjiciendum contendit ibi Naucratius, quia Theodorus potentior jam ad intercessionem atque auxilium est: tantoque amplius, quantum exempli causa refert, ut prius per speculum in aenigmate, Nunc autem Facie ad Faciem, purius splendidiusque Deo serviat, atque ministret. Ac prior aliquantulum Dei viam inchoavit, nobis faciens iter: illie paraturus nobis Beatae Quietis habitaculum, dummodo Deo placitis moribus vixerimus &c. Infra quoque addit: Modo, consummato Apostolico cursu, Caelos pompa ingreditur, & una cum Angelis festos choros ducit, in loco tabernaculi admirabilis, in epulantium sono, Aeternis in Domino fruens Bonis. Sed & ipsum Sanctum Theodorum Studitam in Sermonem XLII. doctrinae ejusdem praeconem reperimus, ubi postquam exhibuit haec Apostoli verba: *Quos vocavit, eos & justificavit. Quos autem justificavit, illos* & glo.

& glorificavit, haec alia adtexit. *Videtin' quo abibimus? Ubi Christus est, ad Dei dexteram confidens, ubi Gaudium & oratio, ubi Angelorum tripudium, ac coetus eorum, qui in Caelis principes conscripti sunt. Ubi gentiles nostri fratres, patresque, eo nobis Mox est abeundum, gavisuris in eo, qui in virtute sua dominatur in aeternum, ut canit sanctus David: non centenis nec millenis annis, sed perpetuis, ac finem non habentibus Saeculis.* Hisce adde Vitam Sancti Nicephori Patriarchae C. Politani, ab Ignatio Diacono, & Custode magnae illius Ecclesiae contextam, quam ad diem XIII. Martii publici juris fecere Continuatores Bollandi in Act. Sanctorum. Ibi Cap. XIV. mors sancti Patriarchae dicitur *Transitus ad meliorem Vitam, Beatamque illam Requiem, in qua primitivorum in Caelis descriptorum Ecclesia cum sono choro ducit, festum diem feliciter agens.* Cum quibus pariter & ipse praesultans, atque sanctitatis castimoniam Angelica puritate repraesentans, parem illis Beatae Repromissionis Hereditatem consequutus est. Tum illum in epilogo alloquens ait: *Tu vero Divini inspector Tabernaculi, qui in supernis sacrorum Principatuum atriis ambulas, ac corruptionis nesciam sortem, sedesque immortales propius adire meruisti, & Bona illis parata adeptus, qui actione virtutis fastigium attigerunt, plena eorum satietate replevis &c.* Prostat etiam in Bibliotheca Patrum Tom. V. Commentarius *Philonis Carpathii* in Cantica Canticorum. Quo tempore is floruerit, incertum est. Sunt qui eum scripsisse circiter Annum Christi CCCC. arbitrantur: sed verisimilius longe postea. Utrumque sit, Auctorem Graecum, & quidem pervertutum, nemo neget. At is pag. 682. *custodes murorum censet Apostolos, Prophetas, & Doctores Sanctos omnes.* Tum infra de Ecclesia ait: *Clamat ad Apostolos, Prophetas, & Martyres (quibus se mater Ecclesia commendare non cessat) ut quos habuit suae fidei & salutis auctores, eosdem habeat defensores tutoresque perpetuos, & perfectiores suae spei apud eundem Caelestem Sponsam: cui quidem nunc custodes illi Beati Spiritus in Caelesti illa Hierusalem felicissime Adfunt, ac supplicant pro Sponsa hac militante &c.* Quae quum ita sint, quis in posterum dubitet, an Graeci olim arbitrentur, ad Visionem Dei, atque ad ineffabilem Beatitatem admitti Iustorum Animas post mortem? Controversiae locum nullum relinquunt dilucida haec illorum testimonia. Cum quibus etiam cohaerere videas, quae in variis Orationibus jamdiu evulgatis diserebat circiter Annum Christi DCCCLXXX. *Nicetas Paphlago* Dadybrorum Episcopus. Disertis ille verbis tradit, Sanctos Apostolos *una cum Christo in Caelum receptos, ad ejus*

ad ejus dexteram sedere, uti ille in dextra Dei Patris sedet; eosque Facie ad Faciem illius consuetudine frui; ac Deiparae Matri in superno atque Caelesti Paradiso in exultatione conubernas esse. Sancta quoque Thecla, ut is ait, nunc in celsissimis intus Paternisque conquiescens Sedibus, non jam per fidem, sed per speciem, neque in speculo & aenigmate, sed Facie ad Faciem, Divini Sponsi Pulcritudinem Contemplatur. Gemina sunt, quae is habet in laudatione Sancti Hiacyinthi, ubi pariter Dei Paradisum pro summo Caelo & Aula divini Regis accipit. Reliqua praetereo; neque enim quisquam plura desideret, ut intelligat, qualis olim foret de Sanctorum Beatitudine, Graecae Ecclesiae sententia usque ad Saeculum Christi Nonum: eadem profecto, quae & nunc est Ecclesiae Romanae.

C A P. XXV.

Etiam post Schisma Photianum plerique nobiles Graecae Ecclesiae Scriptores cum Romana Ecclesia in asserenda Beatitudine Sanctorum concordēs. Quid de hac re scripserint Joseph Hymnozaphus, Simeon Metaphrastes, Michael Psellus, Nilus Monachus, Constantinus Acropolitā, Nicephorus Gregoras, Nicolaus Cabasilas, Manuel Palaeologus. Menaea Graecorum idem testata. Quam insipienter Marcus Epheus, & pauci alii Graeculi, dum Concilium Florentinum haberetur, in hoc argumento adversati Romanae Ecclesiae; sed compressi a Gregorio Protosyncaello, Georgio Scholario, sive Genadio, atque ab aliis Graecis vel post ipsum Concilium.

AT eodem Saeculo Nono Graecam ipsam Ecclesiam gravissimis turbis concussit ac dilaceravit Photius, vir multiplici quidem doctrina ornatus, sed incredibilis ambitionis facibus succensus, & pietate omnino vacuus, usque adeo ut Schismate funestissimo illam a Latina sejunxerit. An quicquam turbulentus hic homo recesserit ab antiqua Traditione in doctrina de Beatitudine Sanctorum, detegere nondum potui. Sunt, quae suspicionem mihi aliquam ingerant. Certe post ea tempora nonnulli apud Graecos occurrunt, qui repromissiones Sanctis a Deo factas, ad consummationem Saeculi distulisse videntur: quamquam ambiguum

guum sit, quid ii hac de quaestione revera significare voluerint. Jam hoc innui in principio Capitis praecedentis, atque inter eosdem Scriptores post Photium natos suspicor ego recensendum esse Auctorem Quaestionum ad Antiochum, quae olim perperam Sancto Athanasio Alexandrino tribuebantur. Nam quod ab Anonymo Geographo Ravennate Quaestiones ejusmodi memorentur, nihil inde lucis accipimus ad dignoscendam aetatem Auctoris illius ad nugas proni, quum & Ravennati ipsius dubia prorsus incertaque sit aetas. Is autem Animas Justorum in *Paradisum* quidem immittit, at *Paradisum* a *Regno* distinguit, quamquam postea, veluti sui immemor, *Justor*, qui cum *Abrabamo sunt*, in *Regno* *existere* agnoscat. Hisce vero Quaestionibus aliae in Psalmos adtexuntur, a Clariss. Montfauconio editae Tom. II. editionis Athanasianae; inter quas octogesima nona est de verbis Psalmi CXLIX. *Gloriabuntur Sancti in Gloria, & Exsultabunt in cubilibus suis*. Respondetur: *Sanctos dicit spirituales & probos homines, qui gloriabuntur post mortem in cubilibus suis. Cubilia vero sunt Mansiones Sanctorum, quas post mortem inveniunt, & laetantur in Regno Caelorum*. Verum si quis ex recentioribus Graecis occurrat, non plane concors cum iis, quae haecenus ostendimus: quatenam, quaeso, ratio habenda est hominum a perspicua & stabili Majorum suorum Traditione deflecentium? Et praecipue quum Graeculi posterioris aevi neque doctrina, neque auctoritate certare queant cum tot eximiis Patribus, qui Graecam, immo universam Ecclesiam, tot ante Saeculis illustrarunt. Accedit, quod etsi aliquis e Graecis recentioribus hac in re a paterna Traditione descivit, vetusta tamen sententia non propterea desit esse communis, vel post Photium, in Orientis Ecclesiis. Id quoque ostendendum antea mihi proposueram. Meam nunc fidem properans liberabo.

Sub finem Saeculi Noni, aut ineunte Decimo, hinc evocatus a Deo fuit Sanctus *Joseph Hymnographus* apud Graecos celebris. Ejus Vitam illustravit P. Papebrochius ad diem III. Aprilis in Actis sanctorum. Dicitur autem in Menacis Graecis, quod *Sancta illius Anima, deducuntibus Sanctis Martyribus Angelisque, elevata in Caelum sit, & Ante Dei Conspectum constituta*. Ad haec *Joannes Magnae Dei Ecclesiae Diaconus* in illius Vita num. 37. fusius exponit, qua ratione visa fuerit illius Anima in Caelum deferri, dolente viro pio, cui visio illa oblata fuit, sibi fas minime fuisse, reliqua divinae pompae mysteria conspiciere: quo pacto scilicet

ante

ante sanctissimam Trinitatem fuerit Joseph coetus, eam pie adoraverit, coelestium Spirituum choreis admixtus. Ejusmodi visiones rideant, quantum velint Burneti asseclae: istud non moror. Negare saltem nequeant, quin haec fuerit inconcussa eo tempore de Sanctorum Beatitate sententia Graecorum. Proinde Johannes, Vitae illius Scriptor Graecus, ita sub finem ait: *Dicamus potius, quod cum Apostolis & Martyribus fruatur ea, quae de Sanctae Trinitatis Throno procedit, dignitate & Claritate: cui Adstans, & lucidissimae Pulcritudinis fruitione jucundans, nostrum recordatur &c.* Neque secus sentiebat hac de re sanctus ipse Joseph Hymnographus. Ad diem X. Junii in Act. Sanctorum Bollandi, Hymnum habemus illius, in laudem Sancti Tychonis, ubi is appellatur *Majestati Dei Coronatus Adstans*. Produxit etiam P. Henschenius in Actis Sanctorum ad diem III. Aprilis alterum ejusdem Hymnum de Sancto Pancratio Episcopo Tauromenii, cujus Stropha XXXIII. ita se habet: *Sacerdotum conspicuus fulgoribus, Martyrumque cruscans splendoribus, Sancte Pancrati, jam Dei Gloriam laetus ac gestiens Contemplaris.* Circiter Annum Christi DCCCCXX. ad contextendas Sanctorum Vitas se contulit Simeon Metaphrastes, vir primis honoribus apud Graecos Imperatores functus, atque inter Ecclesiasticos Scriptores celebris. Legitur apud Surium ad diem IV. Novembris Vita Sancti Johannici ab eo scripta; ipsoque teste, pius ille Abbas *Spiritu migrat ad Eum, quem diligebat, deductus a choris Angelorum &c.* Et infra: *Illum praecesserunt Angeli, Paradisi portas ei aperientes, & transmittentes ad eam, quae illic est, Beatitudinem, prae appariturum ante Faciem Domini, & simul versaturum cum Angelicis Ordinibus, a quibus beata Trinitas laudatur.* Ita apud eundem Surium ad diem I. Novembris habetur Passio Sanctorum Acyndini, Aphthonii, & aliorum Martyrum, ab ipso Metaphraste scriptis mandata. Ad Aphthonium, qui primus in agonem descensus erat, sacri Athletae, bono animo, dixerunt, o frater, *Beatam Vitam ingredi. Beatus enim es propter tuum decessum, quia primus nostrum sisseris Coram optata Trinitate, tui laboris accipies remunerationem, Aeternam Lucem consequens, & Gloriam Sempiternam.* Eundem quoque Metaphrastem legisse proderit in Vita Sancti Alypii Cionitae apud Surium die XXVI. Novembris, & Sancti Nicolai Myrensis Episcopi, ut ceteras ab eo conscriptas Vitas praeteream. Neque heic quisquam naevos objiciat, quos in Metaphrastis Operibus Critici viri offendunt. Id unum nunc quaerimus: quae tunc ejus foret, atque Ecclesiae Graecae opi-

cae opinio de Beata in Caelis Sanctorum vita. Egregius & ipse testis esse potest, tunc etiam apud Graecos inconcussam stetisse doctrinam, pro qua haecenus adversus Burnetum in acie steterimus. Ad subsequens Saeculum Undecimum progrediamur, quo insignem sibi paravit Anno Christi ML. eruditionis ac doctrinae famam *Michael Psellus*, in aula C Politana ad eximia munera adhibitus. Is autem in Respons. ad Michaellem Ducam Imperatorem scribebat: *In ipso fulgentissimo Caelestis Beatitatis Throno Christum Vident Fideles in Fide defuncti, & fruuntur Gaudio Aeterno, laeti ipsi, & ad laetitiam provocantes, sub Dei sane oculis immortalem agentes Vitam.* Eodem Saeculo, atque Anno Christi MLXX. ad caelestia elatus est Sanctus Philaretus Monachus Graecus in Monasterio Sancti Eliae, cujus Vitam a *Nilo Monacho* Graeco Auctore coaevoscriptam, ac Latine redditam Bollandi Continuatores evulgarunt ad diem VI. Aprilis. Ibi ejus obitum referens Nilus ait: *Animam illius caelestes Angelorum ebori reverenter susipientes, omnium Conditori Deo honorificentissime, magnaue cum gloria, tamquam divinum quoddam atque ornatissimum donum obtulere. Qui profecto illam accipiens, inter praeclaros Sanctorum virorum, qui jam inde usque a Mundi innabulis fuerunt, ordines adscribit: ubi laetantium omnium est habitatio, ubi gaudium & exultatio, ubi est Caeleste Regnum.* Tandem in Epilogo ad sanctum ipsum Philaretum Nilus conversus, haec addit. *Tu, inquam, qui Deo propior clarior ac purius Illum Intueris, ac mortalitatis nostrae vinculis jam exsolutus, magnam fiduciam ac libertatem Apud Eundem es adeptus, ne umquam nostri te capiat oblivio.* Perspicua haec sunt, neque commentario indigent, quippe Dei Visione beari Sanctos diserte Nilus affirmat.

Florebat Anno Christi MCCLXX. *Constantinus Acropolita*, Magnus Logotheta in Aula C Politana. Prostat ejus Oratio de Laudibus Sancti Johannis Damasceni, edita inter Acta Sanctorum Bollandi in Appendice ad Tomum II. Maji. Ibi ait, *manifestum, certissimumque esse, Damascenum a Deo collocatum fuisse inter eos, qui propius Sibi Adstunt.* Sed & in Vita Sanctae Theodosiae Cap. IV. ad diem XXIX. Maji in eisdem Actis Sanctorum, ab ipso Constantino Acropolita scripta horum similia legas. Anno quoque MCCLXXXIII. vel subsequenti *Gregorius Cyprius* renuntiatus fuit Patriarcha C Politanus. Hic nobis reliquit Encomium Sancti Georgii magni Martyris, evulgatum in praeclaudatis Actis Sanctor. ad diem XXIII. Aprilis, ubi inter alia haec de ipso Martyre in peroratione scribit: *Post*

Apostolos, Prophetasque, & Veteris Testamenti Justos, princeps in choro Martyrum; Primamque Pulcritudinem (scilicet Deum) Facie ad Faciem, non jam per speculum in aenigmate, Contemplans, vixit coram Domino. Impletur enim in eo Isaiæ vaticinium dicentis: Et erit ipsi Dominus in lucem sempiternam, & complebuntur dies lætus ipsius. Propterea etiam in Caelis est noster apud Deum pacificator. Adire etiam juvabit Vitam Sancti Codrati, aliorumque Martyrum, a Nicephoro Gregora, magni nominis Scriptore inter Græcos, exaratam, atque ab iisdem Bollandi Continuatoribus editam ad diem X. Martii. De Codrato is ait: Firmiter nobis persuademus, quod Nunc Bonis Omnibus Apud Deum libere illi perfrui liceat; ac mansiones non has vel illas dumtaxat, sed ad eundem modum omnes inhabitando occupet, tamquam heres & filius, in quo Deus Pater sibi complacuit &c. Infra addit: Frueris tu quidem Nunc, o benedixisse Patri caelestis, præparatis tibi Bonis Aeternis, fatoque nulli obnoxius, quæ neque oculum humanum vidisse, neque in cor terrenum descendisse didicimus: & gaudes, dum Athlobeta Christo sine ulla obstaculo potiris. Floruit Nicephorus Gregoras Anno Christi MCCCXLVII. eique synchronus fuit Nisolaus Cabasilas Archiepiscopus Thessalonicensis, cui debemus Encomium Sanctæ Theodoræ Sanctimonialis, editum inter Acta Sanctorum Bollandi ad diem V. Aprilis. Ibi in fine sanctam mulierem hæc alloquitur: Tu quidem, quam suspirasti, Trinitatem, & in quam fixor ut plurimum tenuisti obtutus, Taurus Nûr Ἀπίστος Μιτῆς, Nunc Immediate Ipsam Possides. Prætereo heic Gregorium Palamam, qui eisdem temporibus præter multa alia Vitam scripsit Sancti Petri Athonitæ in Act. Sanctor. evulgatam ad diem XII. Junii, ubi paria tradit: progredi enim juvat. Anno quoque MCCCCIV. ad plures abiit Theodorus Despota, quem Manuel Palaeologus Græcorum Imperator, ejus frater, luculenta Oratione laudavit, a Combesio edita in Auctionario Bibliothecæ Patrum. Ibi Augustus Orator ait: Ille ab humana consuetudine abjunctus, Deum Consequutus Est, fuitque inscriptus Beatorum choro, inter quos multi ejus cognati &c. Cum Beatis, ipsoque insuper Deo, longe utique jucundius habet, quam quum versabatur nobiscum, usque adeo ut nulla comparatio superfit: Quippe factus particeps interminabilis Vitæ, Gloriæque, & Voluptatis, quæ vitæ illi indefectibili congruit. Quæ enim atrox illi pulchra sunt ac bona, tanto nostris præcellunt, quanto incorruptibilia corruptioni obnoxius; tantumque illorum discrimen, ut neque lin-

qua doceri possit. Tum ait, moleste minime ferendum, quod aliquis e corpore migrans, *Bona Aeterna fuerit consequutus, & Felicitatem, quae nulli deinceps mutationi obnoxia sit. Ceterum credimus, Theodorum in loco esse ab omni tristitia vacuo, in Lumine, quod aliquando apparens, Solem hunc fulgore multo sit obscuraturum: quodque universis praestantius est, credimus esse conjunctum Salvatori Christo, & una cum Martyribus agentem choros, Paradisi potiri bonis.*

Atque haec erat usque ad initium Saeculi Quincti-decimi de hisce rebus sententia, quam palam profitebantur Ecclesiae Graecae Primates, ipsique etiam Augusti. Quod si eorum Hymnos consulas, id saepe ab ipsis repetitum atque inculcatum invenias. Exemplum accipe ex Magnis Graecorum eorumdem Menaeis excerptum, Hymnum videlicet in honorem Sancti Euthychii Melitenensis Episcopi & Martyris, quem ad diem XXVIII. Maji Papebrochius edidit in Act. Sanctorum. Hoc ejus exordium: *Supernis Virtutibus sociatus Eutychi, & Throno divinae Gratiae Nunc Adstans, luciferam tuam memoriam honoranter, tua intercessione divinitus illustra.* Alterum pariter Hymnum audi de Sancto Tito Thaumaturgo, ad diem II. Aprilis ab Henschenio evulgatum in Actis eisdem, atque haultum ex Officio Ecclesiastico Graecorum. Ibi haec verba: *Omnis materiae expertibus Angelis additus, o Beatissime, & Caelestis Regni claritate indefinenter perfruens, respice psallentes. Augusta virtutum specie refulgens, in Thalamo Gloriae ineffabilis recumbis, Christi que in saecula hymnum concinis &c.* Affinia legere potes in altero Hymno in honorem Sanctae Agrippinae Virginis & Martyris, quem e Graecorum Menaeis mutatus idem Papebrochius ad diem III. Junii intulit in Acta Sanctorum. Sed & in Menologio Graeci ipsi Sanctos *Adstare Trinitati* fatentur, & praecipue, quum de Sancto Basilio ajunt: *Βασιλειος σοφὸς, Πατριᾶς Τῆς Τριᾶδος, Βασίλειος sapiens, Qui Adstas Trinitati.* Ceterum plura aggerere non est animus. Dies enim & charta me deficeret, si unaquaeque Graecae Ecclesiae monumenta hanc in rem consulere, atque huc transferre vellem. Satis fuerit Lectorem monere, jamdiu a Cl. viro Nicolao Comneno Papadopoli, sub finem Praenotionum Mystagogicarum, uti hujusce doctrinae testes egregios. laudatos fuisse *Constantinum Armenopolim, Nicetam Thessalonicensem, Heliam Cretensem, Johannem Veccum, Georgium Metochiten, Georgium Trapezuntium, immo & Gregorium Corlessum, Saeculi Sexti-decimi Scriptorem; ita ut dubitatio omnis*

desinere debeat, quin eadem olim foret cum Romana Graecae Ecclesiae sententia de Beatitudine Sanctorum. Addit idem Papadopolus, occurrere passim dogma istud in Menaeis, Triodiis, Synaxariis, Tropariis, atque aliis sacris Graecorum Libris, tum excusis, tum manu exaratis. Atque is consulto ingentem locorum segetem indicavit, petitam ex Anthologio Ecclesiae Graecae, & ex *Horologio* (*Diurnum* Latini appellant) quod Graeci prae manibus habent, in quibus aperta occurrit mentio Caelestis Beatitatis, qua nunc Sancti post depositionem terreni oneris perpetuo fruuntur.

At, inquires, Anno MCCCCXXXVIII. & MCCCCXXXIX. in Florentino Generali Concilio disputatum fuit hac ipsa de re inter Latinos & Graecos. Ita sane; stabilique decreto firmatum tunc fuit, Graecis ipsis consentientibus: *Illorum Animas, qui post Baptisma susceptum, nullam omnino peccati maculam incurrerunt: Illas etiam, quae post contractam peccati maculam, vel in suis corporibus, vel exutae corporibus, sunt purgatae: IN CAELUM MOX RECIPERE, ET INTUERI CLARE IPSUM DEUM TRI- NUM ET UNUM, SICUTI EST; pro meritorum tamen diversitate alium alio perfectius.* In Concilio quoque Constantiensi, Anno Christi MCCCCXVI. non tam perspicua, magnifica tamen, dicta fuerant de Beatitate Sanctorum. Vide Tomum XII. Collection. Labbeanae pag. 1586. ubi ejusdem Concilii Bulla de Canonizandis tribus Sanctis Suecis, ex hisce verbis exordium sumit: **FELIX PRORSUS ET INEFFABILIS EST SANCTORUM GLORIA, incomparabilis Pulcritudo, ET BEATITUDO PERENNIS** &c. *Nihil tamen per nostras laudes, nihil per sacrificia & oblationes eis accrescit novae perfectionis & Gloriae. Nec EORUM PLENA ET PERFECTA FELICITAS nostris operibus, vel obsequio famulatu, minui potest vel augeri, quum per se sufficiens sit status eorum, omnique BONORUM AGGREGATIONE Perfectus.* Ita in Oecumenico illo Concilio ante Florentinum Ecclesia Catholica loquebatur. Possem & alias Sanctorum Canonizationes recensere, praecedentibus Saeculis peractas, in quibus statuitur jam inchoata in Caelis Sanctorum Beatitas: sed pluribus tempero. Quum ergo a primis Christianae Reipublicae Saeculis usque ad idem Concilium Florentinum communis semper, stabiliisque descendisset doctrina de Sanctorum innarrabili Felicitate in Caelis; eamque Graeca ipsa Ecclesia, uti vidimus, concorditer semper suffragio fovisset, ac palam professam fuisset: petiissem lubenter a Novatore Burneto, fuisse ne aequum, ut ob

ut ob contentionem paucorum recederet Ecclesia a dogmate, tanta Saeculorum praecedentium concordia per manus a Majoribus accepto? Immo hoc unum potuit ac debuit amplecti. Eoque magis, quod plerique Graecorum in eo ipso Concilio, ubi agebatur de utriusque Ecclesiae foedere restituendo, non rem ipsam negabant, sed de parergis dumtaxat altercabantur. In Actis ejusdem Concilii pag. 27. edition. Labbeanae haec leguntur: *Et Graeci quidemeos, qui nunc suppliciiis addicti sunt, negant perfecte suscepisse poenas, sed Corpora etiam expectare; quemadmodum & Animae Sanctorum Sunt Quidem Assequutae Beatitudinem, non perfecte tamen. Fruentur autem ea perfecte, quum fiet Resurrectio Corporum, secundum Apostolum ad Hebraeos XI. dicentem: Et bi omnes testimonio fidei probati non acceperunt repromissionem; hoc est per Corpora non acceperunt. Quum vero Corporibus Animae in Resurrectione conjungentur, tunc perfecta fruuntur Beatitudine. Itali vero asserunt, Animas quidem damnatorum non perfecte cruciari, quum non adsint Corpora; tunc enim ajunt, cum Corporibus aeternas poenas sustinebunt. Animas autem Sanctorum perfectam in Caelis jam adeptas esse laureolam, nunc quidem ut Animae; tunc autem suis, inquit, Corporibus indutae perpetuo laetabuntur. At Concilium intactam reliquit ejusmodi controversiam, quae non solum inter Graecos, sed & a longo tempore inter ipsos Latinos Theologos servebat. Additur in Actis. Sunt etiam inter Graecos, qui ita sentiant: Sanctorum Animas non esse perfectam consequutas Beatitudinem, sed in Loco versari separato, ibique laetari, mente volenter cogitationem de perfecta, quae eos manet, laureola, absolutaque Beatitudine, & adeptione Regni Dei. Pauci e Graecis, Photiani Schismatis acerrimis propugnatoribus, postremae huic sententiae adhaerebant, eorumque primipilus fuit Marcus Ephesius, insensissimus ille Latinorum hostis, qui hoc ipso titulo magnus Heros apud Heterodoxos Occidentis postea evasit. At inter ipsos Graecos Bessarion Cardinalis Nicaenus, & Gregorius Protosyncellus, postea Patriarcha CPolitanus, dogma in Florentino Concilio constabilitum tutati sunt, legiturque in ipsius Synodi Actis, Gregorii ejusdem Opusculum, in quo testatur, se fusius hac de re egisse in altero Tractatu, quem numquam legi. Accedit, quod adversus eundem Marcum pugnavit Georgius Scholarius, qui & Gennadius alio nomine appellabatur, Patriarcha CPolitanus & ipse, amplissima Expositione pro Concilio Florentino edita, in ejus Cap. IV. e sacris Literis, atque ex ipsius Ecclesiae Graecae Scriptoribus, sacrisque monumentis, luculente ostendit, eandem semper fuisse Graecorum atque Latinorum sententiam de Bea-*

Beatitate Sanctorum. Hanc Georgii, sive Gennadii lucubrationem in Tomo XXVI. Bibliothecae Patrum, omnium usui expositam, oculisque torvis a nonnullis Heterodoxis exceptam, uti nobile in praesenti Quaestione documentum, optandum est, ut unusquisque legat.

Interea nemo satis mirari possit Photianorum quorundam caecitatem, qui ut virulento in Latinos odio morem gererent, nihil pensi habuerunt, an doctrinam heic desererent ac proderent, quam hactenus ostendimus per tot Saecula ratam atque constantem in Ecclesia non minus Latina quam Graeca stetisse. Rem tamen non levis momenti hac in re animadverte, quaeso. Pauci fuere Graeci illi, qui Concilii Florentini decreto de Beatitate Sanctorum refragati sunt, eorum aciem ducente Marco Ephesio. Sed aut supinae ignorantiae illos arguere jam necesse est; aut in doctrinae tantum parergis tota illorum pugna cum aliis Graecis atque Latinis versabatur; aut alter alterius mentem non intellexisse credendi sunt. Illi quippe convicti a verbis antiquorum Patrum, ac praesertim Basilii, Nazianzeni, & Chrysostomi, quam triadem Scriptorum, neque immerito, incredibili veneratione prosequerantur Graeci omnes, semperque in ore adhuc habent; adducti etiam a Liturgiis, Synaxariis, Trypariis, aliisque sacris suae Ecclesiae Libris: unanimi consensu & ipsi fatebantur, Sanctos nunc in Caelo degere, adflare Deo uni ac trino, ejusque Adspectu gaudere; & nihilominus contendebant, eos nondum recepisse repromissionem, sperandam tantummodo in Resurrectione Carnis. Marcus ipse Ephesius (uti animadvertit nuper laudatus Gennadius Cap. IV. Sect. 3. Exposit.) in Oratione, quam habuerat de Sancto Helia, cum dixerat *in Caelo esse, atque una cum splendoribus Angelorum, Domini Throno Assidere, & Dei Ad Faciem Visione potiri*. Attamen is agebat, Sanctos nondum Regnum ingressos, nondum mercedem, nondum bona, quae oculus non vidit, recepisse. Hoc puto enatum ex male intellectis verbis Andreae & Arethae Caesariensis Episcoporum, de quibus actum supra fuit Cap. XVIII. Gennadius autem reponerat: *Heic subit mihi vehementer ridere: si Deum Facie ad Faciem Justorum Animae Videant; & Trinitati, & Dei Throno sine ullo medio Adstant; nec tamen ineffabilibus Bonis adhuc perfruantur. O insensibilitatem! Quatenam ineffabilia Bona esse existimatis Visione Dei majora? Perspicite quid dicatis; nam id blasphemia maxima est. Si enim Deum in Facie Vident (quod Nemo Negaverit Umquam); sunt autem & alia Bona, quae non vident: ergo majora ea Dei Visione*

ne

ne sunt. At id neque Daemones umquam dicerent. Itaque vides, neminem e Graecis Visionem Dei negasse Sanctis, quamquam ridiculo postea dogmate contenderent, eos adhuc expectare mercedem & Regnum. Sed fortassis id unum ii volebant, augendam nimirum tunc esse Justorum Felicitatem in Caelis, quum contubernium Carnis Animae recipient: quod & Latina Ecclesia agnoscit; sed spiritu dissensionis praerepti oculos avertébant ab iis, quae Latini recte sentiebant. Porro in praesentia nihil nostra certo scire interest, fuerit-ne ejusdem Apologiae Auctor Gennadius, qui & Georgius Scholarius, an Joseph Episcopus Methonenfis, an quisquam alius: qua de re adhuc inter Eruditos disputatur. Nemo neget, quin ea processerit ab Auctore aliquo Graeco, Marci Ephesii synchrono, cui perspecta melius, quam nobis, erat suae Ecclesiae doctrina in hocce negotio. Propterea quicumque apud ipsos Graecos nunc etiam numerantur homines mitioris animi, atque ingenii ad meliora compositi, ii Novatores suae gentis, Latinorum odio nimium excaecatos, averfati, hac in re cum Romana plane Ecclesia consentiunt. Immo testatur idem Papadopolus, gente Graecus, & in sacris Graecorum rebus versatissimus, si Marcum Ephesium, Margunium, & paucos alios excipias, reliquos Graecos numquam abcessisse neque abscedere a dogmate, quod tam a Latinis quam a Graecis in Concilio Florentino constabilitum animadvertimus. Quae vero nunc Ecclesiae Graecae hac de re communis sententia sit, Papadopolus ipse prodit verbis *Gabrielis Severi* Metropolitae Philadelphienfis, acerrimi alioquin Latinorum hostis, qui Saeculo proxime praeterito in Libro de Differentiis (non secus atque *Georgius Coreffius*, alter Photianus synchronus praestiterat in Epistol. Theolog.) in haec verba loquitur: *Hanc habeo sententiam in hac controversia, nimirum Sanctorum Animas Videre sane, ut Animae sunt, Beatitatem & Gloriam Dei, uti in Sapientiae Libro dicitur: Justorum Animae In Manu Dei Sunt; & ut magnus Basilius in jam allatis locis dicebat. At in quantum debent iterum Anima & Corpus perfectam mercedem recipere Divinae Beatitatis: dico, nondum perfecti Sanctos Praemium accepisse. Nam tunc erit perfecta merces, quum Christus judicabit universam terram, & reddet unicuique secundum opera ejus.* Philadelphienfis sententiam nemo Catholicorum improbat. Nemo quippe nostrum dubitat, quin post Corporum, sive Carnis Resurrectionem, futura sit major Beatitudo Justorum in Caelis, uti jam vidimus tradi a veterum quoque plebisque. Istud autem disputationi adhuc inter Theologos obnoxium est,

est, scilicet intensive-ne, an extensive augenda tunc sit eadem Beatitas. Quam quidem controversiam ingredi nunc neque vacat, neque refert. Hic enim in quamcumque partem inclines, a Catholica Ecclesiae tramite non declines. Vide Sanctum Thomam in 4. Distinct. 49. Quaest. I. Articulo 4., aliosque Scholasticos de hoc argumento loquutos. Satis nobis sit jam percepisse, quam ridendus sit Burnetus, qui Florentini Concilii sententiam veluti vetustatis ac Traditionis suffragio destitutam exclamat. Antiquissimam, stabilemque hujus Dogmatis Traditionem nunc habet Lector: quod erat demonstrandum.

CAP. XXVI.

Quam necessarium, quam utile ad Christianorum Spem confovendam, quamque Dei bonitati consonum Dogma de Beatitudine Sanctorum. Contra quam perniciofa Burneti opinio, utpote quae a Martyrio, Virtutibusque homines avertat, & Vitiiis ostium grande recludat. Quam simul divinam lenitatem dedecet.

Longe plura, ne dicam innumera alia, congerere potuisssem tum Latinae, tum Graecae Ecclesiae Monumenta, ut fusius etiam ostenderem, quam longe lateque in omnibus Christi Ecclesiis, atque ab ipsis remotioribus Saeculis, communis, constans, & ore omnium depraedicata semper fuerit Justorum in Regia Caelesti Beatitas, minime expectato redivivae Carnis contubernio. Sed modus est adhibendus. Nunc ergo Lectores rogo, Britannos potissimum, si quisquam ad haec legenda accedat, ut Burnetum ad causam dicendam de Libro a se evulgato jam tandem adigant. Scilicet cur, & quo animo, quoque consilio inveteratam (puto etiam apud suos tribules) sententiam de Felicitate Sanctorum, postremis hisce temporibus arrodendam, ac, si fieri posset, deiciendam ipse sibi sumserit. Quis non videt, Impiorum, & Iniquorum commodis Burnetum sedule prospexisse, quando eorum supplicia usque ad consummationem Saeculi distulit? Dum vero Justorum quoque retributionem ad magnum illum diem procrastinat, vix dici potest, quantam perniciem Christianae Religioni moliaturs malefana illius opinio, & quam propterea detestanda atque omnibus fugienda sit, qui revera Christo suam fidem addixere, atque

que in Christo Domino suam spem collocarunt. Rerum certe sacram peritis notum arbitror, Christiani hominis vitam atque oeconomiam, quod est ad operandum, e tribus potissimum pendere Virtutibus, quas Theologicas, & supernaturales appellamus: e *Fide* videlicet, *Spe*, & *Caritate*, quas identidem divinus Paulus commemorat. Quo altius hae insident in animis nostris, eo operosius tum declinando a malo, tum faciendo bonum nobis cordi & curae est, ut Deo placeamus. Si vero imbecilles hasce in nobis sentimus, gradibus quoque infirmis tunc ad Deum tendimus, atque in vitia facile sinimus ut rapiamur. Et quidem etiamsi ultra hanc vitam altera non esset, recta ipsa Ratio persuaderet, & Deum esse, ipsumque fore amandum, & Virtutem potius, quam Vitia, nobis esse excolendam. Verum tam ipsa Ratio, quam Revelatio certos nos facit, existere alteram Vitam, Animasque ratione praeditas, immortales & numquam perituras, a Deo fuisse creatas. Ad haec quum supremum omnium Creatorem agnoscere opus sit infinite Justum (quod attributum nisi mente captus ei deneget): necesse quoque est, in altero Saeculo & Praemia Justorum & Poenas Iniquorum fateamur, ubi Justus Deus aequa lance & illos remuneretur, & hos secundum merita puniat: quod videlicet in hoc Mundo non semper sibi faciendum divinus rerum arbiter pro sua voluntate atque sapientia censet. Validissimum hoc argumentum ad immortalitatem Animae demonstrandam, a Platone usurpatum, Chrysostomus, alique Patres saepe inculcant. At quod praecipue certos nos facit de Immortalitate Animae, vox primae Veritatis est, vox Christi Domini, cujus Religionem invictis adducti rationibus amplexi sumus, & cujus dicta a fallacia ac errore prorsus immunita merito credimus. Erunt ergo Praemia, erunt & Poenae in altera Vita, eaque per Fidem adventura novimus ac certissime credimus. Erit Deus ipse, summum Bonum, praemium Bonis, quum se in Regia spectandum electis suis praebebit, suoque adspectu eorum intima illuminabit, satiabit, atque admiranda, numquamque desitura voluptate replebit. Sed quid Christianis prodesset, tantam Felicitatem in Caelis paratam nosse & credere, nisi etiam se eadem potituros, & quidem sine longa mora, sperarent? Propterea non Fidem solam, sed & Spem in suorum Fidelium Animas immittit Deus, ut quod viribus nostris assequi numquam fas esset, misericordia & ope divina conferendum nobis speremus. O beatam Spem, o dulce proborum refrigerium in teris! Si spiritu facta carnis mortificabimus, si cum Christo com-

M m

patic-

pariemur, si ambulantes in viis Domini abnegabimus nosmetipsos: nos quoque glorificabimur, & ex filiis heredes, heredes quidem Dei, coheredes autem Christi, per Dei misericordiae gratiam evademus. Nunc quod non videmus, speramus. Nunc per patientiam inestimabilia illa Bona expectamus. Veniet, ac cito veniet exoptata illa dies, qua Christum amorem nostrum, in gloria Patris sedentem, Facie ad Faciem contemplabimur, ac videbimus Deum, sicuti est, non jam amplius per speculum, sive in aenigmate, atque inhabitabimus in atriis ejus, & satiabimur bonis domus ejus. Quis ergo nos separabit a Caritate Dei, quae est in Christo Jesu Domino nostro? tribulatio? an angustia? an fames? an nuditas? an periculum? an persecutio? an gladius? Nihil horum sane: fiducia nostra in Deo est; in his omnibus superabimus propter Eum, qui dilexit nos. Ipse enim nobiscum victoriam referet, & justus simul ac misericors Pater sua nobis dona, quum hinc emigrabimus, largietur.

Verum in Britannia exsurrexit, qui nos separare postremis hisce temporibus a Caritate Christi vellet. Atque is Burnetus est, quem non ita pridem prurigo invasit iterum suscitandi tamdiu sepultos atque exhibitos Chiliastrarum errores, & procrastinandi usque ad extremum Christi Judicium, immo & post illud ad Annos Milles, supernam Justorum Felicitatem in Caelis. Christianorum mentibus quam perniciofa sit ejusmodi opinio, quicumque serio recogitet, quis continuo non intelligat? Ut ut non tollatur per eam prorsus Spes nobis a Deo ingesta, grande profecto illi vulnus hac ratione infertur. Ita nimirum efformatus a divino Artifice homo fuit, ut innatum ei sit atque essentiale principium, in volendo & agendo, Amor sui ipsius, & desiderium Felicitatis. Propterea benignus ipse Deus immensa bona paravit, eaque proposuit mentiri nescius Fidelibus suis, ut tanto Praemio sollicitati, in via mandatorum suorum alacres decurrant, certitudine ac Spe incomparabilis hujus mercedis levante, immo earum reddente laborem itineris. Atque haec praemia ille saepe ac saepius repetit, nobisque inculcat in sacris Literis, quasi veritus, ne de iis aliquando dubitaremus, aut eadem excidere e memoria nostra pateremur: probe noscens, quantum virium haec habeant ad excitandos animos hominum ad cultum & amorem, alioqui per se expectandum, Virtutis. *Quod etiam vel maxime in illius doctrina admireris* (inquit Chrysostomus) *ubique summa cum plenitudine certaminum praemia ponit: uti Deum videre, adire hereditatem Regni Caelorum, ac Filios Dei*

*Dei fieri, Deoque similis, misericordiam consequi & consolationem, tum etiam in Caelis copiosam habere mercedem. Sicubi vero etiam tristitiam meminisse oportet, parce id facit. Gebennæ enim. men semel in hisce sermonibus posuit; in aliis vero quibusdam dissimulante, ac hortatorio potius quam comminatorio sermone. Scilicet optimus ille Pater, promptior ad remunerandum quam ad puniendum est. Verum Burnetum auscultes, ab hisce præmiis arcantem Justos, donec nudi Spiritus Carnis consortium recipiant: quid; quæso, cogitandum deinceps foret de Deo, qui se adeo munificum erga servos suos tam crebro edicit? Quo in loco erunt Præmia illa, toties ac tantopere deprædicata? & quo tandem evadet suavissima & efficac Christianæ gentis Spes, quæ non confundit? Burnetus quippe contendit, Justorum Animas corporeo carcere solutas in ignotum quemdam Locum deferri, a Cælo remotum, ibique specie quadam Somni colligari, & externam quamque rem oblitis ignobili quadam in *depressione*, sive *inactione* & otio degere. Quamobrem secundum illius præne dixi deliria, Sanctorum Petri & Pauli Apostolorum, Stephani, aliorumque Martyrum Spiritus, promissa illa Præmia adhuc expectant, eo tantum tempore consequuturi, quum universorum Resurrectionem Archangeli tuba indicabit. Confectaria dogmatis hujus persequamur.*

Primo fieri non potest, quin Impii; Increduli, atque Ethnici nobis insultent, nostramque Spem sonantibus cachinnis irrideant. Quid enim, inquit, vos Christiani dicitis: *Gloriamur in Spe Gloriarum Filiorum Dei?* Quid *Spe gaudentes*, vos jactitatis? Ecce inter Britannos doctus vir, qui Christianum se dicit, palam fateatur, nondum ullum eorum, qui Deum credunt, ab exordio Mundi ad hunc usque diem, quæ sperabat, adeptum fuisse. Jam fluxere tot annorum Millia, ex quo frustra mercedem hanc opperiuntur Adam, Abel, Abraham, Isaac, & Jacob. Abiere jam Mille ferme & septingenti Anni, ex quo Apostoli vestri vitam fortiter dedere pro Christo, consequendæ Beatitudinis illius, quam tam sæpe in ore habetis, Spe atque fiducia illecti; & nullus tamen est hactenus in illam immissus. Porro quid sentiendum de divino, ut dicitis, Magistro vestro, qui ad parandam suis Discipulis Mansionem in domo Patris sui se ire ante decem & septem Saecula professus est, quum illuc tamen nemo hactenus aditum invenerit? Numquid illi luserit, aut promissa sua sefellit, aut tot Saeculis opus fuit ad parandum illis & vobis in Cælo domicilium? Ad hæc in fine saltem Mundi vos votis vestris compotes futuros esse speratis. At quan-

donam desinet esse Mundus? Id ignoratis, ipsumque vobis occultum voluit Magister vester. Quid, si non post Mille Annos, sed post multa Annorum Millia expectandum sit hujus Mundi finis? Quid, si numquam terribilis hic dies adveniat? Denique risu excipient Impii (dolens atque indignabundus dico) divinum ipsum Redemptorem nostrum, qui animos nostros erecturus ad quaeque aspera pro Virtute toleranda, aiebat: *Beati pauperes spiritu, quoniam ipsorum est Regnum Caelorum. Beati mites, quoniam ipsi possidebunt terram. Beati, qui lugent, quoniam ipsi consolabuntur. Beati, qui esuriunt & sitiunt iustitiam, quoniam ipsi saturabuntur. Beati misericordes, quoniam ipsi misericordiam consequentur. Beati mundo corde, quoniam ipsi Deum Videbunt &c.* Variis hisce nominibus, ut nuper Chrysostomus innuebat, & Nyssenus alibi monuit, unam Caelestem Beatitudinem significavit Dominus. Quei, inquit Epicuri aestelae, adeo magnifica sperare vos fecit Christus, si Burneto restante nondum quisquam illud Regnum, illam Terram, quam Viventium Terram appellatis, solarium illud, illam satietatem, misericordiam, & Visionem Dei assequutus est? Et numquid praegnantibus verbis non usus est Praeceptor vester, quum ait: *Gaudete & exsultate, quoniam merces vestra copiosa est in Caelis?* Ille, quasi jam tenerent ineffabilem istam mercedem, gaudere suos & exsultare jubet. Atqui ne ullus quidem post tot Saeculorum spatium coronam istam retulit, incertumque plane est, quando sit relaturus, cunctis interim sua spe fraudatis. Haec, aliaque id genus dicta sceptoribus Pyrrhonis adversus sanctissimam ac veracissimam Christi Religionem Burnetus ministravit improvida opinione sua. Atque hoc unum satis esse potest apud sapientes Christi Fideles, ut hanc ipsam opinionem, tot absurda patientem, abominentur, & falsam e vestigio dijudicent. Is enim, ut verbis utar Theophili Archiepiscopi Alexandrini, *Christianum Dogma* de Beatitudine Iustorum, *ludum & jocum facit*, quum tot Christus fuerit Fidelibus suis pollicitus, nihil vero istorum completum haecenus Burnetus velit. Quae etiam Regnum Christi in Caelis nondum inchoatum temere contendit, quum tamen, ut idem sanctus vir animadvertit, *nulli dubium sit, quin qui Deus permanet in aeternum, simul babeat & Regnum, & super ipsos quoque, quos REGNI POSSESSIONE DONAVIT, Rex perpetuus appelletur*. Ita Theophilus circiter Annum Christi CCCXC. in Epist. II. Paschali, a Sancto Hieronymo in Latinum sermonem converſa.

Secundo, ab opinione Burneti absterrentur Fideles, ne in posterum alacriter

alacriter Martyrium pro Christo subeant, si occasio tulerit & ne contra Vitia in agone Christiano fortiter dimicent, animoque obfirmato procedant in amore Virtutum. Nos labores aggredimur, nos ad aerumnas, aliaque mala exantlanda ferimur, dum majus bonum e labore & patientia nos esse assequuturos speramus. Martyres ipsi ad eximia illa praemia anhelantes, quae Christi Athletas in Caelis manent, invicto robore perstabant in tormentis, vitamque laeti dabant, ut terrena bona cum immensa Caelorum Beatitudine commutarent, in quam certo & confestim se invehendos ea ratione norant. Nam, uti agebat Sanctus Asterius Amasenus Episcopus circiter Annum Christi CCCC. Homil. in Sanctos Martyres, *Spes spiritualium bonorum, proba admodum fortitudinis ac tolerantiae exsistit doctrix: quae nimirum velut idoneum pignus, certaue arrha animis insidens, periculum omne impercussos jubet aspicere, ac reipsa ferre strenue. Atque id consentanea maxime ratione. Sic enim fere hominibus natura comparatum est, ut in iis laboribus, quibus nihil praemii propositum sit, molles ac resoluti efficiamur: eosque vicissim vegeti alacresque adeamus, qui praemia ac honores propositos habent. Quamobrem universi Martyres, Evangelicae illi scripturae animum adhibentes, qua Dominus sacros pugiles ac Dei amantes hortatur, dicens: Si quis confitebitur me &c. pro ea confessione immotis animis acutum ferrum tolerarunt, ac rogos conscenderunt &c. Neque tantummodo Bonum ac Praemium majus animis nostris proponatur oportet, ut pro illo adipiscendo multa toleremus: sed etiam necesse est, ut Praemium illud proxime arripiendum sit. Alioquin quo magis remotum a nobis Bonum aliquod contemplamur, eo plus illud in aestimatione nostra decrescit, ita ut vel exigua Bona praesentia videantur nobis majora, quoties cum Bonis, quamvis longe excellentioribus sed remotissimis comparentur. Id quotidie usu venire experientia nos docet. Itaque, si, uti Burnetus sibi persuasit, & nobis (quod tamen absit) persuadere vellet, ne post Mille & Septingentos quidem Annos Martyres & Justi percipere fructum suorum laborum; ignotumque omnino sit, quando beata illa dies exortura sit; neque desit metus, ne plura ac plura adhuc Saecula restent: refrigerat illico Proborum ardor in arduo Virtutum curriculo, atque aegre mortem quisque eligat pro Christi amore, Virtutisque custodia, quando Vitam, tam grande Bonum, & praesens, depositurus sit, aut laboriose sit ducturus, pro Bono tam longe posito, ac tam sero e manu Dei recipiendo. En grave alterum absurdum, quod secum trahit in-*
consul.

consulta opinio Burneti. Divinae sapientiae oeconomiam non videt is per haec sua commenta eversum iri? Nihil magis optat Deus, quam ut Virtutem complectamur; misitque ideo in terras Unigenitum suum, ut faceret sibi Populum sectatorem bonorum operum. Probe quoque sciens, animos hominum, a se efformatos, non moveri ad magna agendum, nisi expectatione Praemii magni, atque imminetis, sublimia pollicitus est, eaque post mortem nostram quin illico praestare possit Deus, nemo neget. At nunc Burnetus Christiano Populo denuntiat, quae tanta liberalitate nobis promissa fuere, minime expectanda esse post mortem, sed incerto tempore, cujus tam longa etiam possit esse series, ut post plurima tantummodo Annorum millia promissa sua Deus exsolvere velit. Quis, amabo, haec audiens, praesentia Bona, ipsamque Vitam laetus contemnat, ut Bona futurae Vitae tam immani spatio remota apprehendat?

Tertio, non tantum Justis praemia, sed & Injustis poenas aequus rerum omnium Moderator indixit. Verum ut gratificarentur Iniquorum gregi, prodire nostris temporibus Novatores quidam in Britannia bene noti, qui hasce poenas, quamquam *Aeternas* disertis verbis in Evangelio appellatas, in aeternitatem protrahendas negarunt. Immo inventi sunt quidam, qui Animas eorumdem Improborum, ne diutius in tormentis Inferorum crucientur, in nihilum tandem a Deo redigendas statuerunt. Alia nunc ratione in subsidium hominum nequam accurrit Burnetus. Non solum is supplicia Impiorum apud Inferos *Sempiterna* fore inficitur pag. 239. sed etiam majus adhibet solatium illorum Animabus, contendens, neminem hactenus in ea supplicia deductum fuisse, quae toties Deus in divinis Scripturis fuerat comminatus. Complura jam Annorum Millia abierunt, ex quo Mundum atque humanum genus Creator condidit; & nemo tamen hactenus sensit, an urat Ignis Infernus. Fortassis etiam multa alia Annorum Millia decurrent, antequam Improborum turba in flammis illas conjiciatur: nam postremi tantum Judicii die Inferorum poenalium ostia aperientur, si Burneto credimus. Nollem duris suspicionibus onerare memoriam istius hominis; at is plane videatur conjurationem inisse cum Atheis & Improbis, ut ex eorum animis metum divinae Justitiae amoveat, aut in ipsis, quanto possit conatu, imminuat. Nunc etiamsi Christiana gens Aeternitatem poenae a Deo constitutae credat, certumque habeat, mox ut quisque emigrat ex hac vita odio Dei dignus, in illa tormenta detru-

detrudendum; tam multi nihilominus in Vitia & peccata ruunt, & quod pejus est, in ipsis torpent atque marcescunt. Quid vero deinceps expectandum foret, ubi in opinionem Burneti miserrime Britannia concederet? Tam immaniter debilitato terrore alterius vitae, nonne enormem in modum fieri posset morum ejus gentis in deterius conversio? Cur innumera illa flagitia, quae in Ethnicis cum Apostoli, tum Sancti Patres, olim deprehenderunt (quamquam propiora, quam Burnetus, plerique ex Ethnicis ipsis crederent tormenta Inferorum) non apud Britannos sensim succrescerent, Atheis ac Deistis denique Burneto, velut suo commilitoni, plaudentibus? Quis haec ferat? A Christi sane dictis, divinoque consilio ista abhorrent, qui non minus Justos Praemiorum spe ad Virtutem incitat, quam Injustos terrore Gehennae compescere cupit. Cur autem non continuo post mortem malos Omnipotens puniat, qui jamdiu ait: *Mibi vindicta, & ego retribuam*? Et nonne *horrendum est*, ut inquit Apostolus ad Hebr. X. 31. *incidere in manus Dei viventis*? Numquid vires, aut voluntas Deo defunt ad castigandos rebelles suos, ita ut eorum supplicia in tot Saecula differantur?

Quartò, tantum abest secundum Burneti sententiam, ut misericors Deus Praemia toties promissa in Sanctos suos ex hac vita decedentes effundat, victoresque in certamine pro se inito coronet, ut eos contra veluti reos puniat. An ego quicquam heic exaggerem, sapiens Lector mox judicabit. Eorum videlicet Animae Corpore solutae, si Burneto credimus, in ignotum locum devehuntur, atque Lactantio teste *in una communique custodia detinentur, donec tempus adveniat, quo maximus Judex meritorum faciat examen*. Ibi vero, uti idem Burnetus est opinatus pag. 83. degunt *in statu quietis, silentii, & ἀπαιρίας* (idest nihil operantes) *quoad Mundum externum: quousque experiscentes & evigilantes in Resurrectione; mutato statu, quasi excusso Somno, in lucem & in Mundum visibilem resurgunt*. O vere obdormientem hominem, suaque somnia placide pro solidis rebus venditantem, sed in gravem Dei, sanctissimaeque Religionis contumeliam! Ergo secundum somniatoris hujus imaginarios Spiritus Justorum statim a morte in carcerem & ergastulum quoddam detruduntur, a Caelorum Regno remotissimum. Ibi ab origine Mundi post tot Annorum Millia detinentur Justi quilibet: & quamquam Christus Dominus mirabili sacrificio Crucis Patrem placatum erga genus humanum effecerit, id nihil eis profuit. Immo ne Apostoli quidem & Martyres, immensi illius beneficii haec-

nus

nus fuere participes. Ipsi quoque in carcerem coniecti; carcer adhuc clausus egredi cupientibus; clausae adhuc Caelorum portae, neminique licet illuc inferre pedem. Ergo nondum reconciliatur Pater; ergo nullus adhuc Redemptionis fructus, quum & post perfolutum a divino Salvatore pretium, melius nunc non habeant Animae Justorum, quam ante adventum misericordis Filii Dei. Ergo exinanitur Incarnatio Filii Dei; exinanitur Crux; & frustra Paulus tot ac tanta ad Romanos scripserit de magnificentia meritorum, & gratiae Christi in novo Foedere, praecipue quum ait: *Non sicut delictum, ita & donum. Si enim unius delicto multi mortui sunt: multo magis gratia Dei, & donum in gratia unius hominis Jesu Christi.* Et nos gloriamur in spe Glorificatorum Dei. Frustra quoque is nobis consolationem adhibet, inquiens: *Nunc vero liberati a peccato, servi autem facti Deo, habetis fructum vestrum in sanctificationem: finem vero Vitam Aeternam.* Haec sunt confectionaria, & quidem, ni fallor, blasphemata Burnetanae opinionis. Quod plus est, Justorum omnium, & vel ipsorum Apostolorum ac Martyrum Spiritus in carcere illo, in otio ignobili, in quadam torporis specie, omniumque, quae gesta sunt in Mundo, obliiti, longe a praesentia & conspectu Dei, a tot Saeculis vivunt, & Burneto jubente victuri sunt usque ad extremum Christi Judicium. Haecine Beatitas illa, quam toties, tantoque apparatu ante oculos Fidelium suorum proposuit Dominus, ut ad arduum Virtutis agonem unumquemque sollicitaret? Immo illos in miserum statum coniectos, & reorum ad instar ab Aula eliminatos, & in exilium actos, atque ibi infelici vitae conditione maceratos fateri cogimur. Nam quantumlibet aerumnis, vanitate, aliisque incommodis terrena haec vita abundet: quis tamen nostrum lubens hanc ipsam mansionem defereret, in qua mille objecta nos delectant, in qua operamur, solliciti quotidie, ut commoda & gaudia uberiora nobis accedant, ubi commutaturus eam foret cum infelici illa quiete, atque inactiuosa mansionem, in quam Burnetus Proborum Animas hinc abeuntes compellit? Quod si aliquis reponat, Animabus iis in solatium converti spem ac memoriam Beatitudinis futurae, de qua certae jam sunt: experientiam heic omnium testem provoco, an non potius excogitandum & dicendum sit, Beatitatis ipsius memoriam in immodicum vergere cruciatum Spirituum, carcerem illum inhabitantium. Rectissime Salomon jamdiu aiebat Proverb. XIII. 12. *Spes, quae differtur, Affligit Animam, sive spes protrahita, est languor & aegritudo cordis.* Quum quis innocens in carcere detinetur, spe sibi ingesta libertatis quam-

primum

primum recipiendae reficitur. At ubi Menses plures abeunt, neque oprata illa dies umquam emergit, inquietus evadat animus, necesse est, & spes in impatientiam transeat. Hercle si unum Annum in carcere inclusus, & solus egisset Burnetus, numquam illi in mentem venisset, pari poena damnare Justos perfectos post mortem. At quid dixi, pari poena? Si Anni, immo centena, immo millia aliquot Annorum fluant, atque in carcere clausus, nondum libertati sit restitutus, spe abeunte desperatio & immanis tristitia succedat oportet. Neque aliud de Justorum statu in absurdissima Burneti opinione excogitandum est. Nihil plus sitiunt vere Deum amantes Animae, vel quum in hac vita versantur, quam Deum suum, summum videlicet Bonum assequi, eumque posse intueri, ejusque beato conspectu potiri, intra se cum Apostolo gementes & expectantes adoptionem filiorum Dei. *Desiderantibus*, ut inquit Comicus, *invisa est quaevis mora*: tormentum est quaelibet procrastinatio. Qui sitit, & fontem paratum de longe conspicit, at potare diu nequit, non spe oblectatur, sed desiderio cruciatur, & fatigata expectatione enecatur. Ergo intelligas, quanta poena torquerentur Justii, si aucto in morte hoc desiderio, & tunc invalescente adeo dulci spe, optata nihilominus Beatitate fraudarentur; & quousque eorum moestitia & dolor procederet, si post diutinum aliquot Saeculorum desiderium ac spem nossent sibi expectandum illud adhuc esse, quod tantopere cupiunt, aliquot insuper Annorum Millia. Heu informem atque abominandam Burneri sententiam, quae Deum, Patrem nostrum amantissimum, veluti sui, suorumque promissorum oblitum exhibet! Num adeo bonum ac miseratorem Deum decere umquam putes, post absolutum certamen, ad quod ille nos tam anxie sollicitat, Coronam denegare, Praemiumque in enorme temporis spatium protrahere, fatigando interea & excruciendo (& quidem sine ullo meriti augmento, nam id solum in hac vita sperandum est) filiorum suorum spem atque expectationem? Ne in hominibus quidem ferendum id forer. Proinde incredibilia, injuriosa Deo; nobis propinat Burnetus; & quod magis intolerandum est, is alibi, ut Improbis faveat, ultra omnem mensuram misericordiam Deo tribuit; ipsum vero non veretur immisericordem praestare erga amicos & filios suos. Profecto qui hanc temere scribit, ignorat, quid sit poena damni, quid abesse ab adspectu Dei: quod omnium maximum supplicium in Inferis futurum est, neque Justis in somniato loco aliquo a Caelis remoto conclusus supplicium esse desineret, etiamsi aliquando desitutum id esse statuas.

Nn

At

At quoniam non semel Burnetus nomen *Somni*, & *Dormientium* nobis ingerit: nunc monendus est Lector, referri ista non ad Animas a Corpore avulsas, sed ad Corpora ipsa, quae nunc dormiunt, in supremo tantum excitanda Iudicio. Audi Sanctum Paulinum Episcopum Nolanum, qui Anno Ch. 406. Natalem XIII. Sancti Felicis (e tenebris per me eductum, publicique juris factum Tom. I. Anecd. Lat.) recitans, in haec verba loquitur:

*Et dignum retinere suae pia Carnis honorem
Ossa, quibus Sanctus numquam desistit adesse
Spiritus: unde piis stat gratia viva Sepulcris,
Quae probet in Christo functos sine morte sepultos,
Ad tempus placido SOPIRI CORPORA SOMNO.*

Propterea sicut in Symbolo dicimus de Christo Domino: *Mortuus & Sepultus est*, utique Corpore, non Anima: ita & de Fidelibus vita functis dicimus: *Dormiunt in Somno Pacis*, idest Corpore, non autem Anima.

C A P XXVII.

*Improbandum Burneti consilium in huiusmodi quaestione pertractanda.
Quae ab eo divinae Scripturae loca pro se adducuntur, nihil
Romanae Ecclesiae hac de re Dogmati adversantur.*

Nemo ergo, nisi desipiat, nequit quin agnoscat, summe laudabile, Deoque dignum, nostrisque Animabus utile, Ecclesiae Romanae dogma de Beatitate Sanctorum. Contra haecenus vidimus, quam gravibus absurdis laboret, atque adeo quam perniciofa sit, ac minime ferenda Burneti opinio. Verum is, nisi jam ante Christum Iudicem stetisset, fortasse reponere nunc posset, se studio Veritatis ductum, adversatum fuisse communi huic Christianae gentis sententiae. Immo is Cap. I. Operis, se ipsius *Veritatis amore flagrantem* in hac ipsa controversia iactitavit. Namque ubi decreverit Deus, idque ex divinis Libris eluceat, in fine dumtaxat Mundi futura esse Praemia Iustorum, frontem demittere opus est; & non quod nos volumus, aut aequum magis congruum nobis videtur, sed quod ille voluit atque decrevit, credendum est. Pulcra sane verba, venusta hercle excusatio, quam tamen in promptu semper habeat quisque Novator. In censum autem Novatorum, atque illorum, qui appellantur *free Thinkers*, immo & inter Visionarios Tho-

Thomam Burnetum jamdiu retulere sapientes Britannii, ex quo is in *Theoria telluris, in Archaeologiis Philosophicis*, atque in *Tractatu de Fide, & officiis Christianorum*, qualis foret ingenii sui modulus notum universitati Literatorum fecit. At infelicem Veritatis sortem! quam se deperire vel ii maxime profitentur, qui ab ipsa longius recedunt: quod ubique dolendum est, sed praesertim in Religionis negotio. Hanc Athei supra alios se attigisse sibi blandiuntur, ridentque aut miserentur veluti illusas aliorum mentes. Neque perspiciunt, id unum se quaerere, ut nullum sit exinde frenum affectibus ac moribus suis, seque universi generis humani teterrimos hostes evasisse. Alii Gloriolae amore succensi, hujus consequendae spem collocant aut in novis erroribus cudentis, aut in antiquorum somniis ex oblivionis antro revocandis, nihil pensi habentes, an ista in sacrarum Literarum dedecus, aut in perniciem Religionis & Reipublicae vergant. Loco Veritatis est illis amor Novitatis. Atque utinam non ejusmodi morbo laborasset Burnetus, neque ei verum id tantummodo fuisset visum, quod quamquam peregrinum, & ipsius Anglicanae Ecclesiae placitis repugnans, conciliaturum famam sibi non vulgaris ingenii sperabatur. Ita fit, ut infelicius in dies gens illa sentiat, quam perniciosos fructus pariat, excussisse auctoritatem Ecclesiae a Deo stabilitam, ac methodum contempsisse ab Apostolis praescriptam conservandae apud Christianos a Deo traditae doctrinae, dum quisque pro lubito divinos Libros interpretatur, nullisque amplius habenis indomita sua ingenia patitur regi. Sed nihil minus, quam Veritas, cordi fuisse Burneto, facile Lector deprehendet. Ille quidem nonnulla sacrarum Literarum loca in suam opinionem derivat: aliquot etiam e Sanctis Patribus pro se laudat: tum quasi re confecta sibimet ipsi ovationem atque triumphum decernit. At istud quid aliud est, nisi agyrtam atque impostorem agere? quid aliud, nisi incautum Lectorem fallere consulto velle, qui arbitratus, in Burneti Libro quaestionis hujus momenta quaelibet se accepisse, nihil ultra quaerit, atque in ejus fide & eruditione conquiescit? Si Veritatis re ipsa amator fuisset hic Scriptor, pari utique diligentia investigasset, pari sinceritate exposuisset contrariae sententiae vires atque argumenta, neque illa paene cuncta dissimulatione inhonesta omnium oculis subduxisset. Alioqui, si haec certandi ratio excusanda foret, vix ullum est e sacratioribus Religionis Christianae dogmatis, ab Anglicana ipsa Ecclesia receptis, quod aliquibus

Scripturae verbis productis, nonnullis etiam locis ex Libris Patrum excerptis, impugnare sycophanta aliquis non possit; ac dissimulatis, quae contra faciunt, imperito popello persuadere, Veritatem in suis tantum castris militare. Itaque nos, sinceriori methodo procedentes, epilogum heic exhibeamus eorum, quae haecenus in controversiam istam concessimus. Et primo recolenda est regula, quam quisque pius & sapiens divinarum Scripturarum Interpret praee oculis semper est habiturus: submittendam nempe esse Rationem nostram Revelationi, ubi clara atque aperta est mens Dei revelantis in Libris divinitus scriptis. Quoties vero contra evidens Rationis lumen Scripturae sacrae verba pugnare videntur, aut inde gravia absurda consequi animadvertimus; tunc Traditione Patrum explorata, adhibitisque in consilium Majoribus nostris, interpretationi honestae locus est quaerendus: quod potissimum praestare consueverunt Theologi, quum sacris in Libris tropi, verba translata, allegorica dicta occurrunt, & spiritalia per sensibilia explicantur. Eoque magis in eam sententiam inclinandum semper est, quae absurda evitet, & consona judicetur naturae, bonitati, aequitati, aliisque perfectissimis Dei attributis, quoties id faciendum suadeant alia Scripturarum loca, atque ab interpretatione ista Majorum Traditio minime dissentiat. Jam quot absurdus abundet Burneri opinio, nuper vidimus; nemo vero inficias eat, quin Catholicae Ecclesiae sententia hac in re illa sit, quam amplecti nos doceat, immo cogat Religionis oeconomia, & benefica Dei natura atque voluntas, nisi evidens Scripturae sermo adversetur. Atqui nihil Burnerus, aliive in hoc argumento versati, quicquam adferre haecenus potuerunt aut possunt, unde liqueat, tum solum Beatitudinem Sanctorum inchoandam esse, quum Mundi hujus advenerit finis. In Evangelio quidem, atque in Apostolorum literis, crebra fit mentio, veluti magni muneris, Resurrectionis Carnis, & redemptionis Corporis nostri, incorruptionis tunc consequendae; at nusquam ibi negatur, quin ante illud tempus Justorum Animabus purgatis deferenda sit Beatitudo Caelestis. Sub nomine *Vitae Aeternae* Beatitudo ista designatur. Apostolus autem ad Roman. VI. 22. probos Christi Fideles habere nunc *fructum in sanctificationem, finem vero Vitam Aeternam*, quum nempe hinc soluti ad Christum abibunt. Complementum vero & perfectio Beatitudinis tunc erit, quum rediviva Caro transferetur & ipsa in gloriam. Proin-

Proinde Dominus noster Johann. VI. 47. aiebat: *Qui credit in me, habet Vitam Aeternam; & infra: Si quis manducaverit ex hoc pane, vivet in aeternum. Qui manducat meam carnem & bibit meum sanguinem, habet Vitam Aeternam; & ego resuscitabo eum in novissimo die.* Tam certos nos facit Christus de Beatitudine futura, ut, quasi haec sit jam inchoata, inquit *Habet*: indicaturus postea absolutum Vitae hujus Aeternae statum futurum, subdit; *Et Resuscitabo.* Prius habet homo Justus Vitam Aeternam Animae, hoc est Beatitudinem; deinde Corporis quoque Beatitudine donabitur. Quaecumque autem sacrarum Literarum loca proferuntur a Burnero, iusta interpretatione componuntur cum sententia nostra, quam recta Ratio & Religio praefarendam omaino suadent. Eadem loca raptim rursus percurramus.

Inquit Sanctus Johannes in Epistol. I. Cap. III. 2. *Nondum apparuit, quid erimus. Sciamus, quoniam quum apparuerit, similes ei erimus, quia Videbimus Eum, Sicuti Est.* At supra ostendimus, & rursus infra ostendemus, non solum in fine Mundi venturum, atque apparituum esse Dominum, sed etiam illum ad mortem uniuscujusque Fidelis venire, atque apparere, ut Judicium de illius Anima instituat. Apostolum laudat Burnerus scribentem Rom. VIII. 19. & 23. *Expectatio creaturae Revelationem filiorum Dei expectat.* Isi intra nos gemimus, adoptionem filiorum Dei expectantes, redemptionem corporis nostri. Supra vero animadvertimus, non frustra in divinis Libris, ubi de supremo Judicio agitur, tam saepe dici, nos *Revelari*, nos *Manifestari*, quia in solemnibus Judicio illo manifestum fiet, quale fuerit peculiare & occultum Judicium Animarum, per quod aut ad praemium, aut ad poenam deductae antea fuerant. Utique vero & nos expectamus adoptionem filiorum Dei, quam Anima hinc abiens, & nihil amplius reatus luendum habens, apud misericordem Deum consequitur in Caelo. Nihil enim obstat, cur Caelum jam sanguine Christi reclusum non ingrediantur, & non impleantur tot magnifica Dei promissa, qui supra meritum nostrum paratus est ad remunerandos famulos suos sibi fidos. Expectamus etiam Resurrectionem, quia tunc totus homo coronabitur, & Justorum gloria augenda est. Inquit etiam Paulus ad Colossens. III. 4. *Quum Christus apparuerit, vita vestra: tunc & vos apparebitis cum ipso in Gloria.* Haec de adventu postremo Filii Dei, quae nihil ad rem faciunt. Nam uti certum est, tunc minime inchoandam Gloriam Christi, ita nihil impedit, quominus

nus Justorum quoque Gloria fuerit jamdiu ante inchoata. Tunc tam Christus quam Justī apparebunt, ut eorum Gloria coram universo genere hominum, & praecipue coram Improbis, reveletur. Vide Sipientiam Cap. III. & duobus subsequentibus. Petrus praeterea in Epistol. I. Cap. V. 4. ait: *Quum apparuerit princeps pastorum, percipietis immarcescibilem Gloriam Coronam.* At ipse apparebit etiam ad mortem singulorum Fidelium. Praeterea idem Petrus paullo antea scripserat, se *participem futuram Gloriam, quae in futuro Revelanda est*, idest in postremo Christi Adventu, ac propterea non tunc exordium habiturae, sed confirmandae in conspectu totius humani generis. Producit etiam a Burneto Apostolus secunda ad Timoth. I. 12. *Scio, cui credidi, & certus sum, quia potens est depositum meum servare in illum diem justus Judex.* Depositū voce Animam significari putat Burnetus; sed dissimulat, quot interpretationibus obnoxium sit vocabulum *παράθεμα*, sive *Depositum*, tum apud veteres, tum apud recentiores. Eoque magis, quia pone sequuntur haec alia: *Bonum Depositum custodi.* Vide Svicerum in Thesauro Ecclesiastico, atque Estium in Comment. ad Sacram Scripturam. Addit ibidem Paulus Cap. IV. 6. *Ego enim jam delibor, & tempus Resolutionis meae instat. Bonum certamen certavi, cursum consummavi, fidem servavi. In reliquo reposita mihi est Corona justitiae, quam reddet mihi Dominus in illa Die justus Judex.* De Corona in postremo tantum Judicio speranda heic agi Burnetus censet. Nos vero longe acquius contendimus, significari heic ab Apostolo Coronam, statim post mortem reddendam. Nam *illa Dies* refertur ad *Resolutionem*, idest ad separationem Animae a Corpore. Habes heic *Diem Resolutionis*, quam subsequitur Corona Justitiae. Alibi habes *Diem Dissolutionis*, quam statim sequitur *Esse Cum Christo*: uti & *peregrinari a Corpore*, sive *Mori*, cujus peregrinationis finem illico excipit *Praesentes Esse Ad Dominum*. Quid igitur ultra de mente Apostoli dubitandum est? Et potissimum quia vitam ille suam e publicis ludis sive certaminibus antiquorum metitur, in quibus notissimum erat, victori sine mora delatam fuisse Coronam atque Bravium, non vero post aliquot annorum millia, uti vellet Burnetus. Propterea incassum ille subsequenter ejusdem Pauli verba laudat: *Liberavit me Dominus ab omni opere malo, & salvum faciet in Regnum suum Caeleste.* Ista rectius nobis, immo nobis tantum, militant; atque in evidentiam nostri dogmatis transeunt, si cum iis jungantur Apostoli ejusdem verba, *cupientis dissolvi, & esse cum Christo*, quae toties

mc.

memoravimus. Locum quoque Pauli secunda ad Thessalonicens. I. 7. innuit Burnetus, ubi ait: *Et vobis, qui tribulamini, Requiem nobiscum in Revelatione Domini Jesu, de Caelo cum Angelis virtutibus ejus &c. quum venerit glorificari in Sanctis suis &c.* At respondeat Burnetus Hammondo & aliis, qui locum hunc, aliaque similia de vindicta & retributione propediem facienda, pertinere censent ad excidium Regni Judaici, quod Dominus Matth. XXIV. & alibi jam imminere praenuntiavit, quamquam tam horrendae Tragodiae diem occultum semper voluerit Apostolis suis. Proinde Hammondo idem haec alia Christi verba Matth. XVI. 27. *Filius enim hominis venturus est in gloria Patris sui cum Angelis suis; & tunc reddet unicuique juxta opera sua. Amen dico vobis, sunt quidam de his stantibus, qui non gustabunt mortem, donec videant Filium hominis venientem in Regno suo:* ad ipsam desolationem Hierosolymae refert, quae sane peracta fuit, viventibus adhuc nonnullis ex Apostolis & discipulis Domini. Atque id accurate animadvertendum. Neque enim semper de supremo Mundi totius Judicio loquitur venturi praeficius Salvator, sed etiam aliquando de peculiari illo Judaicae gentis Judicio, in quo *redditurus erat unicuique juxta opera sua*, ut intelligamus, cur Paulus atque alii Apostoli persuasum haberent fieri potuisse, ut everio Hierosolymae, vel dum ipsi viverent, complenda foret. Et tunc quidem bonis ac tribulatis pro Christo, *Requiem* nuper vidimus Secunda ad Thessalonicens. I. 7. promissam. Nam si iis, ad quos Epistola haec scripta fuit, expectanda fuisset *Requies* in fine Mundi, non consolationem, sed desperationem ingessisset Apostolus. Quid vero foret ejusmodi *Requies*, indicatum in eodem loco videas, dicente Paulo: *In exemplum justi Judicii Dei, ut digni habeamini in Regno Dei, pro quo & patimini.*

Pergit Burnetus laudare loca alia Apostoli Prima ad Thessalonicens. IV. 13. & 14. & Prima ad Corinth. XV. 30. ubi, si ei fides, Sanctus Paulus *ita argumentari videtur, ac si tota spes nostra penderet a Resurrectione*. Egregie ille, quum inquit *videtur*: nam revera non inde consequitur, quod ipsius Burneti menti obversatur. Non semel dixi, apud primos Christi Fideles summo in honore fuisse Resurrectionem Corporum, tum quod sperarent credentque, Corpus ipsum, pro digno famulatu praefici Spiritui, remunerandum a Deo; tum quod per Corporum anastasin certa reddebatur Immortalitas Animae. Firmissimum vero Resurrectionis nostrae argumentum desumebant e gloriosa Resurrectione Christi, ac propterea

pterea Resurrectionis Dominicae festus dies prae ceteris erat sacer atque festivus; eaque de causa toties Apostoli mentionem Resurrectionis inculcabant, ne quis Animam in morte perire suspicaretur, aut nimium de dormientibus contristarentur, sicut ceteri, qui spem non habent. Hoc omnium maximum erat Christianae gentis solatium; atque hoc in primis ostendendum & credendum fuit, uti primum ac necessarium principium futurae Vitae. Quod si Anima post resolutionem Corporis debebat: alicubi eam detineri intermedio tempore consequens erat. Ex aliis vero documentis Evangelii & Apostolorum norant Fideles, ipsam e Mundo migrantem in loca ineffabilis gaudii, aut poenarum transferri. Norant etiam, incertam, ignotamque nobis esse sortem nostram in altera Vita: pendere tamen hanc a nobis, prout fideliter cooperamur cum Gratia Dei, aut infideles ab ipsa deficimus, sectaturi legem carnis repugnantem legi mentis nostrae. Quare nihil excuspat Burnetus e crebra Resurrectionis mentione in Apostoli literis ad quaestionem, quam prae manibus habemus. Praeterea Sanctus Paulus ad Romanos VIII. 18. inquit: *Existimo enim, quod non sunt condignae passionibus huius temporis ad futuram Gloriam, quae Revelabitur in nobis.* Haec Burnetus: *Quando vero, ait, revelabitur? statim a morte? minime, sed cum redemptione Corporis nostri:* Utique tunc Revelabitur, sed quae ante praecesserat. Haec enim est vis verbi illius. Et profecto ibi Corinthios solatur Paulus expectatione Gloriam cito consequendae, ad quam nos omnes anhelamus, & intra nos gemimus, adoptionem filiorum Dei expectantes, & sperantes libertatem Gloriam filiorum Dei, quum creatura liberabitur a servitute corruptionis: quod contingit, quoties Proborum Anima liberatur corpore mortis huius. Quos enim, quaeso, animos fecisset Corinthiis Apostolus, si eis dixisset, uti sibi fingit Burnetus: *Si spiritu facta carnis mortificaveritis, vivetis, Deique filii eritis. Si autem filii, & beredes, coheredes autem Christi; sitamen compatimur, ut & conglorificemur?* Atqui scitote expectationem gemitusque nostros, ne post mortem quidem desituros. Sed multa fortassis Annorum Millia expectanda nobis esse, antequam Praemium adveniat: incertum quippe est, quando novissimus rerum humanarum finis aderit. Ergo hilares in agone procedite. Et quis, hisce positis, nos separabit a caritate Christi? an tribulatio? &c. Profecto admissit Corinthiis, non addidisset animos hisce verbis, & hacce doctrina Paulus, qui tamen prorsus alienum ab ejusmodi sententia se prodit, dum ait: *Nam quos praescivit & praedestinavit conformes fieri*

fieri imaginis Filii sui, hos & Iustificavit: quos autem Iustificavit, illos & Glorificavit. Jam Glorificatio in multis Fidelibus praecesserat; aut si de Glorificatione futura loquitur Paulus, adeo vicinam ille inuenerit, ut quasi completa dici posse videatur. Et quum ait, *praedestinavit nos conformes fieri imaginis Filii sui*; si tamen compatimur, ut & glorificemur; immo quum ipse Dominus Luc. XXIV. 26. praedixerit: *Oportuit pati Christum, & ita intrare in Gloriam suam*: quomodo conformes in societate passionum Fideles cum suo capite, tam deformes postea in exitu excogitemus, ut quo Caput ipsum intravit, nemo adhuc post tot Saecula introierit; & passione peracta, absoluteque certamine, nemo haec coronam acceperit, nemo conglorificatus, immo pro Gloria in ignobilem Somni speciem, atque *Inactionem* conjectus fuerit? Ad haec Burnetus pag. 132. in aliam rem producit Sancti Pauli verba ad Colossens. III. 3. *Vita vestra abscondita est cum Christo in Deo. Quum autem Christus, vita nostra, Manifestabitur, tum & vos cum eo Manifestabimini cum ipso in Gloria*. Sed & ista in sententiam nostram recte cadunt. Hoc est, licet vita vestra Spiritalis, qua vitiis mortui estis, & vita Caelestis, ad quam hinc emigrantes evehimini, sit, ac futura sit diu ignota mortalium oculis; quippe abscondita in sinu Dei, ubi Christus est: attramen venit dies, quum Christus vita vestra se Mundo manifestabit in gloria, & tunc gloria vestra atque immensa Felicitas Manifestabitur coram univerforum hominum coetu. Profertur & ab eodem alter Apostoli locus ad Philippens. III. 20. *E Caelo Salvatorem expectamus Dominum nostrum Jesum Christum, qui reformabit corpus humilitatis nostrae* &c. Sed quae praecedunt, addenda erant, nempe: *Multi enim ambulant, quos saepe dicebam vobis (nunc autem & flens dico) inimici Crucis Christi, quorum finis interitus. Nostra autem Conversatio in Caelis est, unde etiam Salvatorem expectamus* &c. In Graeco textu est Πολύμηνα, quod Vulgatus Interpres reddit *Conversatio*: veteres non pauci *Municipatus*. De hoc Municipatu vide infra Cap. XXIX. locum Hieronymi, Sensus ergo est: Abundant inimici Crucis, ventri tantum dediti, terrena tantum quaerentes, quos manet perditio aeterna post mortem. At nos peregrinorum more Caelestia tantum cogitamus; & nunc animo sumus, re autem hinc migrantes, in Caelo, Patria, ac Municipatu nostro erimus; ex quo Caelo praeterea (illud *Etiam* non frustra additum fuit) expectamus Salvatorem nostrum, qui vile Corpus nostrum vita, claritate, atque immortalitate donabit. Non enim, ut alibi idem divinus Scriptor

Oo

ait,

ait, *habemus hanc Civitatem manentem, sed futuram inquirimus.* Et ipse in hac ipsa Epistola antea dixerat, se urgeri desiderio *dis-
soluti & esse cum Christo.* Et in hoc ipso Cap. III. 13. metaphoram de-
sumta e currentibus in stadio, ut Bravium, idest praeium certa-
minis acquirant, ait: *Quae retro sunt obliuiscens, ad ea, quae sunt
priora* (idest Caelestia ante me posita) *extendens me ipsum, ad de-
stinatum persequor* (hoc est scopum semper prae oculis habens se-
stinum) *Bravium supernae vocationis Dei in Christo Jesu.* Heu mise-
rum Paulum, si quis Burneti somniis credit, exclamet! quantum
te tua spes fecerit! jam mille & septingenti anni abiere, & *Brav-
ium* sive Praemium certantibus propositum, ad quod tanto ardo-
re currebas, & quod Victoribus disferri minime consuevit, non-
dum es assequutus! Sed non miser, sed non deceptus, sed sine fine
Beatus post mortem suam Paulus jamdiu in Caelo esse coepit. Bur-
netus quidem sua opinione deceptus. Neminem vero nostrum ab
ejus somniis deceptum iri confido.

Porro laudat Novator iste illum quoque Apostoli locum Secunda
Corinth. IV. 17. *Id enim, quod in praesenti est momentaneum & le-
ve tribulationis nostrae, supra modum in sublimitate aeternum Glo-
riae pondus operatur in nobis:* quasi istud aeternum Gloriam pondus
referendum sit ad Resurrectionis diem. Quod nos negamus, immo
contrarium inde eliciendum dicimus. Nam Apostolus, Fideles ad
recte operandum, intuitu quoque praemii *immensi* atque *aeterni* a
Deo promissi incitans, praecipue urget comparisonem inter breve
tempus laborum hujus vitae, & perpetuo duraturum praemium
vitae alterius. Si aut statim, aut brevi post mortem accipiendum
hoc praemium non credebatur, & ad extremi Judicii diem diffe-
renda erat spes Gloriam: comparationi illi parum aut nihil roboris
fuisset, eamque fortassis increduli risissent. Ut quid, dixissent, sem-
per duraturam Gloriam nobis tanta patientibus inculcas, quum
ne tu quidem noris, quando ea sit inchoanda, & multa fortassis
Annorum Millia supersunt, sine gloria illa, sine praemio ullo
transigenda? Habe tibi tuam Gloriam, quae tam enormi mora
emenda est, suumque caput in tanta incertitudine temporis abscon-
dit. Proinde aequum est credere, ideo spe *aeterni* Praemii anima-
tos fuisse Fideles, quod brevi in illius possessionem immittendos se
scirent: quod revera alibi Apostolus tradit. Exeruit praeterea
idem Scriptor Britannus hanc in rem celeberrima Salvatoris ver-
ba Matth. XXV. 34. in supremo Judicio ad Justos dicenda: *Venite
benedicti Patris mei. Possidete paratum vobis Regnum a constitu-
tione*

tionem Mundi; quibus, ut alibi monui, Millenarii Regni super terram error, quem restituendum visionarius ille Auctor speravit, prorsus confoditur. Ceterum etsi de Regno loqui heic videatur Dominus, quasi tunc inchoanda sit illius possessio, monendus Lector est, nihil textum illum adversari jam inchoatae Justorum Beatitati. In Græco est *Κληρονομήσασθαι*, idest, *titulo proprietario*, sive *mancipii*, *possidete*. In domo quoque terreni Patris sunt filii, atque illius bonis fruuntur, donec tempus adveniat, quo Usus in Proprietatem convertatur. Porro ita evenire de Sanctis, evidenter colligimus ex Apocalypsi Sancti Johannis XX. 4. ubi hæc verba: *Et vidi Animas decollatorum propter testimonium Jesu, & propter verbum Dei, & qui non adoraverunt bestiam, neque imaginem ejus, nec acceperunt characterem ejus in frontibus, aut in manibus suis; & vixerunt, & Regnaverunt cum Christo mille Annis*. Aperitissime vero post illos mille Annos, idest completo tempore Legis Evangelicæ, extremum Judicium adventurum ait Sanctus idem Apostolus, in quo coram impiis omnibus, incredulis & improbis revelabitur Gloria Sanctorum, quibus jamdiu ministratus fuerat *introitus in æternum Regnum Domini nostri & Salvatoris Jesu Christi*, ut utar verbis Sancti Petri in Secunda Epistola I. 11. Quapropter nullum Burnetus, aut quisquam alius, producere locum potuit, neque poterit e penu divinorum Librorum, quo Beatitas Sanctorum negetur, antequam mortui audiant vocem Filii Dei. Contra vero tot nobis documenta suppeditantur ab eisdem sacris voluminibus, ut Beatitudinem istam fateri cogamur jam inchoatam, neque differendam ad diem, fortasse remotissimum, consummationis Saeculi.

CAP. XXVIII.

Egregiis sacrarum Literarum locis confirmata Catholicorum sententia. Simeonis Junioris, cognomento Theologi, nobilis pro illa attestatio. De statu Justorum post mortem nemo detestabilius loquutus, quam Burnetus. Gregorii Magni, Thomæ Aquinatis, Philippi Solitarii, luculenta pro Sanctorum Beatitate testimonia.

CLarissima, ajebam, Scripturae loca præsto sunt nobis, in quibus, nisi oculos claudere velimus, expressam legimus Felicitatem

summam Sanctis, ceterisque nihil reatus luendum habentibus, ineundam sine mora post mortem. Id genus primo sunt, quae ex Apostoli Secunda ad Corinth. V. 6. toties commemorata nobis fuerunt: *Dum sumus in Corpore, peregrinamur a Domino* (idest absumus a praesentia Domini.) *Per fidem enim ambulamus, & non per speciem*, (hoc est credimus quidem & scimus, Dominum vivere, & regnare ad dexteram Dei Patris sui in gloria; sed eum, dum heic sumus, intueri facie ad faciem nequimus.) *Audemus autem, & bonam voluntatem habemus magis peregrinari a corpore, & praesentes esse ad Dominum*. Idest e rebus humanis abire cupimus, ut Anima soluta vinculis huius Corporis evolet ad Dominum, eumque contemplari, ejusque beatissimo adpectu frui libere confestim possit. Haec verba caute, idest subdole, dissimulavit Burnetus. At ea nobis firmissimum atque ineluctabile argumentum praebent, ut certa credatur Romanae Ecclesiae sententia: quippe in iis nemo non videt apertissime promissam Justis perfectis statim a morte, ac sine Corporis contubernio, Gloriam & Visionem Dei. Falli heic non possumus. Idcirco rectissime Sanctus Thomas Aquinas in Opuscul. II. contra Graecos Cap. 9. hisce laudatis aiebat: *Patet ergo, quod Sanctorum Animae, a Corporibus absolutae, ad Caelestem habitationem perveniunt, Deum Videntes*. Non ergo *Sanctarum Animarum differtur Gloria, quae in Dei Visione consistit, usque ad diem Judicii, quo Corpora resument*. Hoc etiam apparet per dictum Apostoli ad Philippens. I. 23. ubi dicit: *Desiderium habens dissolvi, & Esse cum Christo*. Vanum enim hoc desiderium esset, si, Corpore dissoluto, adhuc Paulus cum Christo non esset, quem tamen constat esse in Caelo. Idem est *Esse Cum Christo, & Praesens Esse Ad Dominum*: idem quoque *Praesens Esse Ad Dominum*, ac participem fieri Caelestis Beatitatis. Nam uti praeter alios Sanctos animadvertit Gregorius Magnus Papa Lib. IV. Cap. 25. Dialogorum: *Qui Christum in Caelo esse non dubitat, nec Pauli Animam esse in Caelo negat*. Apostolus ad Philippens. II. 11. ait: *Et omnis lingua confiteatur, quia Dominus Jesus Christus in Gloria est Dei Patris*. Novit-ne, an negat adeo certam veritatem Burnetus? Porro digna nequitiam sunt, quae commemorarentur, excogitata ab ipso ad eludendam Apostoli mentem perspicuam. Nam is revera sibi objecit, sed frustra dissolvere conatus est, illud *Dissolvi, & Esse cum Christo*. Idcirco apud primos Christi Fideles, eorumque successores invaluit formula *Migrare ad Dominum*, quum quis e Justis ex hac vita decederet, hoc est plena vox gaudii, quum certa spes haberetur de illius transitu

ex

ex aerumnis hujus Saeculi in Caelum ad societatem Glorïae cum Christo. Atque heic molestum Lectori non fuerit audire, quid scripserit *Simeon junior*, cognomento *Theologus*, Abbas, seu Presbyter C. Politanus, & Scriptor magno in honore habitus apud Graecos. Lubentius autem Graecos Auctores, dimissis tot Latinis, quos commemorare poteram, ad controversiam istam accerso, quod postremis Saeculis aliquot ex iis declinasse vidimus hac in re a doctrina suorum Majorum. Floruit Simeon, si Caveo & aliis fides, Anno Christi MLI. Clarissimus P. Montfauconius in Bibliotheca Coisliniana pag. 410. eum vixisse tradit tempore *Basili & Constantini Porphyrogenitorum*, hoc est circiter Annum Christi DCCCLXXV. quod tamen aliis accuratius investigandum relinquo. En quid ille adversus Burneti somnia, Jesum alloquens, tamdiu antea retulerit in Lib. divinor. Amor. Cap. II. Tom. 22. Bibliothecae Patrum. *Male conjectant*, ait, *male sapiunt*, qui se non tecum, verumtamen in Requie, futuros autumant: qui locum quemdam (o dementia!) extra Regnum ac Thalamum, a Gehenna & ignis supplicio remotum, nec eum lucidum, ac tenebris vacantem constituunt: in quem infelices illi devenire desiderant; non egere se Aeterna Tua Gloria, aut Caelorum Regno, sed in Requie fore arbitranter. Proh istorum caliginem! prob ignorantiam! prob miseriam & spes inanes. Nusquam hoc scriptum exstat: nusquam hoc erit. Verum in lumine Felicitatum, qui sancta & divina gesserint; in tenebris autem Poenarum erunt, qui iniquitatis operarii fuerunt. Qui ergo illic post mortem esse concupiscunt, multis lacrymis & lamentis digni sunt; quoniam ut jumenta rationis expertia, penitus nihil sapiunt, sibi tempestem imprecantur, se ipsos seducunt. Hisce titulis ornatum vides a Simeone Burnetum. Pergit ille dicens: Tu Regnum Caelorum, Christe, tu terra mitium, tu virens Paradisus, tu Thalamus divinus & ineffabilis. Tu mensa communis omnium, tu cujusque Sanctorum lucerna inextincta. Tuae tunica, & Corona, & Coronarum distributor. Tu Gaudium & Requies, tu Gloria & deliciae &c. Si igitur non videntes lumen tuum, nec ab te visi & separati, Visione tua, omnia bona tua complectente, privantur: ubinam Requiem, ubi locum dolore vacuum invenient? Etenim recti habitabunt cum Vultu tuo. Non poterat efficacius exhibilari Burnetana opinio, simulque ostendi, quantum Felicitatis eos maneat, qui post obitum migrant ad Dominum, atque evehuntur ad beatam illius praesentiam in Caelos. Atque haec eadem fuerat San-

Sancti Augustini sententia, qui Tractat. LI. in Johann. Evangel. illa verba: *Si quis mihi ministrat, me sequatur*, in hunc modum interpretatur: *Quid est: Me sequatur, nisi me imitetur? At quo fructu? qua mercede? quo Praemio? Et ubi sum, inquit, ego, illic & minister meus erit. Gratis ametur, ut operis, quo ministratur illi, pretium sit Esse Cum illo. Ubi enim bene erit sine illo? aut quando esse poterit cum illo? Audi evidentiur. Si quis mihi ministraverit, honorificabit eum Pater meus. Quo honore, nisi ut sit cum Filio ejus? Et quem majorem Honorem accipere poterit adoptatus (idest fidelis Christi imitator) quam ut sit, ubi est Unicus; non aequalis factus divinitati, sed consociatus Aeternitati? Sic ministrantem Christo honorificabit Pater ejus, Honore illo Magno, Ut Sit Cum Filio Ejus, nec umquam deficiat Felicitas ejus. Habes, quid sit Esse Cum Christo. Quod quum divinus Apostolus & Patres concedendum Justis assleverent, mox ut Anima e Corpore dissolvitur: quis nisi incredulus contraria opinari, nobisque persuadere audeat?*

Secundo, multa Apocalypseos loca attulimus, eo collineantia, ut certos nos faciant Beatitatis Animabus Sanctorum, & praesertim Martyrum jam conlatae in Caelis. Qui sincere verborum illorum vim perpendat, nullus dubito, quin cito deprehendat, quantum absit a veritate Burneti sententia. Tertio, communis sententia Patrum fuit, *Requiem* appellari ab Apostolo in Epistola ad Hebraeos Cap. IV. Beatitudinem a Christo nobis procuratam & promissam in Regno Caelorum. Quamobrem tam saepe Patres ea voce sunt usi, & adhuc Ecclesia utitur, ut significet ineffabile illud *Praemium Justorum*. Hoc idem elucet ex Apocalypsi XIV. 13. *Beati Mortui, qui in Domino moriuntur. Amodo jam dicit Spiritus, ut Requiescant a laboribus suis*. At in hanc ipsam beatam Requiem multos e Christianis jam ingressos testatur Apostolus, dum ait Heb. IV. 10. *Qui enim ingressus est in Requiem ejus*. Sed & idem in eadem Epistola Cap. XII. 22. confirmatum vidimus, ubi Sanctus Paulus memorat *Civitatem Dei viventis, Hierusalem Caelestem, & multorum milium Angelorum frequentiam, & Ecclesiam primitivorum, qui conscripti sunt in Caelis, & Judicem omnium Deum, & spiritus Justorum perfectorum*. Communis Patrum sententia est, describi haec a divino Apostolo potissimum Ecclesiam triumphantem in Caelis, in quam ille agnoscit jam invectos *Spiritus Justorum perfectorum*. Consentiunt & praestantiores postremi aevi Interpretes, tum quod vox Graeca, *ὑπάρχουσα*, *Spiritus*,

tur; Animas designare consuevit a Corpore separatas; tum quod *Tetraduigma*, *Perfecta*, hoc est Spiritus *perfecti*, sive consummati, nonnisi dicuntur Animae, quae jam attingere metam, deductae ad illum Beatitudinis statum, qui Justos manet in altera Vita, uti in Graecorum potissimum Liturgiis dicitur. Quarto, vidimus Latronis poenitentis Animam evectam a Christo in *Paradisum*; Animam quoque Lazari pauperis ab Angelis portatam in *Sinum Abrabae*; Divitis vero immisericordis in *Infernum*, in *flammas*, in *tormenta*. Atque heic dicere liceat, neminem detestabilius de statu Justorum post mortem loquutum fuisse, quam Burnetus. Is in ignotum locum eorum Animas detrudit, ubi velut semisopitae quiescunt, in otio & *inactione* jacentes, atque expectantes Resurrectionem Corporum: quem statum ubi serio perpendas, ingentem infelicitatem appelles, Spe videlicet & expectatione per tot Saecula fatigatis iis Spiritibus, & majori etiam in ventura Saecula moerore fatigandis. At qui Millenarii Regni errore, quem restituere vellet Burnetus, olim tenebantur, saltem Animas Justorum arbitratu sunt in locum meliorem, quam terrena habitatio, aut saltem in Paradisum terrestrem interea transferendas, sedem nempe admirandae Felicitatis, uti divini Libri, & Sancti Patres concorditer suffragio testantur. Sanctum Irenaeum audi, quem Chiliastarum paene antesignanum novimus, & Burnetus pro se laudat, haec Lib. V. Cap. V. contra Haereses de terrestri Paradiso scribentem: *Dicunt Presbyteri, qui sunt Apostolorum discipuli, eos qui translati sunt, illuc translator esse (Justis enim hominibus, & Spiritum habentibus, praeparatus est Paradisus, in quem & Paulus Apostolus asportatus audivit sermones inenarrabiles, quantum ad nos in praesenti) & ibi manere eos, qui translati sunt, usque ad consummationem, coaespicientes incorruptelam.* Neque aliter Tertullianus, alter Millenarii somnii praedicator, Burneto carus, in Apolog. Cap. 47. *Ridemur*, ait, *si Paradisum nominemus locum DIVINAE AMOENITATIS, recipiendis Sanctorum spiritibus destinatum, maceria quadam igneae illius Zonae a notitia Orbis segregatum.* Tum animadvertit, ab Ethnicis quoque *campos Elysios* admitti, ac propterea Ethnicos hisce alloquitur: *Unde haec, oro vos, Philosophis aut Poetis tam consimilia? Nonnisi de nostris sacramentis.* Nos quum de *Paradiso voluptatis*, quo primus parens e divino munere fruebatur, Patres loquentes audimus, locum deliciis mirum in modum referendum agnoscimus, ac tanta felicitatem Adamo innocenti invidemus.

mus. En vero Burnetum, qui ne istum quidem Paradisum adeundum reliquit Animabus Justorum: sed eas in incognitum locum conjecit, ibi futuras immenso temporis spatio, cujus finem nemo novit, ibique ad instar glirium quadam veluti specie somni correptas. Heu nugatorem, & Christianae spei inimicum! Parum abest, quin exclamem, collineare ejus consilia ad augendas in patria sua Incredulorum acies. Ceterum nos pluribus jam palam fecimus, plerosque Sanctorum Patrum censuisse, nihil aliud *Paradisum* nomine significatum a Christo fuisse nisi locum ineffabilis Felicitatis in Caelo, ubi etiam Sanctus Paulus arcana verba audivit. *Stude*, aiebat etiam Macarius Alexandrinus circiter Annum Christi CCCLXXIII. Homil. XXV. *ingredi in Sanctam Civitatem, in Hierusalem, bello non infestam & Supernam, ubi etiam Paradisus*. Terrestris Paradisus Corporibus delicias parabat. At Christus Animae Latronis, non Corpori, illa die delicias pollicitus fuit. Neque amplius in Terra reperitur Paradisus ille.

Quinto, iidem Patres arbitrati sunt, per *Sinum Abrahae* designari Regnum Caelorum. Atque ubi mentem Domini diligenter explores, dum haec tradit in Evangelio, vix aliud concipere possis. Quare non sine indignatione excipienda venit Burneti temeritas, qui Justorum Animas ergastulo carnis solutas in tam abjectam ac miseram conditionem dejecit, eamque duraturam per immensam fortassis Annorum seriem, ut horrorem potius, quam solatium, probis Dei amatoribus injiciat. Vel pauci illi inter veteres, qui *Paradisum*, aut *Sinum Abrahae* sumserunt pro loco diverso a Regno Caelorum, nihilominus credidere, Animas Justorum ibi collocatas invidendis bonis frui. Hoc ipsum a *Paradisum* nomine certo edificimus: eo quippe vel ipsi Ethnici Hortum delictis plenum significabant, sacrae vero Literae locum mirae Felicitatis. Quinam ergo malus genius Burnetum invasisit, ut ne *Paradisum* quidem vestigium Justis concedendum censuerit, contra expressam divini nostri Praeceptoris vocem? Quei *Sinum* illum *Abrahae* veluti pro nihilo habuit, atque Angelos, per quos Justorum Spiritus illuc deducuntur, ne ictu quidem oculi dignatus est? At Chrysostomus Oratione in Quadraginta Martyres scripsit: *Anima Justa, quando hinc excefferit, Angelorum manibus deferretur, qui eam sistunt in Regia Urbe, quae est Caelestis Hierusalem*. Quicumque sapit, majorem certe, quam visionario huic homini, fidem exhibebit tot eximiis Patribus, Scriptorisque ex antiquitate venerandis, qui de *Paradiso*, & *Sinu Abrahae* aliter judica-

judicarunt. Patribus, qui Paradisum idem cum Regno statuerunt, adde etiam Johannem Jejunatorem Patriarcham C. Politanum, haec scribentem circiter Annum Christi DLXXXV. in Oration. de Virginitate: *Latro in momento salvatus est, quum creditisset, & incorruptibile Regni thesaurum lucratus est.* Sed quod etiam minus in Burneto ferendum est, contendit ille, Iniquorum Animas in Inferorum poenas ac supplicia sibi destinata tum solum rapiendas, quum omnium Corpora resurgent. At Christus ille Dominus, ex cujus auctoritate Christianus quisque pendet, disertissime nos docet, Divitem nequam, mox ut hinc abscessit, collocatum fuisse *ἐν τῷ ᾄδῃ, ἐν βαράνοῖς, ἐν τῇ φλόγι, in Inferno, in Tormentis, in Flamma:* atque ita de ea re (sive historia, sive parabola sit) loquitur, ut agnoscamus Divitis illius supplicia inchoata ante Resurrectionem Carnis, quum fratres ejus adhuc super terra viventes ac epulantes exhibeat. Num discipulus supra Magistrum? Immo Christi contemtor atque haereticus, qui contra minime obscura illius dicta temere insurgit. Praeterea quum ex Evangelio, & communi Patrum sententia, Improborum Animae minime consortium Carnis expectent, ut in Inferno Igne torquantur, hoc unum satis est ad proendum, Proborum quoque Animas, non expectata Resurrectione, beari in Caelis. Quis enim mentis compos, & divinae naturae attributa, quantum heic licet, contemplans, persuadere sibi possit, Deum optimum, atque infinite misericordem, exigere statim post mortem Poenas a peccatoribus, Praemio autem donare nolle Justos; immo iis, qui pro se certarunt, & pugnam viriliter confecerunt, Coronam differre ad tantas annorum myriades? *Fidelis est Deus;* caris suis magnifica pollicitus est: *non tardat promissionem suam,* uti Sanctus Petrus Secunda Epistol. III. 9. jam nos monuit. *Justus etiam est Deus, & Justitias dilexit.* Si talem se praebet, puniendo sine cunctatione Malos post mortem: cur ralem se non exhibeat, praemia quoque Bonis largiendo? Saepe vero Dominus Apostolis, atque Apostoli suis discipulis (quod supra ostendimus) remunerationem *prope esse, ac cito deferendam* praenuntiaverunt. At nunc crumpit, qui Christum, ejusque Apostolos aut falsi, aut erroris arguit, nimirum contendens, carere Justos, & vel ipsos Apostolos, a mille & septingentis Annis Praemio; atque insuper non fraudatam solum hactenus eorum spem, sed & ulterius fraudandam, donec erit genus humanum in terris; quod fortasse nonnisi post multa annorum millia propagari desinet. Quis haec ferat in Scriptore, qui se Christianum dicat?

P p

Sexto

Sexto, adduximus verba divini Magistri Johann. XIV. 2. qui proximus morti haec ad Apostolos turbatos & moestos, solatii causa, loquebatur: *Vado parare vobis Locum, & quidem in D. m. Patris mei*, idest in Caelesti Regia, in Paradisi Gloria (nam *Gloria & Divitiae in D. mo Ejus*), ubi *mansiones multae sunt. Et si aliter, & praeparavero vobis Locum, iterum venio, & accipiam vos ad me ipsum, Ut Ubi Sum Ego, & Vos Sitis*. Discipulorum turbatio inde nascebatur, quod amantissimum Dominum a se abiturum audissent, seque ab optatissima illius praesentia divellendos nossent. *Non turbetur cor vestrum*, ait ad eos Dominus. Praecedo ego, ad Patrem meum iturus: in ejus beatissima domo Mansionem vobis parabo: adveniente vero morte vestra rursus veniam ad vos, ut Animas vestras recipiam, mecumque adducam in paratam vobis Beatitudinis Mansionem, ubi ero & ego: mea quippe voluntas est, ut vos sitis semper, ubi ego quoque ero. Quem in locum ascenderit Dominus quadraginta diebus post Resurrectionem suam, nemo Christianorum ignorat. Ibi nihil illum impedit, quin pararet Mansionem Dilectis suis: nihil, quin illos acceperit ad se ipsum; atque ille tam amanter sponderat id, quod facile complere poterat, ac fideliter volebat. Quoi nunc audeat Burnetus persuadere Lectori Christiano, nondum in paratam Mansionem ingressos fuisse Apostolos, eosque post tot Saeculorum decursum arceri adhuc a Praesentia & Specie Domini, neque ibi eos esse, ubi ille est? Judicet prudens Lector. Ne, quaeso, nobis obtrudat Burnetus, Jesum Christum aut illusorem, aut impotentem ad praestanda, quae promisit. Supra vero ostendimus, unum quidem restare *Adventum Domini* gloriosum, totique generi humano spectandum; at plures alios occultos, nobisque ignotos *Adventus* illius esse admittendos: scilicet in morte nostra, ut iudicium instituat peculiare singulorum hominum. Audi heic Apostolum Prima ad Timoth. VI. 13. *Praecipio tibi*, inquit, *coram Deo &c. ut serves mandatum sine macula, irreprehensibile, usque in Adventum Domini nostri Jesu Christi*. Miror esse Interpretes, qui heic agi putent de postremo Adventu Domini, universum Orbem iudicaturi, quasi Timotheus victurus esset usque ad finem Mundi, ac tanto tempore servaturus mandata Dei. Sed haec illi parum consentaneae excogitarunt, quod nullum alium Christi Adventum post ejus Ascensionem in Caelum agnoscerent, nisi ad supremum Iudicium: quum tamen Dominus se ad Hierosolymae, Regnique Judaici horrendum excidium adventurum se praedixerit, occultum
ta men

tamen iudicium de Justis. & injustis Judaeis tunc habiturus: quo tempore adhuc in vita versari Timotheus potuisset. Praeterea ad mortem quoque singulorum Fidelium adventurum Dominum, alibi animadvertimus; & de hoc ipso Adventu omnino credendus est heic loqui Apostolus. Neque quod in sacris Literis *Dies Domini* non semel occurrat, e vestigio accipiendum id semper est de solempni ac terribili die extremi Iudicii: nam & *Dies Domini*, hoc est *Dies Iudicii*, interdum indicat obitus nostri diem, quo occultum Iudicium a Domino peragitur de probis ac improbis. Hoc alibi ostendimus; atque in hoc sensu sumenda sunt praelaudati Apostoli verba, dum scribit ad Philippenf. I. 6. *Confidens hoc ipsum, quia qui coepit in vobis opus bonum, perficiet usque in Diem Christi Jesu*. Et infra: *Ut probetis potiora, ut sitis sinceri, & sine offensa in Diem Christi*. Et ad Corinth. I. 1. *Qui & confirmabit vos in finem sine crimine, in Die Adventus Domini nostri Jesu Christi*. Qui nihil aliud in mente habent, nisi extremum Christi Adventum, hisce locis parum congruum affingunt sensum. Germana interpretatio est: qui per gratiam suam coepit in vobis opus bonum, idem in vobis perficiet illud usque ad mortem vestram, ad quam aderit Christus ipse Dominus, vos remuneraturus. Non enim Corinthii aut Philippenfes illi perduraturi erant usque ad excidium Mundi; neque de eorum successoribus id praedictum fuerat; neque perficiendum erat in aliis, quod in iis, ad quos scribit Paulus, Dominus bene coeperat. In hunc eundem sensum explicanda omnino videntur, quae idem Apostolus Gentium Secunda ad Timoth. I. 18. ait de Onesiphoro de se bene merito: *Det illi Dominus invenire misericordiam a Domino in illa Die*: Id est, quum e viris excessurus erit. Nam Iudicii supremi terribilis Adventus, dies erit Iustitiae, non vero Misericordiae. Atque heic digna forent, quae integra referrentur Sancti Gregorii Magni verba, Homil. XIII. in Evangelia; ubi occulta haec Christi Iudicia ad singulorum Fidelium mortem coformat verbis ipsius divini Salvatoris Luc. XII. 37. *Beati servi illi, quos, quum venerit Dominus, invenerit vigilantes: Amen dico vobis, quod praeinjet se, & faciet illos discumbere, & transiens ministrabit illis*. Haec de hora mortis nostrae, ac Iudicio tunc de nobis clam instituendo sunt dicta. Dominus autem, ut inquit beatissimus ille Pontifex, *Iustos faciet discumbere, id est in AETERNA QUIETE Refoveri. Discumbere quippe nostram, IN REGNO QUIESCERE est*. Et sane laudata Domini verba

apud Sanctum Lucam in hanc sententiam mirifice nos compellunt, ac praecepit si considerentur, quae praecedunt. Inquit enim unigenitus Dei Filius ad Apostolos: *Sint lumbi vestri praecincti, & vos similes hominibus expectantibus Dominum suum, quando revertatur a nuptiis, ut, quum venerit & pulsaverit, confestim aperiant illi.* Non loquitur Dominus de iis tantummodo, qui in vivis erunt, quum ipse judicaturus omnes in fine Mundi adveniet: loquitur ad Apostolos ac Discipulos, quorum vita in terris ad supremum Mundi diem minime reservanda erat; eosque omnes monet, ut parati sint ad excipiendum Dominum, quandocumque venerit. Pari sensu Cap. XXIV. Matth. Dominus ait: *Et Vos esote parati, quia quia nescitis hora, Filius hominis veniet.* Ergo de singulorum morte agit, ad quam tam illos quam ceteros Fideles paratos in sanctitate vitae & expurgata conscientia invenire cupit: quippe tunc adventurus ipse est ad secretum Judicium de ipsorum operibus instituendum. Quamobrem non una *Dies Domini* excogitanda. Atque hoc etiam animadvertit magnus & sanctus vir Thomas Aquinas in Opuscul. II. contra Graecos Cap. IX. hisce verbis: *Attendendum est, quod sicut Dies Judicii dicitur Dies Domini; quia est Dies Adventus ejus ad Judicium universale totius Mundi: ita Dies mortis cujuscumque, dicitur Dies Domini; quia ad unumquemque in morte venire dicitur Christus remuneraturus, vel condemnaturus.* Unde quantum ad remunerationem Bonorum, dicit ad Discipulos, *Jobann. XIV. 3. Si abiero, & praeparavero vobis Locum, iterum Veniam, & accipiam vos ad me ipsum, ut ubi sum ego, & vos sitis.*

Septimo, ad idem nobis persuadendum confluere possunt alia illa verba Salvatoris Luc. XVI. 9. *Facite vobis amicos de mammona iniquitatis; ut, quum defeceritis, recipiant vos in Aeterna Tabernacula.* Theophylacto & Euthymio testibus, nihil aliud heic est *ὅταν κληθῆτε, quum defeceritis*, nisi, quum vos vita praesens deficiet, sive quum moriemini. Gravior quoque animadvertit, a Platone *κλήματα* appellari Mortuos: quod & interdum LXX. Interpretes fecerunt. Hoc idem & alii sentiunt. Contra si quis haec aliter interpretatus fuit, non satis diligenter expendisse mihi creditur vim vocum atque contextus. Nam *recipiant vos in Aeterna Tabernacula* dicitur de Animabus separatis a Corpore in Caelum recipiendis, atque adeo necesse est, ut *quum defeceritis*, separationem istam, sive Mortem significet. Nemo vero est, qui non agnoscat per
Taber-

Tabernacula illa *Aeterna* designari Regnum Caelorum, sive Beatitudinis locum aeternum, quem Paulus Secunda ad Corinth. V. 1. appellavit *Domum non manufactam, Aeternam in Caelis*. Tabernaculum caducum, quale peregrinorum est, dicitur Corpus nostrum, aut terra, quam incolimus. Verum *Aeterna Tabernacula* sunt habitatio nostra in Caelis, cui numquam finis erit; & quandoquidem *Aeterna* sunt, neque adveniente Domino in fine Mundi, inde facienda erit transmigratio. Ex his ergo verbis perspicue pariter deduci videas sententiam Catholicae Ecclesiae, pro qua hucusque propugnativimus. Non dicit Jesus, Justos eleemosynis faciendis deditos, in Vitam Aeternam recipiendos, quum resurgent mortui, quum consummatio Saeculi adveniet. Dicit, beatam hanc sortem eis paratam atque ineundam, quum ex hac vita emigrabunt. Non moram aliquot millium Annorum interferit (quod Burnetus perperam fecit): sed quo tempore hinc abibunt, tunc in beata illa Tabernacula ingressum eis futurum promittit. Luculentius insuper hoc indicant verba illa, *ut recipiant vos*. A quo enim in Caelum recipiendi sunt, quum vita funguntur, qui fecerunt sibi amicos de mammona iniquitatis? Ab hisce ipsis Amicis, Justis videlicet Pauperibus, in Caelum antea receptis, quia preces suas, atque Eleemosynae meritum ante Deum statuentes, Eleemosynariis quoque vitam aeternam ac sedem in Caelis aeternam impetrabunt; ita ut haec minime referri possint ad Resurrectionis tempora, sed respiciant praesens Ecclesiae militantis aevum: Adhuc tamen, & unum animadvertas velim. Postquam Dominus avaros ad Eleemosynam oratione illa sollicitavit, paucis interjectis, eodem Cap. XVI. 19. historiam sive parabolam profert Divitis a misericordia aversi, & Lazari ulcerosi atque patientis, quem *in Sinum Abrabae* deductum ab Angelis exhibet. Ejusmodi nempe exemplo, quae antea depraedicaverat, evidentius confirmat. Si ergo quaeris, quid sit *Sinus Abrabae*, quo evectus est felix ille Pauper, jam tenes. Idem est atque *Tabernacula Aeterna*, in quae Pauperes spiritu recipiendos antea dixerat divinus Praeceptor, recepturos postea illuc & eos, qui amore Pauperum in hac Vita dignos se praestiterint eorum consortio. Vide, quomodo cuncta consonent; ut tandem statuamus, nomine *Sinus Abrabae* unam Caelestem Beatitudinem innui a Domino, qui & alibi Felicitatem immensam ejus loci expressit sub nomine Convivii, in quo *Justi Recumbent cum Abraham, & Isaac, & Jacob*.

Audi

Audi propterea Sanctum Augustinum, qui, postquam exemplum Lazari & Divitis eloquenter in Sermone XLI. illustravit, tandem haec subdit: *Facite vobis amicos de mammona iniquitatis, ut & ipsi recipiant vos in Aeterna Tabernacula. Sunt hec Pauperes, non habentes tabernacula, ubi nos recipiant. Facite eos amicos de mammona iniquitatis. Nolite contemnere Pauperes non habentes quo redeant, quo intrent. Habent quo intrent. Habent Tabernacula. Habent & Aeterna. Habent quo frustra recipi optabitis, sicut Dives ille, si non eos nunc in vestra receperitis.* En quid Augustino Tabernacula Aeterna fuerint: ille nempe Sinus, in quo a Divite miserrimo spectatus est pauper Lazarus, recumbens & fruens bonis Domus Dei in Sinu Abraham, idest apud Abraham. Augustino adjunctum heic volo recentioris aevi Scriptorem Graecum, ut evidentiùs in dies intelligat Lector, quam foede Majorum suorum fidem deseruerint pauci illi Graeculi Latinorum hostes, de quibus alibi facta est mentio. Is est Philippus Solitarius, Monachus Graecus, qui circiter Annum Christi MXCV. aut MCV. Dioptram; hoc est Amussim Fidei & Vitae Christianae ad Callinicum Monachum scripsit, a Jacobo Pontano Latine redditam. Ibi Lib. II. Cap. 9. quaerit, quemnam in locum proficiscantur Justorum Animae post discessum ex hac luce; atque ita respondet: *Scripturae docent, excelsum esse locum, in quo Animae Justorum Requiescant. Hic autem Locus diversis nominibus appellatur: nempe: Regio Viventium; Terra Mitium; Tabernaculum a Deo factum; Civitas altissima; Torrens odoratissimus, Sonitus festum celebrantium: Et haec quidem ex Epistolis Pauli ad Corinthios & Philippenses constant. Dissoluto incolata tabernaculi hujus, Domum altam in superis habemus, ejus aedificator Dominus, ejus opifex Deus: Solum vigila Corporibus. Constante Credimus, Abductum Nos Ibi Ad Dominum, quietum esse praestat. Quare & amabilem illam vocem emittit: Cupto dissolvi, & hinc absolvi, ut cum Christo vivam, quicum esse desidero. Infra sententiam suam dictis Sanctorum Patrum confirmat, inquit: Justorum Animae in manu Dei sunt. Johannes autem Damascenus vir sapientissimus, vere ipse gratta, quod nomen ejus sonat: Animae quidem habetis & inquit in Hymnis Martyrum in Civitate Caelesti, in qua Habitantes Cum Domino Vivitis, pro quo & occubistis. Et plurimos aliorum vestre & majores inter Sanctos, dictis meis adstipulantes producam vobis: Gregorium Basilium, Summum Magistrum, Gregorium Nyssenum, Andream Cretensem, & illud aureum divinumque Os (Johannem Chrysostomum)*

num) omnes simul concorditer, & unanimi consensu, omnium Sanctorum Animas in Caelo Esse, confirmantes. Oportet enim Mundum supernum impleri omnimodis (ut magna illa & vigil mens Gregorius scribit): e quo delapsus Satan, ut fulgur de Caelo cum Angelis suis, Domino teste, projectus fuit. Haec Philippus ille Graecus, qui & infra Lib. IV. Cap. 16. quaerit, quando jam Animae Sanctorum cum Christo sedente ad dexteram Patris sunt in Caelis, quid aliud majus in retributionem pro laboribus accipere possint in secundo Christi Adventu; nam quod plenum est, inquit, externa accessione non indiget. Itaque respondet, gaudium & gloriam Sanctorum, resumta Carne, uberius auctum iri. In Caelis quidem perfecte habitant, Creatorique Adstantes, Eum Contemplantur, & Gaudent. Sed quum tandem Corpus quoque in Resurrectione illa omnium communi receperint, tunc etiam gratiae gloriam, & laborum Praemia Plenissima, Coronasque adipiscentur. Denique Philippus subsequenti Cap. 17. ostendit, in Paradisum, non terrestrem, sed Caelestem, post Resurrectionem Domini introire Justorum Animas. Hic est, inquit, Paradisus, in quem raptus est Paulus, in quem Gregorius, & magnus cum aliis ingressus est Basilius, in infinita & divina & aeterna Bona illa, quae oculus non vidit &c. Parcat Lector, si rursus huc advoco Scriptores Graecos; nimium quippe nostra interest nosse, quatenam fuerit per tot Saecula concors hac in re Ecclesiae Graecae sententia cum Latina, ut si quando Graeculum quempiam offendas, qui postremis hinc temporibus aliter sentire videatur, dignoscas, pugnare ipsum non solum contra Latinos, in antiqua semperque tradita doctrina constantes, sed etiam contra suam ipsius Ecclesiam, cum Latina retroactis Saeculis unanimi consensu concordem.



CAP. XXIX.

*Abominandae calumniae, quibus Ecclesiam Romanam Burnetus
onerat, quasi haec Lucii causa postremis hisce temporibus sen-
tentiam invexerit de Beatitudine Sanctorum. Nihil illa ba-
bet, nisi quod priorum Saeculorum Ecclesia professa fuit.
Olympiadori, Asterii Amaseni, Nili Monachi testimonia
adduntur. Sanctorum quoque Invocatio firmata au-
thoritate Origenis, Sancti Cypriani (cujus verba
Johannes Fellus perversè interpretatur) ac San-
cti Hieronymi. Burneti ineptiae, negantis
Animabus Corpore solutis omnem do-
loris & gaudii motum.*

PRaefer delibata e sacris Literis loca, aliquot etiam, ut vidi-
mus, ex antiquis Patribus, Scriptorisve Ecclesiasticis Burne-
tus produxit, veluti suae sententiae testes idoneos. Injuste non
acturum, neque molestiam Lectori creaturum me spero, si centies
meminero, nimium desiderari bonam fidem in homine illo. Erat
Scriptoris veritatis amore flagrantis, qualem se is profitetur, non
hosce tantum paucos oculis Lectorum objicere, sed & alios sine
comparatione longe plures, opinioni suae adversantes adferre in me-
dium, ut in conspectu positis omnium placitis, cuique foret in prom-
tu id seligere, quod veritati propius agnosceretur. Profecto non
sine dolo malo praetermissa a Burneto, celataque videantur, quae
consilio suo obesse posse is bene noverat, persuasumque habebat,
non conquirenda a Lectoribus ineruditis, apud quos ille sua dum-
taxat commendata volebat. Verum obviam itum hucusque fuit il-
lius artibus, ac duo jam tandem, ni fallor, ostendimus. Primum
est, si Lactantium excipias, quem numquam pro Christianae or-
thodoxae doctrinae interprete fido Ecclesia accepit, reliquos Patres
a Burneto pro se laudatos, adversus illum re ipsa pugnare. Alte-
rum est, ex omni antiquitate, atque a primis Ecclesiae Saeculis
usque ad Concilium Florentinum, convenire omnes ferme Patres
in eandem Florentini Concilii sententiam, ita ut non solum divi-
narum Literarum suffragio, sed continuata omnium Saeculorum
Traditione nitatur dogma Romanae Ecclesiae de Beatitudine Sancto-
rum. Quamobrem ludum ludit tribulibus suis Burnetus, quum eos
eruditurus, veluti manu ducit ad Sanctorum Patrum scholam, en-
in-

inquiens, hic mecum consentit, en alter mihi adhaeret; suatum interea oculis tot alia paene innumera subducens, quibus opinio sua a fundamentis evertitur. At heic habet Lector, quibus sublesta fidei hominem de facie tandem aliquando noscat. Quamquam circulatorias illas artes non haecenus omnes detexi. Nihil impensius nonnulli apud Britannos curant (atque utinam verum non esset) quam odium Populi fovere atque accendere contra Romanam Ecclesiam, ne Schismati, quod sine lacrymis meminisse nequimus, ulus umquam sit in posterum finis. Quae recta sunt apud nos, coloribus tetris pinguntur: & quod gravius est, calumniis & mendaciis, immo & puerilibus spectaculis minime parcitur, ut quacumque ratione a doctrina, ritibusque antiquae Matris vehementius avertantur animi nimium credulae, nec satis eruditae Plebis. Possem id ego sexcentis exemplis confirmare. At solum peto, an non esset hominum sapientum, & Christi, atque ejus Ecclesiae sponsae amatorum, pacem potius Christiana Caritate quaerere atque suadere, quam bellum; & diligentius investigare, veris-ne an falsis accusationibus discordia continuetur; & meditari intentius, quam teterum malum sit Schisma, quod Sanctus Irenaeus, aliique subsequuti Patres tantopere detestantur; quod quicumque facit, factumve fovet, frustra sperat aeterna gaudia sese consequuturum; & quod profecto non nos a Britannis, sed illi a nobis numquam satis dolendo consilio fecerunt. Conspicatus ergo Burnetus sitam in eo fore potio rem spem enervandae, immo & expungendae penitus, si fieri posset, e Britannorum animis, doctrinae de Beatitate non procrastinata Sanctorum, si persuadere eis posset, confectarium hanc esse alicujus ex dogmatis Romanae Ecclesiae, in Britannia nunc improbatis: ejusmodi cuniculo non semel est usus. Do illius verba.

Nuperis Saeculis, inquit is pag. 48. quis non videt, investum hunc novae Fidei Articulum in Ecclesiam Romanam, consiliis prudentium & politicorum; quo Sanctis invocandis, aliisque id genus institutis commodior ansa praeberetur, ceterisque, quae adhaerent, lucrosi dogmatis patrocinium? Recte notavit Bellarminus, hanc doctrinam Fundamentum esse omnium aliarum, quae ad Sanctos spectant; nempe quae spectant ad Sanctorum cultum, Sanctorum canonizationem, Sanctorum Imagines & Reliquias; denique peregrinationes, & vota iis nuncupata. Vides, quantam catenam, auro & argento gravem, secum trahit hoc dogma: Et si annexas Purgatorium, sive statum Animarum, quae ad Caelum non recta eunt, sed vivorum precibus, & suffragiis Sanctorum, eo serius aut citius evehuntur: habet auri fodinam quavis In-

dia ditiozem. Sed Vae illis, qui cauponantur Verbum Dei, Secunda Corinth. II. 17. Veritus deinde, ne perfunctorie Britanni sapientiores ad tam vividam perorationem aures praebuerint, aut ipsam fuerint obliiti, nova impressione illos rursus aggreditur pag. 74. crambem eandem repetens, & inquiens: Haec meditentur ii, quorum interest: utcumque quoad Reformatos, nihil valet haec auctoritas Romana, Synodorum, aut Pontificum. Nobis integrum est, rem aestimare ex aequo, & ex omnibus suis momentis diligenter expendere, quo propendeat, quo nos ducat Scriptura sacra; quo rei ipsius ratio, quo aetas intemerata Ecclesiae. Nec id tantum ante oculos habere, quod his reclamantibus factum sit, aut definitum nudius tertius in Conventu Florentinae. Dignum utique est hoc caput de Statu Mortuorum, quod excutiat penitus, & de quo contendamus pars utraque. Huic enim superstructa est tota molei Religionis & Pompae Romanae circa Sanctos: de iis canonizandis, ut loquuntur, invocandis, & colendis; nec de iis ipsis tantum, sed etiam eorum Imaginibus & Reliquiis. Hinc pendunt etiam peregrinationes & vota meritorea, & Sanctorum Missae, & novum illud, sed utilissimum, Purgatorii inventum. Quandoquidem idcirco ex hoc filo pendeat tantus apparatus, tantum pondus superstitionum, ex hoc fundamento aut lapide angulari tantum aedificium: nostra plurimum refert nihil temere concedere in hac causa; nec indulgere nimis piis affectibus, sed male fundatis, in re tanti momenti. Ita Burnetus ad suos Britannos, cum Ecclesia Catholica in ista quaestione, ut reor, concordet, aut parum ab ea discordet, quos etiam facile in suam opinionem pertrahendos paullo ante speraverat, quandoquidem, ut is ait, Pontificii (quorum interest maxime, ut Caelo, Gloria, & Visione Dei fruantur ante Resurrectionem) fatentur, Patres generatim ea de re cum ipso Burneto convenire. Denique irridendo dolet, veritatem tam sero inventam Florentiae fuisse. Verum ut homini tanta arte ac fiducia pugnanti tandem respondeam: non Florentiae inventa sero Veritas; sed heic duo quidem vera nos invenimus, ac manu tangimus: scilicet Burnetum calumniari Pontificiis, eodemque tempore imponere velle suis Britannis. An ita se res habeat, experiamur.

Ex iis, quae hactenus a me congesta fuere, exploratum habemus, vel a primis Ecclesiae Saeculis Christianae Reipublicae commune dogma fuisse, Animas Martyrum, separatas a Corpore, statim ad Caelestia Regna transferri. Id unum satis est ad subruendam totam Burneti molem. Nam hoc posito, habemus minime exspectandam
Justis

Iustus esse Beatitatem in supremo Mundi Iudicio. Si Martyres nihil impedit, quominus Beati confestim apud Deum evadant: quid ceteros Iustos perfectos impedit? Et profecto hos quoque, dum perfecta peccatorum expiatione vel heic, vel in altera Vita functi sint, ad aeternam Felicitatem in Caelos admitti pariter animadvertimus. Atque in hanc sententiam palam factum est, conspirare Acta sincera Martyrum, Epistolae Smyrnenſis & Viennensis Ecclesiarum, Sanctos Patres Ignatium, Iustinum, Cyprianum, Dionysium & Athanasium Episcopos Alexandrinos, Methodium, Eusebium Caesariensem, Constantinum Augustum &c. Hisce addidimus Sanctos Hilarium, Ambrosium, Hieronymum, Basilium, Nazianzenum, Nyssenum, Ephraemum, Chrysostomum, Prudentium, & copiosam aliorum Sanctorum manum, qui eandem doctrinam differis verbis, primisque Ecclesiae Saeculis, depraedica-runt. Orientales quoque Ecclesias hac in re cum Latina concordēs fuisse, pluribus documentis evicimus. Et quamvis Arethae, aut Andreae Caesariensis Episcopi Saeculo Christi Decimo novitia doctrina, uti Cap. XVIII. monui, quosdam e Graecis a vetustissima Traditione averterit: nihilo fecius ostendimus, plerosque & poriores inter ipsos Graecos, posterioribus quoque Saeculis, constantes perstitisse in Majorum suorum sententia. Addo nunc, censei, floruisse paucis post Aretham illum Annis Olympiodorum Graecum Scriptorem, cujus Enarratio in Ecclesiasten Latine reddita proſtat, non semel typis tradita. At is ad Cap. VI. haec habet: *Sapiens vero pauper spiritu, juxta Evangelii dictum, ambulat coram vita, hoc est per virtutum semitas pergit, donec demum perveniat ad ultimum Appetibile. Dissolvi enim cupit, & esse cum Christo, qui profecto est Vita Aeterna.* Deinde ad Cap. XII. *Quum in terram Corpus resolvitur, Anima revertitur ad Deum, redditura rationem rerum, quas gessit in vita, Creatori suo.* Sanctis vero potissimum Martyribus Coronam & Praemia sine mora conferri in Caelis, ex innumeris veterum attestationibus didicimus. Quibus juvat nunc ad-jungere Sanctum Asterium Amasenum Episcopum, qui circiter Annum Christi CCCXCVIII. praeter alia, quae Cap. XVI. ex ejus Sermonibus hausi, haec etiam nobis offert in Laudatione Sancti Protomartyris Stephani, a Combefisio edita. *Clamabat, ait, Domine Jesu Chrisſte, suscipe Spiritum meum. Festinus namque ad velut coloniam ire properabat, & e peregrino solo ad Patriam, ad illustrem praeclaramque Civitatem e terra deserta, aestu arida, ac horribili squallore obsita, contendebat.* Infra haec adtexit: *Angelorum quidem*

exercitus agonem demirantes, Stephanumque ingenti stipatum satellitio in Hereditatis suae partem evebentes, impensus gaudebant. Sermonem hunc etiam Phorius laudavit. Praeterea vide apud Bollandum ad diem XIV. Januarii, Acta Monachorum, qui pro Christo apud montem Sinam Saeculo Quinto trucidati fuere; a Nilo Monacho, magni Chrysostomi discipulo, literis consignata. Ibi Cap. VII. Sanctus Theodolus moriens superstites socios hinc ad certamina animabat: Scit Agonotheta (ita Christum appellare consueverunt Graeci) quo iudicio tradat athletas adversario: ut qui praeclara Praemia & bravia proposuerit iis, qui plagas aequo animo accipiunt. Quae enim oculus non vidit &c. ea Deus paravit iis, qui pro ipso decertarunt, & pietatis praemiis vitam suam gloriose coronarunt. Sic enim Deum decebat munificum superare labores remunerationibus, & Coronas praebere Athletis, ut & reddat mercedem, quae debetur, & gratiam efficiat remunerationem, propter insignem honorem. Matrem quoque cujusdam e Martyribus Cap. X. Nilus inducit, exultantem ob illius gloriosum e vita exitum. Beata ego, aiebat, in matribus, quae Deo talem exhibuerim Athletam. Rursus quoque ego beata: vere confido fore ut deinceps glorier, quum tu in Christum fueris resolutus, & una Cum Eo Futurus sis Perpetuo, & Deliciarum, quae numquam desinunt, sis Particeps. Possem & alia id genus aggregare documenta; sed modus tandem habendus est. Si haec nescivit Burnetus, quei illius ignorantiam; si novit, quei illius impudentiam excuses?

Itaque prima Burneti illusio atque calumnia est, insultare tum Catholicis, tum Britannis suis, ceterisque credentibus jamdiu reſeratae Sanctis Caeleſtem Gloriam, quasi tum ſolum ex puteo hauſta fuerit haec Veritas, quum Generale Concilium Florentiae habitum fuit. Jam Sole meridiano clariſſus intuemur, nihil ibi conſtitutum in ejuſmodi controverſia, quam quod per tot Saecula ab exordio Eccleſiae tam Occidentales quam Orientales Eccleſiae tamquam ratum certumque tenuerant. Secunda illusio & calumnia Burneti eſt, perſuadere velle Britannis ſuis, Catholicos, ſive Pontificios, manus quodammodo jam dediffe ſatendo, *Patres generatim* ad Reſurrectionem Carnis diſtuliffe retributionem Sanctorum. Aut nos infantes, aut ſtipites ſuaves credat oportet, qui incredibilia haec de nobis venditat, ac tanta confidentia apud eruditos Britannos diſſeminat. Immo non ſolum negamus, Patres generatim adverſatos fuiſſe dogmata in Synodo Florentina ſtabilito, ſed etiam ſperamus, neminem in poſterum fore, qui non agnoſcat eoſdem in hanc ipſam doctrinam conſpi-

conspirantes, uti ostendunt quae hactenus de huiusmodi controversia in medium attulimus. Tertia calumnia, eaque omnium teterima adversus Catholicos, qua Burnetus fortasse confusus est, & praecipue credidit, se Britannorum animos expugnatum, illosque in suam opinionem pertrahendos, ea est, Quæstus tantummodo causa a Pontificiis inveciam & constabilitam fuisse sententiam de Beatitudine Sanctorum, quos propterea uti apud Deum patronos colere atque invocare æquum sit & utile Christianis, debeatque in honore habere illorum Reliquias. Heic, si Burneto fides, latet Hydrae caput, unde tot *Superstitiones* fluunt, quibus Pontificiae Ecclesiae inquinantur, & quarum virus fortassis ille veretur, ne in Anglicanam quoque effundatur. Dignus esset Burnetus, qui heic asperis exciperetur. Sed pacato animo rogatos tantum volo Britannos æqui & veritatis amantes, ut præjudicatis opinionibus tantisper sepositis, mecum placide in consilia Burneti inquirent. Agit heic ille contumeliis, non rationibus, adversus Catholicos, quos veluti *cauponantes verbum Dei* traducit, quasi Romana Ecclesia opinionem de Beato Sanctorum vita functorum statu unius turpis Lucri causa invexerit, aut amplexa fuerit. At quando palam jam factum est, cunctos pacæ doctrina & sanctitate præstantissimos Patrum, vel ipsis primis Ecclesiae Saeculis, non aliud credidisse & tradidisse, quam quod nunc credit & tradit Ecclesia Romana: quid aliud inde consequitur, nisi ab impudenti accusatore isto una eademque nota atque censura damnari primitivam Ecclesiam, immo ignominiam hanc in Patres potius, quam in nos recidere, quando nos non procudimus, sed ab eis accepimus hoc ipsum Dogma? Quid vero hæc audientes Increduli, quorum contagione heu nimium Britannia laborat, de Religione Christiana dicturi sint, facile conicere possumus. Si Sanctos viros atque Doctores nostros in ipsa Ecclesiae adolescentia nunc homo Christianus ob lucrum *cauponantes verbum Dei*, atque adulteratores Evangelicae doctrinae exhibet: rideant Impii necesse est sanctissimam Religionem, & ipsum despectui habeant divinum illius Auctorem, qui non Apostolis tantum sed Ecclesiae universae se semper adfuturum sponderat Matthæi Cap. XXVIII. vers. 20. inquit: *Ecce ego vobiscum sum omnibus diebus usque ad consummationem Saeculi*: qui etiam nos iusserat audire *Ecclesiam Dei vivi*, quæ est *columna & firmamentum Veritatis*, Prima ad Timoth. III. 15. Nonne subannantes dicere possunt Impii: quos ipsos vos pluris facitis priorum Saeculorum Doctores, en infectos habemus eo ipso errore, falsaque doctrina, quam Burnetus non in Ecclesia tantum, sed

& in

& in ipsa Anglicana seprehendisse fatetur? Verum pereant Novatores, qui obcaecati cupiditate gloriae, nova quotidie comminiscuntur, & vetera bene stabilita, quantis possunt, viribus concutiunt. Calumniari volens, in promptu semper habet suspiciones, quibus egregia quaeque facta & inventa oneret atque denigret. Eadem quoque facilitate posset Burnetus, Episcopis alibi infestus, aut quicumque e Calvini asseclis, carpere Episcopatus institutionem, quasi per sacrum illud munus aditum sibi quiescerint Sacerdotes ad dominationem, ad honores, ad commoda & lucrum. Posset etiam Epicuri & Lucretii sectator eandem affigere quaestus causam Religionis ipsius praedicationi, ut alia omittam. *Duat ansas unaquaeque res habet*, aiebat Epicletus: scilicet nihil tam bonum, tam rectum est, quod carpere non possit malignus, quum velit: Sapientis autem est, contemti obrectatorum naeniis, veras atque intimas rerum causas investigare. In praesenti vero quaestione statim in oculos incurrit ratio, cur ab Apostolorum aevo ad nostra usque tempora vigerit fides de non retardata Beatitudine Justorum, & Poena Improborum: quia videlicet id e sacris Literis deducitur, & Religionis sanctissimae Institutor tum praemiis post certamen absque mora recipiendis sollicitare nos voluit ad laboriosum iter Virtutis, tum terrore poenarum imminentium avertere malos a Vitiis. Hanc autem fuisse doctrinam a divino Magistro Apostolis traditam, non vero Burnetanam, invictissimo argumento est, omnes ferme priorum quinque Saeculorum Patres convenire in ipsam concordēs.

At, inquit Burnetus, ex hoc principio manat *tota Religio ac pompa Romana circa Sanctos, de iis canonizandis, invocandis, & colendis* &c. hoc est, si illi credimus, magna seges *Superstitionum*. Profecto manat; verum consuetudina haec, atque huius ritus nullo quidem labore Burnetus in *Superstitionum* censum referre potest, sed numquam, nisi calumniis, ut fieri solet, ac fallaciis utatur, ostendere id poterit. Non est meum in hanc provinciam ingredi. Prostant Catholicorum Concilia, ac plurimum praestantium Theologorum communionis Romanae Libri, quibus refelluntur hac in re heterodoxae gentis cavillationes, legitimique praestantur Romanae Ecclesiae ritus & Dogmata. In istis Conciliis ac Libris rogatos iterum volo Britannos, ut legant, quae sit Catholicorum mens, germanaque doctrina, atque huius doctrinae solida fundamenta; non vero in suorum Libris atque Homiliis, in quibus, liceat dicere, nihil minus curatur quam Veritas, quoties de Ro-

de Romana Ecclesia verba faciunt; & unicum studium est odia cumulare in Catholicos, quum tamen omnium Redemptor nihil plus commendet, quam Veritatis amorem, atque erga omnes Caritate certare. Interea Burneto probri & contumeliae loco commemoranti *Pontificiam Theologiam* de Sanctorum Beatitate, invocatione, cultuque minime idololatrico, ut suorum phantasiam adversus haec Dogmata ad arma excitet, nihil aliud nisi haec pauca repono. Scilicet laetari & gloriari nos, quod hujus doctrinae duces & vades habeamus magnos illos viros, scilicet Sanctos Patres priorum quinque Saeculorum, quos probus quisque in Britannia ipsa veneratur, neque reputat *cauponantes verbum Dei*, eoque minus Idololatriae addictos, tantique criminis hortatores suis in Libris. Nisi furens aliquis Haereticus, aut ex Atheismo ebrius, neget, quin Sancti illi viri, & ipsi cum Apostolo, Secunda ad Corinth. II. 17. dicere potuerint: *Non enim sumus, sicut plerimi adulterantes* (sive ut alii legunt, *sicut multi cauponantes*) *verbum Dei, sed ex sinceritate, sed sicut ex Deo, coram Deo, in Christo loquimur*. Jam longo sermone evicimus, Sanctos eosdem Patres fuisse Pontificios in dogmate de non procrastinata Beatitudine Sanctorum. Pontificii quoque fuerunt in doctrina de *Invocatione Sanctorum*. Quod quum dico, gratiae habendae Burneto sunt, qui non aliunde natum agnoscit Ecclesiae Catholicae usum de implorando Sanctorum jam vita functorum patrocinio, quam ex certa persuasione, eos jam apud Deum in Caelesti Gloria versari, & efficacius, quam quum in terris, posse in Caelis orare Deum pro nobis. Haec sine dubio legitima ritus origo: si enim constat e sacris Literis, utiles Animabus nostris esse posse orationes Sanctorum viventium in terra; quanto plus ex iis sperandum est, postquam in Caelum recepti sunt, & deposita Fide ac Spe ante Thronum Dei mirabilem servant Caritatem erga fratres adhuc in Mundo luctantes, eorumque preces ac necessitates in Deo glorificatore legunt? Atqui Lectorem non pigeat paucula hanc in rem a me accipere.

Circiter Annum Christi CCXLVI. *Origenes* Libros suos contra Celsum elucubratus est. Ibi Lib. VIII. sunt ejus verba: *Ex eo quod conciliatur nobis summus Deus, consequens est, ut & benevoli reddantur omnes illius amici, Angeli, Animae, ac Spiritus. Habent enim sensum eorum, qui Dei benevolentia digni sunt; nec solum erga eos, qui digni sunt, bene sunt affecti; sed & omnibus opitulantur, qui summum colere Deum cupiunt, quem & propitium reddunt,*
& cum

*& cum iis communiter precantur, ac simul postulant. De Anima-
bus separatim a Corpore loquitur ibi Origenes, quum eas appel-
let Ψυχὰς καὶ Πνεύματα: ac propterea illas ad Deum translatas
credit. Atque haec jungenda sunt cum aliis, quae de Origene su-
pra Cap. IX. disseruimus. Heic autem habes antiquitatem Invo-
cationis Sanctorum. Junge nunc Origeni Sanctum Cyprianum, qui
Anno Christi CCLII. gratulatoriam Epistolam (cognovimus, fra-
ter carissime, sunt prima illius verba) ad sanctum Cornelium Pa-
pam scripsit de exilio pro fide Christi ab ipso Papa suscepto. Quum
vero is praevideret, appropinquare jam certaminis & agonis nostri
diem, propterea haec addit: Memores nostri invicem simus, concor-
des atque unanimes, utrobique pro nobis semper oremus; pressuras &
angustias mutua caritate revelemus. Et quis istinc nostrum prior
divinae dignationis celeritate praecesserit, perseveret apud Domi-
num nostra dilectio; pro fratribus & sororibus nostris apud miseri-
cordiam Patris non cesset oratio. Ne Burnerus quidem negat, quin
sancti Cypriani inclyti Episcopi & Martyris sententia fuerit ead-
em, quae nunc est, Romanae Ecclesiae de Beatitudine Sancto-
rum. Id & ego ostendi supra Cap. X. & luculentius constabit ex
eius Opusculo de Mortalitate, quod integrum infra dabo. At ex
his discimus, non aliam doctrinam excogitandam nobis esse in
Sancto Cornelio, tunc Romanae Ecclesiae Pontifice, quando
ipsius apud Deum precibus sese ac fratres commendat Cypria-
nus, si is sorte ad ipsum Deum praecedat. Atque ex his intelli-
gas, tunc in Ecclesia Dei exploratum fuisse, magnam vim esse
Sanctorum precibus, postquam ex hac vita migrassent. Reticere
autem nequeo heic, quae ad hunc locum adnotavit Johannes Fel-
lus Oxoniensis in Britannia Episcopus in sua editione Cyprianica
Anni MDCC. Minime, ait, dubitamus, Animas Caelo receptas
precibus Deum optimum maximum sollicitare, ut in terris agentium
miseretur: sed non inde conficitur, preces ad Sanctos fundi debere.
Deos, qui rogat, ille facit. Nisi notum foret, quid possit in animis
hominum praepudicata opinio, & factionis alicujus arrepta a te-
neris unguiculis professio, mirandi locus foret, quei exciderit do-
ctissimo illi viro ratio haec, cur improbanda sit Sanctorum Invo-
catio, quae (sit verbo venia) ne infante quidem digna videatur
Catholicorum auribus. Inquit ille: Deos, qui rogat, ille facit.
At nos Sanctos in Caelum receptos tantummodo precamur, ut
Deum orent pro nobis, certi professione Fidei nostrae, illos non esse
Deos, sed Conservos nostros, feliciores tamen quam nos, & poten-
tiores;*

tiores; eorumque etiam preces ad beneficia a nobis impetranda validas esse, quia offeruntur Deo a Sanctis *per Filium ejus Jesum Christum Dominum nostrum, qui solus noster Redemptor & Salvator est*, ut ait Tridentinum Concilium. Ubinam ergo erat Fellus, quum scripsit: Si illos rogatis, facitis Deos? Ecquando Amicos sive Ministros Imperatorum & Regum facimus Imperatores & Reges, si eorum patrocinium apud rerum Dominos imploramus? Judices appello heic sapientes inter Britannos; pudet enim diutius in adeo inani oratione refellenda insistere. Alterum similem Cypriani locum supra Cap. X. produxi. Succedat demum Sanctus Hieronymus, qui in Epistola ad Heliodorum, scripta circiter Annum Christi CCCLXVI. ad Eremiticam vitam eum adhortans, in haec verba loquitur: *Veniet, veniet postea dies, quo victor revertaris in Patriam; quo Hierosolymam Caelestem vir fortis coronatus incedas. Tunc municipatum cum Paulo capies. Tunc & parentibus tuis, ejusdem Civitatis jus peter. Tunc & pro me rogabis, qui te, ut vinceret, incitavi.* Sunt in hanc rem luculenta alia Basilii, Nazianzeni, Ambrosii, Cyrilli Hierosolymitani, Nyseni, Augustini, Paulini, aliorumque Patrum testimonia. Hos duces in Invocatione Sanctorum nos sequimur. Hos uti legitimos testes Evangelicae doctrinae atque Traditionis audimus. Quos heic sequatur Burnetus, edicat: Manetem, Eunomium, Vigilantium puto, abominanda nomina, nebulones, impios, atque mox, ut erupere, proscriptos. At adstabimus omnes ante tribunal Christi; & rationem reddent, qui inter causas conficiendi Schismatis, horrendi nempe facinoris, adnumerarunt etiam honorem ab Ecclesia Catholica habitum Beatis Dei Servis, non alium profecto, quam qui eis est habitus, dum Saecula illa fluerent, quibus vel ipsi Britanni reverentiam minime negant. Tunc palam fiet, an factis ii caverint ab occultis molitionibus Superbiae, Philautiae, aliorumque humanorum affectuum, quorum causa, non vero vi certae atque exploratae Veritatis nunc tunica Christi confissa est, numquam satis deplorando Caritatis & Religionis vulnere.

Quartam addo illusionem Burneti, qui ut persuadeat, tum solum Beatitudinem Animae sperandam esse, quum redivivo Corpori iterum sociabitur, mirabili ista argumentatione utitur pag. 86. *Voluptas, inquit, & Dolor, quae sunt sensationes primariae & maximi momenti, oriri non possunt in Anima, sine Corpore proprio, ei vitaliter unito; sunt enim affectus, qui adveniunt Animae*

Rr

propter

propter bonum aut malum, quod accidit Corpori quatenus suo. Si baculo percusseris proximum parietem, video motum baculi, & audio sonum ictus aut plagae: sed me nihil dolet. Si vero eodem baculo, & eadem vi percusseris Corpus meum, statim me dolet. Hecle quum haec audient, vix risum tenebunt Philosophicae Scholae tirores. Utique ex unione Corporis multae obveniunt Animis nostris causae Voluptatis atque Doloris: ac propterea hosce motus appellare consuevimus Voluptates Corporeas, ac Dolores Corporis, quorum tamen gratus aut ingratus sensus in una fit Anima, non autem in materia sensus experte. At nemo nescit, innumeros alios procreari in Anima nostra motus Gaudii atque Doloris sine commotione Corporis. Exultat Anima in meditatione Dei, aut in inventione Veritatis, in solutione ardui Problematis, spe vicini, aut consequutione uberis praemii &c. Dolet metu mali, injuriae recordatione, consideratione peccatorum, errorumque suorum &c. En Voluptates Doloresque spirituales. Fac ergo, ut Anima separata a Corpore sistatur ante Thronum Dei, summumque illud Bonum coram intueatur (quod & Angeli faciunt): quis nisi delirando neget, quin gaudio ineffabili perfundi possit ac debeat? Mente illic atque intelligentia est opus, non corporea Phantasia. Quod vero ad externa attinet, sive ad res Mundi hujus, defectum Corporis Creator unus, omnia in se comprehendens, supplet; qui etiam Lumen Gloriae caris suis elargiens, eorum Animas elevat ac roborat, ut ad se intuentium aciem mentis attollant. Quamquam & haec superflua sunt. Dum enim tenemus sacrarum Literarum ac Traditionis auctoritate aliquod Christianae Fidei dogma, impudentis tantummodo est negare ideo illud velle, quod modum quoque & rationem ejus ignoremus, quum illud quidem revelarit, istud vero revelare Deus noluerit. Idque potissimum de iis dicendum est, quae spectant ad Sanctorum Gloriam; illam quippe supra captum nostrum esse jam Apostolus Prima ad Corinthios II. 9. nos monuit notissimis iis verbis: *Quae oculus non vidit; nec auris audivit, nec in cor hominis ascenderunt, quae praeparavit Deus. iis, qui diligunt illum.*

C A P. XXX.

Romanae Ecclesiae Dogma de Sanctis ad Caelestem Felicitatem jam deducit, novis sacrarum Literarum documentis roboratur. Sancti Cypriani Opusculum de Mortalitate in idem Dogma confluit. Quod Sancti, & potissimum Apostolus Gentium, verbis tradidere, factis complerunt. Operis conclusio.

TEmpus autem est contrahendi vela, ut, quae reportavimus e navigatione nostra, tandem colligamus. Jam, ni fallor, abunde perspeximus, Burnetum sub specioso venandae Veritatis ardore, quem omnes vel Impiorum perditissimi crepant, ad sui nominis famam, gloriamque apud Britannos perennem, per novae, sed exitialis doctrinae apparatus, unice inhiasse. Non illum certe humani generis Caritas, non sacratissimae Religionis zelus ad id consilii adduxit. Nam quoties duae de statu Mortuorum sententiae comparantur, quarum altera ad finem usque Saeculorum differt, altera accelerat Justorum praemia, Injustorum poenas: illa sine haesitatione praeferenda dignoscitur, quae moras tollit. Proinde is, ubi & Religionem, & Rempublicam Christianam revera cordi habuisset, ad hanc totis nervis, quantumque fieri potest, roborandam, illustrandam, suadendamque animum suum addicturus fuisset. At ille, nescio quo malo Daemone instigatus, contrariam plane viam iniit, nihil intentatum relinquens, ut Populo suo persuadeat, nullam haecenus mercedem fuisse Justis apud Deum, nullam Improbis gravem poenam, nullum in morte hominum Judicium; sed univerforum retributionem, fortasse post complura annorum Millia, ad diem illam reservari, qua solemne omnium Judicium a Christo Domino in ejus visibili Adventu celebrabitur. Quae sententia in quantam Animarum perniciem vergat, jam palam fecimus, jam nemo non intelligit. Et quum illum insuper deprehenderimus aperte fucum fecisse popularibus suis, dum cuncta, quae pro sua opinione militant, studiosissime in aciem eduxit; longe vero majora ac robustiora praeteriit, quibus persuadetur, veraque demonstratur hac de re sententia Romanae Ecclesiae: quid aliud restat, nisi ut abominandi consilii homo, qui triticum evellere, lolium vero substituere in animum induxit, ejusque pestilens lucubratio, proborum omnium detestatione tandem excipiat atque damnetur?

Rr 2

Hoc

Hoc autem potissimum praestare, Catholicorum omnium est : Jam solida prostant, inconcussaue doctrinae nostrae monumenta. Fortius quoque eis sigillum accessit, ex quo in Generali Concilio Florentino dogma hujusmodi decreto Ecclesiae stabilitum novimus : Ecclesiae, inquam, contra quam portae Inferi numquam praevalerunt, & cui semper adfuturum se Dominus pollicitus fuit usque ad consummationem Saeculi. Quamobrem hilari constantique animo in agone Christiano certemus. Magna proposita nobis sunt praemia, neque expectanda post immanem multorum Saeculorum moram, uti somniant, qui immensae Dei beneficentiae ac magnificentiae detractores se prodere nostris non verentur temporibus. Praecessit nos illuc infinita turba Sanctorum atque Justorum. Nos quoque par Felicitas manet, si pari ardore in via mandatorum Domini curremus, nobis etiam singulis praedicente Spiritu Apocalypf. II. 7. *Vincenti dabo edere de ligno Vitae, quod est in Paradiso Dei mei.* Pollicetur Spiritus Justitiae amatoribus non Paradisum terrestrem Adami, sed Caelestem, sed *Paradisum Dei*, ubi nondum Corporis, sed profecto Animae deliciae sunt; sub quo nomine toties ab antiquis Patribus atque Scriptoribus designatum vidimus Regnum Caelorum. Sanctus quoque Gregorius Nyssenus Oratione II. in Quadraginta Martyres, eorum ope atque interventu precatur, ut corroborati *Fideles ad Paradisum perveniant*. Supra vidimus Cap. XX. nihil aliud esse Nysseno *Paradisum*, nisi Regnum Dei. Nihil autem aliud est *Regnum, quam Vita Aeterna*, inquit Sanctus Augustinus Sermon. 294. olim 14. de Verb. Apostoli. Porro *Vita Aeterna* in eo consistit, ut videatur Deus sicuti est, atque efficiamur Angelorum similes, *qui vident faciem Patris, qui in Caelis est, & perpetuo simus cum Christo, qui Vita nostra est*. Nunc per speculum ambulamus & in aenigmate, Deum tantummodo *per Fidem*, abditum oculis nostris a longe contemplant. Ingemiscimus propterea, atque anxie optamus, ut beata illa effulgeat dies, qua ipsum intueri *per Speciem* nobis liceat, hoc est mirabili ejus & beatifico adpectu ac visione frui detur. At ecquando haec erunt? Fidelem testem habemus Apostolum Domini Paulum, qui Secunda ad Corinth. V. 6. certos nos fecit, minime expectata Resurrectione Corporis, immo post depositionem ipsius Corporis, si juste vixerimus, nos futuros *praesentes ad Dominum*, neque amplius *per Fidem* ambulaturos, sed *per Speciem* comprehensuros summam illius Felicitatis, ad quam heic cum gemitibus anhelamus.

Alia Scripturarum loca vidimus, quae tam beatam fortem sperare

nos

nos faciunt, non uti Novatores quidam contendunt, post enormem moram Saeculorum complurium, quorum etiam finem ignorant; sed statim post confectum certamen, aut postquam heic, aut in altera Vita peccata nostra expiaverimus. Eadem vero spe nunc nos recreat Dominus, quum Johann. XII. 26. ait: *Si quis mihi ministrat, me sequatur: & ubi sum ego, illic & minister meus erit. Si quis mihi ministraverit, honorificabit eum Pater meus*: illum nempe inducens in Regnum suum, ubi Corona Glorae induet eum, & convivam statuet mensae Caelestis cum Abraham & Isaac & Jacob. Contineri-ne ergo potest indignatio contra Burnetum, ejusve similes, qui extra sinum Catholicae Ecclesiae nullo amplius freno cerebrum suum regentes, eo devenere, ut incautae genti non erubescant edicere, vel Petrum & Paulum & Stephanum, quamquam tanta fide & constantia divino suo Magistro ministrarint, eumque fuerint sequuti per immensas tribulationes, ac pro illo tamdem vitam generose dederint; exclusos adhuc degere ab ejus latere ac praesentia, atque in ignoto carcere jacere, frustra suspirantes praesentes esse ad Dominum? Jam abiere Mille ferme & Septingenti Anni, & adhuc suspirant. Recense mihi, si potes, quot fortassis etiam Annorum Millia restant, antequam magna Dies Domini adveniat. Attamen immani hoc terribilique temporis intervallo, si somniatoribus quibusdam credimus, expectandum, suspirandumque est Apostolis, & praemii loco poena tam diuturnae, & quasi infinitae expectationis iis toleranda est, quae quanta sit anhelantibus ad conspectum & societatem Domini sui, nemo satis excogitare possit. At bonus & fidelis promissor Dominus, dementiae arguit istorum cogitationes; & quum discrete dicat, se velle, ut ii, qui sibi ministrant, suaeque vestigia sequuntur, sint illic, ubi ipse erit; non carcerem, sed Regnum, sed Caelestem Gloriam, mox ut emigrant e vita, illos procul dubio sperare facit. Et Petrum revera in Caelum jam sublatum credere Patres, e quibus unum Ambrosium adducam, ita scribentem Exposition. in Lucam Lib. X. num. 92. *Unde te evocem, Petre: ut doceas me, quid flens cogitaveris? Unde, inquam, te evocem? De Caelo, ubi jam choro insitutus es Angelorum*. Concors etiam cum Magistro Apostolus alter, nempe Jacobus Cap. I. 12. Epistolae suae ait: *Beatus vir, qui suffert tentationem, quoniam, quum probatus fuerit, accipiet Coronam Vitae, quam repromisit Deus diligentibus se*. Si haec in Burnetanam opinionem accommodare velis, Impiorum risum concitabis in divinam Scripturam. Nam si Corona vitae tum solum expectanda est, quum Judicii supremi dies adveniet, Burnetum sciscitabuntur, num post mille saltem Annos illucescet haec Dies? Nescio, respondebit ille. Num post decem Annorum millia?

millia? Respondebit, ignoro. Num post quadraginta millia? Incertum esse reponet. Tum illi: Tu-ne ergo *Beatum* nunc appellas, qui afflictiones hujus Saeculi, qui eculeos ac tormenta gravissima pro Christi amore patientissime sustert, quod accepturus sit Coronam post adeo immensum tempus, cujus finem ne tu quidem indicare potes? Si talis est Christianorum Beatitudo, nobis ingens calamitas esse videtur: & praestat *tentationes* hujus vitae summo studio declinare, atque heic, quantum licet, nihil pati, multumque delectari, quam certissima tolerare mala ob spem adeo protractam, ac prorsus incertam. Contra egregie haec verificantur in Romanae Ecclesiae doctrina. Nam secundum ipsius humanae naturae leges prudenter toleratur Malum quodlibet praesens, dum breve sit, quando certi sumus, subsequitur Bonum majus, ac diu duraturum, multoque magis si Aeternum. Propterea & in adversis, atque in ipsis tormentis Beatus est Christi Fidelis, quod haec ipsa Mala paritura sint sibi, superatis *tentationibus* vitae praesentis, statim, aut brevi, in altera Vita immensum Bonum ac Praemium, Beatitatem scilicet ineffabilem atque aeternam. Neque dicit Jacobus post diuturna tempora *Coronam vitae accipiet*; sed *quum probatus fuerit*: scilicet, mox ut constans in patientia, atque in fide perseverans inventus fuerit, accipiet Vitam aeternam. Breve patientiae tempus erit, at Praemio numquam finis erit. Qua ratione Sanctus quoque Paulus animos Corinthiorum, Secunda ad eos Epistola IV. 17. recreabat, inquit: *Id enim, quod in praesenti est momentaneum & leve tribulationis nostrae, supra modum in sublimitate Aeternum Gloriat pondus operatur in nobis*. Atque haec omnia satis innuunt, mercedem reddendam confestim post certamen confectum, non vero post immanem Saeculorum seriem. Quod & ipse Apostolus non obscure tradit in Secunda ad Timoth. IV. 7. dum ait: *Bonum certamen certavi &c. In reliquo reposita est mihi Corona Justitiae*. Coronam vero istam non Apostolis tantum, sed & reliquis *diligentibus se Deus repromisit*, dummodo in agone perseverent usque ad mortem. Tunc enim victoriae praemium accipient, prout etiam pollicitus est Deus in Apocalypseos Cap. II. 10. Episcopo Smyrnenis Ecclesiae, in tribulatione, & paupertate posito, iis verbis: *Ego fidelis usque ad mortem: & dabo tibi Coronam vitae*. Itaque post mortem, post finem boni certaminis, subsequetur Corona, hoc est Beatitudinis Caelestis possessio, non vero Carcer, non Somnus, neque *Inactio*, non demum fatigata atque illusa immani Saeculorum interstitio spes ac desiderium.

Miri-

: Mirifice autem confirmatum videas hoc ipsum dogma a divino Apostolo Paulo, qui Prima Corinth. IX. 24. scribit: *Nescitis, quod ii, qui in studio currunt, omnes quidem currunt, sed unus accipit Bravium? Sic currite, ut comprehendatis.* Tum addit, certantes publicis in ludis contendere, ut corruptibilem Coronam accipiant, nos autem incorruptam. Nulla dubitatio est, quin Christianorum Bravium, sive Praemium victoriae, sit accedere ad intuendum summum Bonum, hoc est, beatifico Dei adspectu frui in Aula Caelesti. *Quidnam est illud Bravium?* inquit heic Sanctus Gregorius Nyssenus; *quaenam illa Corona?* Non videtur mihi aliud esse, praeter ipsum Dominum, in quo singuli sperant. Ipse enim Praefes est certaminis certantibus, & Corona vincentibus &c. Propter persequutionem, quam pro Deo patimur, ad Caeleste Bonum compellimur, ac Beati efficimur. Nos ergo hortatur Apostolus, ut curramus, atque apprehendamus inefabile praemium hoc. *Currite, ut comprehendatis.* Utri, quaeſo, Christianus heic fidem habebit? Paulo-ne Apostolo, an Burneto, homini nihili prae illo? Paulus Corinthios ad cursum in stadio Christiano sollicitat, quia mirandum Praemium propositum est bene currenti: atque uti sine mora Bravium victoribus conferri consuevit, quod eisdem Corinthiis, ceterisque Graeciae Populis notissimum erat; ita exemplo illo usus Paulus, ad patientiam illos hortatur: nam vitae stadio bene absoluto, prout in publicis ludis fieri solet, succedet comprehensio Coronae incorruptibilis. Burnetus contra quasi irridere currentes videtur, quandoquidem, si illum audimus, ne post Mille quidem & Septingentos annos mortaliū quiscquam Bravium & Coronam accepit; immo incertissimum est, quandonam deinceps sit accepturus. Ludit-ne, an mendax est Apostolus, quum ait: *Currite, ut comprehendatis?* Sed & ipse ad Hebraeos IV. 11. postquam Caelestem Gloriam *Requiem* appellavit, stimulos nobis addit, ut ad illam consequendam properemus. *Festinemus ergo, inquit, ingredi in illam Requiem.* Praecedenti similem hunc locum vides. Atqui, uti jam supra Cap. XV. monui, nobis sese objicit heic Burnetus, atque edicit, festinare quidem nos posse, at ingredi in *Requiem* illam beatissimam non posse: quod quanta cum temeritate dicatur, Christianus quisque facile intelligit. Et profecto non ibi Sanctus Paulus loquitur de Requite in hac lacrymarum valle minime speranda; eoque minus de misera illa atque ignobili Requite, sive Somno, ad quem tam Justorum quam Injustorum Animas a Corpore separatas somniator Burnetus deducit. Magnum quid ibi Apostolus memorat, & sperare jubet, si-
nem

nem videlicet Proborum, sive Vitam Aeternam, atque ingressum in istam procurandum esse ait *operibus perfectis*, propterea nos adhortans, ut *simus imitatores eorum, qui fide & patientia hereditabunt promissiones*; Abraham praecipue ante Hebraeorum Fidelium oculos proponens, qui *longanimiter ferens, adeptus est repromissionem*. Cum hisce junge, quae divinus Magister de Servo *fideli & prudenti* ait Matth. XXIV. 45. *Beatus ille servus, quem, quum venerit Dominus ejus, invenerit sic facientem. Amen dico vobis, quoniam super omnia bona sua constituet eum*. Uti Cap. VI. animadvertimus, ex isto, aliisque Evangelii locis jam productis, rite deducitur occultus Adventus Christi Judicis ad singulorum Fidelium mortem; atque adeo non praestolaturus bonos Dei famulos ineffabile Beatitatis praemium in fine Mundi, sed recepturus statim atque adveniens Dominus illos ad se vocaturus, inveniet perseverantes in fide atque in operibus sanctis. Inquit enim Dominus, tunc quum ipse venerit, scilicet ad suscipiendam illorum Animam, (quod & de Protomartyre Stephano factum novimus) *Beatos esse incipere*. Et cur? Quia *super omnia bona sua* constituentur a Domino in altera Vita, idest in Dei Gloriam invehentur, quae omnium bonorum complementum est. Si desidem Servum, de mora Domini sui sibi blandientem invenerit, *dividet eum, partemque ejus ponet cum hypocritis: illic erit fletus & stridor dentium*. Cur nos in remunerando Servo *fideli* segnem Dominum umquam suspicemur?

En ergo Christianae Spei solida fundamenta, quae numquam satis detestando consilio Burnetus invadere est ausus, in perniciem Animarum nostrarum, paene dixi, conjuratus. Sed quod efficacius avertere nos heic potest ac debet a Novatoris istius machinamentis, exemplum est Martyrum in primitiva ipsa Ecclesia. Numquam satis repetere juvabit, sacros illos Reipublicae Christianae pugiles tanta alacritate pugnasse pro Christi nomine, tantaque constantia ad tormenta mortemque ipsam properasse, quia exploratum habebant, vitae huic aerumnosae atque caducae, mox ut ab ea emigrarent, illico successuram esse alteram in Caelis beatissimam apud Dominum. Id veterum documentis innumeris, perspicuis, confirmatum supra a nobis fuit. Immo ceteros quoque Justos felicissimae hujus sortis participes censuit antiquitas: quod egregie in primis testatus fuit Sanctus Cyprianus in Opusculo de *Mortalitate*, hisce infra adjungendo. Atque heic in primis animadvertat Lector velim, nihil ex iis, quae pro sua opinio-

opinionē adfert Burnetus, & sacris Literis depromptum, ignotum fuisse celeberrimo illi Ecclesiae Carthaginiensis Antifisti, ceterisque tunc temporis Martyribus. Attamen vide quantis animis, quantaque promptitudine ii in supplicia ruerent, quae nobis vel tantum audita stuporem, terroremque incutiunt. Non aliunde mirabilis illa animi fortitudo prodierit potuit, quam ex certa fiducia ineffabilis atque aeterni Praemii, a Deo statim conferendi, in cuius comparatione passiones huius temporis pro nihilo, aut saltem tamquam aliquid leve ac momentaneum haberentur. Huic nimium persuasioni norant nequitiam adversari, quae de Resurrectione Corporum toties in divinis Libris occurrunt. Atque id potissimum noverit oportet splendidissimum Ecclesiae lumen Sanctus Cyprianus, quem sane nemo hospitem in Scripturarum scientia appellare audeat, neque negare ejusdem doctrinae praeconem, quae adhuc in Romana Ecclesia viget. Lege infra illius Opusculum. Neque alia tunc erat ipsius Romanae Ecclesiae sententia, uti supra Cap. X. animadvertimus: in quam etiam consensisse vidimus Sanctum Ignatium Martyrem, & monumenta Smyrnenfis, & Vienneſis Ecclesiarum, ut reliqua jam a nobis producta praeteream. Quis ergo non intelligat, ideo tanta consensione praeclaros Antifistes, & tot Martyres, atque Ecclesias in idem dogma conspirasse, quia a Christo Domino per Apostolos inconcussa Traditione doctrina eadem profecta fuerat? Et quid de ejus certitudine dubitandum restat, quum vel ipsi Apostolici viri, eorumque Discipuli, a fonte parum remoti, id, quod nos credimus, non scriptis tantum, sed & cervice pro Christo data, se firmiter credere professi fuerint? Si Martyres jam accepere repromissionem, si minime expectata Resurrectione Corporum, jam Beatae sunt eorum Animae in visione Dei: jam tenes, frustra a Burneto adhiberi, quaecumque de Resurrectione, ac supremo Judicio in sacris Literis prostant.

Quamquam, si ipsos Apostolos consulamus, eadem lux nobis affulget: immo tanta, ut cunctos Religionis Christianae irrisores, si quis judicio locus apud eos restat, nedum Burnetum, convincere possimus. Unum adeamus Paulum. De legitima eius Epistolarum origine, quarum profunditatem, vim, & eloquentiam satis mirari nemo queat, is solum dubitet, qui mente omnino caprus est. Produnt illae hominem tanto Jesu Christi amore ardentem, tam certum de revelata ab eo doctrina, ut pro illa tuenda centies carnis jugulum oblaturus fuisset: quod & denique glorioso Martyrio

Sf

peregir.

peregit. Patenti miraculo ad Christum conversus, cum Apostolis versatus, admirandi praeterea ingenii vir, falli non poterat in iis, quae depraeedicabat: eoque minus alios voluisse fallere credendus est. Nam ubi statum hominem paratum mori pro Christo, consequens est, ut alte etiam animo ejus insideat inconcussa Fides in illum, atque erga illum impensus amor. Nemo praeterea, nisi prorsus mentis impositus, tot labores exantlet, tot persecutiones ferat, lubensque tandem vitam, omnium pretiosissimam, profundat (quod Paulus praestitit) in eum dumtaxat finem, ut opiniones apud se falsas aliis propinet. Ineluctabile istud est argumentum Veritatis Christianae Religionis. Sed & hinc discimus, eundem Apostolum persuasum habuisse, post dissolutionem corporis sui, nihil esse differendam beatam Animae suae vitam & gloriam in Caelis. Is omnia contemnebat: is omnia tolerabat, ut Christum lucrificeret, semper contendens ad *bravium supernae vocationis Dei in Christo Jesu*, Philippens. III. 8. & 14. Et quodnam hoc *bravium*, sive praemium bene in stadio currentium? Ad Christum proficisci, atque ejus praesentia frui, ac in aeternum cum eo habitare. Christus autem, qua Homo est, non ubique est, sed in Caelo est, *in dextera Dei sedens*, & constitutus a Patre *ad dexteram suam in Caelestibus*, ut ipse non uno in loco testatur. Haec *spes vocationis Dei*, hae *divitiae hereditatis ejus in Sanctis*, quas saepe sibi, & ad Ephesios scribens rememorabat, uti eximium solamen in tribulationibus, uti acutum dulcemque stimulum ad majora etiam tentandum pro Dei gloria, qui *convivificavit nos in Christo, & conresuscitavit, & consedere fecit in Caelestibus in Christo Jesu*. Tantum vero Praemium, tantam Felicitatem atque Bravium, ad quod comprehendendum Corinthios, ut nuper vidimus, ille properantes cupiebat, quum probe nosset divinus Apostolus consequi nos non posse, dum *peregrinamur a Domino*, id est donec terreno hoc carcere detinemur longe a praesentia Domini: propterea cupiebat *dissolvi*, & *peregrinari a Corpore*, id est deponere carneam hanc massam, certus, se hinc solum extemplo fore *cum Christo*, & *ad praesentiam Domini* se esse sistendum. Id numquam satis repeti atque inculcari potest. Falli opinione non poterat Paulus, a Deo edoctus, & spiritu Dei plenus; sed quidem misere fallitur, atque indignatione Christianorum omnium dignus est novitatum venator Burnetus, qui incomparabilem Apostolum Bravio carentem adhuc exhibet, atque extra Caelum collocat: hoc est a loco, ubi revera Christus est, arceri non veretur; ipsum contendens

ne

ne post mille quidem & septingentos annos ad *praesentiam Domini* tantopere exoptatam, atque certa fiducia statim post *resolutionem suam* expectatam, fuisse deductum, neque deducendum, donec cum Corpore resurgat.

Utrique resurget Paulus: resurgemus & nos, quum Christus Iudex ad univerforum Judicium ingenti cum gloria visibiliter adveniet; & tunc Corpore etiam ad Caelestem Gloriam admissio, complebitur atque perficietur Iustorum gaudium ac Beatitas in Caelo, quum videlicet totus homo coronabitur. In obscuro quidem restat, quale quantumque futurum sit incrementum istud Felicitatis in Resurrectione Iustorum; idque disputationi aliorum servatum volo. Attamen interim certa ratione tenemus, intermedio hoc tempore eorum Animas, a Corpore separatas, dum nihil eis eluendum superfit, in Caelum, & ad gaudia sempiterna transire, atque Dei Visione donari, in quo revera sita est Beatitas ac Vita Aeterna. Non sibi tantum, sed & omnibus iis, qui diligunt Adventum Domini, Apostolus a Deo edoctus repositam ait *Coronam iustitiae*, quam in die Resolutionis nostrae nobis, si fideles erimus, reddet, iustus Iudex simulque misericors, Dominus. Itaque & nos innutriti in *Spem Vitae Aeternae, quam promisit, qui non mentitur, Deus*, non Burnetum auscultemus, hanc Spem in nobis impio conatu paene extinguentem, sed Paulum hortantem, *ut abundemus in Spe, & virtute Spiritus Sancti*. Jam praecessit in Caelum Christus Spes nostra, Christus Vita nostra: nobis quoque jamdiu mansionem paravit in domo Patris sui; nosque invitat atque expectat, ut & nos intremus, coheredes futuri cum ipso, *si tamen compatimur, ut & conglorificemur*. Praecessit etiam turba magna Iustorum, teste Johanne Apostolo, *quam dinumerare nemo potest ex omnibus gentibus, stantes Ante Thronum, & in Conspectu Agni*. Nam quos Deus bonitatis omnis fons praedestinavit conformes fieri imaginis Filii sui, *hos & vocavit; & quos vocavit, hos & justificavit: quos autem justificavit, illos & Glorificavit*. Deo Remuneratori magnifico in-juriosa nimium sunt Burneti commenta, atque excogitatae a visionario homine immanes illae morae. Nos contra solatur certa spe Apostolus Christi Petrus, dum scribit: *Nen tardat Dominus promissionem suam*. Ingentia quidem pollicitus est; at nihil obstat, quominus sine cunctatione promissa compleat. Quid de tam bono Patre amplius dubitandum? Qui non frustra spem nostram, animosque nostros ad sublimia erexit, quum ait: *Gaudete, & exultate, quoniam merces vestra copiosa est in Caelis*. Quare beatam

illam Patriam, inaeſtimabilis gaudii domicilium, intentis avidiſque oculis in hac lacrymarum valle perpetuo contemplemur. Hinc nobis ſolatium dulce in adverſis, hinc nobis ſtimulus jugis, *ut abnegantes impietatem, & ſaecularia deſideria, ſobrie & juſte & pie vivamus in hoc ſaeculo, exſpectantes beatam ſpem, & adventum gloriae magni Dei & Salvatoris noſtri Jeſu Chriſti.* Et procul dubio ad mortem noſtram adveniet ſuorum Fidelium amantiffimus Dominus; & cum gloria, licet oculis carnalibus occulta, veniet (nam ubi Chriſtus, ibi gloria) ſuſcepturus carorum ſuorum Animas, eaſque in caeleſtem ſuum Paradifum invecturus, ubi nullus dolor, ubi lux & requies & pax perpetua, & ſonus epulantium, & vox perennis laetantium & benedicientium Deo in aeternum, ubi de torrente voluptatis omnes Juſti bibunt, & replentur Bonis domus aeterni Regis.

Equidem laetatus ſum in his, quae dicta ſunt mihi: *In Domum Domini Iſtimus.* Sed jam veni, amator hominum benigniſſime, Jeſu, atque manum praebe, ut tuto perveniamus. Aperi oculos tuos, & vide, quot hoſtes tum externi tum interni, quot laquei, quot pericula noſtro ad te itineri ſeſe objiciant. Itaque in adjutorium noſtrum ſeſtina: accelera, ut cruas nos, quia ſine te nihil poſſumus. Tu nos ſperare juſſiſti Regnum tuum, Regnum omnium ſaeculorum, & reposita eſt haec ſpes in ſinu noſtro. Adveniat, adveniat Regnum illud tuum. Heic omnia vana, caduca, aerumnis ac tentationibus plena. Tum ſolum quieſcemus, quum habitabimus in monte ſancto tuo, & adimplebis nos laetitia cum Vultu Tuo. Verumtamen timor & tremor veniunt ſuper nos, quoties recogitamus, quam ſaepe declinavimus a mandatis tuis, & ſicut oves errantes in via peccatorum cucurrimus. Nunc itaque, Deus noſter magne ac fortis, apud Patrem tuum, Patrem miſericordiarum, Advocate noſter fidelis, ne ſinas, ut Spes noſtra excidat, quam ſanguis tuus pro nobis effuſus peperit, quam firmat inſeſſabilis clementia divini Patris tui. Neque enim in juſtificationibus noſtris proſternimus preces ante faciem tuam, ſed in miſerationibus tuis multis. Convertere igitur de Caelo, Domine, & respice nos e domo tua ſancta & glorioſa, quam proſpectamus & nos viva fide, viva ſpe, poſtquam palam profeſſus es, te ad nos deſcendiſſe, non ut Juſtos, qui tui jam ſunt, ſed ut Peccatores, qui ſine intellectu a te receſſerunt, vocares, atque in Regnum tuum induceres. Inveniſti, quos quaeris; inveniſti nos, indeſeſſe Paſtor animarum noſtrarum. Ergo trahe nos poſt te, ſero quidem, ſed jam tandem ad te converſos, ac ingenti fiducia

cia sequentes te. Erit Angelis tuis majus gaudium, si nos jam a te averfos, iterumque ad pascua tua te miserante reductos, in Caelum atque in aeterna tabernacula tua excipient. Exaudi nos, Domine, exaudi. Intret oratio nostra in conspectu tuo. Nobis quoque, quamquam rebellibus olim tuis, aditus sit in Caelestem tuam Hierusalem, in quam jam Sancti tui invecti de multitudine miserationum tuarum gloriantur, & inebriantur ab ubertate domus tuae, perpetuo clamantes: Quam magna multitudo dulcedinis tuae, Domine, quam paraveras timentibus te! Adjuva nos, bone Jesu, salutaris pater: Cito ad nos veni, omnium Salvator, amantissime Jesu, & salvos fac nos in Regnum tuum. Tibi interea cum Patre & vivifico Spiritu sit gloria, honor, & imperium per infinita Saecula.

F I N I S.

APPEND



A P P E N D I X

SANCTI CAECILII CYPRIANI

OPUSCULUM DE MORTALITATE,

Anno Ch. CCLII. conscriptum, ad Fidelium solatium
heic recusum.

*Ex Editione Amstelodami, Anni M D C C. cum altera
Baluziana conlatum.*

*Inter calamitates
et in primis con-
siderandum, quod
prædictæ sunt.*



Tū apud plurimos vestrum, fratres dilectissimi, mens solida est, & fides firma, & anima devo-
ta, quæ ad præsentis Mortalitatæ copiam non
mouetur, sed tamquam petra fortis & stabilis tur-
bidos impetus Mundi, & violentos Seculi flu-
ctus frangit potius ipsa, nec frangitur, & tenta-
tionibus non vincitur, sed probatur: tamen quia
animadverto in Plebe quosdam vel imbecillitate animi, vel fi-
dei parvitate, vel dulcedine secularis vitæ, vel sexus molli-
tie, vel, quod majus est, veritatis errore, minus stare fortiter, nec
pectoris sui divinum atque invictum robur exerere: dissimulanda
res non fuit nec tacenda, quo minus, quantum nostra mediocritas
potest, vigore pleno, & sermone de Dominica lectione concepto,
delicatæ mentis ignavia comprimatur; & qui homo Dei & Christi
esse coepit, Deo & Christo dignus habeatur. Agnoscere enim se
debet, fratres dilectissimi, qui Deo militat, qui positus in caele-
stibus castris, divina jam spirat, ut ad procellas & turbines Mun-
di

Baluz. sperat.

di trepidatio nulla sit in nobis, nulla turbatio, quando haec ventura praedixerit Dominus providae vocis hortatu instruens, & docens, & praeparans, atque corroborans Ecclesiae suae Populum ad omnem tolerantiam futurorum, bella & fames & terrae motus & pestilentias per loca singula exurgere praecuntiavit & docuit. Et ne inopinatus nos, & novus rerum instantium metus quateret, magis ac magis in novissimis temporibus adversa crebrescere ante praemonuit. Fiunt ecce, quae dicta sunt; & quando fiunt, quae ante praedicta sunt, sequuntur & quaecumque promissa sunt, Dominus ipso pollicente & dicente: *Quum autem videritis haec omnia fieri, scitote quoniam in proximo est Regnum Dei.* Lucae XXI. 31.

Regnum Dei, fratres dilectissimi, esse coepit in proximo: praemium vitae, & gaudium salutis aeternae, & perpetua laetitia, & possessio Paradisi nuper amissa, Mundo transiente, jam veniunt. Jam terrenis Caelestia, & magna parvis, & caducis Aeterna succedunt. Quis heic anxietatis & sollicitudinis locus est? quis inter haec trepidus & moestus est, nisi cui spes & fides deest? Ejus est enim mortem timere, qui ad Christum nolit ire. Ejus est ad Christum nolle ire, qui se non credat cum Christo incipere Regnare. Scriptum est enim; *Iustum fide vivere.* Si iustus es, & fide vivis, si vere in Deum credis, cur non Cum Christo Futurus, & de Domini pollicitatione securus, quod Ad Christum Voceris, amplecteris, & quod Diabolo careas, gratularis? Simeon denique ille iustus, qui vere iustus fuit, qui fide plena Dei praecepta servavit, quum ei divinitus responsum fuisset, quod non ante moreretur, quam Christum vidisset, & Christus infans in Templum cum Matre venisset, agnovit in spiritu natum esse jam Christum, de quo sibi fuerat ante praedictum: quo viso scivit, se cito esse moriturum. Lactus itaque de morte jam proxima, & de vicina accersitione securus, accepit in manus puerum, & benedicens Dominum exclamavit, & dixit: *Nunc dimittis servum tuum, Domine, secundum verbum tuum in pace; quoniam viderunt oculi mei salutare tuum.* Luc. II. 29. Probens scilicet, atque contestans, tunc esse servis Dei pacem, tunc liberam, tunc tranquillam quietem, quando de istis Mundi turbinibus extracti, sedis & securitatis aeternae portum petimus, quando expuncta hac morte ad immortalitatem venimus.

Illam enim Nostra Pax, illa Fida Tranquillitas, illa stabilis & Firma & Perpetua Securitas. Ceterum quid aliud in Mundo, quam pugna adversus Diabolum quotidie geritur? quam adversus jacula ejus & tela consiliatationibus assiduus dignatur? Cum Amperplexanda fide Tranquillitas & perpetua Securitas.

avari-

avaritia nobis, cum impudicitia, cum ira, cum ambitione congressio est: cum carnalibus vitiis, cum illecebris secularibus assidua & molesta luctatio est. Obsessa mens hominis, & undique Diaboli infestatione vallata, vix occurrit singulis, vix resistit. Si avaritia prostrata est, exurgit libido: si libido compressa est, succedit ambitio: si ambitio contempta est, ira exasperat, inflat superbia, vinolentia invitat, invidia concordiam rumpit, amicitiam zelus abscindit. Cogaris maledicere, quod divina Lex prohibet. Compelleris jurare, quod non licet. Tot persecutiones animus quotidie patitur, tot periculis pectus urgetur, & delectat heic inter Diaboli gladios diu stare, quum magis concupiscendum sit & optandum ad Christum, subveniente velocius morte, properare, ipso instructe nos & dicente: *Amen amen dico vobis, quoniam vos plorabitis & plangetis, Seculum autem gaudebit. Vos tristes eritis, sed tristitia vestra in laetitiam veniet.* Quis non tristitia carere optet? quis non ad laetitiam venire festinet? Quando autem in laetitiam veniat nostra tristitia, Dominus denuo ipse declarat dicens: *Iterum Videbo vos, & gaudebit cor vestrum, & Gaudium Vestrum Nemo Auferet A Vobis.* Quum ergo Christum Videre, Gaudere sit, nec possit esse gaudium nostrum, nisi quum viderimus Christum: quae caecitas animi, quaeve dementia est, amare pressuras & poenas & lacrymas Mundi, & non festinare potius ad gaudium, quod numquam possit auferri?

Hoc autem fit, fratres dilectissimi, quia Fides deest; quia nemo credit vera esse, quae promittit Deus, qui verax est, cuius sermo credentibus aeternus & firmus est. Si tibi vir gravis & laudabilis aliquid polliceretur, haberes utique pollicenti fidem; nec te falli aut decipi ab eo crederes: quem stare in sermonibus atque in actibus suis scires. Nunc Deus tecum loquitur; & tu mente incredula perfidus fluctuas? Deus de hoc Mundo recedenti tibi Immortalitatem atque Aeternitatem pollicetur: & tu dubitas? Hoc est, Deum omnino non nosse. Hoc est, Christum credentium Dominum & magistrum peccato incredulitatis offendere. Hoc est, in Ecclesia constitutum fidem in domo fidei non habere. Quantum profit exire de Seculo, Christus ipse salutis atque utilitatis nostrae magister ostendit; qui quum Discipuli ejus contristarentur, quod se jam diceret recessurum, loquutus est ad eos dicens: *Sime dilexistis, gauderetis utique, quoniam vado ad Patrem;* docens scilicet & ostendens, quum cari, quos diligimus, de Seculo exeunt, gaudendum potius, quam dolendum,

Cujus

Johan. XVI. 20.

Johan. XVI. 22.

*Ex infidelitate
fit, quod mortem
adeo aversantur.*

Johan. XIV. 28.

Cujus rei memor beatus Apostolus Paulus in Epistola sua po- *Philippens. 1. 21.*
nit, & dicit: *Mibi vivere Christus est, & mori lucrum.* Lucrum
maximum computans, jam Seculi laqueis non teneri, jam nul-
lis peccatis & vitiis carnis obnoxium fieri: exemptum pressuris
angentibus, & venenatis Diaboli faucibus liberatum, Ad Lac-
titiā Salutis Aeternae, Christo vocante, Proficisci.

At enim quosdam movet, quod aequaliter cum Gentilibus *Inepta est querela*
Nostros morbi istius valetudo corripit: quasi ad hoc credide- *Christianorum,*
rit Christianus, ut immunis a contactu malorum, Mundo & *quod cum gentili-*
Seculo feliciter perfruatur, & non omnia heic adversa perpes- *bis plectantur.*
sus ad futuram Lactitiā reservetur. Movet quosdam, quod
sit nobis cum ceteris mortalitas ista communis. Quid enim
nobis in hoc Mundo non commune cum ceteris, quamdiu adhuc
secundum Legem primae nativitatis manet caro ista communis?
Quoadusque istic in Mundo sumus, cum genere humano carnis
aequalitate conjungimur, spiritu separamur. Itaque donec
corruptivum istud induat incorruptionem, & mortale hoc accipiat *1. ad Corinb. XP.*
immortalitatem, & spiritus nos perducatur ad Deum Patrem, *33. Baluz. Christus.*
quaecumque sunt carnis incommoda, sunt nobis cum humano
genere communia. Sic quum foetu sterili terra jejuna est, ne-
minem fames separat. Sic quum irruptione hostili civitas aliqua
possessa est, omnes simul captivitas vastat. Et quando imbrem
nubila serena suspendunt, omnibus siccitas una est. Et quum
navem scopulosa saxa constringunt, navigantibus naufragium si-
ne exceptione commune est. Et oculorum dolor, & impetus
febrium, & omnium valetudo membrorum, cum ceteris com-
munis est nobis, quamdiu portatur in Seculo caro ista commu-
nis. Quinimmo si qua conditione, qua lege crediderit Christia-
nus, noscat & teneat; sciet plus sibi, quam ceteris in Seculo
laborandum, cui magis sit cum Diaboli impugnatione luctandum.
Docet & praemonet Scriptura divina dicens: *Fili, accedens Ecclesiast. 11. 1.*
ad servitutem Dei, sta in iustitia & timore, & praepara ani-
ma tuam ad tentationem. Et iterum: *In dolore sustine, & in hu-*
milite tua patientiam habe; quoniam in igne probatur aurum
& argentum, Homines vero receptibiles in camino humiliationis.

Sic Job post rerum damna, post pignorum funera, vulneribus
quoque & vermibus graviter afflictus, non victus est, sed proba- *Job non magis pie-*
tus; qui in ipsis conflictationibus & doloribus suis patientiam re- *tate, quam calu-*
ligiosae mentis ostendens ait: *Nudus exivi de utero matris, nudus* *mizantibus notabi-*
etiā ibo sub terram. Dominus dedit, Dominus abstulit: sicut Do- *Job 1. 21.*
mino

T t

mino

mino visum est, ita factum est. Sit nomen Domini Benedictum. Et quum cum uxor quoque sua compelleret, ut vi doloris impatiens aliquid adversus Deum querula & invidiosa voce loqueretur, respondit & dixit: Tamquam una ex insipientibus mulieribus locuta es. Si bona suscepimus de manu Domini, mala cur non tolerabimur? In his omnibus, quae contigerunt ei, nihil peccavit Job labiis suis in conspectu Domini. Itaque illi Dominus Deus perhibet testimonium dicens: Animadvertisti puerum meum Job? non enim est similis illi quisquam in terris, homo sine querela, verus Dei cultor.

*Tob. 11. 14.
Pariter Tobias
acruminis exercita-
tus.*

Et Tobias post opera magnifica, post misericordiae suae multa & gloriosa praeconia, caecitatem luminis passus, timens & benedicens in adversis Deum, per ipsam corporis sui cladem crevit ad laudem; quem & ipsum uxor sua depravare tentavit, dicens: *Ubi sunt iustitiae tuae? ecce quae patieris. At ille circa timorem Dei stabilis & firmus, & ad omnem tolerantiam passionis fide religionis armatus, tentationi uxoris invalidae in dolore non cessit, sed magis Deum patientia maiore promeruit: quem postmodum Raphael Angelus collaudat, & dicit: Opera Dei revelare & confiteri honorificum est. Nam quando orabas tu, & Sarra nurus tua, ego obtuli memoriam orationis vestrae in conspectu claritatis Dei. Et quum sepelires tu mortuos simpliciter: & quia non es cunctatus exsurgere, & derelinquere prandium tuum, & abisti & condidisti mortuum: missus sum tentare te. Et iterum me misit Deus curare te; & Sarram nurum tuam. Ego enim sum Raphael unus ex septem Angelis sanctis; qui adsumus, & conversamur ante claritatem Dei.*

*Tolerantiam iusti
semper habuerunt;
ipse Abraham pa-
ter fidelium sen-
satus.*

Num. XVII. 10.

Psalm. LI. 17.

Deuter. VIII. 2.

Hanc tolerantiam iusti semper habuerunt: hanc Apostoli disciplinam de Domini lege tenuerunt; non musitare in adversis, sed quaecumque in Seculo accidunt, fortiter & patienter accipere; quum Judaeorum Populus hinc semper ostenderit, quod adversus Deum frequentius murmuraret. Sicut testatur in Numeris Dominus Deus, dicens: *Desinat murmuratio eorum a me, & non morientur.* Murmurandum non est in adversis, fratres dilectissimi: sed patienter & fortiter quidquid acciderit sustinendum, quum scriptum sit: *Sacrificium Deo spiritus contritus.* Cor contritum & humiliatum Deus non despiciat. In Deuteronomio quoque moneat per Moysen Spiritus Sanctus, & dicat: *Dominus Deus tuus vexabit te, & famem injiciet tibi, & cognoscetur*

fecerit in corde tuo, si bene custodieris praecepta ejus, siue non : Et iterum: *Tentat vos Dominus Deus vester, ut sciat, si diligitis Dominum Deum vestrum ex toto corde vestro, & ex tota anima vestra.* Sic Abraham Deo placuit, quia ut placeret Deo, nec amittere filium timuit, nec gerere parricidium recusavit. Qui filium non potes lege & forte mortalitatis amittere; quid faceres, si filium jubereris occidere?

XIII. 3.

Genes. XXII. 1.

Ad omnia te paratum facere timor Dei & fides debet. Sit licet rei familiaris amissio: sit de infestantibus morbis assidua membrorum & cruenta vexatio: sit de uxore, de liberis, de excedentibus caris funebribus & tristis avulsio. Non sint tibi scandala ista, sed proelia: nec debilitent aut frangant Christiani fidem, sed potius ostendant in colluctatione virtutem; quum contemnenda sit omnis injuria malorum praesentium fiducia futurorum bonorum. Nisi praeceperit pugna, non potest esse victoria: quum fuerit in pugnae congressione victoria, tunc datur vincentibus & corona. Navis gubernator in tempestate dignoscitur. In acie Miles probatur. Delicata jactatio est, quum periculum non est. Conflictatio in adversis probatio est veritatis. Arbor, quae alta radice fundata est, ventis incumbens non movetur; & navis, quae forti compage solida est, pulsatur fluctibus, nec foratur. Et quando area fruges terit, ventos grana fortia & robusta contemnunt, inanes palcae flatu portante rapiuntur. Sic & Apostolus Paulus post naufragia, post flagella, post carnis & corporis multa & gravia tormenta, non vexari, sed emendari se dicit adversis, ut dum gravius affligitur, verius probaretur: *Datur est mihi, inquit, stimulus carnis meae, angelus Satanæ, qui me colapbizet, ut non extollar. Propter quod ter Dominum rogavi, ut discederet a me; & dixit mihi: Sufficit tibi gratia mea. Nam Virtus in infirmitate perficitur.* Quando ergo infirmitas & imbecillitas & vastitas aliqua grassatur, tunc Virtus nostra perficitur: tunc Fides, si tentata persisterit, coronatur, sicut scriptum est: *Vasa figuli probat fornax, & homines iustos tentatio tribulationis.* Hoc denique inter nos, & ceteros interest, qui Deum nesciunt, quod illi in adversis queruntur & murmurant: nos adversa non avocant a Virtutis & Fidei veritate, sed corroborant in dolore. Hoc quod nunc corporis vires solutus in fluxum venter eviscerat: quod in faucium vulnera conceptus medullitus ignis exae-

Calamitates omnis generis, illustrant virtutis infirmitatem.

Secunda ad Cor. XII. 7.

Ecclesiast. XXVII. 5.

fluat: quod assiduo vomitu intestina quatiuntur: quod oculi vi sanguinis inardescunt: quod quorundam vel pedes, vel aliquae membrorum partes contagio morbidæ putredinis amputantur: quod per jacturas & damna corporum prorumpente languore vel debilitatur incessus, vel auditus obstruitur, vel caecatur ad specus, ad documentum proficit Fidei. Contra tot impetus vastationis & mortis, inconcussis animi virtutibus congregi, quanta pectoris magnitudo est, & quanta sublimitas, inter ruinas generis humani stare erectum, nec cum eis, quibus spes in Deum nulla est, jacere prostratum? Gratulari magis oportet, & temporis munus amplecti, quod dum nostram Fidem *firmi-* ter promimus, & labore tolerato ad Christum per angustam Christi viam pergitur, præmium vitæ ejus & fidei, ipso judicante, capiamus.

Saluz. fortiter.

Mors fortassis E-
thnicis timenda,
minime Christia-
nis.

Mori plane timeat, sed qui ex Aqua & Spiritu non renatus, Gehennæ Ignibus Mancipatur. Mori timeat, qui non Christi Cruce & Passione censetur. Mori timeat, qui ad Secundam Mortem de hac morte Transibit. Mori timeat, quem de Seculo Recedentem Perennibus Poenis Aeterna Flamma Torquebit. Mori timeat, cui hoc mora longiore confertur, ut Cruciatu Ejus & Gemitu interim differantur. Multi ex nostris in hac Mortalitate moriuntur, hoc est, multi ex nostris de Seculo liberantur. Mortalitas ista ut Judæis, & Gentilibus, & Christi hostibus pestis est, ita Dei Servis Salutaris Excessus Est. Hoc quod sine ullo discrimine generis humani cum injustis moriuntur & justis, non est, quod putetis bonis & malis interitum esse communem. Ad Refrigerium Justis Vocantur: Ad Supplicium Injusti Rapiuntur. Datur Velocius Tutela fidentibus, perfidis Poena. Improvidi & ingrati sumus, fratres dilectissimi, ad divina beneficia, nec quid nobis confertur, agnoscimus. Excedunt ecce in pace turæ cum gloria sua Virgines, venientis Antichristi minas & corruptelas & lupanaria non timentes. Pueri periculum lubricæ ætatis evadunt, ad continentiae atque innocentiae Præmium feliciter perveniunt. Tormenta jam non timet delicata Matrōna, metum persequutionis, & manus, cruciatuque carnificis, moriendi celeritate lacerata. Pavore mortalitatis & temporis accenduntur tepidi; constringuntur remissi; excitantur ignavi; desertores compelluntur, ut redeant; Gentiles cognuntur; muticæ; vetus fidelium Populus ad quietem vocatur; ad ætatem recens & copiosus exercitus robore

robore fortiore colligitur, pugnaturus sine metu mortis, quum proelium venerit, qui ad militiam tempore mortalitatis accedit.

Quid deinde illud, fratres dilectissimi, quale est, quam pertinens, quam necessarium, quod Pests ista & lues, quae horribilis & feralis videtur, explorat iustitiam singulorum? & mentes humani generis examinat, an infirmis serviant sani; an propinqui cognatos pie diligant; an misereantur servorum languentium domini; an deprecantes aegros non deserant Medici; an feroces violentiam suam comprimant; an rapaces avaritiae furentis insatiabilem semper ardorem vel metu mortis extinguant; an cervicem flectant superbi; an audaciam leniant improbi; an pereuntibus caris, vel sic aliquid divites indigentibus largiantur & donent sine herede morituri. Ut nihil aliud Mortalitas ista contulerit, hoc Christianis, & Dei servis plurimum praestitit, quod martyrium coepimus libenter appetere, dum mortem discimus non timere. Exercitia sunt nobis ista, non funera. Dant animo fortitudinis gloriam. Contemptu mortis Praeparant Ad Coronam.

*Multis de causis
causa est pestis.*

Sed fortasse aliquis opponat & dicat: Hoc me ergo in praesenti Mortalitate contristat, quod qui paratus ad Confessionem fueram, & ad Tolerantiam passionis toto me corde & plena virtute devoveram, Martyrio meo privor, dum morte praevenior. Primo in loco non est in tua potestate, sed in Dei dignatione Martyrium. Nec potes, te dicere perdidisse, quod nescis, an merearis accipere. Tunc deinde Deus scrutator renis & cordis, & occultorum contemplator & cognitor, videt te, & laudat & comprobatur; & qui perspicit, apud te paratam fuisse virtutem, reddet pro virtute mercedem. Numquid Cain, quum Deo munus offerret, iam peremerat fratrem? & tamen parricidium mente conceptum Deus providus ante damnavit. Ut illic cogitatio mala, & perniciofa conceptio, Deo providente prospecta est: ita & in Dei servis, apud quos confessio cogitatur, & Martyrium mente concipitur, animus ad bonum deditus Deo iudice coronatur. Aliud est enim Martyrio animum deesse; aliud animo defuisse Martyrium. Qualem te invenit Dominus, quum vocat, talem pariter & iudicat; quando ipse testetur & dicat: *Et scient* Apocalyps. II. 23. *omnes Ecclesiae, quia ego sum scrutator renis & cordis.* Nec enim Deus sanguinem nostrum, sed fidem quaerit. Nam nec Abraham, Baluz. nostri de-
nec Isaac, nec Jacob occisi sunt; & tamen fidei ac iustitiae meri-
fuerat.

*Nec hoc nomine
Pestis averfanda,
quod a Martyrio
excludat.*

Matth. VIII. 11. tis honorati, inter Patriarchas primi esse meruerunt: ad quorum Convivium congregatur quisquis fidelis & iustus & laudabilis invenitur.

Id unum nobis incumbit, ut ad Dei voluntatem nos componamus.

Meminisse debemus, voluntatem nos, non nostram, sed Dei facere debere, secundum quod nos Dominus quotidie iussit orare. Quam praeposterum est, quamque perversum, ut, quum Dei voluntatem fieri postulemus, quando evocat nos & accersit de hoc Mundo Deus, non statim voluntatis ejus imperio pareamus! Obnitimur & reluctamur, & pervicacium more servorum Ad Conspectum Domini cum tristitia & moerore Perducimur, exeuntes istinc necessitatis vinculo, non obsequio voluntatis: & volumus ab eo Praemiis Caelestibus Honorari, ad quem venimus inviti? Quid ergo oramus & petimus, Ut Advēniat Regnum Caelorum, si captivitas terrena delectat? Quid precibus frequenter iteratis rogamus & poscimus, ut acceleret Dies Regni, si majora desideria & vota potiora sunt servire istic Diabolo, Quam Regnare Cum Christo?

Notabilis historia mortis ejusdem Episcopi.

Denique ut manifestius divinae providentiae indicia clarescerent, quod Dominus praescius futurorum suis consulat ad veram Salutem: quum quidam de collegis & Confacerdotibus nostris jam infirmitate defessus, & de appropinquante morte sollicitus, commeatum sibi precaretur, adstitit deprecanti & jam paene morienti juvenis honore & majestate venerabilis, statu excelsus, & clarus adspectu: & quem adstantem sibi vix posset humanus adspectus oculis carnalibus intueri, nisi quod talem videre jam poterat de Seculo recessurus. Atque ille non sine quadam animi & vocis indignatione infremuit & dixit: *Pati timetis; exire non vultis. Quid faciam vobis?* Increpantis vox & monentis est; qui de persecutione sollicitus, de acersitione securis, non consentit ad praesens desiderium, sed consulit in futurum. Audivit frater noster & Collega moriturus, quod ceteris diceret. Nam qui moriturus audivit, ad hoc audivit, ut diceret: audivit non sibi ille, sed nobis. Nam quid sibi disceret jam recessurus? Didicit immo nobis remanentibus, ut dum Sacerdotem Dei, qui commeatum petebat, increpitum esse comperimus, quid cunctis expediat, agnosceremus.

Cypriano divinitus revelatum, ut contra mortis inuentum fratres amaret.

Nobis quoque ipsis minimis & extremis, quoties revelatum est, quam frequenter atque manifeste de Dei dignatione praecceptum est, ut testificaler assidue, & publice praedicarem, fratres

fratres nostros non esse lugendos accersitione Dominica de Seculo liberatos, quum sciamus non eos amitti, sed praemitti; recedentes praecedere, ut proficiscentes, ut navigantes solent; desiderari eos debere, non plangi: nec accipiendas esse heic atras vestes, quando Illi Ibi Indumenta Alba Jam Sumserint: occasionem dandam non esse Gentilibus, ut nos merito ac iure reprehendant, quod Quos Vivere Apud Deum dicimus, ut extinctos & perditos lugeamus; & fidem, quam sermone & voce depromimus, cordis & pectoris testimonio non probemus.

Spei nostrae ac Fidei praevaricatores sumus. Simulata, ficta, fucata videntur esse, quae dicimus. Nihil prodest, verbis praeferre Virtutem, & factis destruere Veritatem. Increpat denique Apostolus Paulus, & objurgat, & culpatur, si qui contristentur in excessu suorum. Nolumus, inquit, ignorare vos, fratres, de dormientibus, ut non contristemini, sicut & ceteri, qui Spem non habent. Si enim credimus, quia Jesus mortuus est, & resurrexit: sic & Deus Eor, Qui Dormierunt in Jesu, Adducet Cum Illo. Eos contristari dicit in excessu suorum, qui Spem non habent. Qui autem Spe vivimus, & in Deum credimus, & Christum passum esse pro nobis & resurrexisse confidimus, in Christo manentes, & per ipsum atque in ipso resurgentes: quid aut ipsi recedere istinc de Seculo nolumus, aut nostros recedentes quasi perditos plangimus ac dolemus? ipso Christo Domino & Deo nostro monente ac dicente: *Ego sum resurrectio & Vita*. *Johann. XL. 25.* *Qui credit in me, licet moriatur, Vivet. Et omnis, qui vivit & credit in me, non morietur in aeternum.* Si in Christum credimus, fidem verbis & promissis ejus habeamus: & non morituri in aeternum, Ad Christum, Cum Quo & Victuri & Regnaturi Semper Sumus, Laeta Securitate Veniamus. Quod interim morimur, ad Immortalitatem morte transgredimur. Nec potest Vita Aeterna succedere, nisi hinc contigerit exire. Non est exitus iste, sed transitus, & temporali itinere decurso, Ad Aeterna Transgressus. Quis Non Ad Meliora Festinet? Quis Non Mutari & Reformari Ad Christi Speciem, & Ad Caelestis Gratiae Dignitatem Venire Citius Exoptet? Paulo Apostolo praedicante: *Nostra autem Conversatio, inquit, In Caelis Est: unde & Dominum expectamus Jesum Christum, qui transformabit Corpus humilitatis nostrae, configuratum Corpori Claritatis suae.* Tales nos futuros & Christus Dominus pollicetur, quando Ut Cum Illo Simus, & Cum Illo In Aeternis Sedibus Vivamus, atque

Spei & Fidei praevaricatio est, mortem resurgere.

Prima ad Thimoth. IV. 12.

Baluz. transformari.
Baluz. Glorise.
Philippens. III. 20

atque In Regnis Caelestibus Gaudemus, Patrem pro nobis precatur, dicens: *Pater, quos mihi dedisti, Volo, Ut Ubi Ego Fuero, & Ipsi Sint Mecum, & Videant Claritatem, Quam Mihi Dedisti, prius quam Mundus fieret.*

*Iustissima gaudii
causae, quod mor-
tali intervntu
Christo jungatur
Fidelis.*

*Genes. V. 24. &
ad Hebr. XI. 5.*

Sapient. IV. 11.

Psal. LXXXIV.

*Quod etiam a
Mundi hostili in-
cursu liberetur
Fidelis.*

I. Johan. II. 15.

Venturus Ad Christi Sedem, Ad Regnorum Caelestium Claritatem, lugere non debet nec plangere: sed potius secundum pollicitationem Domini, secundum fidem veritatis, in professione hac sua & translatione gaudere. Sic denique invenimus & Enoch translatum esse, qui Deo placuit; sicut in Genesi testatur. & loquitur Scriptura divina: *Et placuit Enoch Deo, & non est inventus postmodum, quia Deus illum transulit.* Hoc fuit placuisse in conspectu Dei, de hoc contagio Seculi meruisse transferri. Sed & per Salomonem docet Spiritus Sanctus, eos, qui Deo placeant, maturius istinc eximi, & citius liberari, ne, dum in isto Mundo diutius immorantur, Mundi contactibus polluantur. *Raptus est, inquit, ne malitia mutaret intellectum illius. Placita enim erat Deo Anima ejus: propter hoc properavit educere eum de medio iniquitatis.* Sic & in Psalmis ad Dominum properat Spirituali fide Deo suo Anima devota, dicens: *Quam dilectissimae habitaciones tuae, Deus virtutum! Desiderat & properat Anima mea ad Atria Dei.* Ejus est, in Mundo diu velle remanere, quem Mundus oblectat, quem Seculum blandiens atque decipiens, illecebris terrenae voluptatis invitat.

Porro quum Mundus oderit Christianum; quid amas eum, qui te odit, & non magis sequeris Christum, qui te & redemit, & diligit? Johannes in Epistola sua clamat, & loquitur; & ne carnalia desideria sectantes, Mundum diligamus, hortatur: *Nolite, inquit, diligere Mundum, neque ea, quae in Mundo sunt. Si quis dilexerit Mundum, non est caritas Patris in illo: quia omne, quod in Mundo est, concupiscentia carnis est, & concupiscentia oculorum, & ambitio Seculi, quae non est a Patre, sed ex concupiscentia Mundi. Et Mundus transibit, & concupiscentia ejus. Qui autem fecerit voluntatem Dei, manet in aeternum, quomodo & Deus manet in aeternum.* Potius, fratres dilectissimi, mente integra, hinc firma, virtute robusta parati ad omnem voluntatem Dei sumus; pavore mortis excluso, immortalitatem, quae sequitur, cogitemus. Hoc nos ostendamus esse, quod credimus, ut neque carorum lugeamus excessum; & quum accersitionis propriae dies veniet, incunctanter & libenter ad Dominum ipso vocante Veniamus.

Quod

Quod quum semper faciendum fuerit Dei servis; nunc fieri multo magis debet, corridente jam Mundo, & malorum infestantium turbinibus obfesso; ut qui cernimus coepisse jam gravia, & scimus imminere graviora, lucrum maximum computemus, si istinc velocius recedamus. Si in habitaculo tuo parietes vetustate nutarent, tecta desuper tremerent, domus jam fatigata, jam lassâ, aedificiis senectute labentibus ruinam proximam minaretur, nonne omni celeritate migrares? Si navigante te, turbida & procellosa tempestas fluctibus violentius excitatis, praenuntiaret futura naufragia, nonne portum velociter pereres? Mundus ecce nutat & labitur, & ruinam sui non jam senectute rerum sed sine testatur: & tu non Deo gratias agis, non tibi gratularis, quod exitu maturiore substractus ruinis & naufragiis & plagis imminetibus exuaris?

Præsertim quum jam in fine Seculi mala gravissima impendant.

Considerandum est, fratres dilectissimi, & identidem cogitandum, renuntiasse nos Mundo, & tamquam hospites & peregrinos isthic interim degere. Amplectamur Diem, qui Assignat Singulos Domicilio Suo: Qui Nos istinc ereptos & laqueis secularibus exsolutos Paradiso Restituit & Regno Caelesti. Quis non peregre constitutus, properaret in Patriam Regredi? Quis non ad suos navigare festinans, ventum prosperum cupidius optaret, ut velocius caros liceret amplecti? Patriam Nostram Paradisum computemus, Parentes Patriarchas Habere Jam Coepimus. Quid non properamus & currimus, ut Patriam Nostram Videre, ut Parentes Salutare Possimus? Magnus Illic Nos carorum numerus exspectat; parentum, fratrum, filiorum frequens Nos & copiosa turba desiderat, jam de sua *Immortalitate* Secura, & adhuc de nostra salute sollicita. Ad horum conspectum & complexum venire, quantalibet illis & nobis in commune laetitia est! Qualis Illic Caelestium Regnorum Voluptas, sine timore moriendi, & Cum Aeternitate Vivendi! Quam Summa & Perpetua Felicitas! Illic Apostolorum Gloriosus Chorus. Illic Prophetarum Exultantium Numerus. Illic Martyrum Innumerabilis Populus, ob certaminis & passionis victoriam Coronatus. Triumphantes Illic Virgines, quae concupiscentiam carnis & corporis, continentiae robore subegerunt. Remunerati Misericordes, qui alimentis & largitionibus pauperum, justitiae opera fecerunt; qui Dominica praecepta servantes, ad Caelestes thesauros terrena patrimonia

Baptismate vorum animis nostris perpetuo deest obversari; noscum statu ad quem aubramus.

*Balog, Escolani-
tate.*

nia transfulerunt. Ad hos, fratres dilectissimi, avida cupiditate properemus; ut cum his Cito esse, Ut Cito Ad Christum Venire contingat, optemus. Hanc cogitationem nostram Deus videat, hoc propositum mentis & fidei Dominus Christus aspi-
 ciat: Daturus Eis Gloriam Suam Ampliora Praemia, quorum circa se fuerint desideria majora.

F I N I S.

005673907

